

唐 李延壽 撰





中 華 書 局

第

卷

六八至卷八〇(傳)

南史卷六十八

列傳第五十八

趙知禮 蔡景歷 子徵 宗元饒 韓子高

華皎

劉師知 謝岐 毛喜 沈君理 陸山才

之討 侍、太府卿,權知領軍 王僧辯論軍事,其文並知禮所製。 是恒侍左右,深被委任,當時計畫,莫不預焉。 一元景仲也,或薦之,引爲書記。 · 趙知禮字齊旦,天水隴西人也。 事。 及景平,授中書侍郎,封始平縣子。陳受命,位散騎常 知禮爲文贍速,每占授軍書,下筆便就,率皆稱旨。 父孝穆,梁候官令。 武帝征侯景,至白茅灣,上表於梁元帝及與 知禮涉獵文史,善書翰。 陳武帝 由

天嘉元年,進爵爲伯。 王琳平,授吳州刺史。 知禮沈靜有謀謨,每軍國大事,文帝輒令

聖書問之。 再遷右將軍,四領前軍將軍。 卒,贈侍中,諡曰忠。 子元恭嗣。三

南康 嗣 景歷少俊爽,有孝行,家貧好學,善尺牘,工草隸。 蔡景歷字茂世,濟陽考城人也。 王 會理 通,謀匡復,事泄被執,賊黨王偉保護之,獲免,因客游京口 祖點,梁尚書左戶侍郎。 爲海陽令,政有能名。 父大同,輕車岳陽王記室參 在侯景中,與

帝得書,甚加欽賞,卽日授征北府中記室參軍,仍領記室 侯景平,陳武帝鎭朱方,素聞其名,以書要之。 景歷對使人答書,筆不停綴,文無所改。

之。 畢,召令草檄,景歷援筆立成,辭義感激,事皆稱旨。 承聖中,還掌記室。 **衡陽獻王昌爲吳興太守,帝以鄕里父老,尊卑有數,恐昌年少接對乖禮,** 武帝將討王僧辯,獨與侯安都等數人謀之,景歷弗之知。 及受禪,遷祕書監、中書通事舍人,掌 乃遺景歷輔 部分旣

三年,武帝 |永定二年,坐妻弟受周寶安餉馬,爲御史中丞沈炯所劾,降爲中書侍郎,舍人如故。 崩。 時外有强寇,文帝鎭南皖,朝無重臣,宣后呼景歷及江大權 、杜稜定議,

景歷躬共宦者及內人密營斂服,時旣暑熱,須營梓宮,恐斤斧之聲聞

秘不發喪,疾召文帝。

外, 乃以蠟 爲秘器,文詔依舊宣行

侯安都,景歷勸成其事,以功遷太子左衞率,進爵爲侯, 文帝. 即位,復爲祕 書監, 舍人如故。 以定策功,封新豐縣子。 常侍、舍人如故。 累遷散騎常侍。 坐妻兄劉洽依 文帝 倚

景歷權勢前後姦詭,〔三并受歐陽威餉絹 百匹,発官

華皎反,以景歷爲武勝將軍、吳明徹軍司。 皎平,明徹於軍中輒戮安成內史楊文通 叉

受降人馬仗有不分明,景歷又坐不能匡正被收。 **外之獲宥**

臣,不加深罪,出爲豫章內史。 意 河南, 太建五年,都督吳明徹北侵,所向剋捷,大破周梁士彥於呂梁,方進 宣帝卽位,累遷通直散騎常侍、中書通事舍人,掌詔誥,仍復封邑。 以爲指麾可定,景歷稱師老將驕,不宜過窮遠略。 未行,為飛章所劾,以在省之日,贓汚狼籍,帝令有司案問, 帝惡其沮衆, 圍彭城。 大怒, **婚以朝廷舊** 時宣帝

銳

景歷但承其半。 於是御史中丞宗元饒奏免景歷所居官,徙居會稽

侍、兼御史中丞,復本爵封,入守度支尚書。 及吳明徹敗,帝追憶景歷前言,即日追還,以爲征南 舊式拜官在午後,景歷拜日,適逢輿駕幸玄武 鄱陽王諮議。 數日,遷員 外散騎常

觀,在位皆侍宴,帝恐景歷不預,特令早拜,其見重 如 此。

卒官、贈太常卿、諡 日敬。 十三年,改葬, 重贈中領軍。 顧明元年,配享武帝廟庭。

年, 車駕 親 幸其宅,重 贈景歷侍中、中撫將軍、四諡 日忠敬、 ,給鼓吹一部,於墓所 立碑

景 大權字伯謀,濟陽考城 歷 屬文,不尚 雕靡,而 長 人,位少 於敍 事、應 府 対 機 四 敏 會縣伯。 速,爲當時所稱。 太建二年,卒於通 有 文 集三十卷。 直散 騎 常侍。 子徴 嗣。

歷以其 憂, 居喪 徴字 有 如 希祥, 王 成 ||祥之性,更名字焉 人禮 幼聰敏、精識强記。 繼 母 劉氏, 性 悍 忌,視之不以道,徵供侍益謹,初 年六歲,詣梁吏部尚書河南褚翔,嗟其穎悟。 無怨 色。 徵 本名覽,景 七歲 1 母

獲 従 部 古今得喪及當 知 直 趸 中 曲 撰 襲封 書 Ŧ. 陳 徴 武 令 禮 善 新豐侯。 帝 事 撫 o 中 爲 卹 時 後 南 書 ·, 得 徐 政 主器其才 清 至德 務。 州 簡 物情,旬月之 無 中,位太子 召補 事 叉 幹、任 ,或 敕 迎主簿, 以 云 廷尉 徴 間,衆近 寄 中 有 日 寺獄, ·庶子、 :怨言, 尋授 重 0 太學博士。 遷 中 事 萬。 後主 吏 無 書舍人, 部 大小, 位 聞之大怒, 尚書, 望旣 掌詔 太建 取 重,兼聲位 毎 徴 十日日 誥。 中, 議 收奪 決。 累遷太子中舍人, 尋授. 人馬, 往東宮, | 熏灼 俄 敕 左 遺徴 戸尙 物物 將誅 議 於皇太子 收募 書,與 之, 咸忌憚之。 兵 左右致 僕 兼東宮領 士 前 射 自 論 江 尋 爲 述 總

順 明三年,至隋軍濟江,後主以徵有幹用,令權知中領軍事。 徵日夜勤苦,備盡心力,

後主 |嘉焉,謂曰:「事寧有以相報」。 及決戰於鍾山南岡,敕徵守宮城西北大營,尋令督衆軍

戰事。陳亡,隨例入長安。

風俗, 構之功,宜且如啓,拜訖卽追還。」徵不修廉隅,皆此類也 鼓吹,後主謂所司曰:「鼓吹軍樂,有功乃授,蔡徵不自量揆,紊我朝章。 |徴美容儀,有口辯,多所詳究。 山川土地、問無不對。然性頗便佞進取、不能以退素自業。 至於士流官宦,陳宗戚屬,及當朝制度,憲章儀軌,戶口 初拜吏部尚書,啓後主 然其父景歷旣 有締 借

曹郎,轉給事郎,卒。 隋文帝聞其敏贍,召見顧問,言輒會旨。 子翼,位司徒屬。 入隋,爲東宮學士。 然累年不調,久之,除太常丞。 歷尚書戶部儀

府 初建,元饒與沛 宗元饒,南郡 江陵 國劉 人也。 師 知 同 少好學,以孝聞。 爲主簿。 陳武帝受禪,稍遷廷尉卿、尚書左丞。 仕梁爲征南府外兵參軍。 及司 宣帝初,軍 徒王僧辯 或

務廣,事無巨細,一以咨之,「弘臺省號 遷御史中丞,知五禮事。 時合州刺史陳襃贓汚狼籍,遣使就渚斂魚,又令人於六郡乞 爲稱職

米,百姓甚苦之,元饒劾奏発之。 吳興太守武陵王伯禮、豫章內史南康嗣王方泰等,驕蹇放

列傳第五十八 宗元饒

一六六四

横,元饒案奏,皆見削黜。 年,拯救乏絕,百姓甚賴焉。 及於名敎不足者,隨事糾正,多所裨益。 元饒性公平,善持法,諳曉故事,明練政體,吏有犯法,政不便時, 以課最入朝,詔加散騎常侍。 遷南康內史,以秩米三千餘斛助人租 後為吏部尚書,卒。 課,存問高

嘗離左右。 **高恒會意旨。稍長,習騎射,頗有膽決,願爲將帥。** 我乎。」子高許諾。子高本名蠻子,帝改名之。 年十六,爲總角,容貌美麗,狀似婦人,於淮渚附部伍寄載欲還鄉里,文帝見而問曰:「能事 韓子高,會稽山陰人也。 家本微賤。侯景之亂,寓都下。 性恭謹,恒執備身刀及傳酒炙。 及平杜龕,配以士卒。文帝甚愛之,未 景平,陳文帝出守吳興,子高 帝性急,子

帝嘗夢騎馬登山,路危欲墮,子高推捧而升。

城,文帝自北門出,倉卒闇夕,軍人擾亂,唯子高在側。 彪奔松山,[刊]浙東平。 反命酬答,於闇中又往慰勞衆軍。 文帝之討張彪也,沈泰等先降,帝據有州城,周文育鎭北郭香巖寺,張彪自剡縣夜還襲 文帝乃分麾下多配子高,子高亦輕財禮士,歸之者甚衆。 文帝散兵稍集,子高引入文育營,因共立栅。 文帝乃遣子高自亂兵中往見文育, 明日敗彪,

文帝嗣位,除右軍將軍,封文招縣子。 及王琳平,子高所統益多,將士依附之,其有所

論 進,帝皆任使焉。 天嘉六年,爲右衞將軍。 文帝不豫,入侍醫藥。

武 衡 在位議立皇太子,子高預焉,執送延尉。其夕與到仲舉同賜死。 、廣諸鎭。 廢帝即位,加散騎常侍。 光大元年八月,前上虞縣令陸昉及子高軍主告其謀反,宣帝在尚書省,因召文 宣帝入輔,子高兵權過重,深不自安,好參訪臺閣,又求出爲 父延慶及子弟並原宥。

偉。 事,深見委任。 華皎, 陳武帝南下,文帝 晉陵暨陽人也。 及文帝平杜龕,仍配以甲兵。 爲景所囚,皎遇文帝甚厚。及景平, 世爲小吏。 皎梁代爲尚書比部令史。 御下分明,善於撫接,解衣推食,多少必均。 文帝爲吳興太守,以皎爲都錄 侯景之亂,事景之黨王

天嘉元年,封懷仁縣伯。

爲 侯,仍授都督 王琳東下 ,皎隨侯瑱拒之。 湘 州 刺史。 皎起自下 琳平,知江州事。 ·吏,善營產業, 後隨都督吳明徹征周迪,迪平,以功進爵 又征川洞,多致鲖 鼓及生口, 並

下。廢帝卽位,改封重安縣公。

韓子 高 誅 後,皎內 不 自安, 光大元年,密啓求廣州,以觀時主意。 宣帝偽許之,而詔書

未出。 兵襲之。 五萬,乘大艦繼之。 皎亦遣使引周兵, 又崇奉梁明帝, 士馬甚盛。 慮皎先發,乃前遣明徹率衆三萬,乘金翅直趣郢州,又遣撫軍大將軍淳于量率衆 詔乃以吳明徹爲湘州刺史,實欲以輕

恐上流宰守並爲皎扇惑,乃下詔曲赦湘、巴二州,其賊主帥節將,並許開恩出首。 俗、桂陽太守曹宣、湘東太守錢明、並隸於皎。又長沙太守曹慶等本隸皎下,因爲之用。 州 時梁明帝遣水軍爲皎聲援,周武帝遣衞公宇文直頓魯山,又遣柱國長湖公元定攻圍郢 梁明帝授皎司空,巴州刺史戴僧朔、衡陽內史任蠻奴、巴陵內史潘智虔、岳陽太守章昭

奴、章昭裕、曹宣、劉廣業獲免。 渡,步趣巴陵,巴陵城已爲陳軍所據,乃降,送于建鄴。 | 皎以大艦載薪,因風放火,俄而風轉自焚,皎大敗,乃與| 戴僧朔奔江陵。 | 元定等無復船 **皎遂終於江陵,其黨並誅,唯任蠻**

劉 師 知,沛國相人也。 家本素族。 祖奚之,齊淮南太守,以善政聞。 父景彦,梁司

農卿。

師 知本名師智,以與敬帝諱同,改焉。 好學,有當務才,博涉書傳,工文筆,善儀體,臺

闕 閣 故 武 事 帝 ', 多 爲 所 派 詳 相 悉。 及 加 紹 九 泰 錫 並 初 、陳武 受禪 ,其 帝 入輔 儀 注 一以師 多 師 知 知 所定 爲中 書舍 人, 掌 詔 誥。 時兵 亂 朝 儀 多

目 陳霸 **事已了。**」 敬 先反。 帝 在 一
武
帝 內殿, 我 本 日 亦 師 須 知 卿 作 常 乃忠 天子, 侍 左 於 右。 我, 何 意 後 及 見殺 莫復 將 加 爾。 害, 師 知 師知 師 執 知 帝 詐 不 衣 帝 對 令出 行 武 事 帝 者 帝 受 加 覺 命 刃 ٠, 遶 焉 仍 牀 兼 旣 走曰:「 舍 而 人。 報 師 陳 性 武 知 疏

簡 服 導 非 備 著 宜 同 玉 鎧 服 路 衰 引 師 有 關 與物 者 吉 成 邪 絰 知 及 不 武 服 異, 凶 議 多件 爱 此 師 帝崩, 同 與梓 從靈 及 此 知 今謂: 博 時 武 卽 議 雖 以二 士 輿 賁 宫 云 可 六 議。 位 梓 者 部 擬 鼓 日 議 宦 宫 儀 伍 旣 成服 謝 吹 不 靈 不 服 有 愚 稱 同 遷, 展 岐 執 成服 謂 無 何 議 差 蓋 六 時 而 共 變,從梓宮者皆 功 日 別 啓 日 本 朝 在 任 奉 成 臣 西階 取 遇 備 車 靈 甚 若言文物並 服 左 共 喪禮。 筵袝 ٠, 俠 議 丞 重 並 稱 一其所 徐陵 大 是吉服, 宗 爲 靈 行 案 成服 座 服 廟 皇帝靈 決 梁 獻 直 須 吉,司 斷 梓 亦 昭 替 衰 服 Ξ 宮 1,皆有 明 衰 座 無鹵簿,直 爱至 陵云:「案山陵 剂 太子 事 絰 俠 山 者 御 弘 士 陵, 中書舍人蔡景歷、江 俠 薨,成服 凶 禮 人 益 公御獨 豊 衣 實 是爱 悉 容 服吉凶 如 爲衰經? 口 袵 鹵 ,俠侍之官,悉著衰 左 自 此 簿吉 丞 絰 胥 制 之制 議 而 吏, 部伍 (元) 此 奉 若言 華 上 自 博 至王 蓋 德 是 但 中, 公卿 藻 衰 Щ <u>{</u>Ц 沈 公 陵 陵 公,四海 謝 衣 胥 卿 文 之儀, 鹵 阿 以 岐 吏 丽 升 並 下 等 唯 議

列

傳

能決,乃具錄二議奏聞,上從師知議。 答云:「老病屬纊,不能多說。古人爭議,多成怨府,傅玄見尤於晉代,王商取陷於漢朝。謹 衞,最是近官,反鳴玉紆靑,與平吉不異?左丞旣推以山陵事,愚意或謂與成服有殊。」|陵重 之內,必備衰絰。案梁昭明太子薨,略是成例,豈容凡百士庶,悉皆服重,[10]而侍中至於武 自三緘,敬同高命。若萬一不死,猶得展言,庶與羣賢,更申揚榷。」文阿猶執所見,衆議不

帝不豫,師知與尚書僕射到仲舉等入侍醫藥。帝崩,豫顧命。宣帝入輔,師知與仲舉等遣 舍人殷不佞矯詔令宣帝還東府、自己事覺、於北獄賜死。 初,文帝敕師知撰起居注,自永定二年秋至天嘉元年爲十卷。 遷鴻臚卿,舍人如故。 天嘉元年,坐事免。 尋起爲中書舍人,復掌詔誥。 天康元年,文

謝岐,會稽山陰人也。父達,梁太學博士。

曆,庶事委之。

彪每征討,恒留岐監郡知後事。

彪敗,陳武帝引參機密,爲兼尚書右丞。時 軍旅屢興,糧儲多闕,岐所在幹理,深被知遇。 岐 少機警,好學,仕梁爲山陰令。侯景亂,流寓東陽。景平,依于張彪。彪在吳郡及會 永定元年,爲給事黃門侍郎、中書舍人,兼右

丞如故。天嘉二年卒,贈通直散騎常侍。

弟嶠,篤學,爲通儒。

毛喜字伯武,滎陽陽武人也。 祖稱,梁散騎侍郎。父栖忠,中權司馬

詞也。 天嘉三年至都,宣帝時爲驃騎將軍,仍以喜爲府諮議參軍,領中記室,府朝文翰, 及梁元帝卽位,以宣帝爲領直,喜爲尚書功論侍郎。及魏平江陵,喜與宣帝 以家屬爲請。 文帝卽位,喜自周還,進和好之策,陳朝乃遣周弘正等通聘。 喜少好學,善草隸。陳武帝素知之。 周冢宰宇文護執唐手曰:「能結二國之好者,卿也。」仍迎柳皇后及後主還 及鎭京口,命喜與宣帝往江陵,仍敕宣帝諮禀之。 及宣帝反國,又遣喜入周, 俱遷長安。 皆喜

自古名賢杜叔英、虞叔卿等二十餘人以啓之,文帝稱善。 文帝嘗謂宣帝曰:「我諸子皆以『伯』爲名,汝諸子宜用『叔』爲稱。」宣帝以訪喜,喜卽條

懼,無敢厝言。 文帝崩,廢帝沖昧,宣帝錄尚書輔政,僕射到仲舉等矯太后令,遣宣帝還東府, 喜卽馳 入,謂宣帝曰:「今日之言,必非太后之意,宗社 .至重,願加三思。」竟 當

如其策。

委前 炭, 使修器甲。」宣帝曰:「子高卽欲收執,何更如是。」喜曰:「山陵始畢,邊寇尙多,而 「朝,名爲杖順,宜推心安誘,使不自疑,圖之一壯士之力耳。」宣帝卒行其計。 右 衞 將軍韓子高始與仲舉通謀,其事未發,喜謂宣帝曰:「宜簡人馬配與子高,幷賜 子高

陽三王 田,上 條、韶頒天下,文多不載。 及帝卽位,除給事黃門侍郎,兼中書舍人,典軍國機密。 親 與緬案圖指畫,其見重如此。 論定策功,封東昌縣侯, 歷位御史中 丞,五兵尚書,參掌選事 以太子右衞率、右將軍行江 太夫人, 宣帝議北侵,敕喜撰軍制十三 遣員 外散騎常侍 杜 夏、武陵、桂 緬 品 其

爲 淮左新平,邊 及得淮南之地,喜陳安邊之術,宣帝納之,即日 人未輯,周氏始吞齊國 一,難 與爭鋒,未若安人保境,斯久長之術也」。 施行。 帝又欲進兵彭、汴,以問喜,喜以

從。吳明徹卒俘于周。

喜後 歷 丹 陽 尹 , 東部 尚書。 及宣帝崩,叔陵構逆,敕中庶子陸瓊宣旨,令南北諸軍皆

喜處分。賊平,加侍中。

不用喜計,遂令至此。」由是益見親重,喜乃言無回避。 初 门宣帝 委政於喜,喜數 有諫爭,事 並 見從。 自明徹敗後,帝深悔不用其言,謂袁 時皇太子好酒德,每共親幸人爲 憲曰:

|喜言心疾,仆于階下,移出省中。 總以下,展樂賦詩,醉酣而 長夜之宴,喜嘗言之宣帝,太子遂銜之,即位後稍見疏遠。 曰:「終不爲官用,願 歡宴,非我所爲耳。」乃與 如聖旨。」傅縡爭之曰:「若許報讎,欲置先皇何地。」後主曰:「當與一 ·司馬申謀曰:「此人負氣,吾欲將乞鄱陽兄弟,聽其報讎,可乎。」 命喜。 于時 後主醒,乃謂江總曰:「我悔召毛喜, 山陵初畢,未及踰年,喜見之不懌,欲諫而 及被始興王傷,創愈, 知其無病, 後主已醉 但欲阻我 置酒引江 小 對

明元 舉 兵反,郡與豐州 (年)徵爲光祿大夫,領左驍騎將軍,道卒。 至德元年,授永嘉 接, 而素無備,喜乃修城隍器械,又遺兵援建安。 、內史。 喜至郡,不受奉秩,政弘清靜,人吏安之。 有集十卷。 子處沖嗣 賊平,授南安內史。 遇豐州 刺史章大寶 頄

郡,勿令見人事耳。」

沈 君 理 字 仲倫 一、吳興 人也。 祖僧畟,梁左戶尚書。 父巡,元帝時位少府卿。 魏平荆州

梁宣帝署金紫光祿大夫。

注。 及帝受禪,拜駙馬都尉,封永安亭侯,爲吳郡太守。 理 美風 儀,博涉有 識 陳武帝鎮南徐州 巡遣 君理致謁,深見器重,命尚 時兵革未寧, 百姓荒弊, 會稽 君理 總集 長公

列

士卒,修飾器械,深以幹理見稱。

州迎柩。 文帝嗣位,累遷左戶尙書。 朝議以在位重臣,難令出境,乃遣長兄君嚴往焉。 天嘉六年,爲東陽太守。 天康元年,以父憂去職,自請往荆 及還,將葬,韶贈巡侍中、領軍

將軍、諡曰敬子。

太建中,歷位太子詹事,吏部尚書。 宣帝以君理女爲皇太子妃,賜爵望蔡縣侯,位侍

中、尚書右僕射。 卒,贈翊左將軍、開府儀同三司,諡曰貞憲。 君理弟君高、君公。

君高字季高,少知名,性剛直,有吏能。 位衞尉卿,平越中郎將、都督、廣州刺史,甚得

人和。卒,諡祁子。

君公博學有才辯,善談論,後主深器之。 君公自梁元帝敗後,常在江陵。 顧明中,與蕭瓛、蕭巖叛隋歸陳,後主擢爲太子詹事 陳亡入隋,文帝以其叛亡,命斬于建康

君理第五叔邁,[15]亦方正有幹局,位通直散騎常侍,侍東宮。

陸山才字孔章,吳郡吳人也。 祖翁寶、梁尚書水部郎。 父汎,中散大夫。

山才倜儻,好尙文史,范陽張纘、纘弟綰並欽重之。

宜也。 職。 才獲反。累遷度支尚書,坐侍宴與蔡景歷言語過差,爲有司所奏,免官。 闕,見忌新主,謀人之義,可無愼哉;然晚遇誅夷,非其過也。 涉便佞,貞介所羞。 西陽、武昌二郡太守。卒,諡曰簡子。 剋蕭勃, 紹泰 若乃校其才用,理不同年,而卒能膺務濟時,蓋其遇也。 論曰:趙知禮、蔡景歷屬陳武經綸之日,居文房書記之任,此乃宋、齊之初傅亮、王儉之 文育爲熊曇朗所害,曇朗囚山才等,送于王琳。 華皎經綸云始,旣 中, 禽歐陽頗,計畫多出山才。 都督周文育出鎭南豫州,不知書疏,以山才爲長史,政事悉以委之。文育南 元饒始終任遇,無虧公道,名位自卒,其殆優乎。 ,蹈元功,殷憂之辰,自同勁草,雖致奔敗,未足爲非。 後文育重鎭豫章金口,山才復爲鎭南長史、豫章 未至,而侯安都敗琳將常衆愛,由是山 希祥勞臣之子,才名自致,迹 毛喜逢時遇主,好謀而成,見 子高權重爲戮,亦其 **尋授散騎常侍,遷** 師知送往多

廢昏朝,不致公輔,惜矣。

沈、陸所以見重、固亦雅望之所致焉。

校勘記

- <! | 再遷右將軍 「右將軍」陳書作「右衞將軍」。</p>
- [二]子元恭嗣 「元恭」陳書作「允恭」。
- = 坐妻兄劉洽依倚景歷權勢前後姦詭 「劉洽」各本作「劉裕」,據陳書改。 按此或因當時習聞劉
- 124 重 贈景歷侍中中撫將軍 「中撫將軍」各本作「中撫 軍將軍」,據陳書删

裕之名致誤,宋陳相去未遠,當無命名與之相同者。

又各本脫「勢」字,據陳書補

- 五 禎 明三年 「三年」各本作「二年」,據陳書改。 按隋師濟江、陳亡、事 在順明三年。
- ベ 事 無巨細 以咨之 「咨」各本作「貫」、據陳書改、通志作「責」。
- [4] 彪奔松山 「松山」張彪傳作「若邪山」。
- 人 山 爱及武賁鼓吹執蓋奉車並是吉服 「武賁」本字「虎賁」,此避唐諱改。
- ታኄ 靈筵祔宗廟梓宮祔 山陵實 如 左 丞 議 「耐山陵」各本作 「還山陵」, 據陳書改。 按陳書備載陵議

本爲「祔山陵」。 左丞,指徐陵。

- 豈容凡百士庶悉皆服重 「皆」各本作「此日」二字,據陳書 改。
- 令宣帝還 東府 「東」字各本並脫,據陳書補。 按後毛喜傳亦作「令宣帝還東府」,明此脫文。
- 以太子右衞率右將軍行江夏武陵桂陽三王府國事 「右將軍」陳書作「右衞將軍」。

名。君理父名巡,叔名邁,字並從辵。

南史卷六十九

列傳第五十九

沈 炯 虞荔 弟寄 傅縡 章華 顧野王 蕭濟 姚察

帝南 並殺之,炯弟攜 檄軍書,皆出於炯。 才,終逼之令掌書記。 怒,命斬之。 入援建鄴,以炯監郡。 下,與僧辯 沈炯字初明,[]吳興武康人也。 炯少有儁才, **炯解衣將就戮,礙於路間桑樹,乃更牽往他所,或救之,僅而獲免。** 其 會白茅灣,登壇設盟,炯爲其文。 母逃免。 爲當時所重。 及簡文遇害,四方岳牧上表勸進,僧辯令炯制表,當時莫有逮者。 及子仙敗,王僧辯素聞其名,軍中購得之,酬所獲者錢十萬,自是羽 臺城陷,景將宋子仙據吳興,使召炯,方委以書記,炯辭 侯景平,梁元帝愍其妻子嬰戮,特封原鄉侯。 仕梁爲尚書左戶侍郎、吳令。 祖瑀,梁尋陽太守。 及景東奔,至吳郡,獲炯妻虞氏及子行簡 **父續,王府記室參軍。** 侯景之難,吳郡太守袁君正 僧辯爲司徒,以炯 以疾, 子仙 愛其 子仙

1 六七七

列

傅

第

Б.

+

九

沈炯

爲從事中郎。梁元帝徵爲給事黃門侍郎,領尙書左丞。

掃 無所交接。 魏 剋 荆州 時有文章,隨卽棄毀,不令流布 被虜,甚見禮遇,授儀同三司。 以 母 在 東,恒思歸國,恐以文才被留,閉門却

不 仰 聞 道 跡,帶陵阜 海 有魯遂荒,大庭之跡無泯。 惜 煙 故實,竊有 浦 窮晏駕,甲 放 霞 禮 嘗 了伏增 卿還,幾時可至。」少 獨行經漢武通天臺,爲表奏之,陳己思鄕之意。 日 而 觀 愚心。 · 悽戀。」 芒芒,羈旅縲臣,豈不落淚。 帳 而 珠簾,一朝零落,茂陵玉 稱功,橫中流於汾河,指栢梁而 奏訖,其夜夢有宮禁之所 黍稷非馨,敢望徼福。 日 伏惟陛下降德猗蘭,纂靈豐谷,漢道旣登,神仙 ,便與王克等並獲東歸。 盌, 昔承明見厭,嚴助東歸,駟馬可 但雀臺之弔,空愴魏君,雍丘之祠 逐出 ,兵衞甚嚴,炯便以情事陳 高宴,何其甚樂,豈不然歟!旣而 人間。 歷 曰「臣聞橋山雖掩、鼎湖 陵雲故基,與原 司農 卿,御史中丞。 訴。 田 乘, 可望。 而膴 聞 ,未光夏后,瞻 長卿西反,恭 有 膴, 之竈 運屬上僊, 人言:「甚 射之罘於 別風 岢祠; 餘

敕 所 由 陳 武 相 帝受禪,加通直散騎常侍。 迎 尊累,使卿公私 無廢也。」 表求 歸養,詔 不 許。 文帝嗣位,又表 求 去,韶答曰:

寇 大雷 初 ,留異擁據東境,帝欲使炯因是立功,乃解中丞,加明威將軍,遣還鄉里,收徒衆。 稱炯宜居王佐,軍 國大政,多預謀謨。 文帝又重其才,欲寵貴之。 會王琳入 以

虞荔字山披, 會稽餘姚人也。 祖權, 梁廷尉卿、 永嘉太守。 父檢, 平北始興王諮議

參軍。

容拜謁。」王以荔有高尚之志,雅相欽重,還郡,卽辟爲主簿,荔又辭以年小不就。 風儀,博覽墳籍,善屬文。 仕梁為西中郎法曹外兵參軍,兼丹陽詔獄正 又嘗詣徵士何胤,時太守衡陽王亦造之,胤言於王,王欲見荔,荔辭曰:「未有板刺,無 荔幼聰敏,有志操。年九歲,隨從伯闡候太常陸倕,倕問五經十事,荔對無遺失,倕甚異 及長,美

顧協泊然靜退,居于西省,但以文史見知。尋領大著作。 文郎,遷通直散騎侍郎,兼中書舍人。時左右之任,多參權軸,內外機務,互有帶掌,唯滿與 梁武帝於城西置士林館,荔乃制碑奏上,帝命勒之于館,仍用荔爲士林學士。 尋爲司

及侯景之亂,荔率親屬入臺,除鎭西諮議參軍,舍人如故。回臺城陷,逃歸鄉里。

平,元帝徵爲中書侍郎。貞陽侯僭位,授揚州別駕,並不就

張彪之據會稽,荔時在焉。 及文帝平彪,武帝及文帝並書招之,迫切不得已,乃應命至

列傳第五十九 處荔

都,而武帝崩,文帝嗣位,除太子中庶子,仍侍太子讀。 尋領大著作。

任遇隆重,而居止儉素,淡然無營。 初,荔母隨荔入臺,卒於臺內,尋而城陷,情禮不申,由是終身蔬食布衣,不聽音樂。 文帝深器之,常引在左右, 朝夕顧訪。 荔性沈密, 雖

論,凡所獻替,莫有見其際者。

於道。 省。 送,當時榮之。子世基、世南,並少知名。 情甚切,他人豈知。」乃敕寶應求寄,寶應終不遣。「荔因以感疾,帝欲數往臨視,令將家口 荔以禁中非私居之所,乞停城外,帝不許,乃令住蘭臺。 第二弟寄,寓于閩中,依陳寶應,荔每言之輒流涕。文帝哀而謂曰:「我亦有弟在遠,此 又以蔬食積久,非羸疾所堪,乃敕曰:「卿年事已多,氣力稍減,方欲仗委,良須克壯。 卒,贈侍中,諡曰德子。 乘輿再三臨問,手敕中使相 及喪柩還鄉里,上親出臨 望

常侍。 應聲曰:「文字不辨,豈得非愚」。客大慚。入謂其父:「此子非常人,文舉之對,不是過也。」 寄字次安,少聰敏。 及長,好學,善屬文。 大同中、嘗驟雨、殿前往往有雜色寶珠、梁武觀之、甚有喜色、寄因上瑞雨頌。 年數歲,客有造其父,遇寄於門,嘲曰:「郎子姓處,必當無智。」寄 性沖靜,有栖遁志。 弱冠舉秀才,對策高第。 起家梁宣 城王國左 帝謂

爲中 寄兄荔曰:「此頌典裁清拔、卿之士龍也、將如何擢用。」寄聞之歎曰:「美盛德之形容,以申 擊壤之情耳,吾豈買名求仕者乎。」乃閉門稱疾, 記室,領郡五官掾。 在職簡略煩苛,務存大體,曹局之內,終日寂然。 唯以書籍自娛。 岳 陽王營爲 會稽太守,

勸 每欲引寄爲僚屬,委以文翰,寄固辭獲免。 ii 舟 令自結,寶應從之,乃遣使歸誠。 而 侯景之亂,寄隨兄荔入臺,及城陷,遁還鄉里。 載,瑋嘗忤彪意,乃劫寄奔晉安。 承聖元年, 時陳寶應據有閩中,得寄甚喜。 除中書侍郎,寶應愛其才,託以道阻不遣。 張彪往臨川,强寄俱行。 陳武帝平侯景,寄 寄與彪將鄭瑋

寶應 引 縱 知寶 假 火 說 者,旋自救之。 託, 應 蹶 他 及 寶 然 事以拒之。 不 遣 起曰:「可謂智士。」寄正 應結昏留異,潛有逆謀,寄微知其意,言說之際,每陳逆順之理,微以諷諫。寶應輒 可諫, 慮禍 人燒寄所臥屋,寄安臥不 又嘗令左右讀漢書, 及己,乃爲居 寶 應自此 方信之。 士服以拒絕之。 色曰:「覆酈驕韓,未足稱智,豈若班彪王命識所歸乎。」 動。 臥而聽之,至蒯通說韓信曰「相君之背,貴不 親近將扶寄出,寄曰:「吾命有所懸,避欲安往。」 常居東山寺,爲稱脚疾,不 復起。 ·可言」, 寶 應以 寄

及留異稱兵、寶應資其部曲、寄乃因書極諫曰:

東 Щ 居 士: 虞寄 致書於明將軍 使君節下一寄流離艱故,飄寓貴鄉,將軍待以上賓之

列

傳

塵莫報 申以 ,是以敢布腹心,冒陳丹款,願將軍留須臾之慮,少思察之, 國士之眷,意氣所感,何日忘之。 而寄沈痼彌留,惕陰將盡,常恐卒塡溝壑,涓 則冥目之日,所懷

寄雖 業,欽明睿聖,選賢與能,羣臣 于時 乎。 狂 軍惑於邪說,翻然異計,寄所以疾首痛心, 廟略,推赤心於物者也。 鑒,〔三折從衡之辯,策名委質,自託宗盟,此將軍妙算遠圖,發於衷誠者也。 難,仗劍 士,據重位而不傾,執大節而不失,豈惑於浮辭哉。 瞽之說,披肝膽之誠,則雖 天下 此所以五尺童子,皆願荷戟而隨將軍 疾侵耄及,言無足采,千慮一得,請 夫安危之兆,禍福之機,匪獨天時,亦由人事。 興師,援旗誓衆,抗威千里。豈不以四郊多壘,共謀王室,匡時報主,寧國庇人 沸騰,人無定主,豺狼當道,鯨鯢橫擊,海內業業,未知所從。 屢申明詔,款篤殷勤,君臣之分定矣,骨肉之恩深矣。 死之日,猶生之年 .輯睦,結將軍以維城之重,崇將軍以裂土之封,豈非 陳愚算。 一者也。 泣盡繼之以血,萬全之策,竊爲將軍惜之。 也。 願將軍少戢雷霆,赊其晷刻, 及高祖武皇帝肇基草昧, 失之毫釐,差以千里。 將軍文武兼資,英威動俗, 將軍運動微之 是以明智之 初濟艱難 及主 往因 使得盡 不意將 宏 E 謨 多 繼

自天厭深德,多難荐臻,寰宇分崩,英雄互起,不可勝紀,人人自以爲得之。

然夷

一次八二

瑕忘 悉 强 也。 伊 危 勠力勤王,豈不 叉天假之威,而除其患,其事甚明,二也。今將軍以藩戚之重,擁東南之衆, 命一旅之師,或資一士之說,琳卽 天 区 非 長 王 所 い驅深 委以 夕。 **一琳之强,侯瑱之力,進足以搖蕩中原,爭衡天下,退足以屈强江外,** 翦 復 孰 八人力。 授,當璧應運,其事甚明,一也。 亂, 此 過,寬厚待 且 何失於富貴?此 如 數 非 **入**, 留 心腹,任 侯景? 拯溺扶危,四海樂推,三靈眷命,揖讓而居南面者,陳氏也。 有劉 將 人者 、繋馬 且 軍 兵革 、頂競逐之機,楚、趙連從之事,可得雍容高拱,坐論西伯, 狼 ,將軍所知,首鼠 勳高 以爪牙,胸中豁然,曾無纖芥。 將 人, [2] 改過自新, 咸加敍擢。 埋 顧 軍之衆 輪,云 已後, 竇融,寵過吳芮,析珪判野,南面稱孤,其事甚明,三也。 隅,至亟經摧衄,聲實 又其事甚明,四也。 奮不 人皆厭亂,其孰能棄墳墓,捐妻子,出萬 孰如王琳?武 ·顧命, 兩端,唯利是視,其餘將帥 瓦解冰泮,投身異域,與則厥角稽額 以先 主上承基,明德遠被,天綱 皇滅侯景於前, 士卒者乎? 方今周、齊鄰陸 虧喪, 膽氣 至如余孝頃、潘純陀、李孝欽、歐陽頗等, 況將軍釁非張繡,罪異畢諶, 此 叉其 《衰沮。 今上摧 亦可] 境外無虞,幷兵一向,匪朝 事 基明, 見矣。 再張,地維 高寒、向文政、留瑜 王琳於後, 死不顧之計, 豈非**歷**數有在,惟 雄張 六也。 孰能 委命闕庭。 其事 偏 重紐 此 被堅執銳, 盡忠奉上, 且 當何慮於 且 隅。 甚明,五 乃天時, 從將軍 將軍之 聖朝棄 夫以 然 或 斯

異,不愛其親,豈能及物。留將軍身縻國爵,子尚王姬,猶且棄天屬而弗顧,背明君而 唐、

右渠危亡繼及,

天命可畏,

山川難恃。

況將軍欲以數郡之地,

當天下之兵,以諸侯 戟百萬,拔本塞源,自圖家國,其有成功者乎?此又其事甚明,[<]十也。 出 自戰其地,人多顧後,梁安背向爲心,修旿匹夫之力,衆寡不敵,將帥不侔,師以無名而 晉陽之謀,張、陳井陘之事。此又其事甚明,九也。且北軍萬里遠鬭,鋒不可當,將軍 孤立,危急之日,豈能同憂共患,不背將軍者乎。至於師老力屈,懼誅利賞,必有韓、智 於白刃之間乎。此又其事甚明,七也。 之資,拒天子之命,强弱逆順,可得侔乎。此又其事甚明,八也。且非我族類,其心必 了事以無機而動,以此稱兵,未知其利。夫以<u>漢朝吳、楚,[+] 晉室穎、顒,連城數十,長</u> 歷觀前古,鑒之往事,子陽、季孟傾覆相尋,餘

北 智者不再計,此成敗之效,將軍勿疑,吉凶之幾,間不容髮。方今蕃維尙少,皇子幼沖, 凡 預宗枝,皆蒙寵樹。況以將軍之地,將軍之才,將軍之名,將軍之勢,而能克修蕃服, 面 稱臣,寧與劉澤同年而語其功業哉?豈不身與山河等安,名與金石相弊。願加三 爲將軍計者,莫若不遠而復,絕親留氏,秦郎、快郎,隨遣入質,釋甲偃兵,一遵詔

思,慮之無忽。

寄 氣 力縣微,餘陰無幾,感恩懷德,不覺狂言,鈇鉞之誅,甘之如

應 覽書大怒。 及 寶 應 敗走, 或謂 夜至蒲 寶應曰:「虞公病篤,言多錯謬。」寶應意乃小 田, 顧謂: 其 子扞秦曰:「早從虞公計,不 至今日。」扞秦但泣 釋。[10]亦以 寄人望, 而 . 且容

寶應

旣

凡

諸

賓客微

有交涉者皆誅,唯寄以先識

発

洞

風 寄謂 好看 初 所 今夜 沙 親 門慧標涉獵 月,當 曰:「標公旣以 照紫微宮。」實 有才思, 此始,必以 及寶應起兵,作五言詩 (應得 此 之甚 終。」後 |悦。||慧標 竟 坐是 以示寄,寄一 詸 以 送之曰:「送馬猶臨 覽便止 一 正 色無 水,離旗 稍引 標

對 仲舉 令 也。 於 是 以 未嘗 帝 文帝 令 自 洛 師 日 長 流 少 表 至 停 衡 尋敕 篤 寓 相 秩 吾自 南 事 陽 行 公 滿 也。」後 事 王 都督章昭達發遣寄還朝, 士, 造 得之。」乃手 旣 裁 其有 次 與 春 出 兄荔 必 除 閤 月 於 疑 東中 河須 仁厚, 便自 議 帰 就就 敕 得 絕, 郎 用寄。 求 二 人 雖 建安王諮議,加 以 解 因 僮 決 退。 旦夕游處, 感 豎 之, 寄 氣 未 但朔 及至, 入謝, 常曰:「知足不 病 嘗 加 毎 H 帝 以 謂 兼掌 牋 戏昭 得 。聲色。 日.二 目 茘 修 書 書, 將 而 所以 記 管寧無恙, 辱 已。三二太建 軍 氣 至 暫屈卿 宜求宿 臨 吾知足矣。」 輒 寄乃 危 奔 執 劇 辭 甚慰勞懷。」 游 節 土 八 以 有 蕃,非止 危 年, 疾 則 行 殆 及謝 辭 不 業 加 者數矣。 氣 堪 太 者。」仲舉 病 凜然 以 中 且 頃之, 私 文翰 夕 大 庭 陪 白 夫 前 相 帝謂 列。 後 未 毎 刃 後卒。 煩, 諸 不 所 知 居 憚 王 乃 所 到

列

傅

第

五.

十

九

應

荔

爲州將,下車必造門致禮,命釋鞭板,以几杖侍坐。 望拜道左。 或言誓爲約者,但指衙便不欺,其至行所感如此。 嘗出游近寺,閭里傳相告語,老幼羅列, 所制文筆,遭亂並多散失。

還言之文帝,召爲撰史學士。再遷驃騎安成王中記室,撰史如故。 州刺史蕭循。 琳敗,隨<u>琳將孫</u>瑒還都。時陳文帝使顏晃賜楊雜物,楊託辉啓謝,詞理周洽,文無加點。 長好學,能屬文。」太清末,丁母憂,在兵亂中,居喪盡禮,哀毀骨立,士友以此稱之。後依湘 傅縡字宜事 循頗好士,廣集墳籍,辉肆志尋閱,因博通羣書。 ,北地靈州人也。父彝,梁臨沂令。 王琳聞其名,引爲府記室。 晃

還,累遷太子庶子、僕。[]言 |縡篤信佛教,從興皇寺||慧朗法師受三論,盡通其學。尋以本官兼通直散騎侍郞使||齊,

等因共譖之,後主收繹下獄。粹素剛,因憤恚,於獄中上書曰:「夫人君者,恭事上帝,子愛 軍 才使氣,陵侮 國 大事,下筆輒成,未嘗起草,沈思者亦無以加,甚爲後主所重。 後主即位、遷秘書監、右衞將軍、兼中書通事舍人、掌詔誥。 人物,朝士多銜之。 會施文慶、沈客卿以佞見幸,專制衡軸,而釋益疎。 粹爲文典麗,性又敏速,雖 然性木强,不持檢操,負 文慶

恐東 黔黎,省嗜慾,遠諂佞,未明求衣,日旰忘食,是以澤被區宇,慶流子孫。 後宮曳綺繡 度,不 虔郊 [三臣 南 王 一氣,自斯 心 廟之神,專媚淫昏之鬼。 ,廐馬餘菽粟,兆庶流離,轉尸蔽野,貨賄公行,帑藏損耗,神怒人怨,衆叛親 加 面,臣面可改,則臣心可改。」後主於是益怒,令宦者李善度窮其事,自己賜死 而盡。」 書奏,後主大怒。 小人在側,宦豎弄權,惡忠直若仇讎,視百 頃之稍解,使謂曰:「我欲赦卿,卿能 陛下頃來酒色過 改過不ご釋 姓如草芥。

而 粹雖 復 來者百餘日。 强直 有才,而毒惡傲慢,爲當世所疾。 時時有彈指聲。 及死,有惡蛇屈尾來上靈牀,當前受祭酹,

獄

中。

有

集十

卷。

景 拜 位, 如 乃還都 之亂 不 妃 于今五 改 嬪 時 絃 ,游嶺南,居羅浮山寺,專精習業。 有吳興章華,字仲宗,家本農夫,至華獨好學,與士君子游處,頗通經史,善屬文。 而 易張 臨 後主時,除太市令,非其所好,乃辭以疾。 年,不 軒。 臣 思先帝之艱難,不知 老 見 臣宿將,棄之草莽,諂 麋 鹿復游於姑蘇矣。」 書奏,後主大怒,卽日斬之。 天命之可畏。 佞 歐陽頠 讒邪,升之朝廷。 為廣州 減明初, 溺於嬖寵, 刺 史, 上 今疆 書極 署爲 惑於酒 場日 諫, 南 蹙, 色。 海太守。 其大略 隋 祠 軍 --日:「陛下即 ·壓境, 廟 頗子 約敗, 而 不出, 候

顧野王字希馮,吳郡吳人也。 祖子喬,梁東中郎武陵王府參軍事。日巴父恒,信威臨賀

王記室,兼本郡五官掾,以儒術知名。

奇字,無所不通。 爲臨賀王府記室。 十二,隨父之建安,撰建安地記二篇。 愛其才。野王又善丹青,王於東府起齋,令野王畫古賢,命王襃書贊,時人稱爲二絕。 野王幼好學,七歲讀五經,略知大旨。 宣城王爲揚州刺史,野王及琅邪王襃並爲賓客, 長而 偏觀經史,精記默識,天文地理,蓍龜占候,蟲篆 九歲能屬文。嘗制日賦,領軍朱异見而奇之。

尺,又居喪過毀,殆不勝哀。及杖戈被甲,陳君臣之義,逆順之理,抗辭作色,見者莫不壯 及侯景之亂,野王丁父憂,歸本郡,乃召募鄉黨,隨義軍援都。 野王體素清羸, 裁長六

之。城陷,逃歸會稽。

後爲黃門侍郎,光祿卿,知五 陳天嘉中, 敕補撰史學士。 禮事。 太建中,爲太子率更令,尋領大著作,掌國史,知梁史事。 卒、贈秘書監、右衞將軍。

野 王 所撰玉篇三十卷,輿地志三十卷,符瑞圖十卷,顧氏譜傳十卷,分野樞要一卷,續洞 少以篤學至性知名,在物無過辭失色。 觀其容貌,似不能言,其厲精力行,皆人所

一卷,玄黎表一卷,並行於時。 又撰通史要略一百卷,國史紀傳二百卷,未就而卒。 有

文集二十卷。

兵、度支、祠部三尚書,卒。 封松陽縣侯。 時 有蕭濟字孝康,東海蘭陵人也。 陳文帝爲會稽太守,以濟爲宣毅府長史。及卽位,授侍中。 好學,博通經史。 **仕梁爲太子舍人。預平侯景功,** 太建中,歷位五

姚察宇伯審,吳興武康人,吳太常卿信之九世孫也。父僧垣,梁太醫正。日三及元帝在

荆州,爲晉安王諮議參軍。後入周,位遇甚重。

里。 加 梁代,二宮所得供賜,皆回給察兄弟,爲游學之資。察並用聚蓄圖書,由是聞見日博。 三,梁簡 禮 接。 在 察幼有至性,六歲誦書萬餘言。不好戲弄,勵精學業,十二能屬文。 亂 文帝時在東宮、盛修文義、即引於宣猷堂聽講論難、爲儒者所稱。 離間,篤學不廢。 起家南海王國左常侍,兼司文侍郎。 元帝於荆州即位,授察原鄉令。 後兼尚書駕部郎。 後爲佐著作,撰史。 遇梁室喪亂,隨二親還鄉 僧垣精醫術,知 及簡文嗣位,尤 年 名

傳第五十九 顧野王 姚察

列

散 餘條,並爲剖析,皆有經據。 騎常侍,報聘于周。 陳永定 [中,吏部尙書徐]陵領大著作,復引爲史佐。 江左耆舊先在關右者,咸相傾慕。 臻謂所親曰·「名下定無虛士。」 著西聘道里記。 使還,補東宮 太建初,補宣明殿學士。 沛國劉臻竊於公館訪漢書疑事十 尋爲通直

六九〇

學士,遷尙書祠部侍郞。

駭,莫不慚服。僕射徐陵因改同察議。其不順時隨俗,皆此類也。 事 ,神禮簡,古無宮懸之文。陳初承用,莫有損益。宣帝欲設備樂,付有司立議,以梁武爲 時碩學名儒,朝端在位,咸希旨注同。察乃博引經籍,獨違羣議,據梁樂爲是。當時驚 舊魏王肅奏祀天地,設宮懸之樂,八佾之儛,爾後因循不革。 至梁武帝以爲事人禮縟,

後主立、兼東宮通事舍人、知撰史。至德元年、除中書侍郎、轉太子僕、餘並如故 後歷仁威淮南王、平南建安王二府諮議參軍。丁內憂去職。俄起爲戎昭將軍,知撰梁

停長齋,令從晚食。又詔授祕書監,領著作,奏撰中書表集。 察母韋氏喪制適除,後主以察羸瘠,慮加毁頓,乃密遣中書舍人司馬申就宅發哀,仍敕申專 事黃門侍郎,領著作。 加譬抑。 初,梁室淪沒,察父僧垣入長安,察蔬食布衣,不聽音樂,至是凶問因聘使到江南。時 尋以忠毅將軍起兼東宮通事舍人,

察頻讓不許。

俄敕知著作郞事。

服闋, 察既累居憂戚,齊素日久,因加氣疾。後主嘗別召見,爲之動容, 歷度支、吏部二尚書。 除給

所 衣著,止是麻布蒲練,此物於吾無用。 察自居顯要,一不交通。 嘗有私門生不敢厚餉,送南布一端,花練一匹。 既欲相款接,幸不煩爾。」此人遜請,察厲色驅出, 察謂曰:「吾

獨 召入內殿,賜果菜,指謂朝臣曰:「聞姚察學行當今無比,我平陳唯得此一人。」 陳亡入隋,詔授祕書丞,別敕成梁、陳二史。又敕於朱華閣長參。文帝知察蔬菲,別日 自是莫敢饋遺。

蘇。 至是承襲,愈更悲感,見者莫不爲之歔欷。丁後母杜氏喪,解職。 開皇十三年,襲封北絳郡公。察在陳時聘周,因得與父僧垣相見,將別之際,絕而復 在服制之中,有白鳩

巢于戶上。

果,任家有無,不須別經營也。 葬日, (式)預參對問。大業二年,終于東都。遺命薄葬,以松板薄棺,纔可容身,土周於棺而 仁壽二年,詔除員外散騎常侍、晉王侍讀。煬帝卽位,授太子內舍人。及改易衣冠,删 止麤車卽送厝舊塋北。日代了不須立靈,置一小牀,每日設清水,六齋日設齋食菜

體 柔軟,顏 初,察欲讀一藏經,並已究竟,將終,曾無痛惱,但西向坐正念,云「一切空寂」。 其後身 色如 恒。 兩宮悼惜、贈賵甚厚。

至孝,有 人倫鑒識,沖虛謙遜,不以所長矜人。專志著書,白首不倦。 所著漢書訓纂

衡陽王府法曹參軍、會稽王主簿。 功,隋開皇中,文帝遣中書舍人虞世基索本,江北且進。 三十卷、說林十卷、西聘、玉璽、建康三鍾等記各一卷,文集二十卷。所撰梁、陳史,雖未畢 臨亡,戒子思廉撰續。 思廉在陳爲

死其宜矣。 顧、姚栖託藝文,蹈履淸直,文質彬彬,各踐通賢之域,美矣乎! 貞一,並取貴時主,豈虛得乎。傅縡聰警特達,才氣自負,行之平日,其猶殆諸,處以危邦, 及於運逢交喪,驅馳戎馬,所在稱美,用捨信有時焉。虞荔弟兄,才行兼著,崎嶇喪亂,保茲 論曰:沈炯才思之美,足以繼踵前良。 然仕於梁朝,年已知命,主非不文,而位裁邑宰。

校勘記

- 沈炯字初明 「初明」陳書作「禮明」。王鳴盛十七史商権六四引何焯說,以爲當作禮明。
- 除鎭西諮議參軍舍人如故 「舍人」二字各本並脫,據陳書、通志補
- 將軍 詞 運 颜延年五君詠:「識密鑒亦洞。」梁簡文帝詩:「洞鑒資我皇。」 動微之鑒 「動」疑當從文苑英華六八五作「洞」。洞微謂洞察微末。洞鑒又當時常用

- 맫 寬厚待人 一待 人」各本作「得人」,據傳增湘文苑英華校本改
- Ħ 且. 留 將 軍 狼 顧 隅 「狼顧」各本作「狼狽」,據陳書
- ナマ 繫馬 埋 輸 「繋馬」各本作「撃馬」、據陳書、 通鑑、册府元龜八三二改。 按此借後漢張綱故事 用

以表意志之堅決。 「繋馬」,文苑英華六八五作「縶馬」,於文亦合。

- 〔4〕 夫以漢朝吳楚 「夫」字各本並脫,據陳書補
- 八〕此又其事甚明 「此」字各本並脫,據陳書補。
- *γ*υ ∟/ 寄 聞 明 者 鑒未 形 「鑒」各本作「覽」,據陳書、册府元龜八三二、文苑英華六八五改。
- [10] 寶應意乃小釋 「意」字各本並脫,據陳書補。
- 〔三〕但朔旦牋修而已 「朔旦」陳書作「朔望」。
- 累遷太子 庶子僕 僕 字各本並脫,據陳書補。 按太子僕官階高於太子中 ·庶子, 見南齊書百

官誌。

- [1] 令宦者李善度窮其事 「李善度」陳書作「李善慶」。
- 祖子 喬梁東 41 郎武 陵 王府參軍 事 「郎」字各本並脫,據陳書補
- 至 父僧 垣梁· 太醫 正 「僧垣」各本作「僧坦」、據周書本傳 改
- 葬日 列 傳 止 第 廳 五. 車 + 即送厝舊 九 校 **瑩北** 勘 記 「麤車」各本作「鹿車」,據陳書改。

(1七)文帝遣中書舍人處世基索本 「中書舍人」據陳書及隋書處世基傳當作「內史舍人」。 隋文帝 父名忠,故中書省稱內史省,中書舍人稱內史舍人。

南史卷七十

列傳第六十

循吏

吉翰 杜驥 申恬 杜慧度 阮長之 甄法崇 孫彬

從子廉

孫謙 何遠 郭祖深 傅琰

孫岐

虞愿

王洪範

李珪之

沈瑀

范述曾

長吏之職,號曰親人。至於道德齊禮,移風易俗,未有不由之矣。

故

費 日耗千金。 宋武起自匹庶,知人事艱難,及登庸作宰,留心吏職。而王略 播茲寬簡,雖所未暇,而黜已屛欲,以儉御身,左右無幸謁之私,閨房無文綺 外舉, 未遑內務, 奉師之

列 傳

蓋宋世 窗網 制度滋 騷動。 家給 階。 之盛,自此衰矣。 及永初受命,無所改作,所居唯稱西殿,不制嘉名,文帝因之,亦有合殿之稱。 之飾。 出 命 暮 將 豈徒 卹 戶 動在 人足,即事 歸 下, ·長,犬馬餘菽粟,土木衣綈繡。 之極盛也。 故能 自茲迄于孝建,兵連不 自事 嬖女幸臣, 賜傾府藏, 更不 一濟時。 以至橫流。 戎車 而 及古,人乖於昔,蓋 雖 已。 歲駕,邦甸不擾。 晉世諸帝多處內房,朝宴所臨,東西二堂而已。 費由 難, **暨元嘉二十七** 守宰之職以六春爲斷,雖沒世不徙,未及曩時,而 轉死溝渠, 府實,事無 莅人之官, 息。 竭四海不供其欲, 殫人命未快其 由 外擾。 年,舉境外捍,於是傾資掃蓄, 於時可冤。 遷變歲屬, 以區 文帝幼而寬仁,入纂大業,及難 爲上所擾,致化莫從。 追陋前規、更造正光、玉燭、紫極諸殿。 區江東,蕞爾迫隘,荐之以師 自此方內晏安,甿庶蕃息,奉上供徭,止於歲賦,晨 凡百戶之鄉,有市之邑,歌謠 突不得點, 席 未暇暖, 猶有 ij 孝武 興陝服,六戎薄伐, 三 蒲、密之化,事未易 未供, 旅,因之以 明皇 人有 末年,日清暑 繼祚,彌 舞蹈,觸處成羣 所 深賦 係,更無苟得 及孝 彫 欒綺節,珠 凶荒,向時 厚斂,天下 篤 武 方構, 承 浮侈, 興師

史, 獄 丞,與建康為比。 損 華反樸,恭己南面,導 帝 承 斯 奢縱,輔立 永明繼運、垂心政術、杖威善斷、猶多漏網、長吏犯法、封刃行誅。 幼主,思 人以躬, 振 意存 人瘼,風 勿擾。 移 百城。 以 山 陰大邑, 爲政未春,擢 獄訟繁滋, 山陰令傅琰為 建元三年 益 ·, 別 州 郡 置 刺

吏事 車連歲,不遑啓居,軍國糜耗,從此衰矣。 逸,歌聲舞節,袨服華粧 多倚附權門,互長貪虐,裒刻聚斂,侵擾黎甿。 天下搖動,無所措其手足。 居職,以三周爲小滿。水旱之災,輒加振卹。十許年中,百姓無犬吠之驚,都邑之盛,士 ·,及居宸扆, 專務 刀筆。 桃花 未嘗枉法申恩,守宰由斯而震。 · 淥水之間,秋月春風之下,無往非適。 繼以昏亂,政由羣孽,賦調雲起,徭役無度。 屬以魏軍入伐,疆場大擾,兵 明帝自在布衣、達于 一女昌

飾。 等居官,並以廉潔著。又著令:小縣有能,遷爲大縣令,大縣有能,遷爲二千石。於是山陰令 皆召見於前,親勗政道。始擢尚書殿中郎到溉爲建安內史,左戶侍郎劉鬷爲晉安太守。 得 息肩 仲孚有異績, · 勞己所先,事唯急病。 元年,始去人貲,計丁爲布。 太官常膳、惟以菜蔬、圓案所陳、不過三盞、蓋以儉先海內也。 斯亦近代獎勸之方也。 梁 武 在田,知人疾苦,及定亂之始,仍下寬書。東昏時雜調咸悉除省,於是四海之內始 及踐皇極,躬覽庶事,日昃聽政,求瘼卹隱。 以爲長沙內史,武康令何遠清公,以爲宣城太守。 乃命輶軒以省方俗,置肺石以達 在身服浣濯之衣,御府無文錦之 故每選長吏,務簡廉平, 剖符爲吏者,往往承風 一窮

案前史各立循吏傳,序其德美,今並掇采其事,以備此篇云。

六九八

憐 北 征 吉翰字休文,馮翊池陽人也。 廣固, 賜爵建城縣五等侯。 初爲龍驤將軍劉道憐參軍,隨府轉征虜左軍參軍,隨道 參宋武帝中軍軍事、臨淮太守。 復爲道憐驃騎中兵參

軍、從 事 中郎。 爲將佐十餘年,清謹勤正,甚爲武帝所知 賞。

元 嘉 中,歷位梁、南秦二州刺史,徙益州刺史,加督。 在任著美績,甚得方伯之體,論者

稱 之。

此。 全貸, 事 八 關 視 訖, 自下 齋呈事 累遷徐州刺史、監徐完二州豫州之梁郡諸軍事,〔三時有死罪囚,典籤意欲活之,因翰 旣欲加恩, 謂 畏服,莫敢犯禁。 曰:「卿意當欲宥此囚死命。 `,翰省訖,語令且去,[2] 明可更呈。 卿 便當代任 卒於官。 其罪。」因 命左右收典籤付獄殺之,原此囚生命。 昨於齋坐見其事,亦有心活之。 明旦,典籤不敢復入,呼之乃來。 但此囚罪重,不可 其刑政 取昨所呈 類如

杜驥字度世,京兆杜陵人也。 高祖預,晉征南將軍。 曾祖耽,避難 河西,因仕張氏。 苻

本 出 中 乎 日 爲 以 華高 金金 牧 今世,養馬不暇,豈辦見知。」上變色曰:「卿何量朝廷之薄 **傖荒遇之,**[吾] 雖復 见 坦 圉,便超入 族,亡曾祖 日 頗涉史傳,宋武帝平長安,隨從南還。 禪忠孝淳深,漢朝莫及,恨今世無復此輩人。」坦曰:「日磾之美,誠 、內侍,齒列 因晉氏喪亂,播遷凉土,[+] 直以南度不早,便以荒傖賜隔。 人才 名賢。 可施,每爲清途所隔,坦恒以此慨然。「K」嘗與文帝言及史籍, 聖朝: 《雖復拔才,臣恐未必能也。」 上 元嘉中,位青、冀二州刺史,晚度北人,南朝 也。」坦曰:「請以 默 如 臣言之,臣 聖韶,假使 H 磾 胡人,

北 土 累遷 舊法,問疾必遣子弟。 長 沙王 義欣後軍 錄事參軍 |驥年十三,父使候同郡韋華。 |華子||玄有高名,見而異之,以

情沮 洛陽 舊器 可 者 鍾 守 於 人 敗, 叉 耳。 洛 南 城 元 水,驥 嘉 還。 廢 無 不 七年 人, 君率衆 糧 可 食, 乃遣使給之曰:「 叉 復禁。」 随 大鍾墜洛水 無糧食,及彥之敗退,驥欲棄城走,慮爲 於是 見就,共守此城,大功旣立,取 到彦之入河南, Ŀ 引 一怒, 衆去,驥 中, 使建威將軍鄭順之殺聳夫於壽陽。 虜旣 至是帝遣將姚聳夫領千五 亦委城南奔。白文帝:「本欲 南度,洛城 加建武將軍。 勢弱 鍾 無晚。」聳夫信之,率所 魏撤 ,今修 河南戍悉歸河北,彦之使驥守洛陽。 文帝 理 百 城 人迎 以 誅。 池、並已堅固 死固守,姚聳 致之。 **聲夫**,吳興武康 初,武 帝 時 頟 平關 聳夫 就驥。 軍 夫入 洛, 糧 政率 城便走,人 又足,所乏 及至 致鍾 勇果有 所 城 領 不 牽 虡

列

傳

氣力,宋偏裨小將莫及。

穆之及驥爲吏人所稱詠。 十七年,驥爲靑、冀二州刺史,在任八年,惠化著於齊土。 後徵爲左軍將軍,兄坦代爲刺史,北土以爲榮焉。 自義熙至于宋末,刺史唯洋

已發,大相推檢。上遣主書詰責驥,幷檢開函之主。驥答曰:「開函是臣第四息季文,伏待 坦長子院爲員外散騎侍郎,文帝嘗有函詔敕坦,琬輒開視。 信未及發,又追取之,敕函

刑坐。」上特原不問。卒官。

間聽其絃管,積久轉不能平,於是自率宿衞兵誅幼文、勃、超之等。 孫超之居止接近,又並與阮佃夫厚善。佃夫旣死,廢帝深痪之。帝微行,夜輒在幼文門墉 **| 韓謀反事,拜給事黃門侍郎。廢帝元徽中爲散騎常侍。幼文所莅貪橫,家累千金。與沈勃、** 第五子幼文薄於行,明帝初,以軍功封邵陽縣男,尋坐巧妄奪爵。後以發太尉廬江王 兄叔文爲長水校尉,

父兄永皆得歸晉,並以幹用見知。 申 恬字公休,[公]魏郡魏人也。 武帝踐阼,拜太中大夫。宣元嘉初,歷党、青二州刺史。 曾祖鍾,爲石季龍司徒。 宋武帝平廣固,恬父宣、宣從

恬兄謨與朱脩之守滑臺。 魏剋滑臺見虜。 後得還,爲竟陵太守。

歷下邳、北海二郡太守、所至皆有政績。又爲北譙、梁二郡太守。 恬初爲驃騎劉道憐長兼行參軍。宋受命,辟東宮殿中將軍,度還臺,直省十年,不請休 郡境邊接任榛,屢被

寇抄。 恬到任,密知贼來,乃伏兵要害,出其不意,悉皆禽殄。

加督。 年,冀州移鎭歷下,以恬爲冀州刺史,加督。明年,加濟南太守。孝武踐阼,爲靑州刺史,尋 元嘉十二年,遷督魯東平濟北三郡諸軍事、泰山太守,威惠兼著,東人便之。二十一 齊地連歲興兵,百姓雕弊,恬防禦邊境,勸課農桑,二三年間,遂皆優實

性清約、頻處州郡、妻子不觅飢寒、世以此稱之。後拜豫州刺史,以疾徵還,道卒。 死

之日,家無遺財。

子廛,南譙太守。謨子元嗣,海陵太守。元嗣弟謙,臨川內史。

宜因 久。」 市官以白上,乃原生命,繫尙方。 尋被宥,復爲驍騎將軍。 疾卒。 安都、東陽太守沈法系北捍、至兗州、魏軍已去。坦建議任榛亡命、屢犯邊人、今軍出無功、 一此翦撲,上從之。亡命先已聞知,舉村逃走,安都、法系坐白衣領職,坦棄市,羣臣爲請 |永子坦,孝建初爲太子右衞率,徐州刺史。|大明元年,魏攻兗州,孝武遣太子左衞率|薛 將行刑,始興公沈慶之入市抱坦慟哭曰:「卿無罪,爲朝廷所枉誅,我入市亦當不

列

亦

?見殺。

戍 雕 陵 子 城,奉順不同安都,安都攻圍不能剋。 令 孫 明帝時爲徐州刺史,討薛安都。 會令孫至,遣往睢陵說闡, 行至淮陽,即與安都合。 弟闡時為濟陰太守, 殺之。 令孫

贈 武 遯之當至,分遣 仕 州 右 帝 1將軍 義 府 杜 旗 爲 慧度, 交阯朱獻人也。[5] 本屬京兆。曾祖元爲寧浦太守, 遂居交阯。父瑗字道言, 日南、 建,進號冠 二子斷遏水陸津要,暖收衆斬遜,州境獲寧。 九德、交阯 軍 將軍。 太守。 盧循竊據廣州 初, 九眞太守李遜父子勇壯有權力,威制交土,聞刺史滕 遣使通好,暖斬之。 後爲 龍驤將軍、交州 義熙六年卒,年八十四, 刺史。

慧度 戰 度。 脱等皆 放火箭,循衆艦 六月 乃率文武六千人拒循於石碕,破之。 慧度,暖第五子也。 奔 竄 庚 子,循晨造 石碕, 盤結 俱然,一時散潰。 南津, 俚、獠, 七年,除交州刺史,詔書未到,其年春,盧循襲破合浦,徑向 令三 各 1有部曲 軍 入城乃食。 循中箭赴水死。 循雖 循知弈等與杜氏 破, 慧度 餘黨皆習兵 悉出宗族私 斬循及父嘏并循二子,並傳首建鄴 有怨, 事 李遜子 財以充勸賞, 遭 使 招 孫李弈、李移、李 之。 弈等受循節 自登高 交州 艦 合

封慧度龍編縣侯。

至城門不夜閉,道不拾遺。卒,追贈左將軍。 修學校,歲荒人飢,則以私祿振給。爲政纖密,有如居家,[10]由是威惠霑洽,姦盜不起。 遣長史江攸奉表獻捷。 武帝踐阼, 進號輔國將軍。 慧度布衣蔬食,儉約質素。能彈琴,頗好莊、老。 其年,南討林邑,林邑乞降,輸生口大象金銀古貝等,乃釋 以慧度長子弘文為振遠將軍、交州刺史。 禁斷淫祀,崇

遣弟弘猷詣建鄴,朝廷甚哀之。 被徵命,而可晏然者乎。」弘文母阮年老,見弘文輿疾就路,不忍別,與到廣州,遂卒。 舊見其患篤,勸待病愈。 弘文曰:「吾世荷皇恩,杖節三世。 龍編侯。 初,武帝北征關、洛,慧度板弘文行九眞太守。及繼父爲刺史,自己亦以寬和得衆,襲爵 元嘉四年,文帝以廷尉王徽爲交州刺史,(三弘文被徵, 會得重疾, 牽以就路。 。常欲投軀帝庭,以報所荷,況親 臨死, 親

盗 賊屛迹。 孝建中,以豫章太守檀和之爲豫州刺史,和之先歷始興太守、交州刺史,所在有威名, 每出獵,猛獸伏不敢起。

阮長之字景茂,日三一字善業,陳留尉氏人也。 祖思曠, 金紫光祿大夫。 **父**曹,驃騎諮

列傅第六十 循吏

議參軍。

長 初 之年十五喪父,有孝性,哀感傍人。 爲諸府參軍,母老,求補襄垣令,督郵無禮鞭之,去職。後拜武昌太守。 除服,蔬食者猶積載。 閑居篤學,未嘗有惰容。 時王弘爲江

州、雅相知重、引為車騎從事中郎。

禄。 言善政者咸 知 錄,後歸,悉以還之。爲中書郞直省,夜往鄰省,誤著展出閣,依事自列。 ,不受列。 元嘉 時郡 長之去武昌郡,代人未至,以芒種前一 田祿以芒種爲斷,此前去官者則一年秩祿皆入後人。始以元嘉末改此科,計月分 十一年,除臨海太守,在官常擁敗絮。 稱之。文帝深惜之,曰:「景茂方堪大用,豈直以清苦見惜。」子師門,原鄉 長之固遣送曰:「一生不侮暗室。」前後所莅官,皆有風政,為後 日解印綬。 至郡少時,母亡,葬畢不勝憂卒。 初發都,親故或以器物贈別,得便緘 門下以閽夜人不 人所思。 宋世

愆期 固。 守李元德清勤均平,姦盜止息。 何 道 有名晉世,官至南蠻校尉。 自 前 元嘉初 宋縣 少清 廉, 令成浦 ·文帝遣大使巡行四方, 棄散騎常侍王歆之等上言:「宣威將軍、陳南頓二郡太 白首 爲政 彌厲。 (寬濟)遺詠在人。 應 加 | 飲之位左戶尚書、光祿大夫,卒官。 彭城內史魏恭子廉惜修慎,在公忘私,安約守儉, 褒賚,以勸于後。」各被襃賜。 前 鯛陽令李熙國在 事有方,人思其政。 飲之字叔道,河東人。 故 Щ 久而彌 會祖 桑令

列傳第六十 循吏

因 亡,愕然未言。 境肅然。 命口受爲辭,因遜謝下席。 甄 法崇,中山人也。 于時,南平繆士通爲江安令卒官,至其年末,法崇在聽事,士通前見。 坐定,云:「卿縣人宋雅見負米千餘石不還,令兒窮弊不自存,故自訴。」法崇 父匡,位少府卿,以清聞。 而法崇爲問,宋家狼狽輸送。自己太守王華聞而歎美之。 法崇、宋永初中爲江陵令,在任嚴整,縣 法崇知其已

爲府錄事參軍,帶郫縣令。 薪,豈拾遺金者邪。」卒還金。 中 故 而 不復以此言相屬。」由此名德益彰。 失。 得 五 法崇孫彬。 檀越乃能見還,輒以金半仰酬。」往復十餘,|彬堅然不受,因謂曰:「五月披羊裘 兩金,以手巾裹之,彬得,送還寺庫。 彬有行業,鄉黨稱善。 將行, 梁武帝布衣而聞之,及踐阼,以西昌侯藻爲益州刺史,乃以彬 同列五 及在蜀,藻禮之甚厚云。 嘗以一束苧就州長沙寺庫質錢,後贖苧還, 人,帝誠以廉愼。 道人驚云:「近有人以此金質錢,時有事 至彬,獨曰「卿昔有還金之美, 不得 於苧束 而 負 舉

傅琰字季珪,北地靈州人也。 曾祖弘仁,宋武帝之外弟,以中表歷顯官,位太常卿。 祖

砌字彦先,員外散騎侍郎。 父僧祐,山陰令,有能名。

中,遷尙書左丞。母喪,鄰家失火,延燒隊屋,抱柩不動。鄰人競來赴救,乃得俱全。 | 琰美姿儀, 仕宋爲武康令, 遷山 陰令,並著能名,二縣皆謂之傅聖。賜爵新亭侯。 | 琰 股 元徽

髀之間已被烟焰

關絲於柱鞭之,密視有鐵屑,乃罰賣糖者。 又二野父爭雞,琰各問何以食雞,一人云粟,一 理縣譜,子孫相傳,不以示人。 人云豆。乃破雞得粟,罪言豆者。 齊高帝輔政,以山陰獄訟煩積,復以啖爲山陰令。 縣內稱神明,無敢爲偸。」獎父子並著奇績,時云諸傅有 賣針、賣糖老姥爭團絲來詣琰,琰挂

中,爲廬陵王安西長史、南郡內史,行荆州事。卒。琰喪西還,有詔出臨哭。 昇明中,遷益州刺史。自縣遷州,近世罕有。齊建元四年,徵驍騎將軍、黃門郎。 冰明

之,皆有能名,而不及琰也。沈字彦流,東海人,歷錢唐、山陰、秣陵令,南平、長沙太守,清 廉戒慎,身恒居祿而居處日貧。死之日無宅可憇,故吏爲營棺柩。聞慰自有傳。仲起見沈 時長沙太守王沈、新蔡太守劉聞慰、晉平太守丘仲起、長城縣令何敬叔、故鄣縣令丘寂

憲傳、敬叔見子思澄傳。

近在閣下。」卽轉爲主簿。在縣專以廉潔御下。 ,而寂之不肯開門,曰::「不奉墨旨。」|彧方於車中爲教,然後開。|彧歎曰::「不意郅君章 寂之字德玄,吳興烏程人。年十七,爲州西曹,兼直主簿。刺史王彧行縣夜還,口吾前驅 于時丹徒縣令沈巑之以淸廉抵罪,寂之聞

之曰:「清吏眞不可爲也、政當處悸、孟之間乎。」

之,謂曰:「我今重來,當以人肝代米,不然淸名不立。」 更鳴,必令淸譽日至。」巑之雖危言,上亦不責。後知其無罪,重除丹徒令。入縣界,吏人候 曰:「無以承奉要人。」上曰:「要人爲誰。」巑之以手板四面指曰:「此赤衣諸賢皆是。若臣得 見 天子足矣。」上召問曰:「復欲何陳。」答曰:「臣坐淸所以獲罪。」上曰:「淸復何以獲罪。」 巑之吳興武康人,性疎直,在縣自以淸廉不事左右,浸潤日至,遂鎖繫尙方。 歎曰:「一

故宜 爲 買棺器。 |罪貶,無論襃恤。] 乃敕不給贈賻。 又有汝南周洽,歷句容、曲阿、上虞、吳令,廉約無私,卒於都水使者。無以殯斂,吏人 齊武帝聞而非之,曰:「治累歷名邑而居處不理、遂坐無車宅死,令吏衣棺之,此

如 神 能欺,事自 琰子 何以至此。」答曰:「無他也,唯勤而清。 劇 爲官亦 理 則 物無疑滯,欲不理得乎。」時臨淮劉玄明亦有吏能,歷山陰、建康令,政 有能名,後爲吳令,別建康令孫廉,廉因問曰:「聞丈人發姦擿伏,惠化 清則憲綱自行, 勤則 事無不 理。 憲綱自行 則

列

常爲天下第一,終於司農卿。 日:「我有 ·奇術,卿家譜所不載,臨別當相示。」旣而曰:「作縣令唯日食一升飯而莫飮酒,此 後翽又代玄明爲山陰令,問玄明曰:「願以舊政告新令尹。」答

兼 相 獄 郡 廢 曹掾固爭曰:「古者有此,今不可行。」岐曰:「其若負信,縣令當坐。」竟如期而反。 中書通事舍人,累遷安西中記室,兼舍人如故。 乃移獄於縣,岐卽令脫械,以和言問之,便卽首服。法當償死,會冬節至,岐乃放其還家。 久之,復除始新令。縣人有因鬭相歐而死,死家訴郡,郡錄其仇人,考掠備至,終不引咎。 |岐字景平, 世梁起家||南康王左常侍,後兼尚書金部郎,母憂去職,居喪盡禮。 服闋後疾 太守深

岐美容止,博涉能占對。一大同中與魏和親,其使歲中再至,常遣岐接對焉。

何事須和?必是設間,故令貞陽遣使,令侯景自疑,當以貞陽易景,景意不安,必圖禍亂。 冬,貞陽侯蕭明伐彭城,兵敗,囚於魏。二年,明遣使還述魏欲通 太清 左衞朱异曰:「邊境且得靜寇息人,於事爲便。」議者並然之。 元年,累遷太僕,司農卿,舍人如故。岐在禁省十餘年,機事密勿,亞於朱异。 和好,「云敕有司及近臣定 岐獨曰:「高澄旣新 得志, 此年

若許通好,政是墮其計中。且彭城去歲喪師,渦陽復新敗退,今使就和,益示國家之弱。

不可許。」异等固執,帝遂從之。及遣使,景果有此疑,遂舉兵入寇,請誅失异。

守,岐帶疾出圍,卒於宅。 逆, 豈有求和。」及<u>景</u>背盟,莫不歎服。 尋有韶,以<u>岐勤勞,封南豐縣侯。 固辭不受。 宮城失</u> 還鎮。敕許之,乃於城西立盟。求遣召宣城王出送。岐固執宣城王嫡嗣之重,不宜許之。 乃遣石城公大款送之。及與景盟訖,城中文武喜躍,冀得解圍。岐獨言於衆曰:「賊舉兵爲 三年,遷中領軍,舍人如故。二月,侯景於闕前通表,乞割江右四州安置部下,當解圍

子孫競來取之。 虞愿字士恭,會稽餘姚人也。祖賚,給事中、監利侯。父望之早卒。 齊中庭橘樹冬熟, 愿年數歲獨不取,齊及家人皆異之。

司風 常丞,尚書祠部郎,通直散騎侍郎。 內省直,有異先啓,以 令史,風起方面,輒先啓聞。 宋元嘉中,爲湘東王國常侍。及明帝立,以愿儒吏學涉,兼蕃國舊恩,意遇甚厚。除太 相 檢察。 星文災變,不信太史,不聽外奏,敕靈臺知星二人給愿,常 帝性猜忌、體肥憎風、夏月常著小皮衣。拜左右二人爲

各五層。 德!尚書令袁粲在坐,爲之失色。帝大怒,使人驅曳下殿,[1]<]愿徐去無異容。以舊恩,少 曰:「陛下起此寺,皆是百姓賣兒貼婦錢,Cl+D佛若有知,當悲哭哀愍。 日中已復召入。 帝以故宅起湘宫寺,費極奢侈。 新安太守巢尚之罷郡還見帝,曰:「卿至湘宮寺未。我起此寺是大功德。」愿在側 以孝武莊嚴剎七層,帝欲起十層,不可立,分爲兩刹, 罪高佛圖, 有何功

饒借帝,曰:「皇帝飛碁,臣抗不能斷。」帝終不覺,以爲信然,好之愈篤。 愿又曰:「堯以此敎 |丹朱,非人主所宜好也。」雖數忤旨,而蒙賞賜猶異餘人。 遷兼中書郎。 帝好圍碁,甚拙,去格七八道,物議共欺爲第三品,與第一品王抗圍碁,依品賭戲。抗

· 久, 蘂不復効。 大漸日,正坐呼道人,合掌便絕。 曰:「此是奇味, 卿頗足不。」景文答曰:「臣夙好此物, 貧素致之甚難。」 帝甚悅。 食逐夷積 胸腹痞脹,氣將絕。左右啓飲數升酢酒,乃消。疾大困,一食汁滓猶至三升。水患積 帝寢疾,愿常侍醫藥。帝尤好逐夷,以銀鉢盛蜜漬之,一食數鉢。 謂揚州刺史王景文

不忍殺,放二十里外山中。一夜蛇還牀下。 兒婦,愿遣人於道奪取將還。 愿以侍疾久,轉正員郎。出爲晉平太守。曰己在郡不事生業。前政與百姓交關,質錄其 在郡立學堂教授。 復送四十里山,經宿復歸。 郡舊出髯蛇,膽可爲藥。 論者以爲仁心所 有遺愿蛇者,愿

致。 海邊有越王石,常隱雲霧,相傳云「淸廉太守乃得見」。 愿往就觀視,清徹無所隱蔽

後琅邪 王秀之爲郡,與朝士書曰:「此郡承虞公之後,善政猶存,遺風易遵,差得無 事。」

褚彦回嘗詣愿,愿不在,見其眠牀上積塵埃,有書數袠。

彦

回歎曰:「虞君之淸至於此。」令人掃地拂牀而去。

以

母老解職,除後軍將軍。

遷中書郞,領東觀祭酒。 兄季爲上虞令卒,愿從省步出還家,不待詔便歸東。 [II]除驍

騎將軍、遷廷尉、祭酒如故。

愿嘗事宋明帝,齊初,神主遷汝陰廟,愿拜辭流涕。 建元元年卒。 愿著五經論問,撰會

稽記,文翰數十篇。

歡 可自防。」答曰:「天下無洪範何有哉,蒼生方亂,豈可一日無公。」帝甚賞之。 女說洪範 王 一洪範,上谷人也。<a>[三]宋泰始中,魏剋青州,洪範得別駕淸河崔祖歡女,仍以 南 歸。 |朱桂陽王之難,隨齊高帝鎭新亭,常以身捍矢。 高帝曰:「我自有楯,卿 爲妻。 旭

初, 爲靑、冀二州刺史,悔爲晉壽時貨財所敗,更勵淸節。 後爲晉壽太守,多昧贓賄,爲州所按。 大懼,棄郡奔建鄴。 先是青州資魚鹽之貨,或强借百 高帝輔政、引爲腹 ڔڹ

列

姓麥地 者魂祭之。 倉等數戍。 以種 人人呼名,躬自沃酹,仍慟哭不自勝,因發病而亡。 後遇敗,死傷塗地,深自咎責。 紅花,多與部下交易,四日以前 利益。洪範至,一皆斷之。 乃於謝祿山南除地,廣設茵席,殺三牲,招戰亡 洪範旣北人而有清正,州人 啓求侵魏,得黄郭、鹽

永明中, 有江夏李珪之字孔璋,位尚書右丞,兼都水使者,歷職稱爲清能。 後兼少

府卒。

呼爲「虜父使君」,言之咸落淚

之,謂曰:「觀卿才幹,當居吾此職。」 獄 |瑀 沈瑀字伯瑜,吳興武康人也。父昶,事宋建平王景素。 臺陳請得冤罪,由是知名。 爲奉朝請,嘗詣齊尚書左丞殷瀰,瀰與語及政事,甚器 景素謀反,昶先去之,及敗坐繫

遙光,嘗使送人丁,速而無怨,遙光謂同使東曰:「爾何不學沈瑀所爲。」乃令瑀專知州獄事 瑀 **瑀以法繩之,衆憚其强。** 司 徒竟陵王子良聞瑀名,引爲府行參軍,領揚州部傳從事。 子良甚相知賞,雖家事皆以委瑀。 子良 時建康令沈徽学恃勢傲 薨, 瑀復事刺史始安王

益善之。 就作、三日便辦。 曰:「沈瑀必不枉鞭汝。」覆之果有詐。 湖熟縣方山埭高峻,冬月,公私行侶以爲艱。 爲建德令,敎人一丁種十五株桑、四株柿及梨栗,女子丁半之。人咸歡悅,頃之 揚州書佐私行,詐稱州使,不肯就作,再鞭之四十。 明帝復使瑶築赤山塘, 明帝使瑀行修之。 所費減材官所量數十萬。 書佐歸訴遙光,遙光 |瑪乃開四洪,| 斷行客

遂降。 |伯之泣曰:「余子在都。」|瑀曰「不然人情 匈 匈,皆 思 改 計,若不早圖,衆散難合」。 去官還都, 兼行選曹郎, 隨陳伯之軍至江州。 會梁武起兵圍郢城,瑀說伯之迎武帝

成林。

宅」。至是稱爲帝說之,帝曰:「雲得不死,此夢可驗。」及帝卽位,雲深薦瑀,自暨陽令擢兼 丞 尙書右丞。 如故。 初,瑀在寬陵王家,素與范雲善,齊末嘗就雲宿,夢坐屋梁柱上,仰見天中有字曰「范氏 | 踽薦族人沈僧隆、僧照有吏幹、帝並納之。 時天下初定,陳伯之言瑀催督運輸,軍國獲濟。帝以爲能,遷尙書駕部郎,兼右

息之。 訟 訴無所通,以法繩之。縣南又有豪族數百家,曰己子弟縱橫,遞相庇廕,厚自封植,百姓 以 母 ·憂去職,起爲餘姚令。縣大姓虞氏千餘家,請謁如市,前後令長莫能絕。 |瑪召其老者爲||石頭倉監,少者補縣僮,皆號泣道路,自是權右屏跡。 瑪初至,富吏 自 | 瑀到

皆鮮 足有蹉跌, 衣美服 輒加榜捶 以自彰別、瑪怒曰:「汝等下縣吏,何得自擬貴人」、悉使著芒屨粗布,侍立終日, **| 璃微時嘗至此鬻瓦器,爲富人所辱,故因以報焉。** 由是士庶駭怨。

踽廉潔自守,故得遂行其意。

害焉。三三子續累訟之。 行事邪。〕」瑀出,謂人曰:「我死而後已,終不能傾側面從。」是日於路爲人所殺,多以爲類達 性屈强,每件穎達,穎達銜之。天監八年,因入諮事,辭又激厲。 後爲安南長史、尋陽太守。 遇穎達尋卒,事不窮竟。續乃布衣蔬食終其身。 江州刺史曹景宗卒,仍爲信威蕭穎達長史,太守如故。 穎達作色日:「朝廷用君作 |瑀

衞 在宮多所諫爭、三三太子雖不能全用,然亦弗之罪也。 宋晉熙王 道惠曰:「此子必爲王者師。」齊文惠太子、竟陵文宣王幼時,齊高帝引述曾爲之師友,起家 率沈約 范述曾字子玄,一字穎彥,吳郡錢唐人也。 國侍 亦以述曾方汲黯。 郎。 齊初至南郡王國郎中令, 遷太子步兵校尉, 帶開陽令。 幼好學,從餘杭呂道惠受五經,略通章句。 竟陵王深相器重,號爲周舍。 述曾為 人騫諤, 太子左

明帝即位,爲永嘉太守。 爲政清平,不尙威猛,甿俗便之。所部橫陽縣山谷嶮峻,爲

將軍。 者二百餘家。 逋 逃所聚,前後二千石討捕莫能息。述曾下車,開示恩信,凡諸凶黨,褟負而出,編 郡送故舊錢二十餘萬,一無所受,唯得白桐木火籠朴十餘枚而已。 自是商旅流通,居人安業。勵志清白,不受饋遺。 明帝下詔襃美,徵爲游擊 戶屬籍

言,著雜詩賦數十篇。 爲太中大夫。 東昏時,拜中散大夫,還鄉里。 述曾生平所得奉祿,皆以分施,及老遂壁立無資。 梁武帝踐阼, 乃輕行詣闕,仍辭還。 以天監八年卒。 武帝下詔褒美,以 注易交

後有吳興丘師施亦廉潔稱,罷臨安縣還,唯有二十籠簿書, 並是倉庫劵帖。 當時以比

述曾。位至臺郎。

不受。 清愼强記,縣人號爲神明。 放還家。奉秩出吏人者,悉原除之。郡境翕然,威恩大著。 **謙將述職,敕募千人自隨。** 孫謙字長遜,東莞莒人也。 至郡,布恩惠之化,蠻膫懷之,競餉金寶。 謙曰:「蠻夷不賓,蓋待之失節耳。 宋明帝以爲巴東、建平二郡太守。 客居歷陽,躬耕以養弟妹,鄉里 謙慰喻而遺,一無所納。及掠得生口,皆 何煩兵役,以爲國費。」固辭 一稱其敦睦。 郡居三峽,恒以威力鎭之。 仕宋爲句容令,

一七一六

視 事 ,三年,徵還爲撫軍中兵參軍,遷越騎校尉、征北司馬。 府主建平王將稱兵,患謙强

直,託事遣使至都,然後作亂。及建一誅,遷左軍將軍 公三。

齊初,爲錢唐令,御煩以簡, 獄無繋囚。 及去官,百姓以厭在職不受餉遺,追載練帛以

送之。謙辭不受。每去官輒無私宅,借空車廐居焉。

永明初,爲江夏太守,坐被代輒去郡,繫尙方,頃之,殆爲中散大夫。 明帝將廢立, 欲引

謙 爲 心膂,使氣衞尉,給甲仗百人。 謙不願處際會,輒散甲士,帝雖不罪而弗復任焉

天監六年,爲零陵太守,年已衰老,猶强力爲政,更人安之。

先是郡多猛獸暴,謙至

絕 迹。 及去官之夜,猛獸卽害居人。 謙爲郡縣,常勤勸課農桑,務盡地利,收入常多於

鄰境。

梁

笑 (之曰:「朕當使卿智,不使卿力。」十四年,詔 九 年,以老徵爲光祿大夫。及至,帝嘉其淸潔,甚禮異焉。 加優秩,給親信二十人,幷給扶。 毎朝見,猶請劇職自効。

冷 到 夏 熱不 日 公門。 無幬 謙 自 調,卽時猶渴。」謙退遣其妻。 少及老,歷二縣 力於仁義,行己過人甚遠。 帳 一而 夜臥未嘗有蚊蚋,人多異焉。 五郡、江北所在廉潔。 從兄靈慶嘗病寄謙,謙行出,還問 有彭城劉融行乞,疾篤無所歸,友人興送謙舍,謙開聽 年逾九十,强壯 居身儉素,牀施蘧蒢屛風。 如五六十者。 起居,靈慶曰:「向 冬 則· 每朝會, 輒先衆 布被莞席。 飲

事以受之。 及融死,以禮殯葬,衆咸服其行義。末年,頭生二肉角,各長一寸。

足周 車過 常所乘者爲魂車,他無所用。」第二子貞巧,乃織細廢裝轜,以篾爲鈴佩,雖素而華。 哀,甚悼惜之。 三代,官成兩朝,如我資名,或蒙贈諡,自公體耳。 身,擴足容柩。 精,非吾志也。 十五年,卒官,時年九十二。 臨終遺命諸子曰:「吾少無人間意,故自不求聞達,而仕 士安束以蘧蒢,王孫倮入后地,雖是匹夫之節,取於人情未允。 氣絕卽以幅巾就葬,每存儉率。 直僦轜牀,裝之以廢。 今使棺 帝爲舉 比 見 轜 歷 以

政 蹋 陵 要每 丞。 高 面 天監初,沈約、范雲當朝用事,廉傾意奉之。及中書舍人黃睦之等,亦尤所結附。 食、廉必日進滋旨、皆手自煎調、不辭勤劇、遂得爲列卿、御史中丞、晉陵吳興太守。 不 爽 從子廉字思約。父奉伯位少府卿、淮南太守。至三廉便辟巧宦,齊時已歷大縣,尚書右 武 知嗔,齧齒作步數,持此得勝人。」譏其不計恥辱,以此取名位。 有險薄才,客於廉,廉委以文記。爽嘗有求不遂,乃爲屐謎以喻廉曰:「刺鼻不知嚏, (帝嘗曰:「東莞二孫,謙、廉而已。」 然處官平直,遂以善 凡 廣 貴

列

求迎 發覺, 尙 ·書令蕭懿,懿深保匿焉。 梁武帝, 何 遠踰垣以免,融遇禍, 一遠字義方,東海鄉人也。 父慧炬,齊尚書郎。 肅遣兵援送。 會赦出。頃之,懿遭難,子弟皆潛伏,遠求得懿弟融藏之。 武帝見遠謂張弘策曰:「何遠丈夫,而能破家報舊德,未易 遠家屬繫尚方。 遠遂亡度江,因降魏。 遠仕齊爲奉朝請,豫崔慧景敗亡事,抵 入壽陽見刺史王肅 旣而

知無不爲。 武帝踐作,以奉迎勳,封廣興男,爲後軍鄱陽王恢錄事參軍。 恢亦推心仗之,恩寄甚密。 遠與恢素善,在府盡其志

及

也。」(三五

乾 時 如 此。 土 魚數片 俗皆汲江 大 遷武昌太守。 跡雖 夫 坐法皆不受測,遠度已無贓 而 水,盛夏,遠患水溫,每以錢買 已。 似偽,而能委曲 然性剛嚴,吏人多以細事受鞭罰,遂爲 遠本倜儻,尙輕俠。至是乃折節爲吏,杜絕交游,饋遺秋毫無所受。 用意。 車服尤弊素,器物 ,就測立三七日不款,猶以私 人井寒水。 無 不 人所訟,徵下廷尉,被劾十 **然銅漆。** 取 錢者,則摙 江 左水族甚賤,遠 藏禁仗除名 水還之,其 數條。 他 毎 事率多 食不過

帳 以待焉。如②至武康,遠獨設糗水而已。 後 武 康令, 愈厲廉節,除 .淫祀,正身率職,人甚稱之。 彬去,遠送至境,進斗酒隻鵝 太守王彬巡屬縣,諸 而別。 |彬戲曰:「卿 縣皆盛供

之有也。 桂州、「三」緣道多剽掠,入始興界,草木無所犯。 有過陸納,將不爲古人所笑乎。」武帝聞其能,擢爲宣城太守。 郡經寇抄,遠盡心綏理,復著名迹。 春年,**遷樹功將軍、始興內史**。 時泉陵侯 自縣為近畿大郡,近代未 朗爲

在 在吳頗有酒失。 惜之,所至皆生爲立祠,表言政狀,帝每優詔答焉。 取,歲暮擇人尤窮者充其租調,以此爲常。然其聽訟猶人也,不能過絕。 東陽歲餘,復爲受罰者所謗,坐免歸。 遠在官好開途巷,修葺牆屋,人居市里,城隍廐庫,所過若營家焉。 遷東陽太守。 遠處職,疾强富如仇讎,視貧細如子弟,特爲豪右所畏憚。 後歷給事黃門侍郎,信武將軍,監吳郡 田秩奉錢,並無所 而性果斷,人畏而

之,不能記也。 妻子飢寒如下貧者。及去康陽歸家,經年歲,口不言榮辱,士類益以此多之。 以顏色下人。是以多爲俗士所疾惡。其淸公實爲天下第一。 人之急,言不虛妄,蓋天性也。 遠性耿介,無私曲,居人間絕請謁,不造詣。 後爲征西諮議參軍、中撫軍司馬,卒。 每戲語人云:「卿能得我一妄語,則謝卿以一練。」衆共伺 與貴賤書疏,抗禮如一。其所會遇,未嘗 居數郡,見可欲終不變其心, 其 輕 財好義,

封

事,其略曰:

ー七二〇

事,不 郭 ·見用。 祖 選爲長兼南梁郡丞,徙後軍行參軍。 人也。 梁武帝初起,以客從。 後隨蔡道恭在司州。 帝溺情內教,朝政縱弛,祖深輿櫬詣闕上 陷北還,上書言境上

貪 者淪溺溝壑,曲鉤者升進重沓。飾口利辭,競相推薦,訥直守信,坐見埋沒。勞深勳 厚,祿賞未均,無功側入,反加寵擢。昔宋人賣酒,犬惡致酸,陛下之犬,其甚矣哉。 **《穢遂生。頗由陛下寵勳太過,馭下太寬,故廉潔者自進無途,貪苛者取入多徑,直**弦 大梁應運,功高百王,慈悲旣弘,憲律如替。愚輩罔識,褫慢斯作。〔三〕各競奢侈,

也。 歲尙 務。 不務農桑,空談彼岸。夫農桑者今日濟育,功德者將來勝因,豈可墮本勤末,置邇効賒 擢 今商 學,置立五館,行吟坐詠,誦聲溢境。比來慕法,普天信向,家家齋戒,人人懺禮, 而 臣 聞 以 「郡縣苛暴,不加勸獎,今年豐歲稔,猶人有飢色,設遇水旱,何以救之。陛下昔 階 旅 人為 《轉繁,游食轉衆,耕夫日少,杼軸日空。 級,惰耕織者告以明刑。 國本,食爲人命,故禮曰國無六年之儲,謂非其國也。推此而言,農爲急 如 此 數年,則家給人足,廉讓 陛下若廣興屯 可 田,賤金貴粟,勤農 生

損 物圖己。 夫 君子 道人者害國小人也,忠良者捍國君子也。臣見疾者詣道士則勸奏章,僧尼 小人,智計 不同、君子志於道、小人謀於利。 志於 道者安國濟 人,志於利者

容宥, 輕。 臣 則 則 類 · 恇 有 療病當 令齋講,俗師則鬼禍須解,醫診 勉 使 息謀 而 臣言 (捨) 說 乖 去巫鬼, 外甸, ·件貴 入身滅 內 臣, 則 使 臣 尋華、扁 有雲、旻。 中國 則 何 禍 所恨 在 土 不 女 為國 測 南望懷冤,若賈誼 雲、晏所 |當黜| 則湯熨散丸,皆先自爲 所 以不 議 佞 邪 則 傷俗盛法,勉、捨之志唯顧安枕江東。 用管、 鑊 重生,豈不慟哭。 區 區 晏。 必聞 也。 **今之所任,腹背之毛** . 者,正以社 臣謂 臣 爲國之本,與療 今直言犯顏 心酸計 重而 耳。 螻 蟻 罪 病 主 論 或 慈 外 相

逆耳。 縱。 爾 ? 節 百僚 諫 卿 伏 法 夫謀臣 爭是誰 願 者 士,尠: 過實在 去貪濁,進 人之父母, 良將, ·? 有奉公,尸 下 執 而讁見於上,遂使聖皇降誠、「言」躬自引 事皆同 何代無之, 廉平 惠者 禄 」, 明 IIII 人之仇讎,法嚴則 競 不 利, 法 貴在 和 令、嚴 **、答問唯** 不尙 見知, 刑 廉 罰 潔。 要在 唯 ,禁奢侈,薄賦斂,則 而 人 累金積 用耳。 已。 思善,德多則 入對 一般, 陛 侍列 則言聖旨 下皇基兆運二十餘載, 咎, 物 宰輔晏 如 生惡 天下幸甚。 仙, ·神夷, 不 然, 惡不 田 曾 出 不 可 謹 無謙 論 商 長,欲 Ŀ 則 封 臣 何 退。 云 子之 故 誰 不 可 敢 而 且

十九條,伏願抑獨斷之明,少察愚瞽。

時帝 大弘 釋 典 將 以易俗,故祖深 尤言其 事 下,條 以爲

都 下佛 寺 五 百 1餘所, 窮極宏麗。 僧尼十餘萬, 資產豐沃。 所在郡縣, 不可勝言

列

傳

農。 皆服 道人 羅 又有白徒,尼則皆畜養女,皆不貫人籍,天下戶口幾亡其半。 罷白徒養女,聽畜奴婢。 紈,其蠹俗傷法, 抑由於此。 婢唯著青布衣,僧尼皆令蔬食。 請精加 檢括, 若 無道行,四十已下,皆使還俗附 如此,則法興俗盛,國富 而僧尼多非法,養女

人殷。

不然,恐方來處處成寺,家家剃落,尺土一人,非復國有。

梁興 任用 Ļ 狼。 降,蕩滌惟始,而監符猶 篚,使人納重貨,許立空文。 又遣押使至郡,州郡競急切,同趣下城。 籍,同籍又叛,則取比伍,比伍 三津,名在遠役,身歸鄉里。 或有身殞戰場,而名在叛目, (以來)發人征役,號爲三五。 ,皆募部曲。 江、湘人尤受其弊。 朝廷擢 用 、勳舊, 而揚、除之人,逼以衆役,多投其募,利其貨財。 爲三陲州郡,不顧御人之道,唯以貪殘爲務。 下舊日,限以嚴程。 自三關以外,是處遭毒。 其百里微欲矯俗,則嚴科立至,自是所在恣意貪利,以事 又懼本屬檢問,於是逃亡他境,僑戶之興,良由此故。又 又叛, 及投募將客,主將無恩,存卹失理,多有物故,輒 監符下討, 則望村而取。 令宰多庸才,望風畏伏。 上不任信下,〔邑〕轉相督促。 稱爲逋叛,錄質家丁。 而此勳人投化之始,但有一身,及被 一人有犯,則合村皆空。 皆虛名上簿,止送出 於是斂戶課,薦其筐 迫脅良善,害甚豺 合家叉叛,則 臺使到 雖肆: 州,州 一
告
時 刺叛 取 同

陳在 請斷界首將生口 喪,被起爲 吳郡 入北,及關津廢替,須加糾擿」,又言「廬陵年少,不宜鎭襄陽,左 ,曾無辭讓」。 其言深 刻。 叉「請復郊四星」。 帝雖 不能 悉 用,然 嘉 僕 其正 射王

擢

爲豫章鍾

陵令,員外散騎常侍。

不避 干。 南太守畏之如 及至 强 普通七年,改南 禦, 南州 動 致 上府 ,公嚴清 刑辟。 州津爲南津校尉, 刻。 奏江 || 刺刺 由來王侯勢家出 史邵 陵王、 以祖深爲之。 太子詹事周捨贓罪。 入津、這一不忌憲綱,俠藏亡命。祖深搜檢姦惡 加雲騎將軍,秩二千石。 遠近 側足,莫敢 使募部曲二 從縱恣。 淮

近,長江 中嘗 貨 有賊 () 鞭而 常服故 一肅清 祖深 徇 布 衆 襦,素· 自 、率討之,列陣未敢進,仍令所親人先登,不時進,斬之。 朝 野憚之,絕於干 木案, 食不過一 請。 肉。 所領皆精兵,令行禁止。 有姥餉一早青瓜,祖深報以疋帛。 有 :所計 逐大破; 逐,越境追 後 有富 賊,威振遠 人効之 江

郡 縣 之職, 論 日 外 善政之於 無 横擾 勸賞威刑,事多專斷,尺一詔書,希經邦邑。 **殖良工之於埴** 也, 用 功寡 而 成器多焉。 漢世 東居官者或長子孫,皆敷 戶 口 殷盛 刑 務 簡闊

列

傳

-- L-

德政以盡人和,興義讓以存簡久。故龔、黃之化,易以有成。降及晚代,情僞繁起,人減昔 時,務殷前世。 則武城弦歌,將有未暇,淮陽臥鎮,如或可勉。 立績垂風,難易百倍。若以上古之化,御此世之人,今東之良,撫前代之俗, 未必今才陋古,蓋化有醇薄者也。

校勘記

- 孝武末年 按此孝武謂晉孝武帝曜,下「及孝武承統」,謂宋孝武帝駿。
- 突不得黔席未暇暖 「席」各本作「竈」。按文選班固答賓戲:「孔席不喚同暖,墨突不黔。」突,煙
- 囱;席,座位。 宋書作「席未暇煖」,是。今據改。
- 遷徐州刺史監徐兗二州豫州之梁郡諸軍事 「之」字各本並脫,據宋書補。
- [B] 語令且去 「令」宋書作「今」。
- 35. 晚度北 人南朝常以傖荒遇之 「北人」各本作「北入」,據宋書改。 按「晚度北人」、謂北人渡江
- C六〕坦恒以此慨然 「此」字各本並脫、據宋書、通志補。

之後者。

 $\overline{}$ -□ 亡曾祖 難河西」,此不得云「亡高祖播遷涼土」,宋書是。 因晉氏喪亂播遷涼土 「曾祖」各本作「高祖」,據宋書改。 按坦爲驥兄,上云「會祖耽避

- <u>ス</u> 申恬字公休 「申恬」各本作「申怙」,據宋書、 通志改,下同。 按太平御覽六三四引徐爱朱書:
- 申恬字道獻
- . ≯. ∪ 杜慧度交阯朱戴人也 書宋武帝紀亦作「杜慧度」。 「杜慧度」各本作「杜慧慶」,總目、傳目同。 王懋竑讀書記疑、王鳴盛十七史商権六四並云「度」是「慶」非、此傳 宋書良吏傳作「杜慧度」,本
- 誤。 今從改。
- 有如居家 「居家」朱書作「治家」,此避唐諱改。
- 及繼父爲刺史 「及」各本作「乃」,據宋書改。
- 「王徽」朱書文帝紀作「王徽之」。

文帝以廷尉王徽爲交州刺史

- 阮長之字景茂 「景茂」宋書作「茂景」。
- 宋家狼 狽 輸送 「宋家」各本作「繆家」,誤,今改正
- 二吾 刺史王彧行縣 夜還 「縣」字各本並脫,據通志 補。
- 二公 二年明遣使還述魏欲通和好 「二年」各本作「三年」,據梁書改。 按下「三年,遷中領軍」, 明此
- 爲「二年」之譌。
- 口也 皆是百姓賣兒貼婦錢 「錢」字各本並脫,據南齊書補。
- 列 使人驅 傳 第 曳下殿 六 + 校 「驅」各本作「馳」,據南齊書改。 勘 記

- [12] 出爲晉平太守 「晉平」各本作「晉安」,據南齊書改。
- [10] 不待詔便歸東 「待」各本作「得」,據南齊書改
- 王洪 . 範上谷人也 「王洪範」各本及本書蠕蠕傳作「王洪軌」。 南齊書張沖傳、芮芮傳亦作「王洪

範。。 軌」。然本書齊高帝紀、江脳傳及南齊書明帝紀建武元年、柳世隆傳、江脳傳、魏虜傳悉作「王洪 通鑑齊高帝建元元年「帝遣王洪範約柔然寇魏」 考異云:「齊書作『王洪軌』,今從齊紀。」

今依通鑑一律改爲「王洪範」。

- 三〕多與部下交易「易」字各本並脫,據通志補。
- 縣南又有豪族數百家 「有」字各本並脫,據梁書、册府元龜七〇四補。
- [18] 多以爲穎達害焉 「爲」字各本並脫,據梁書補。
- 在宮多所諫爭 「在宮」各本作「在官」,據梁書改。 按此在宮,指在太子東宮。
- 號資敍均甚高,謙齊初尙爲錢唐令,疑當從册府元龜作「左軍參軍」。 遷左軍將軍 梁書作「左將軍」,册府元龜七一九作「左軍參軍」。 按「左將軍」或「左軍將軍」軍
- 謙自 少及老歷 二縣五 郡 按據謙傳、謙祇歷巴東、建平、江夏、零陵四郡太守、疑「五郡」有譌。
- 父奉伯位 少府卿淮南太守 張森楷南史校勘記云:「宋書明帝紀作南譙太守,隋書經籍志作南

海太守。」未知孰是。

- [11元] 未易及也 「及」各本作「人」、據册府元龜九四九改。
- [WO] 諸縣皆盛供帳以待焉 各本並脫「縣」字,據梁書補。
- [M]] 時泉陵侯朝爲桂州 「朗」梁書作「淵朗」,此避唐諱省。
- [三] 褫慢斯作 册府元龜五四一作「悖慢斯作」。
- [三] 遂使聖皇降誠 「降誠」册府元龜五四一作「降誡」。
- [ME] 上不任信下 「不」各本譌「下」,今改正。
- CI至〕由來王侯勢家出入津 「津」册府元龜二○○作「南津」。

南史卷七十

列傳第六十一

儒林

伏曼容 子暅 **陋子挺** 何佟之 嚴植之 司馬筠 **卞**華 崔靈恩

孔 僉 盧廣 沈峻 太史叔明 峻子文阿 孔子袪 皇侃 沈洙

顧越 襲孟舒 沈不害 王元規 陸慶

戚衮

鄭灼

張崖

陸

詡

沈德威

賀德基

全緩

張譏

矣。 缺。 其後 及漢武帝 蓋今之儒者,本因古之六學,以弘風正俗,斯則王政之所先也。 太學 生徒、動至萬數、郡國黌舍、悉皆充滿、其學於山澤者、或就而爲列肆焉。 時,開設學校,立五經 博士,置弟子員, 射策設科, 勸以官祿,傳業者 自秦氏坑焚, 位故益 其道 用 故 衆

列

傅

第

六

+

儒

林

宗室、王侯始就學受業,武帝親屈輿駕,釋奠於先師先聖,申之以讌語,勞之以東帛,濟濟 學生遣就會稽雲門山,受業於廬江何胤,分遣博士、祭酒,到州郡立學。 館,公卿罕通經術,朝廷大儒,獨學而弗肯養衆,後生孤陋,擁經而無所講習,大道之鬱也久 以迄宋、齊,國學時或開置,而勸課未博,建之不能十年,蓋取文具而已。是時鄉里莫或開 自 未遑也。 徒,雖議 焉,洋洋焉,大道之行也如是。 士各一人。於是以平原明山賓、吳郡陸璉、吳興沈峻、建平嚴植之、會稽賀瑒補博士,各主 一館。 兩漢登賢,咸資經術。洎魏正始以後,更尚玄虛,公卿士庶,罕通經業。時荀顗、摯虞之 館有數百生,給其餼稟,其射策通明經者,卽除爲吏,於是懷經負笈者雲會矣。 至梁武創業,深愍其弊,天監四年,乃詔開五館,建立國學,總以五經教授,置五經博 創制,未有能易俗移風者也。 天嘉以後,稍置學官,雖博延生徒, 及陳武創業,時經喪亂,衣冠殄瘁,寇賊未寧,敦獎之方,所 自是中原橫潰,衣冠道盡。 成業蓋寡。 其所采綴,蓋亦梁之遺儒,今並集 逮江左草創,日不暇給, 七年,又詔皇太子、 叉選

之,以備儒林云。

探微畫叔夜像以賜之。 好周易,嘗集朝臣於清暑殿講,詔曼容執經。 事,以吾觀之,晏了不學也。 曼容早孤, 與母兄客居南海。 爲尙書外兵郎 故知平叔有所短。」聚徒教授以自業。 少篤學,善老、易,倜儻好大言。 ,嘗與袁粲罷 曼容素美風采,明帝恒以方嵇叔夜,使吳人陸 朝相會言玄理 ,時論以爲一臺二絕。 爲驃騎行參軍。 常云:「何晏疑場中 宋明 帝 九

昇明末,為輔國長史、南海太守,至石門作貪泉銘

輒升 將軍 薨。 建武 齊建元 高坐爲 王儉深相愛好,令與河內司馬憲、吳郡陸澄共撰喪服義。〔〕及竟,又欲與定禮樂,會儉 中,拜中散大夫。 講說,生徒常數十百人。 中,上書 勸封禪,高帝以爲其禮難備,不從。 時明帝不 重儒術,曼容宅在瓦官寺東,施高坐於聽事, **仕爲太子率更令,侍皇太子講。** 有賓客, 衞

|梁臺建,召拜司徒司馬,出爲||臨海太守。 天監元年卒官,年八十二。

曼容多伎術,善音律,射馭、風角、醫算,莫不閑了。 爲周易、毛詩、喪服集解,老、莊

語義。子順。

令。 時曼容已致仕,故頻以外職處臍,令得養焉。 **晒字玄曜,幼傳父業,能言玄理,與樂安任昉、彭城劉曼俱知名。** 仕齊位東陽郡丞、鄞

列傳第六十一 儒林

梁武 帝 踐 作,兼五經博士,與吏部尚書徐勉、中書侍郎周捨總知 五. 禮

登者,輒以太守田米助之。 以 聞 出 爲 詔勘有十五事 永陽 內史,在郡清潔,政務安靜,郡人何貞秀等一 爲吏人所懷,帝善之。 郡多麻苧,家人乃至無以爲繩,其厲志如此。 徙新安太守,在郡清恪如永陽 百五十四人詣州言狀 屬縣始新、遂安、 時。 湘 人賦稅不 州 刺

滿,多託疾居家。 平,宜加將養,勿使恚望,致虧士風,可豫章內史。』豈有人臣奉如此之詔,而不亡魂破膽,歸 得稱功? 入東之始,貨宅賣車,以此而推,則是本無還意。避歷典二邦,少免貪濁,此自爲政之本,豈 大不敬論。」有詔勿論,暅遂得就郡 武 海寧並同 將軍、監吳郡事。 [聽卑,無私不照。 書侍御史<u>虞</u>嚼奏曰:「風聞豫章內史伏暅,去歲啓假,以迎妹喪爲辭,因停會稽不去 徵 爲國子博士,領長水校尉。 常謂人才品望居何遠之右,而遠以淸見擢,名位轉隆。回膻深懷誹怨,形於辭色。 '時生爲立祠 而冒寵不辭,吝斯苟得。故以士流解體,行路沸騰,辨跡求心,無一可恕。請以暅 轉求假到東陽迎妹喪,因留會稽築宅,自表解職。詔以爲豫章內史,乃出 去年十二月二十一日下詔曰:『國子博士、領長水校尉伏暅爲政廉 時始興內史何遠累著清績, 武帝擢為黃門侍郎, 俄遷信

徵爲給事黃門侍郎,領國子博士,未赴卒。

齊末已爲司徒左長史,暅獨滯於參軍事,〔三及終名位略相侔。暅性儉素,車服粗惡,外雖退 靜,內不免心競,故見譏於時。 然能推薦後來,常若不及,少年士子或以此依之。 子挺。 初,暅父曼容與樂安任遙皆昵於齊太尉王儉,遙子昉及暅並見知。頃之,昉才遇稍盛,

挺字士標,幼敏悟,七歲通孝經、論語。及長,博學有才思,爲五言詩,善効謝康樂體。

父友<u>樂安任</u>防深相歎異,常曰:「此子日下無雙。」齊末,州舉秀才,對策爲當時第一。[E]

監初,除中軍參軍事。居宅在潮溝,於宅講論語,聽者傾朝。 梁武帝師至,挺迎謁於新林,帝見之甚悅,謂之顏子,引爲征東行參軍,時年十八。天 挺三世同時聚徒教授、罕有其

累爲晉陵、武康令。罷縣還,仍於東郊築室,不復仕。

邵陵王爲江州,攜挺之鎭。 侍御史。 挺少有盛名,又善處當世,朝中勢素多與交游,故不能久事隱靜。後遂出仕,除南臺書 因事納賄被劾、懼罪,乃變服出家名僧挺,久之藏匿,後遇赦,乃出天心寺。三會 王好文義,深被思禮。挺不堪蔬素,因此還俗。侯景亂中卒。

音邇說十卷,文集二十卷。

子知命,以其父宦途不進,怨朝廷,後遂盡心侯景。襲郢州,圍巴陵,軍中書檄皆其文

一七三四

也。言及西臺,莫不劇筆。 及景篡位,爲中書舍人,權傾內外。 景敗,被送江陵,於獄幽死。

挺弟捶亦有才名,爲邵陵王記室參軍。

何佟之字士威,廬江灊人,晉豫州刺史惲六世孫也。 祖邵之、宋員外散騎常侍。父啟、

齊奉朝請。

儉雅相推重。起家揚州從事,仍爲總明館學士。仕齊,初爲國子助教,爲諸生講喪服,[於] <u>佟之少好三禮,師心獨學,强力專精,手不輟卷。讀禮論三百餘篇,略皆上口。太尉王</u>

結草爲絰,屈手巾爲冠,諸生有未曉者,委曲誘誨,都下稱其醇儒。

父母亡後,常設一屋,晦朔拜伏流涕,如此者二十餘年。當世服其孝行。 生講論,孜孜不怠。性好潔,一日之中洗滌者十餘過,猶恨不足,時人稱爲水淫。有至性, 唯修之而已,當時國家吉凶禮則皆取決焉。後爲驃騎司馬。永元末,都下兵亂,修之常集諸 建武中,爲鎭北記室參軍,侍皇太子講。時步兵校尉劉瓛、徵士吳苞皆已卒,都下碩儒

発官。 于時又有遂安令劉澄,爲性彌潔,在縣掃拂郭邑,路無橫草,水翦蟲穢,百姓不堪命,坐 然甚貞正,善醫術,與徐嗣伯埓名。子聰能世其家業。

門侍 時百 郎,儒者榮之。 度草創 修之自東昏卽位,以其兇虐, , 佟之依禮定議, 所著文章禮議百許篇。 ,多所裨益。 乃謝病,終身不涉其流。[4]梁武帝踐阼,以爲尚書左丞 天監 子朝隱 二年卒官。 、朝晦 故事 了左丞無贈官者,帝**特**詔

習鄭氏禮 嚴植之字孝源,建平秭歸 周易、毛詩、左氏春秋。 人也。 性淳孝謹厚,不以所長高 少善莊、老、能玄言、精解喪服、孝經、論語。 人。 少遭父 憂, 因菜食二十 及長, 偏

跣送 喪墓所 仕 齊爲廣漢王國右常侍,仍侍王讀。 ,爲起冢,葬畢 乃還。 當時義之。 及王誅、國人莫敢視、植之獨奔哭、手營殯斂、 後爲康樂令。 植之在縣清白,人吏 ?稱之。 徒

登講 受稟奉,妻子 授,以植之兼 五. 梁天 館 監 生 三年, 華至, · 困乏。 近經 博 詔 聽者千餘人。 及卒,喪無所 士。 求 通儒 植之館在潮溝, 修五 禮,有司奏植之主凶 寄,生徒爲市宅,乃得 遷中撫記室參軍, 生徒常百數。 猶 禮。 兼 成 講 喪。 博士。 說 四年, 有 腽 卒於館。 初置 段次第, 丘五經博· 析 植之自疾後 理 士, 分 明 各開館 便 毎 敎

植之性慈仁,好行 陰德,在闇室未嘗怠也。 少嘗山行,見一 患者,問其姓名不能答。 載

列

之,經年而愈。 側、問之、云「姓黃、家本荆州、爲人傭賃。 與 八俱歸, 爲營醫藥,六日而死,爲棺斂殯之,卒不知何許人也。 請終身充奴僕以報厚恩。 植之不受,遺以資糧遣之。所撰凶禮儀注四百七 疾篤,船主將發,棄之于岸」。植之惻然,載還療 又嘗緣栅塘行,見患人 八臥塘

見殺。 宜見殺。」武叱令速去。答曰:「死生命也,君見事不捷,便以義師爲賊。」武捨之去,尋兵至 文,齊奉朝請,始安王遙光使掌文記。遙光之敗,曹武入城見之,端曰:「身蒙始安厚恩,君 司 **语筠字貞素,河內溫人也。晉譙王承七代孫。祖亮,宋司 空從事中郎。父端字敬**

天監初爲暨陽令,有淸績。入拜尚書祠部郎。 筠 少孤貧好學,師沛國劉瓛,强力專精,深爲瓛所器。及長,博通經術,尤明三禮。

服慈母之黨,婦又不從夫而服慈姑,小功服無從故也。』庾蔚之云:『非徒子不從母而服其 詔 不許、還攝本任。而太妃在都,喪祭無主。中書舍人周捨議曰:「賀彦先稱:『慈母之子不 七年,安成國太妃陳氏薨,江州刺史安成王秀、荆州刺史始興王憺,並以慈母表解職,

之慈母也。自己故夫子得有此對,豈非師保之慈母無服之證乎。鄭玄不辨三慈,混爲訓釋, 之,內則所言諸母,是謂三母,非兄弟之母明矣。 以知之。若是兄弟之母其先有子者,則是長妾。長妾之禮,實有殊加,何容次妾生子,乃退 次爲保母。』[10]此其明文。此言擇諸母,[11]是擇人而爲此三母,非謂擇取兄弟之母也。 旣 母 疑。」於是筠等請依制改定嫡妻之子,母沒爲父妾所養,服之五月,貴賤並同,以爲永 **交相顯發,則知慈加之義,[[]]通乎大夫以上矣。** 自 引彼無服,以注慈己,後人致謬,實此之由。經言『君子子』者,此雖起於大夫,明大夫猶爾, 成保母,斯不可也。又有多兄弟之人,於義或可,若始生之子,便應三母俱闕邪?由是推 也。 斯以上,爾應不異。 無其服,則此慈母亦無服矣。〔亞內則云:『擇於諸母與可者,使爲子師。其次爲慈母,其 其三則子非無母,正是擇賤者視之,義同師保,而不無慈愛,故亦有慈母之名。 故傳云『君子子者,貴人之子也』。總言曰貴,無所不包。 子游所問,自是師保之慈母,非三年小功 宋代此科,不乖禮意,便加除削,良是所 經傳互文, 制。 師保 何

下華字昭岳,濟陰宛句人,晉驃騎將軍**還六世孫也**。 父倫之,齊給事中。

後

爲尚書左丞,卒於始興內史。

子濤傳父業,明三禮,位尚書祠部郎,曲阿令。

陽同業友善。 析理,爲當時之冠。 華幼孤貧好學,年十四,召補國子生,通周易。及長,偏習五經,與平原明山賓、會稽賀 梁天監中,爲安成王功曹參軍,兼五經博士,聚徒敎授。 江左以來,鍾律絕學,至瞱乃通焉。 位尚書儀曹郎,吳令,卒。 華博涉有機辯,說經

解,不爲江東所行,乃改說杜義。每文句常申服以難杜,遂著左氏條義以明之。 采,及解經析理,[IE]甚有精致,都下舊儒咸稱重之。 監十三年歸梁,累遷步兵校尉,兼國子博士。 靈恩聚徒講授,聽者常數百人。 僧誕又精杜學,因作明杜難服以答靈恩,世並傳焉。 亦數百人。該通義例,當世莫及。 崔靈恩,清河東武城人也。 少篤學,福習五經,尤精三禮、三傳。 助教孔僉尤好其學。 僧誕會稽餘姚人,以左氏教授,聽者 仕魏爲太常博士。 靈恩先習左傳服 性批朴,無風 時助教虞

先是儒者論天,互執渾蓋二義,論蓋不合渾,論渾不合蓋。 出爲長沙內史,還除國子博士,講衆尤盛。 又出爲桂州刺史,卒官。 靈恩立義,以渾蓋爲一

靈恩集注毛詩二十二卷,集注周禮四十卷,制三禮義宗三十卷,日吾左氏經傳義二十二

卷,左氏條例十卷,公羊、穀梁文句義十卷。

數百人。三爲五經博士,後爲海鹽、山陰二縣令。」儉儒者不長政術,在縣無績。 孔愈、會稽山陰人、少師事何胤、通五經、尤明三禮、孝經、論語。講說並數十編,生徒亦 太清亂,卒

子淑玄,頗涉文學,官至太學博士。」成兄子元素又善三禮,有盛名,早卒。

於家。

長史,卒官。 辭鄙拙,唯廣言論清雅,不類北人。 僕射徐勉兼通經術,深相賞好。 兵校尉,兼國子博士。編講五經。時北來人儒學者有崔靈恩、孫詳、蔣顯並聚徒講說,而音 盧廣,范陽涿人,自云晉司空從事中郞諶之後也。少明經,有儒術。天監中歸梁,位步 後爲尋陽太守、武陵王

沈峻字士嵩,吳興武康人也。 家世農夫,至峻好學。 與舅太史叔明師事宗人沈麟士,

助敎。 官,乃啓峻及孔子袪補西省學士,助撰錄。書成,入兼中書通事舍人。出爲武康令,卒官。 書,實爲羣經源本。 在門下積年,晝夜自課。 受業,莫不歎服,人無間言。弟謂宜卽用此人,令其專此一學,周而復始,使聖人正典廢而 不至,唯助教沈峻特精此書,比日時開講肆,羣儒劉嵒、沈宏、沈熊之徒,並執經下坐,北 更興。」勉從之。奏峻乘五經博士,於館講授,聽者常數百人。及中書舍人賀琛奉敕撰梁 傳峻業者,又有吳郡張及、會稽孔子雲,官皆至五經博士、尙書祠部郎。 時更部郞陸倕與僕射徐勉書薦峻曰:「凡聖賢所講之書,必以問官立義,則周官一 此學不傳,多歷年世。北人孫詳、蔣顯亦經聽習,而音革楚、夏,故學徒 睡則以杖自擊, 其篤志如此。 遂博通五經,尤長<u>三禮</u>。 為兼國子

遷 每講說,聽者常五百餘人。 爲國子助敎。 邵陵王編好其學,及出爲江州,攜叔明之鎭。 型州,又隨府,所至輒講授,故江外人士皆傳其學。[18]峻子文阿。 太史叔明,吳興烏程人,吳太史慈後也。少善莊、老,兼通孝經、論語、禮記,尤精三玄。

術,而文阿 文阿字國衞,性剛强,有膂力。 頗傳之。 又博采先儒異同,自爲義疏。 少習父業,研精章句。 通三禮、三傳、位五經博士。 祖舅太史叔明、舅王慧興並通經 梁簡文引為

列傳

第

東宮學士。及撰長春義記,多使文阿撮異聞以廣之。

景平,陳武 野。 尉,兼掌 於是斟酌裁撰,禮度皆自之出。 景素聞 及侯景寇逆,簡文別遣文阿募士卒援都。 儀禮。 帝以文阿州里,表爲原鄉令、監江陰郡。 其名,求之甚急,文阿窮迫,登樹自縊,遇有所親救之,自投而下,折其左臂。 自太清之亂,臺閣故 事,無有存者,ᠬ引之阿父峻,梁武時常掌朝儀,頗有遺 臺城陷,與張嵊保吳興,嵊敗,文阿簋于山 紹泰元年,入爲國子博士。 尋領· 步 兵校 及

者寬其死,卽 及 陳武帝受禪,文阿輒棄官還武康,帝大怒,發使往誅之。時文阿宗人沈恪爲郡,請使 面縛鎖頸,致於上前。 上視 而笑之,曰:「腐儒復何爲者。」遂赦之。

在師知傳。 武帝崩 ,文阿與尚書左丞徐陵、中書舍 及文帝即位,剋日謁廟,尚書左 丞庾持奉韶遣博士議 人劉師知等,議大行皇帝靈 其禮。 一座俠御衣服之制,語 文阿 議日

是以 亂,萬乘無主, 而 末葉從橫,漢承其弊,雖文、景刑厝,而七國連兵, 爲之, (既葬) 人物推移,質文殊軌, 非無心於禮制也。 便有公冠之儀,始殯受麻冕之策,斯蓋示天下以有主,慮社稷之艱難。 不危則亡。 聖賢因 當隆周之日, 今國諱之日,雖抑哀於璽紱之重,猶未序於君臣之儀。 機而 立教, 公旦叔父,呂、召爪牙,成王在喪, 王公隨時以適宜。 或踰 月 (卽尊) 或崩 **关**千人無君,不敗則 日 稱韶, 禍 此皆 幾 覆國 有 逮乎 古 爲

禮,朝廟退坐正寢,聽羣臣之政。 今皇帝拜廟還,宜御太極前殿,以正南面之尊,此卽

周康在朝,一二臣衞者也。

觴奉壽,家國大慶,四廂雅樂,歌奏歡欣。今君臣吞哀,兆庶抑割,豈同於惟新之禮乎? 復致享,天子以璧,王后用琮。 且周康賓稱奉珪,無萬壽之獻,此則前準明矣。 珪,致享無帛,公王同璧,鴻臚奏賀。 若此數事,未聞於古,後相沿襲,至|梁行之。 夫稱 其壤奠之節,周禮以玉作贄,公侯以珪,子男執璧,此以玉作瑞也。日己奠贄竟,又 謹撰謁廟還升正寢、羣臣陪薦儀注如別。 秦燒經典,威儀散滅,叔孫通定禮,尤失前憲,奠贄不 愚以今坐正殿,止行薦璧之儀,無賀酒

中卒,贈廷尉卿。 韶可施行。 十八卷,並行於時。 尋遷通直散騎常侍, 兼國子博士, 領羽林監。 所撰儀禮八十餘條,自也春秋、禮記、孝經、論語義記七十餘卷,經典大義 儒者多傳其學。 仍令於東宮講孝經、論語。

遂通經術。 孔子袪,會稽山陰人也。少孤貧好學,耕耘樵採,常懷書自隨,役閑則誦讀,勤苦自勵, 尤明古文尚書,爲兼國子助敎,講過書四十編,聽者常數百人。爲西省學士,助

列傳第六十一 儒林

賀琛撰錄、[110]書成,兼司文侍郎,不就。累遷兼中書通事舍人,加步兵校尉。 梁武帝撰 五經

(講) 及孔子正言,專使子袪檢閱羣書以爲義證。 事竟,敕子袪與右衞朱异、左丞賀琛於士

林館遞日執經。後加通直正員郎,卒官。

子袪 凡著尚書義二十卷,集注尚書三十卷,續朱异集注周易 百卷 續何承天集禮論

一百五十卷。

三禮、孝經、論語。 皇侃,吳郡人,青州刺史皇象九世孫也。 爲兼國子助教,於學講說,聽者常數百人。撰禮記講疏五十卷。書成奏 少好學,師事賀瑒,精力專門,盡通其業,尤明

上,詔付祕閣。頃之,召入壽光殿說禮記義,梁武帝善之,加員外散騎侍郎。

厚禮迎之。及至,因感心疾卒。所撰論語義、禮記義,見重於世,學者傳焉

侃性至孝,常日限誦孝經二十徧,以擬觀世音經。丁母憂還鄉里,平西邵陵王欽其學,

沈珠字弘道,吳興武康人也。 祖休季,至三梁餘杭令。 父山卿,梁國子博士、中散大夫。

之亂 積 無不 思 洗鼠 經術 答。 洙 少 方雅 仕 吳郡 於臨 梁 爲 好學,不妄交游。 朱异、 安,時 尙 書 陳文帝 會稽賀琛 祠 部郎,時年蓋二 在 焉 甚嘉之。 通三 親就 禮 一十餘。 習業。 、春秋左 及异、 琛 及陳 大同 於 武 中 上 學者 帝 林館 精識 入輔, 講 强 多涉獵 制旨 記 除國子博士, ,五經章 義,常使洙 文史,不爲章句, 句, 爲 與沈文阿 諸 子: 都 史書 而 侯景 洙 獨

儀

禮

藻。 無 役,旣失亡屍柩 嫁, 在家 主 云言 生 由 人 陳 又有從宜。 此於 弟 迎殯 其餘謂 武帝 內 德 有 息 見牒 藻 人 江左 受禪, 事 議 見 情, 傍 故 謂 在 稱 親 此 未得葬者耳。 一葬禮 ₩禮 主人 故 或未為 - (-- (-- (-) 加員 者, 王 小記云。《久而 復 如 衞 翁 申 外散騎常侍, 爲至月末除 鄭 無 軍 允。 明 靈 所解, 期 云:『久喪不 其 柩在周, 制 時 中原淪 孝軌 議 衆子皆 以 不葬者,唯主喪者不除,其餘以 李胤之祖,王華之父,並存亡不測,其子 靈 旣 主人奉 陷 位揚州別駕從 爲 葬,唯主 在 以後, 內 禮無終身之喪,故制 應不 展域, 外卽吉? 使 · 除, 關 理 人不 雖已 右, 有事 王衛軍 變, 爲待主 事史,大匠卿。 迎 因 例,)喪, 欲 其餘親各終月 所引 迎 宜諮沈常侍 還期 人還情 喪, 使除 此蓋 無指, 久 服 麻 而 禮 禮 有司奏:「建康令沈孝 終 未反。 申竟。」以事諮 之正 晉氏 詳議。」洙 數 諸弟若遂不 月數者,除 而 制服 喪亂 除 也 此月 此 ,依時釋衰, 議 但 或 晦]魏氏 日三 蓋 喪 除, 死 卽是再周 則 引 左 於 已。注 禮 永 丞 東 禮 房庭, 江德 關 絕 朝 有 文 昏 此 之 論 繸

寧可喪期無數,而弗除衰服? 麻 並變禮之宜也。 , 毀靈 稍祭, 若喪 柩 得還, 別 行 改 葬 之 禮 。 孝軌雖因奉使便欲迎喪,而還期未剋,宜依東關故事,在此者並應釋除衰 朝廷自應爲之限制,以義斷恩。」德藻依殊議。 自天下寇亂,西朝傾覆,若此之徒,諒非一二, 奏可

歷,何承天、祖冲之、祖暅之父子漏經,並自關鼓至下鼓、〔三〕自晡鼓至關鼓,皆十三刻,冬夏 殺不辜,寧失不經」,『罪疑惟輕,功疑惟重』。斯則古之聖王,垂此明法。愚謂依范泉著制爲 至如貫高榜笞刺爇,身無完者,戴就熏針並極,困篤不移,豈關時刻長短,掠測優劣? 致實罪不服,如復時節延長,則無愆妄款。且人之所堪,旣有强弱,人之立意,固亦多途。 之上,無人不服,誣枉者多。朝晚二時,同等刻數,進退而求,於事爲衷。若謂小促前 制,近代以來,方有此法。 獄,必應以情,政言依準五聽,驗其虛實,豈可令恣考掠,以判刑罪。 沈洙五舍人會尙書省詳議。時宣帝錄尙書,集衆議之。 時久,非人所堪,分其刻數,日再上。廷尉以爲新制過輕,請集八座丞郎幷祭酒孔奐、行 梁代舊律,測囚之法,日一上,起自晡鼓,盡于二更。及比部郎范泉删定律令,以舊法測立 文帝卽位,累遷光祿卿,侍東宮讀。 起自晡鼓,迄于二更,豈是常人所能堪忍。所以重械之下,危墮 廢帝嗣位,歷尚書左丞,衡陽王長史,行府 都官尚書周弘正議曰:「凡小大之 但漏刻賒促,今古不同。 且測人時節, 本非古 漢書建 夫『與 湖敷, 國事

宗元饒 從書漏 而致 刻。 並依今之夏至,朝夕上測各十七刻。比之古漏,則一上多昔四 各十七 四時不異。 施行 誣。 雖冬至之時,數刻侵夜,正是少日,於事非疑。 庶罪人不以漏短 議 刻, 《之明,斟酌今古之間,<a>言]
<a>言]
<a>会
<a>言
<a>完
<a>会
<a>完
<a>大
<a>是
<a>大
<a>是
<a>是 求之鄙意,竊謂爲宜依范泉前制。」「一宣宣帝曰:「沈長史議 曰:「沈議非頓異范,正是欲使四時均其刻數。 冬至之日各十二刻。 若其日有長短,分在中時前後。今用梁末改漏,下鼓之後,分其短長,夏至之日 廷尉今牒以時刻短促,致罪人不款。 請寫還删定曹詳改前制。」宣帝依 刻,即用今漏, 談得中, 而爲捍,獄 愚意願去 宜更博議。」 囚 則冬至多五 夜測之昧, 無以 左 在夜

洗以太建元年卒。

史。 中,大義略舉。 曰:「吾死後,戚生若赴,便以儀禮、禮記義本付之,若其不來,卽隨屍而殯。」爲儒者推 就國子博士宋懷方質儀禮義。 戚衮字公文,吳郡鹽官 年十九,梁武帝敕策孔子正言幷周禮、禮記義,褒對高 人也。 少聰慧, 懷方北人,自魏攜儀禮、禮記疏,秘惜 游學都下,受三禮於國子 助教 第。 不傳。 除揚 劉 文紹。 州祭酒從 及將亡,謂

許如此。

捣與往復,滚精采自若,領答如流,[三]簡文深加歎賞。 次令中庶子徐摛馳騁大義,間以劇談。摛辭辯從橫,難以答抗,諸儒懾氣。 葬 兼太學博士。 簡文在東宮,召褒講論。 又嘗置宴集玄儒之士,先命道學互相 時変說朝 質難

程文季於呂梁,軍敗入周,久之得歸。 敬帝立,爲江州長史。 仍隨沈泰鎭南豫州。 卒於始興王府錄事參軍。 泰之奔齊,逼滚俱行, 後自齊逃還。 叉隨

滚於<u>梁代撰三禮義</u>記,逢亂亡失。 禮記義四十卷行於世。

愛經術,引灼爲西省義學士。承聖中,爲兼中書通事舍人。仕陳,武帝、文帝時,累遷中散 鄭灼字茂昭,東陽信安人也。 幼聰敏,勵志儒學。 少受業於皇侃。 梁簡文在東宮,雅

大夫,後兼國子博士,未拜卒。

瓜時,輒偃臥以瓜鎭心,起便讀誦,其篤志如此。 自後義理益進。灼家貧,抄義疏以日繼夜,筆豪盡,每削用之。常蔬食,講授多苦心熱,若 · 内 口

時有晉陵張崖、吳郡 陸詡、吳興沈德威、會稽賀德基,俱以禮學自命。

張崖 傳三禮於同郡劉文紹。 天嘉元年,爲尙書儀曹郎, 廣沈文阿儀注,撰五 後爲

國子博士。

陸 詡 小 習崔靈恩 三禮義宗、三三梁時 百濟國表求講禮博士,詔令翮行。 天嘉中,位尚

祠部郎。

倦。 遷 太常丞,兼五禮學士,後爲尚書祠 天嘉 沈德威字懷遠, 元年,徵出 都,後 少有操行。 為國 子 梁太淸末, 遁於天目山, 築室以居。 助 部郎。 敎。 每自學還私室講授,道俗受業數百人, 陳亡入隋,官至秦王府主簿,卒年五十五 雖處 亂 離 率常 而 篤 如 學無 此

都下 甚盛 ,呼德基 ,積年不 賀德基字承業,世傳禮學。 歸,衣資罄乏,又恥服 入寺門,脫白綸巾以贈之。 祖文發、父淹,仕梁 故弊,盛冬止衣狹襦袴。 仍謂曰:「君方爲重器,不久貧寒,故以 俱爲祠部郎,並有名當世。 嘗於白馬寺前逢 德基 此相遺耳。」 婦 人,容服 少 游

列傳第六十一 儒林

問 姓名,不答而 去。 德基於禮記稱爲精明,位尚書祠部郎。 雖不至大官,而三世儒學,俱爲

祠部郎,時論美其不墜。

全緩字弘立,吳郡錢唐人也。 幼受易于博士褚仲都,篤志研翫,得其精微。 陳太建中,

位鎭 南始興王府諮議參軍。 緩通周易、老、莊、時人言玄者咸推之。

張譏字直言,清河武城人也。 祖僧寶、梁太子洗馬。父仲悅、梁尚書祠部郎。

饑幼聰俊,有思理。 年十四,通孝經、論語,篤好玄言。 受學于汝南周弘正,每有新意,

爲先輩推 服。 梁大同中, 召補國子正言生。 梁武帝嘗於文德殿釋說、坤文言, 機與陳郡袁

憲等預焉。 敕令論議,諸儒莫敢先出,譏乃整容而進,諮審循環,辭令溫雅。 帝甚異之,賜

裙襦絹等,云「表卿稽古之力」。

能 勝。 談 及丁父憂、居喪過禮。 幼喪母,有錯綵經帕,即母 爲士林館學士。 之遺制,及有所識,家人具以告之。 簡文在東宮,出土林館,發孝經題,機論義往 每歲時輒對帕哽噎不

復,甚見嗟賞。及侯景寇逆,於圍城之中,獨侍哀太子於武德後殿,講老、莊。 臺城陷,譏崎

嶇避難,卒不事景。

正嘗謂人曰:「吾每登坐,見張譏在席,使人懍然。」 理,雖知兄弟急難,四公不得有助。」弘直謂曰:「僕助君師,何爲不可。」舉坐以爲笑樂。 興弘正論議,弘正屈,弘直危坐厲聲,助其申理。 陳天嘉中,爲國子助敎。 時周弘正在國學,發周易題,弘正第四弟弘直亦在講席。 譏乃正色謂 弘直曰:「今日義集, 辯正 弘

成,後主親執之曰:「當今雖復多士如林,至於堪捉此者,獨張譏耳。」卽手授譏。 宣帝時,爲武陵王限內記室,兼東宮學士。後主在東宮,集宮僚置宴,時造玉柄麈尾新 仍令於溫

文殿講莊、老。宣帝幸宮臨聽,賜御所服衣一襲。

敕譏竪義。 後主嗣位,爲國子博士、東宮學士。後主嘗幸鍾山開善寺,召從臣坐於寺西南松林下, 時索麈尾未至,後主敕取松枝,手以屬譏,曰:「可代麈尾。」 顧羣臣曰:「此卽張

饑後事。」陳亡入隋,終於長安,年七十六。

郡 陸元朗、朱孟博、一乘寺沙門法才、法雲寺沙門慧拔、「三」至真觀道士姚綏,皆傳其業。 吳

騰所撰周易義三十卷,尚書義十五卷,毛詩義二十卷,孝經義八卷,論語義二十卷,老

列

子義十一卷,莊子內篇義十二卷、外篇義二十卷、雜篇義十卷,玄部通義十二卷, 游玄桂林

一十四卷。後主嘗敕就其家寫入祕閣。

子孝則,官至始安王記室參軍。

望,齊散騎侍郎。父仲成,梁護軍司馬、豫章王府諮議參軍。 顧越宇允南,公公吳郡鹽官人也。 所居新坂黃岡,世有鄉校,由是顧氏多儒學焉。 家傳儒學,並專門教授 祖道

無倦。 知人,一見越,便相歎異,命與兄子弘正、弘直游,厚爲之談,由是聲譽日重。 文發,學兼經史,與越名相埓,故都下謂之廢、越焉。 越幼明慧,有口辯,勵精學業,不捨晝夜。弱冠游學都下,通儒碩學,必造門質疑,討論 至於微言玄旨,九章七曜,音律圖緯,咸盡其精微。 時太子詹事周拾以儒學見重,名 時又有會稽賀

先反,時稱其見機。 旣 勇將軍陳慶之送魏北海王顯還北主魏,慶之請越參其軍事。 mi **顥遂肆驕縱,又上下離心,越料其必敗,以疾得歸。** 初爲南平元襄王偉國右常侍,與文發俱入府,並見禮重。 及至,除安西湘東王府參軍。 及武帝撰制旨新義,選諸儒在所流通,遺 裁至彭城,慶之果見摧衂,越竟得 時慶之所向剋捷,直至洛陽。 葬轉行參軍。 大通 F|1

越還吳、敷揚講說。

止可觀,帝深贊美之。由是擢爲中軍宣城王記室參軍,尋除五經博士,仍令侍宣城王講。 三寸,美鬚眉。武帝嘗於重雲殿自講老子,僕射徐勉舉越論義,越抗首而請,音響若鍾,容 越編該經藝,深明毛詩,傍通異義。 特善莊、老,尤長論難,兼工綴文,閑尺牘。 長七尺

孔與等,每爲文會。 阿等逃難東歸,賊黨數授以爵位,越誓不受命。 承聖二年,詔授宣惠晉安王府諮議參軍,領 國子博士。 大同八年,轉安西武陵王府內中錄事參軍,尋遷府諮議。及侯景之亂,越與同志沈文 越以世路未平,無心仕進,因歸鄉,栖隱于武丘山,與吳興沈炯、同郡張種、會稽

|帝有奪宗之兆,內懷憤激,乃上疏曰:「臣|梁世薄宦,祿不代耕。 季年板蕩,竄身窮谷。幸屬 **侍經籍,於今五載。如愚所見,多有曠官,輔弼丞疑,未極時選。至如文宗學府,廉潔正人,** 凡流。木石知咸,犬馬識養,臣獨何人,罔懷報德。伏惟皇太子天下之本,養善春宮,臣陪 聖期,得奉昌運。朝廷以臣微涉藝學,遠垂徵引,擢臣以貴仕,資臣以厚秩,二宮恩遇,有異 所取決,咸見施用。每侍講東宮,皇太子常虛己禮接。越以宮僚未盡時彥,且太子仁弱,宣 甚見優禮。 紹泰元年,復徵爲國子博士。陳天嘉中,詔侍東宮讀。除東中郎鄱陽王府諮議參軍 尋領羽林監,遷給事黃門侍郎,Clab國子博士、侍讀如故。 時朝廷草創,疑議多

而竟不能改革。

侵迫,非有邀求,政是懷此不言,則爲有負明聖。 當趨奉龍樓,晨游夕論,恒聞前聖格言,往賢政道。 敢奏狂瞽,願留中不泄。」疏奏,帝深感焉, 如此,則非僻之語,無從而入。 臣年事

師 扇動蕃鎭,遂発官。 入講授,甚見尊寵。 及廢帝卽位,拜散騎常侍,兼中書舍人,黃門侍郎如故。 太建元年,卒於家,年七十七。 時宣帝輔政,華皎舉兵不從,越因請假東還。 領天保博士,掌儀禮,猶爲帝 或譖之宣帝,言越將

所著喪服、毛詩、老子、孝經、論語等義疏四十餘卷,詩頌碑誌牋表凡二百餘篇。

躬師事焉。 時有東陽襲孟舒者,亦通毛詩, 天嘉中,位太中大夫。 善談名理。 仕梁位尋陽郡丞。 元帝在江州,遇之甚重,

軍,兼嘉德殿學士。 改定樂章, 詔使製三朝樂歌詞八首, 合二十曲, 5001行之樂府。 沈不害字孝和,吳興武康人也。 自梁季喪亂,至是國學未立,不害上書請崇建儒宮,帝優詔答之。 幼孤,而修立好學。 陳天嘉初,除衡陽王府中記室參 後爲國子博士,領羽林監 叉表

敕修五禮,掌策文諡議等事。 太建中,位光祿卿,通直散騎常侍,兼尚書左丞,卒。

周弘正常稱之曰:「沈生可謂意聖人乎。」著五禮儀一百卷,文集十四卷。 不害通經術,善屬文,雖博綜經典,而家無卷軸。 **每製文,操筆立成,曾無尋檢。**

子志道字崇基,少知名,位安東新蔡王記室參軍。陳亡入隋,卒。

王元規字正範, 太原晉陽人也。 祖道實,齊晉安郡守。四三父璋,梁武陵王府中記室

参军

萬,欲妻以女。母以其兄弟幼弱,欲結强援,元規泣請曰:「因不失親,古人所重,豈得苟安 異壤,輒昏非類。」母處其言而止。 元規八歲而孤。兄弟三人,隨母依舅氏往臨海郡,時年十二。郡土豪劉暉者,資財巨

俱獲全,時人稱其至行 船,倉卒引其母妹幷姑姪入船,至三元規自執檝棹而去,留其男女三人,閣於樹杪。 元規性孝,事母甚謹,晨昏未嘗離左右。梁時山陰縣有暴水,流漂居宅,元規唯有一小 及水退,

少從吳興沈文阿受業,十八,通春秋左氏、孝經、論語、喪服。 仕梁位中軍宣城王記室

時論榮之。俄除尚書祠部郎。 記、左傳、喪服等義。 亡入隋,卒於秦王府東閤祭酒。 压 一府限內參軍。 陳天嘉中,爲鎭東鄱陽王府記室參軍,領國子助教。 王爲江州、元規隨府之鎮、四方學徒、不遠千里來請道者、常數十百人。 遷國子祭酒。自己新安王伯固嘗因入宮,適會元規將講,乃啓請執經, 自梁代諸儒相傳爲左氏學者,皆以賈逵、服虔之義難駁杜 無復疑滯。 每國家議吉凶大禮,常參預焉。後爲南平 後主在東宫、引為學士、就受禮

禮記音兩卷。 元規著春秋發題辭及義記十一卷,[圖]續經典大義十四卷,孝經義記兩卷, 左傳音三

子大業,聰敏知名。

初,徵 爲 吓空 始 榮爲 不 事,由是傳經受業者蓋鮮焉。 可 時 爲通直散騎侍郎,不就。永陽王爲吳郡太守,聞其名,欲與相 測 郡五官掾,慶嘗詣焉,王乃微服往榮宅,穿壁以觀之。 有吳郡陸慶,少好學,偏通五經,尤明春秋左氏傳,節操甚高。仕梁爲婁令。 ·嚴君平、鄭子眞何以尙茲。」鄱陽、晉安王俱以記室徵,不就。乃築室屏居,以禪誦 王謂榮曰:「觀陸慶風 見,慶辭以疾。 神凝峻, 陳天嘉 時宗人

敷。 之移人乎。古人稱上德若風,下應猶草,美矣,豈斯之謂也。 向風,斯亦曩時之盛也。自樑迄陳,年且數十,雖時經屯詖,郊生戎馬,而風流不替,豈俗化 當天監之際,時主方崇儒業,如崔、嚴、何、伏之徒,前後互見升寵,于時四方學者,靡然 論曰:語云:「上好之,下必有甚焉者。」是以|鄒纓齊紫,且以移俗,況祿在其中,可無尙

校勘記

- (一)令與河內司馬憲吳郡陸澄共撰喪服義 「義」字各本並脫,據梁書補。
- (ニ) 名位轉隆 「名」各本作「在」、據梁書、册府元龜五一九改。
- 〔』〕 暅獨滯於參軍事 「獨」梁書、册府元龜九一五作「獪」。
- ĽЧ 對策爲當時第一 「對」字各本並脫,據梁書、册府元龜六五〇、七六五補。
- , ... ∵ 五 爲諸生講喪服 乃出天心寺 「天心」各本作「大心」、據册府元龜九四九改。 「諸生」各本作「諸王」、據通志改。 按下「諸生有未曉者, 委曲誘誨」,則作

王」誤。

列傳第六十一 校勘記

諸

- -₩ 乃謝 病 終 身不涉 其流 「其流」通志作「其廷」。
- ス **い** 喪慈 母 如 母 禮 歟 如 母」二字 各本並 脫,據禮記曾子問補
- 九 凵 韴 保 旣 無 其服 則 此 慈 母亦 無服 矣 「母」字據册府元龜 五. 七 九及通志補。 按日知錄五慈母 {如

} ₽

引 (南史· 有「母」字

- 其次爲 保母 其」字各本並脫,據梁書補。 按禮記內則 有「其」字。
- 此言擇 諸 母 「此」字各本並脫,據梁書、册府元龜五七九補
- 自是師 保之慈母非三年小功之慈母也 二「母」字各本並脱,據册府元龜
- 則 知 慈 加 之 義 慈慈 加 册府元龜 五七九作「慈 .母加」,通志 作 慈母」。 疑

作「慈

母

是。

五.

七 九

- 及 解 經 析 理 「經析」二字各本作「析經」,今從梁書。
- 至 制 禮 義宗三十卷 「二十卷」隋書經 經籍志同。 梁書及册府元龜六○○作「四十 七 卷
- 故江外 人士皆傳其 學 「江外」各本作「江州」,據梁書改。 按齊梁後江州僅 有尋 陽 帶 地 叔明

随府 至 江州 郢州 所 至 輒 講 授, 則傳 其學者非但江州 而 故當以江外 爲是。 江外 約 指江

郢 |湘 等州 地 區

- 臺閣: 故 事 無 有 存 者 「存」各本作「在」、據陳書、通志 改。
- 此以玉 作瑞 也 「以」字各本並脫,據通志補。 按周禮春官典瑞:「人執以 見曰瑞。」

- [12] 所撰儀禮八十餘條 「條」陳書作「卷」。
- 錄。 爲西 沈峻 省學 (傳:「時. 士 助 賀琛 中 撰錄 書舍人賀琛 按{梁 書 奉 玄 敕 撰 中 《梁官, 書 舍 乃 啓峻及孔子袪 人賀琛受敕撰梁官, 補西省學士, 啓子袪爲西省學土, 助撰錄。」 則子袪 助 助 撰

賀琛撰錄者,乃撰錄梁官。

- [1] 祖休季 「季」陳書作「稚」,此避唐高宗小名改。
- 何承 天祖 冲之祖 「祖暅之」各本作「祖暅 據陳書補「之」字。

按祖暅之入文學傳。

- [三] 斟酌今古之間 「間」各本作「聞」,據陳書改。
- 竊謂 爲 宜 依范泉前 制 「竊謂 下陳 書 有「允合 衆議 以五
- [三五] 領答如流 「領答」陳書作「對答」。
- 三台 陸 詡 少習 崔 靈恩三 一禮義宗 「宗」字各本並脱、據陳書補。 按崔靈恩傳 有 三禮義宗。
- [1] 法雲寺沙門慧拔 「慧拔」陳書作「慧休」。
- [15] 顧越字允南 「允南」陳書、册府元龜五九七作「思南」。
- 口む 遷 侍 給 郎 事 黄 下文「黄 門侍郎 門 侍 「給事」下各本有「中」字 郞 如 故, 則 此「中」 |字衍文。 據 (陳書删) 按南齊書百官志有 給事 中 與給事黃門

列傳第六十一 校勘記

一七六〇

合二十曲 陳書作「合二十八曲」。

祖道實齊晉安郡守「道實」陳書作「道寶」。

倉卒引其母妹幷姑姪入船 「姑姪」陳書作「孤姪」。

遷國子祭酒 「遷」字各本並脫,據陳書補。

CIED 元規著春秋發題辭及義記十一卷 春秋義略,隋書經籍志著錄王元規春秋左氏義略,皆即此書全稱。 按「義記」當作「義略」。經典釋文敍錄謂王元規續成沈文阿

南史卷七十^一

列傳第六十二

文學

何思澄 劉昭 王智深 袁嘏 丘靈鞠 子遲 子 高爽 縚 子 崔慰祖 朗 緩 丘巨源 王子雲 從孫 鍾嶸 仲孚 祖 孔廣 兄岏 任孝恭 沖之 子暅之 檀超 孔逭 岏弟嶼 熊襄 顏協 **虞通之** 周 孫皓 吳邁遠 興嗣 紀少瑜 虞龢 來嶷 超叔道鸞 吳均 司馬憲 買希鏡 杜之偉 江洪 袁仲明 **卞彬** 劉勰 袁峻 諸葛勗 孫詵

。 易云:「觀乎人文以化成天下。」<u>孔子曰:「煥乎其有文章。」自漢以來,辭人代有,大則憲</u>

顏晃

岑之敬

何之元

徐伯陽

張正見

阮卓

於時。降及梁朝,其流彌盛。蓋由時主儒雅,篤好文章,故才秀之士,煥乎俱集。于時武帝 章典誥,小則申抒性靈。 運接亂離,雖加獎勵,而向時之風流息矣。詩云:「人之云亡,邦國殄悴。」豈金陵之數將終 每所臨幸,輒命羣臣賦詩,其文之善者賜以金帛。 是以縉紳之士,咸知自勵。 至有陳受命, 王在上,咸所敦悅。故云「言之不文,行之不遠」。自中原沸騰,五馬南度,綴文之士,無乏 三百年乎。不然,何至是也。宋史不立文學傳,齊、梁皆有其目。今綴而序之,以備此篇 至於經禮樂而緯國家,通古今而述美惡,非斯則莫可也。是以哲

丘 靈鞠,吳興烏程人也。祖系,祕書監。父道眞,護軍長史。

(主坐處,政如今日。 卿將來復如此也。」累遷員外郎。 靈鞠 少好學,善屬文,州辟從事。詣領軍沈演之,演之曰:「身昔爲州職,詣領軍謝晦,

爲烏程令,不得志。泰始初,坐事禁錮數年。褚彦回爲吳興太守,謂人曰:「此郡才士唯有丘 靈鞠及沈勃耳。」乃啓申之。 宋孝武殷貴妃亡、靈鞠獻挽歌三首、云:「雲橫廣階闇、霜深高殿寒。」帝擿句嗟賞。後 明帝使著大駕南討記論。久之,除太尉參軍。 昇明中,為正員

郎 事,公爲一代鼎臣,不可復爲覆餗。」其强切如此。 **嘗還東**, 兼中書郎。 詣司 `徒褚彥回別,彥回不起,曰:「比脚疾更增,不復能起。」靈鞠曰:「脚疾亦是大 時方禪讓,齊高帝使靈鞠參掌詔策。建元元年,轉中書郎,敕知東宮手筆 不持形儀,唯取笑適。 尋又掌知 國 史。

千里、士子 恨 也。」永明二年,領驍騎將軍。 近 帝即位,爲通直常侍,尋領東觀祭酒。 風流皆出此中。 顧榮忽引諸傖輩度,妨我輩塗轍,死有餘罪。 靈鞠不樂武位,謂人曰:「我應還東掘顧榮冢。 靈鞠曰:「人居官願數遷,使我終身爲祭酒不 江南 地 方數

儉 如 謂 我 元 熙。 靈鞠 人曰:「丘公仕宦不進,才亦退矣。」位長沙王車騎長史,卒。 未進時。」 文集行於時。 好飲酒, 此言達儉。 臧否人物,在沈深座,[]見王儉詩,深曰:[王令文章大進。]靈鞠曰:「何 子遲。 靈鞠宋時文名甚盛,入齊頗減,蓬髮弛縱無形儀,不 著江左文章錄序,起太興, 事家業。

王

殊禮 文最美。 在齊 遲 字希範, 遲文也。 以 坐 事 秀才累遷殿 免 八歲便屬文。 乃獻 及踐 阼, 責躬詩, 中郎。 遷中 上優辭答之。 靈鞠常謂「氣骨似我」。 ·書郎, 梁武 帝平建鄴, 待詔文德殿。 引 爲 時帝著連珠,詔羣臣繼作者數十人,遲 驃騎主簿, 黄門郎謝超宗、徵士何點並 甚被禮遇。 時 勸 進 梁王及 見而異

列

臨 川王 後 宏 出 北 爲 水嘉 侵魏,以爲諮 太守,在郡不稱職,爲有司所糾。 議參軍,領記室。 時陳伯之在北, 帝愛其才,寢其奏。 與魏 軍來拒,遲 天監 四年,中軍 以書喩之,伯之 將 軍

依 语。 遲 雕 辭 取賤 采 麗邈,時有 文通 īni 秀於敬子。」其見稱 鍾嶸著詩評云:「范雲婉轉清便,如流風回雪。 如 此。 遲點綴映媚,

似落花

遂降。

還

拜

中

書侍郎,遷

司空從

事

中郎,卒官。

齊 핰 能 永明初 盜 名,太守呂文顯當 爲 仲孚字公信, 之計,劫掠) 爲國子 三吳。 生。 靈鞠從孫 時倖臣,陵 王儉 仲孚聰明 日一 也。 抵屬 東南之美,復見丘生。」 少好學, 有智略,羣盜畏服, 縣,仲孚獨 讀書常以中宵鐘鳴爲限。 不 ·爲屈 所 舉高 行皆果, 第, 未調, 故亦 靈鞠嘗 還 尔 發。 鄕 里。 稱爲千里駒 爲于湖 家 貧, 命? 乃結 也。

影 111 相繼字 陰 長 令 岡 明 埭,瀉 帝 山陰, 居職 卽 位 並有 甚 瀆 一為曲 有 水 一以阻 政 聲 阿 績,言仲字皆過之。 稱。 令, 其路。 百姓 會稽太守王 謠 敬則 曰:「二傳、沈、劉 軍 敬則 至,遇瀆 齊末政亂 反,乘朝廷不備,反問 涸 一,不如 ,果頓兵不 頭有 贓賄,爲有司 丘。」 得進 前),遂敗。 至而 世傳琰 所舉,將 前鋒已屆 父子、沈憲 仲孚 以拒 見收,竊 曲 阿 守 劉玄 功,遷 逃 仲学 還 明

都

) 會 赦不問

第 頃之卒,贈給事黄門侍郎。 梁 後爲衞尉卿, 武帝踐阼,復爲山陰令。 恩任甚厚。 喪將還,豫章老幼號哭攀送,車輪不得前。 初起雙闕,以仲字領大匠, |仲字長於撥煩、善適權變、更人敬服、號稱神明、政爲 累遷豫章內史,在郡 仲孚爲左丞,撰皇典 更勵清 天下

二十卷,南宮故事百卷,又撰尚寶具

事雜儀行於世

檀 超 字悅祖, 高平金鄉人也。 祖嶷之字弘宗, 宋南琅邪太守。 父道彪字萬壽, 位正

員 郎

以一爵高 稍 刎 相 頸之交。 陵 超 |辱,而||超舉動嘯傲,不以地勢推之,張目謂曰::「我與卿俱是國家微賤時 少好文學,放誕任氣,解褐州西曹。 人」蕭太后,惠開之祖姑,長沙景王妃,超祖姑也,故超以此議之。 蕭惠開爲別駕,超便抗禮。 惠開自以地位居前, 恵開 外 戚 欣然,更 耳,何足

覺 我 後位 爲 優 也。 國子博士,兼左丞。 齊高帝賞愛之,後爲司徒右長史。 超嗜酒,好談詠,自比晉郗超,言高平有二超,又謂人曰:「猶 爲

建元二年,初置史官,以超與驃騎記室江淹掌史職,上表立條例: 開元紀號,不 取宋年、

列 傅 第 六 + 文

一七六六

封爵各詳本傳,無假年表。又制著十志,多爲左僕射王儉所不同。 旣與物多忤,史功未就,

徙 交州,於路見殺。 江淹撰成之,猶不備也。

時 ·有豫章熊襄著齊典,上起十代,「ED 其序云:「尚書堯典謂之虞書,則附所述通謂之齊

書,名爲河洛金匱。」

遠好自誇而蚩鄙他人,每作詩,得稱意語,輒擲地呼曰:「曹子建何足數哉」超聞而笑曰: 一世劉季緒才不逮於作者,而好抵訶人文章。 季緒瑣瑣,焉足道哉,至於邁遠,何爲者乎。」 又有吳邁遠者,好爲篇章,宋明帝聞而召之。及見曰:「此人連絕之外,無所復有。」邁

超叔父道鸞字萬安,位國子博士、永嘉太守,亦有文學,撰續晉陽秋二十卷。

太守孟顗以令長裁之,積不能容,脫幘投地曰:「我所以屈卿者,政爲此幘耳。 | 木|| 彬 字士蔚,濟陰冤句人也。 祖嗣之,中領軍。 父延之,弱冠爲上虞令,有剛氣。 今已投之卿

矣。卿以一世勳門,而傲天下國士。」拂衣而去。

著服 兵 式 :: 故言 以 爲 齊王。 喻 著服,孝子不在日 反。 兰也。 1哭也。 誰 意。 彬 謂 粲 險 拔 宋 彬 「服」者, 蘊 遠,跂予望之。」遂大忤旨,因此擯廢數年,不得仕進。 有 曰:「殿下即 列管謂蕭 雖 才,而 敗, 衣 攸之尚 代哭,列管暫鳴死滅族』。 與 也。 也。 物 東 多件。 宮爲府,三 高帝 「孝子不在 存。 不悅, |彬意介: 齊高 帝輔 及彬退,曰:「彬自作此。」後常於 日代哭」者,褚字也。 則以青溪爲鴻溝,鴻溝以東爲齊,以西爲宋。」仍詠詩 以高帝事無所成, 政,袁粲、劉彦節、王蘊等皆不同,而沈攸 公頗聞不。」時蘊居父憂,與疑同死,故云「尸 乃謂. 彬謂沈攸之得志,褚彦回 帝曰:「比聞謠云 乃擬 東府謁 趙壹窮鳥 高帝, 『可憐可念 寫 高帝時 **活** 之又稱 「當敗, 魚賦

復 手。 爲 斥。 匹 不 體 人 熟於 多 螽 谿 其 後 爲 病, 蚤 鲜, 有 諺言 南 討 蝨 起 加 賦序 捕, 康 以 居甚疎,紫寢 1,『朝 郡 臭穢,故葦 丞。 曰:「余居貧 生 孫 暮 彬頗飲酒,擯棄形骸,仕旣不遂,乃著蚤蝨、蝸蟲、蝦蟆等賦,皆大有指 孫 子子,三十五歲焉。」其略言皆實錄也。 孫 Ë, 敗 席蓬纓之間,蚤 絮,不 布 若吾之蝨 衣 公十年不 能 自釋。 者, 無湯 蝨 製 猥 兼 沐 流 攝性 袍之縕,有生 之慮 懈 淫 **墮**,嬾 絕 癢 (渭濩) 相 弔 事 ·皮膚, 之憂, 無時 |所託,資其寒暑,無與 又爲禽獸決錄。 恕肉,探揣 晏聚 澡 刷 乎 不 곗 謹 護撮, 袴 一、澣沐 爛 目 布 日 易之。 獣 云 失時 不替

列

蠶室。 拙。 事也。 爲具,至著帛冠,十二年不改易。以大瓠爲火籠,什物多諸詭異。自稱下田居,於婦爲傳 名爲蛤魚。」世謂比令僕也。又云:「蝌斗唯唯,羣浮闇水,唯朝繼夕,聿役如鬼。」比令史諮 猪卑率、謂朱隆之;鵝頑傲、謂潘敞;狗險出、謂文度。 「羊性淫而 吾好擲,政極此耳。」後爲一程建太守,卒官。 或謂曰:「卿都不持操,名器何由得升。」「彬曰:「擲五木子,十擲輒鞬,豈復是擲子之 文章傳於閭巷。 (很)猪性卑而率、鵝性頑而傲、狗性險而出。」皆指斥貴勢。 後歷尚書比部郎,安吉令,車騎記室。彬性好飲酒,以瓠壺瓢勺杭皮 其險詣如此。 蝦蟆賦云:「紆青拖紫, 其羊淫恨,謂呂文顯,

作東冶徒賦。武帝見、赦之。 永明中,琅邪諸葛勗爲國子生,作雲中賦,指祭酒以下,皆有形似之目。 坐事緊東治,

又有陳郡袁嘏,自重其文,謂人云:「我詩應須大材迮之,不爾飛去。」建武末,爲諸監

令,被王敬則賊所殺。

腰帶十圍,痰故以此激之。 疑以自况, 其文甚工。後遇赦免, 卒。 貨羊糴米。」 陵 代禱爲縣,構造迎贈甚厚。 「徒有八尺圍,腹無一寸腸,面皮如許厚,受打未詎央。」爽機悟多如 令耳, 何關爽事。」又有人送書與爽告躓,云:「比日守羊困苦。」爽答曰:「守羊 孫抱爲延陵縣,爽又詣之,抱了無故人之懷。 爽受餉,答書云:「高晉陵自答。」人問其所以,答云:「劉蒨餉晉 抱康莞人。父康,吳興太守。 爽出從縣閣下過,取筆書鼓云: 此。 抱善吏職、形體肥壯, 坐事被繫,作鑊魚 無食,何不

帝崩,江夏王義恭取掌書記。 丘 巨源, 蘭陵蘭陵人也。 少舉丹陽郡孝廉,爲宋孝武所知。 明帝卽位,使參詔誥,引在左右。 大明五年, 敕助徐爰撰國 自南臺御史爲王景文

鎭軍參軍。寧喪還家。

旣而不獲,乃與尚書令袁粲書自陳,竟不被申。 啓,敕板起之,使留都下。 望賞異,自此意常不滿 元徽初,桂陽王休範在尋陽,以巨源有筆翰,遣船迎之,餉以錢物。 桂陽事起,使於中書省撰符檄,事平,除奉朝請。 沈攸之事,高帝又使爲尚書符荆州,以此又 巨源因齊高帝自 巨源望有封賞,

一七七〇

昌魚』。 以事見殺。 後除武昌太守,拜竟,不樂江外行。 臣年已老,寧死於建鄴。」乃以爲餘杭令。 時又有會稽孔廣、孔逭皆才學知名。 武帝問之,巨源曰:「古人云、『寧飲建鄰水,不食武 明帝爲吳興,巨源作秋胡詩, 有譏刺語,

來,來則莫聽去。」緒數巾車詣之,每歎云:「孔廣使吾成輕薄祭酒。」仕至揚州中從事 廣字淹源,美容止,善吐論。 王儉、張緒咸美之。 儉常云:「廣來使人廢簿領,匠不須

之、虞龢、司馬憲、袁仲明、孫詵等, [t] 皆有學行,與廣埓名。 何見,見孔逭不。」見重如此。著三吳決錄,不傳。終於衞軍武陵王東曹掾。又時有虞通 這抗直有才藻,製東都賦,于時才士稱之。 陳郡謝滿年少時遊會稽還,父莊問:「入東

通之、蘇皆會稽餘姚人,通之善言易,至步兵校尉。

|蘇位中書郎、廷尉,少好學,居貧屋漏,恐濕墳典,乃舒被覆書, 書獲全而被大濕。 時人

以比高鳳。

憲字景思,河內溫人,待韶東觀爲學士,至殿中郎,口辯有才地,使魏見稱於北

丹陽 尹,取饑爲主簿。好詩賦,多譏刺世人,坐徙巴州。 仲明,陳郡人,撰晉史,未成而卒。初仲明與劉融、十鱳俱爲袁粲所賞,恒在坐席。 粲爲

|詵字||休羣,太原中都人,愛文,尤賞泉石。 卒於御史中丞。

王智深字雲才,琅邪臨沂人也。 少從陳郡謝超宗學屬文。好飲酒,拙澀乏風儀。 仕齊

爲豫章王大司馬參軍,兼記室。

貧於豫章王,王曰:「須卿書成,當相論以祿。」書成三十卷。 可思諱惡之義。」於是多所省除。 又多載孝武、明帝諸褻黷事,上遣左右語約曰:「孝武事迹不容頓爾。 武帝使太子家令沈約撰宋書、疑立袁粲傳,以審武帝。 又敕智深撰宋紀,召見芙蓉堂,云 帝曰:「袁粲自是宋家忠臣。」約 武帝後召見智深於璿明殿, 賜衣服給宅。 我昔經事宋明帝,卿 智深告

拜 表奏上,表 家貧無人事,嘗餓五日不得食,掘莞根食之。 、未奏而武帝崩。 隆昌元年,敕索其書。 司空王僧虔及子志分與衣食。 智深遷爲竟陵王司徒參軍。 発官

字之器流乎遠近。 亦不食矣。」慰祖不得已,從之。父梁州之資,家財千萬,散與宗族。漆器題爲「日」字,「日」 ·食鹽,母曰:「汝旣無兄弟,又未有子胤。 毀不滅性,政當不進肴羞耳,如何絕鹽。 崔 一慰祖字悦宗,清河東武城人也。父慶緒,永明中爲梁州刺史。 料得父時假貰文疏,謂族子紘曰:「彼有自當見還,彼無吾何言哉。」悉火 慰祖解褐奉朝請。 吾今 父

爲 好學,聚書至萬卷。 院始安王遙光撫軍刑獄,兼記室。遙光好棊,數召慰祖對戲。 隣里年少好事者來從假借,日數十袠。慰祖親自取與,未嘗爲辭。 慰祖輒辭拙,非朔望不

見也。

國 口 吃無華辭,而酬據精悉,一座稱服之。 子 祭酒 建武 沈約、吏部郎謝朓嘗於吏部省中賓友俱集,各問慰祖地理中所 中詔舉士,從兄慧景舉慰祖及平原劉孝標並碩學。 朓歎曰:「假使班、馬復生,無以過此。」 帝欲試以百里,慰祖 不悉十餘事,慰祖 辭不就。

慰祖賣宅須四十五萬,買者云:「寧有滅不。」答曰:「誠異韓伯休,何容二價。」 買者又

曰:「君但賣四十六萬,一萬見與。」慰祖曰:「豈是我心乎。」

反,慰祖在城內。 少與侍中江祀款,及祀貴、常來候之,而慰祖不往也。 城未潰一日,濕謂之曰:「卿有老母,宜出。」命門者出之。 與丹陽丞劉渢素善,遙光據東府 慰祖詣闕自首,

繫尙方,病卒。

遷、固二史、採史、漢所漏二百餘事,在厨簏,可檢寫之,以存大意。海岱志良未周悉,可寫 以棺親上,不須甎,勿設靈座。 數本付護軍諸從事人一通,及友人任昉、徐寅、劉洋、裴揆,令後世知吾微有素業也。」又令 慰祖著海岱志,起太公迄西晉人物,爲四十卷,半成。 臨卒,與從弟緯書云:「常欲更注

之。 孝武令朝士善歷者難之,不能屈。會帝崩不施行。 始元嘉中,用何承天所製歷,比古十一家爲密。沖之以爲尙疏,乃更造新法,上表言 祖沖之字文遠,范陽遒人也。「弘會祖台之,晉侍中。祖昌,宋大匠卿。父朔之,奉朝請。 沖之稽古,有機思,宋孝武使直華林學省,賜宅宇車服。解褐南徐州從事、公府參軍。

永明 啓武 行,使人於內轉之。 造,使於樂游苑對共校試,而頗有差僻,乃毁而焚之。 司方如 帝 中,竟陵王子良好古,沖之造欹器獻之,與周廟不異。 歷位 施行。 爲婁縣令,謁者僕射。 馬鈞以來未之有也。[11]時有北人索駁麟者亦云能造指南車,高帝使與沖之各 文惠尋薨又 昇明 中,齊高帝輔政,使沖之追修古法。 寝 初, 宋武平關中,得姚興指南車,有外形而無機杼,[10] 晉時|杜預有巧思,造欹器,三改不成。 文惠太子在東宮,見沖之歷法, **沖之改造銅機**, 圓轉不窮,而 毎

四 方、興造大業,可以利百姓者,會連有軍事,事 轉長水校尉,領本職。 沖之造安邊論,欲開屯田,廣農殖。 竟不行。 建武中,明帝欲使沖之巡行

述數十篇。 親 施機自運,不勞人力。 自 臨 沖之解鍾律博塞,當時獨絕,莫能對者。 視 子暅之。 又特善算。 又造千里船,於新亭江試之,日行百餘里。 |永元二年卒,年七十二。著易老莊義,釋論語、孝經,注九章, 以諸葛亮有木牛流馬,乃造一器,不因 於樂游苑造水 碓 磨 一、武帝 [風水]

之時,雷霆不能入。 **晒之字景爍,少傳家業,究極精微,亦有巧思。** 嘗行遇僕射徐勉,以頭觸之,勉呼乃悟。 入神之妙, **父所改何承天歷時尚未行,梁** 般、倕無以過 也。 當其詣微

晒之子皓,志節慷慨,有文武才略。 少傳家業,善算歷。 大同中爲江都令, 後拜廣陵

太守。

景大懼,即日率侯子鑒等攻之。 爲賊所容。 餘人襲殺景兗州刺史董紹先,推前太子舍人蕭勔爲刺史,結東魏爲援。 理外,百代之下,猶爲梁室忠臣。若何。」皓曰:「僕所願也,死且甘心。」爲要勇士耿光等百 奉戴府君,勦除兇逆,遠近義徒,自當投赴。 新剋此州,人情不附,襲而殺之,此一壯士之任耳。今若糾率義勇,立可得三二百人。 乃說|皓曰:「逆豎滔天,王室如燬,正是義夫發憤之秋,志士忘軀之日。 少長,皆埋而射之。 侯景陷臺城,皓在城中,將見害,乃逃歸江西。百姓感其遺惠,每相蔽匿。 今逃竄草間,知者非一,危亡之甚,累棊非喻。 董紹先雖景之心腹,輕而 城陷,皓見執,被縛射之,箭遍體,然後車裂以徇。 如其剋捷,可立恒、文之勳,必天未悔禍,事生 府君荷恩重世,又不 馳檄遠近,將討景。 廣陵人來嶷 城中無 無謀, 意欲

來嶷字德山, 幼有奇節, 兼資文武。 旣與皓義舉,邵陵王承制除步兵校尉、秦郡太守,

封 永寧縣侯。 及皓敗,幷兄弟子姪遇害者十六人。子法敏逃免,仕陳爲海陵令。

悉。 |武 時,青州 希鏡對曰:「此是司馬越女嫁苟晞兒。」檢訪果然,由是見遇,敕希鏡注郭子。 賈希鏡,平陽襄陵人也。祖弼之,晉員外郎。父匪之,驃騎參軍。[三] 家傳譜學。 人發古冢,銘云:「青州世子,東海女郎。」帝問學士鮑照、徐爰、蘇寶生,並不能

昇明中,齊高帝嘉希鏡世學,取爲驃騎參軍、武陵王國郎中令。 歷大司馬司徒府參軍。

竟陵王子良使希鏡撰見客譜,出爲句容令。

卷,該究精悉,皆如貫珠,當時莫比。 史書吏,曰己撰定繕寫,藏秘閣及左戶曹。 先是,譜學未有名家,希鏡祖弼之廣集百氏譜記,專心習業。 永明 中,衞將軍王儉抄次百家譜,與希鏡參懷撰定。 希鏡三世傳學,凡十八州士族譜,合百帙,七百餘 晉太元中,朝廷給酮之令

被收,當極法。 建武 初,希鏡遷長水校尉,自即億人王泰寶買襲琅邪譜,尚書令王晏以啓明帝, 予 棲長 謝罪,稽顙流血,朝廷哀之,免希鏡罪。 後爲北中郎參軍,卒。撰氏 希鏡 坐

<u>族要</u>狀及<u>人名書</u>,並行於時。

郎,散騎侍郎,直文德學士省,抄史記、漢書各爲二十卷。 時獻文章於南闕者相望焉。 人假借,必皆抄寫, 袁峻字孝高,陳郡陽夏人,魏郎中令渙之八世孫也。 自課日五十紙, 紙數不登則不止。 天監六年,峻乃擬揚雄官箴奏之。四帝嘉焉,賜東帛,除員外 訥言語,工文辭。 又奉敕與陸倕各製新闕銘 早孤,篤志好學。 梁武帝雅好辭賦, 家貧無書,每從

子諸 王並往弔慰,官至少府卿。 劉 昭字宣卿,平原高唐人,晉太尉寔九世孫也。 父彪,齊征虜晉安王記室 祖伯龍,居父憂以孝聞,宋武 帝敕皇太

昭 幼清警,通老、莊義。 及長, 勤學善屬文, 外兄江淹早相稱賞。 梁天監中,累遷中軍

臨川 王 記室

博悉。 初 卒於剡令。 昭伯父肜集衆家晉書注于寶晉紀爲四十卷, 集注後漢一百三十卷,幼童傳一 卷,日公文集十 至昭集後漢同異以注范曄後漢 卷 世

子縚字言明,亦好 列 傅 第 六 + (學)通三禮,位尚書祠部郎,著先聖本記十卷行於世。 文 學

一七七八

名位,所須衣食。不用身後之譽,唯重目前知見。」 紹弟緩字含度,爲湘東王中錄事。 性虛遠,有氣調,風流迭宕,名高一府。 常云:「不須

鍾嶸字仲偉,潁川長社人,晉侍中雅七世孫也。父蹈,齊中軍參軍。

常行 務,粗 之,是人主愈勞而人臣愈逸,所謂代庖人宰而爲大匠斲也。」上不顧而 識之不。」答曰:「嶸雖位末名卑,而所言或有可採。 務,天子可恭己南面而已。」書奏,上不懌,謂太中大夫顧暠曰:「鍾嶸何人,欲斷朕機務,卿 頗賞接之。 職事,莫不爭自啓聞,取決詔敕。 **| 嵊與兄岏、弟嶼並好學,有思理。 | 嶸齊永明中為國子生,明問易。** 爲繁密。 建武初,爲南康王侍郎。 **嶸乃上書言:「古者明君揆才頒政,量能授職,三公坐而論道,** 時齊明帝躬親細務,綱目亦密,於是郡縣及六署九府 文武勳舊皆不歸選部, 且繁碎職事,各有司存, 於是憑勢互相通進,人君之 他言。 衛將軍王儉領祭酒, 今人主總而親 九卿作而 成

亂, 坐弄天爵、勳非卽戎、官以賄就。 永元末,除司徒行參軍。 梁天監初, 揮一 制度雖革,而未能盡改前弊,嶸上言曰:「永元肇 金而取九列,寄片札以招六校。 騎都塞市,郎將

塡街。 永元 其門品,不當因軍逐濫清級。 諸 軍官是素族士人,自有淸貫,而 服旣纓組,尙爲臧獲之事,職雖黃散,猶躬胥徒之役。 若僑雜愴楚,應在綏撫,正宜嚴斷祿力,絕其妨正, 因斯受爵,一 宜削除, 以懲澆競。 名實淆紊,茲焉莫甚。 若吏姓寒 直乞虚 人, 臣 一愚謂 聽 號 極

m 衡 敕付尚書行之。 陽王元簡 出守會稽 、引爲寧朔記室,專掌文翰。 時居士何胤築室若邪山、これり山

發洪

水 漂拔樹石,此室獨存。 元簡令嶸作瑞室頌以旌表之,辭甚典麗。 遷西 一中郎晉安王記室。

微 最優。 故 **嶸嘗求譽於沈約,約拒之。** 稱獨 齊 「永明 步 0 中, 故當辭密於范,意淺於江」。 相王愛文,王元長等皆宗附約。 及約卒,嶸品古今詩爲評,言其優劣,云「觀休文衆製,五言 蓋追宿憾,以此報約也。 于時謝朓未遒, 江淹 頃之卒官。 才盡, 范雲名級 叉

嶼字季望,永嘉郡丞。

周 興 嗣 字思纂 陳郡 項人也。 世居姑孰,博學善屬文。 **警步自姑孰**,投宿 逆旋 ,夜有人

吳興

謂曰:「子才學 太守,唯與 邁 興嗣初談文史而已。 世, 初當見識貴臣,卒被知英主。」言終不測所之。 及罷郡,因大相談薦。 齊隆昌中,侍郎謝朏爲

年, 是銅 帝實錄、皇德記、起居注、職儀等百餘卷,文集十卷。 佐 撰 爲給 (國史。 時武帝以三橋舊宅爲光宅寺,敕興嗣與陸倕各製寺碑,及成俱奏,帝用興嗣 表銘、栅塘碣、檄魏文、次韻王羲之書千字、並使興嗣爲文。 手 詔興嗣 疏 事 監初,奏休平賦,其文甚美,武帝嘉之,拜安成王國侍郎,直華林省。 疽方以賜之。 中, 興嗣 與待詔到沆、張率爲賦,帝以興嗣爲工,擢拜員外散騎侍郎,進直文德、壽光 直西省。 兩手先患風疽,十二年,又染癘疾,左目盲。 帝撫其手,嗟曰:「斯 任防又愛其才,常曰:「興圖若無此疾,旬日當至御史中丞。」 周捨奉敕注武帝所製歷代賦,啓興嗣 與焉。 每奏,帝稱善,賜金帛。 普通二年卒。所撰皇 其年,河南獻 所製。 人而 十七 有斯 後 自

梁天監 吳均體」。 吳均字叔庠,吳興故鄣人也。 初 柳惲 **均嘗不得意,贈惲詩而去,** 爲吳興, 召補 主簿,日引 家世寒賤,至均好學有俊才,沈約嘗見均文,頗 **外之復來,惲遇之如故,** 與賦詩。 均文體清拔,有 弗之憾也。 古氣,好事者或勢 薦之臨川 之,謂 相 稱賞。 靖惠

王、王稱之於武帝、卽日召入賦詩、悅焉。待詔著作、累遷奉朝請。

秋奏之。 竟支離無對。 [家已畢,唯列傳未就,卒。 先是,均將著史以自名,欲撰齊書,求借齊起居注及羣臣行狀,武帝不許,遂私撰齊春 書稱帝爲齊明帝佐命,帝惡其實錄,以其書不實,使中書舍人劉之遴詰問數十條, 敕付省焚之,坐殆職。尋有敕召見,使撰通史,起三皇訖齊代。 均草本紀、

卷、續文釋五卷、文集二十卷。 均 注范曄後漢書九十卷,著齊春秋三十卷,廟記十卷,十二州記十六卷,錢唐先賢傳五 世

先是有濟陽江洪,工屬文,爲建陽令,坐事死。

僧祐居,遂博通經 劉勰字彥和,東莞萬人也。父尚,越騎校尉。 **論,因區別部類,錄而序之。** 定林寺經藏,勰所定也。 勰早孤,篤志好學。 家貧不婚娶,依沙門

郊 宜 與七廟 梁天監中,兼 同 改。 東宮通事舍人,時七廟饗薦已用蔬果,而二郊農社獪有犧牲,勰乃表言一 韶付尚 書議、依魏所陳。 .遷步兵校尉,兼舍人如故,深被昭明太子愛接

列

器,隨仲尼而南行,寤而喜曰:大哉,聖人之難見也,廼小子之垂夢敷!自生靈以來,未有如 九篇而已。」旣成,未爲時流所稱。。總欲取定於沈約,無由自達,乃負書候的於車前,狀若貨 用,實經典枝條,五禮資之以成,六典因之致用。於是搦筆和墨,乃始論文。其爲文用四十 夫子者也。 敷讚聖旨,莫若注經,而馬、鄭諸儒弘之已精,就有深解,未足立家。唯文章之

證。 勰爲文長於佛理,都下寺塔及名僧碑誌,必請勰製文。敕與慧震沙門於定林寺撰經 功畢,遂求出家,先燔鬚髮自誓,敕許之。乃變服改名慧地云。

約取讀,大重之,謂深得文理,常陳諸几案。

至,忽牓門受餉,數日中得米二千餘斛,他物稱是,悉以代貧人輸租 何思澄字元靜,東海郯人也。父敬叔,齊長城令,有能名。在縣淸廉,不受禮遺,夏節

思澄 少勤學工文,爲遊廬山詩,沈約見之,大相稱賞,自以爲弗逮。 約郊居宅新構閣

齋,因命工書人題此詩於壁。 傅昭嘗請思澄製釋奠詩,辭文典麗

天監十五年,敕太子詹事徐勉舉學士入華林撰遍略,勉舉思澄、顧協、劉杳、王子雲、鍾

武陵王中錄事參軍。 軍,兼東宮通事舍人。 前 **嶼等五人以應選。八年乃書成,合七百卷。** 晚還家,所齎名必盡。 每宿昔作名一束,曉便命駕,朝賢無不悉狎,狎處卽命食。有人方之樓護,曰己欣然當之。投 依尚書二丞給三駒, 文集十五卷。 時徐勉、周捨以才具當朝,並好思澄學,常遞日招致之。 自廷尉正遷書侍御史。 執盛印青囊, 舊事糾彈官印綬在前故也。 思澄重交結,分書與諸賓朋校定,而終日造謁。 宋、齊以來,此職甚輕,天監初始重其選。車 後除安西湘東王錄事 後卒於宣惠 參

言誤耳。 初, 思澄與宗人遜及子朗俱擅文名,時人語曰:「東海三何,子朗最多。」思澄聞之曰: 如其不然,故當歸遜。」思澄意謂宜在已也。

世 子朗字世明,早有才思。 人語曰:「人中爽爽有子朗。」卒於國山令,年二十四。 集行於世 周捨每與談,服其精理。嘗爲敗冢賦,擬莊周馬棰,其文甚

匹。」子雲嘗 曰:「才 王子雲,太原人,及江夏費昶,並爲閭里才子。 意 爲自 新 拔, 吊文 有足嘉異。 ,甚美。 昔郎惲博物 **卞蘭巧辭。** | 昶善爲樂府,又作鼓吹曲。 束帛之賜, 實惟勸善。 武帝 可賜絹十 重之,

列

任孝恭字孝恭,臨淮人也。 曾祖農夫,宋南豫州刺史。 農夫弟候伯,位輔國將軍、行

湘州事,並任將帥。

明佛理 少之。 專掌公家筆翰。 所遺。外祖丘它與武帝有舊,帝聞其有才學,召入西省撰史。 司文侍郎,俄兼中書通事舍人。 孝恭幼孤,事母以孝聞。 ,至是**蔬食持戒**,信受甚篤。 孝恭爲文敏速,若不留思,每奏稱善,累賜金帛。 精力勤學,家貧無書,常崎嶇從人假借,每讀一遍, 敕遣製建陵寺刹下銘,又啓撰武帝集序文,並富麗。 而性頗自伐,以才能尙人,於流輩中多有忽略,世以此 初爲奉朝請,進直壽光省,爲 少從蕭寺雲法師讀經論, 諷誦略無 自是

景獲之,使作檄。 太清二年,江立侯景寇逼,孝恭啓募兵,隸蕭正德。 求還私第檢討、景許之、因走入東府。 城陷,景斬剉之。 正德入賊,孝恭還赴臺,臺門閉,侯 文集行於世。

顏協字子和,琅邪臨沂人,晉侍中含七世孫也。 父見遠,博學有志行。 初,齊和帝鎮荆

州 曰:「我自應天從人,何豫天下士大夫事? 以爲錄事參軍,及卽位,兼御史中丞。 而顏見遠乃至於此。」 梁武帝受禪,見遠不食,發憤數日而卒。 帝聞之,

協 減於善勛。 京兆韋仲善飛白,並在湘東王府。 學其書,殆過眞也。 協 幼孤,養於舅氏。 善勛飲酒至數斗,醉後輒張眼大駡,雖復貴賤親疏無所擇也,時謂之謝方眼。 荆楚碑碣皆協所書。 少以器局稱。博涉羣書,工於草隸飛白。 善勛爲錄事參軍,仲爲中兵參軍。 時又有會稽謝善勛能爲八體六文,方寸千言, 時吳人范懷約能隸書, 府中以協優於韋仲而

伯 協 之,爲懷舊詩以傷之。 叔 亦 在 禮,議者甚 協 蕃邸,與協 家雖貧素,而修飾邊幅,非車馬未嘗出游。 「重焉。 同名,才學相亞,府中稱爲二協。 又感家門事義,不求顯達,恒辭徵辟,游於蕃府而已。卒,元帝甚歎 湘東王出鎭荆州,以爲記室。 舅陳郡謝陳卒,協以有鞠養恩,居喪如 時吳郡顧

而

胸

於夷坦,有士君子之操焉。

協 所撰晉仙傳五篇, 日月災異圖兩卷,行於世。 其文集二十卷,遇火湮滅。 子之儀、之

推,並早知名。

列

高名。」少瑜嘗夢陸倕以一束青鏤管筆授之,云:「我以此筆猶可用,卿自擇其善者。」其文因 王安期之爲 紀 少瑜字幼瑒,丹陽秣陵人也。 人。年十三,能屬文。 初爲京華樂,王僧孺見而賞之,曰:「此子才藻新拔,方有 本姓吳,養于紀氏,因而命族。 早孤,幼有志節, 常慕

此遒進。

陽公爲郢州,以爲功曹參軍,轉輕車限內記室,坐事免。大同七年,始引爲東宮學士。邵陵 旣妙玄言,善談吐,辯捷如流。爲晉安國中尉,卽梁簡文也,深被恩遇。後侍宜城王讀。當 王在郢, 啓求學士, 武帝以少瑜充行。 年十九,始遊太學,備探六經,博士東海鮑皦雅相欽悅。 時皦有疾,請少瑜代講。少瑜

後除武陵王記室參軍,卒。 少瑜美容貌,工草書,東部尚書到漑嘗曰:「此人有大才而無貴仕。」將拔之,會溉去職。

敏,有逸才。年十五,遍觀文史及儀禮故事,時輩稱其早成。僕射徐勉嘗見其文,重其有 杜之偉字子大,吳郡錢唐人也。 家世儒學,以三禮專門。父規,梁奉朝請。 之偉幼精

筆力。

乃啓補 中 大通元年,梁武帝幸同泰寺捨身,敕勉撰儀注。[110]勉以先無此禮,召之偉草具其儀。 東宮學士, 與學士劉陟等抄撰羣書,各爲題目,所撰富敎、政道 二篇,皆之偉爲序。

後兼太學限內博士。

以 爲 故事。 大同 七年,梁皇太子釋奠於國學,時樂府無孔子、顏子登歌詞,令之偉製文,伶人傳習, 再遷安前邵陵王刑獄參軍

並 陳武 一如故。 帝爲 丞 之偉求解著作,優敕不許。 相,素聞其名,召補記室參軍。 再遷太中大夫,仍敕撰梁史,卒官。 遷中書侍郎,領大著作。 吏部尚書張續深知之, 及受禪,除 文集十七卷 以爲廊廟之器。 鴻 1 艫卵, 餘

東宮 學士庾信 顏晃字元明,琅邪 使府 中,王 臨沂 一使晃接對,信輕其少, 人也。 少孤貧,好學,有辭采。 日:「此府兼記室幾人了晃日:「猶當 解褐梁邵陵王兼記室參軍。 少於宮 時

人,掌詔誥。 侯景之亂, 卒,贈 奔荆州。 司 農 卿、諡 承聖 日貞子 初, 除中 書侍郎。 陳天嘉初, 累遷員外散騎常侍, 兼中書舍

中學士。」當時

以爲善對

列傳第六十二 文學

一七八八

晃家世單門,傍無戚援,而介然修立,爲當世所知。 其表奏詔誥,下筆立成,便得事理

有集二十卷。

岑之敬字思禮,南陽棘陽人也。父善紆,梁世以經學聞,官至吳寧令,司義郎。

妨我復有顏、閔邪。」因召入面試。令之敬升講坐,敕中書舍人朱异執孝經,唱士孝章,武帝 親自論難。」之敬剖釋從横,左右莫不嗟服。仍除童子奉車郎,賞賜優厚。 爲高第。御史奏曰:「皇朝多士,例止明經,若顏、閔之流,乃應高第。」梁武帝省其策,曰:「何 之敬年五歲,讀孝經,每燒香正坐,親戚咸加歎異。十六,策春秋左氏、制旨孝經義,擢

限內博士。尋爲壽光學士、司義郎。太清元年,表請試吏,行己除南沙令。 十八,預重雲殿法會,時武帝親行香,熟視之敬曰:「未幾見兮,突而弁兮。」即日除太學

陂,仍留廣州。 陳太建**初題朝,授東宮義省學士。 累遷南臺書侍御**史,征南府諮議參軍。 承聖二年,除晉安王宣惠府中記室參軍。時蕭勃據嶺表,敕之敬宣旨慰喻。 會魏剋江

後進,恂恂如也。 每母忌日營齋,必躬自洒掃,涕泣終日,士君子以篤行稱之。十一年卒。 之敬始以經業進,而博涉文史,雅有詞筆,不爲醇儒。性謙謹,未嘗以才學矜物,接引

有集十卷行於世。

子德潤,有父風,位中軍吳興王記室。

何之元,廬江灊人也。 祖僧達,齊南臺書侍御史。父法勝,以行業聞

令。 其宗人敬容,位望隆重,頻相顧訪,之元終不造焉。 之元幼好學,有才思,居喪過禮。 梁天監末,司空袁昂表薦之,因得召見。 或問其故,之元曰:「昔楚人得寵於 累遷信義

觀起,有馬者皆亡。 夫德薄任隆,必近覆敗,吾恐不獲其利而招其禍。」識者以是稱之。

侯景之亂,武陵王以太尉承制,授南梁州刺史、北巴西太守。 武陵王自成都舉兵東下,

之元 劉棻之郡。 與蜀中人庶抗表請無行, 俄而魏剋江陵,劉棻卒、江三司 王以爲沮衆,囚之元于艦中。 王琳召爲記室參軍。 及武陵兵敗,之元從邵陵太守 及琳立瀟莊、署爲中書侍郎。

王琳敗,齊主以爲揚州別駕,所居卽壽春也。

大惶恐。 及衆軍北伐,湘州刺史始興王叔陵遣功曹史柳咸齎書召之。 讀書至「孔璋無罪,左車見用」,遂隨咸至湘州。 再遷中衛府諮議 之元始與陳朝有隙, 参軍

及叔陵誅,之元乃屛絕人事,著梁典,起齊永元元年,迄于琳遇獲,七十五年行事,爲三

列傳第六十二 文學

陳亡,移居常州之晉陵縣。 隋開皇十三年,卒于家。

徐伯陽字隱忍,東海人也。 父僧權,梁東宮通事舍人,領秘書,以善書知名。

皆一時士也。遊宴賦詩、動成卷軸。四回伯陽爲其集序、盛傳於世 馬樞、記室祖孫登、比部郎賀循、長史劉删等爲文會友,後有蔡凝、劉助、陳暄、孔範亦預焉, 初,與中記室李爽、記室張正見、左戶郞賀徹、學士阮卓、黃門郞蕭詮、三公郞王由禮、處士 侯景之亂,至廣州依蕭勃。 敏而好學,善色養。家有史書,所讀者近三千餘卷。 勃平,還都。 陳天嘉中,除司空侯安都府記室參軍。 太建

王賜以奴婢雜物。後除鎮右新安王府諮議參軍事。 陽常奉使造焉。王率府僚與伯陽登匡嶺置宴,酒酣,命筆賦劇韻三十,伯陽與祖孫登前成, 後除鎭北新安王府中記室參軍,兼南徐州別駕,帶東海郡丞。 聞姊喪、發疾卒。 鄱陽王爲江州刺史,伯

張正見字見賾,清河東武城人也。祖善之,〔三〕魏散騎常侍、勃海長樂二郡太守。 父脩

體、魏散騎侍郎、歸梁、仍拜本職、遷懷方太守。

位, 士,卒。有集十四卷,其五言尤善。 爲彭澤令。屬喪亂,避地匡俗山。 正見幼好學,有清才。梁簡文在東宮,正見年十三,獻頌,簡文深贊賞之。 陳武帝受禪,正見還都。 累遷尙書度支郎,撰史著 梁元帝即

阮卓,陳留尉氏人也。祖詮,梁散騎侍郎。父問道,梁岳陽王府記室參軍。

奔赴,水漿不入口者累日。 載柩還都,度彭蠡湖,中流遇疾風,船幾沒者數四,卓仰天悲號, 卓幼聰敏,篤志經籍,尤工五言。性至孝,父隨岳陽王出鎭江州,卒,卓時年十五,自都

俄而風息,人以爲孝感之至。

夷獠往往聚爲寇抄,卓奉使招慰。。交阯通日南、象郡,多金翠珠貝珍怪之產,前後使者 陳天康元年,自己為新安王府記室參軍,隨府轉翊右記室,帶撰史著士。及平歐陽紇,

皆致之,唯卓挺身而還,時論咸伏其廉。

後爲始興王中衞府記室參軍。 及叔陵誅,後主謂朝臣曰:「阮卓素不同逆,宜加旌異。」

至德元年,入爲德敎殿學士。尋兼通直散騎常侍,副王話聘隋。 隋文帝夙聞其名,遣河東

薛道衡、琅邪顏之推等與卓談宴賦詩,賜遺加禮。

友,以文酒自娛。陳亡入隋,行至江州,追處其父所終,遘疾卒。 還除南海王府諮議參軍,以目疾不之官。退居里舍,改構亭宇,修山池卉木,招致賓

慕尙,雖位有窮通,而名不可滅。然則立身之道,可無務乎。 然縱假之天性,終資好習,是以古之賢哲,咸所用心。至若丘靈鞠等,或克荷門業,或夙懷 成。 而出言異句,寫萬物之情狀,而下筆殊形。暢自心靈,而宜之簡素,輪扁之言,未或能盡。 莫不禀以生靈,遷乎愛嗜,機見殊門,賞悟紛雜,咸召無象,變化不窮。發五聲之音響, 論曰:文章者,蓋情性之風標,神明之律呂也。 蘊思含豪,遊心內運,放言落紙,氣韻天

校勘記

[1]在沈深座「沈深」南齊書作「沈淵」、此避唐諱改。

時有豫章熊襄著齊典上起十代 李慈銘南史礼記:「十代恐是宋代之譌。」按下序云:「尚書堯

典謂之虞書, 則附所述通謂之齊書。」 觀其以虞書通堯爲範例, 則齊書所通者當止於宋,安得

「上起十代」以附所述? |李說可從。

- **≒** ∪ 殿下即東宮爲府 「爲」字各本並脫、據通志補。
- 24 復不懃於討捕 「於」各本作「之」,據南齊書改。

肴」,據通志改。

- 五 彬 性好飲酒以瓠壺瓢勺杬皮爲具 「好」字各本 ·並脫, 據太平御覽九七九引補,「具」各本作
- ベ 自稱卞田居 王鳴盛十七史商権六四引何焯曰:「當作『田君』。 韓翃用文韻押君 字,可知

按杭木皮厚,與瓠瓢皆可製爲容器,故彬以之爲酒具。

其誤。」

-召見芙蓉堂 則 又時有虞通之虞龢司馬憲袁仲明孫詵等 即 南齊書王智深傳所附之袁炳叔明也。 「芙蓉堂」各本作「扶容堂」,據南齊書、通志改。 炳字避唐諱而 張森楷南史校勘記 去,仲、叔未知誰是。」 「按下文言仲明撰晉史未成卒,

- т
- 范陽 遒 人也 「遒」南齊書作「薊」。

へ し

- (0) 有外 形 而 無機杼 「機杼」南齊書作「機巧」。
- 馬 絕 世 鈞 以 來未 又引傳玄序云:「先生名鈞字德衡。 之有 也 「馬鈞」各本作「馬 均 鈞 按三國志魏志方技杜夔傳注:「時有扶風 者器之模而 衡者所以定物之輕重。」 是 「均」當作 馬鈞巧思

列 傳 第 六 + 校 勘 記

「鈞」,今從改。

賈希鏡平陽襄陵人也祖弼之晉員外郎父匪之驃騎參軍 南齊書「賈淵字希鏡」,此避唐諱而稱

晉太元中朝廷給弼之令史書吏 「太元」、「書吏」各本作「泰元」、「書史」,並據南齊書及本書王 其字。 王僧儒傳弼之作弼;淵作深,則又以避唐諱而改字。

然為
然為
然為
然為
然為
、
、
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方
方</

建武初希鏡遷長水校尉「建武」各本作「建元」、據南齊書改。按上出「永明中」,永明之前爲建

元,永明之後爲建武,南齊書是。

峻乃擬揚雄官箴奏之「官箴」各本作「言箴」,據梁書及册府元龜一九二、八三九改。後漢書胡 <u>張傳:「初,揚雄依虞箴作十二州二十五官箴,其九篇亡闕。」</u>

集注後漢一百三十卷幼童傳一卷 百三十卷。「一百三十卷」各本作「一百八十卷」,王鳴盛十七史商權二九訂其誤,今從改。 按今本范曄後漢書一百卷,益以司馬彪續漢志三十卷,凡

「幼童傳一卷」梁書、册府元龜五五五並作「十卷」。

時居士何胤築室若邪山 徒,乃遷秦望山。」是築室於秦望非若邪。 「若邪山」梁書同。按梁書處士何胤傳:「胤以若邪處勢迫隘,不容生

狎處即命食有人方之樓護 「樓護」各本作「婁護」。按漢書游俠樓護傳:「是時王氏方盛,五侯

兄弟爭名,其客各有所厚,唯護盡入其門,咸得其驩心。」西京雜記謂「護傳食五侯間」,此即用

其事。今改正。

[10] 太淸二年 「二年」各本作「三年」,據梁書改。

(101) 中大通元年梁武帝幸同泰寺捨身敕勉撰儀注 「中大通」各本作「中大同」。 按徐勉卒於大同元

年,中大同在大同之後。 又據梁書武帝紀,蕭衍於同泰寺拾身凡三次,一在大通元年,一在中大

通元年,一在太淸元年。 無中大同元年事。 觀下出「大同七年」,則此爲其前之「中大通元年」無

疑,今訂正。

[II] 表請試吏 「請」字各本並脫,據陳書補。

之元從邵陵太守劉棻之郡俄而魏剋江陵劉 茶卒 張森楷南史校勘記:「梁書敬帝紀書盗殺邵

陵太守劉棻,而此云卒,蓋誤。 陳書作劉恭,故於此云劉恭卒。」按通鑑紹泰元年紀作「劉棻」。

[三]] 動成卷軸 「動」陳書作「勒」。

[12] 祖善之 「善之」陳書作「蓋之」。

呈 陳天康元年 「天康」各本作「天嘉」, 據陳書改。 按文帝諸子傳陳伯固封新安王在天嘉六年,

阮卓爲新安王記室參軍當在天康元年。

南史卷七十三

列傳第六十三

孝義上

蔣恭 潘綜 襲穎 陳遺 徐耕 劉瑜 秦綿 董陽 孫法宗 張進之 愈愈 賈恩 范叔孫 郭世通 子原平 張楚 吳國夫 丘傑 ト天與 嚴世期 師覺授 弟天生 吳逵

王彭

余齊人 孫棘 妻許 徐元妻許 錢延慶 何子平 崔懷順 許昭先

王虛之 顧昌術 江柔之 江軻 吳慶之 蕭叡明 鮮于文宗

蕭矯妻羊 羊緝之女佩任 吳康之妻趙 蔣儁之妻黃 吳翼之母丁

會稽陳氏三女 永興概中里王氏女 諸暨屠氏女 吳興乘公濟妻姚

列

傳

第 六

+

Ξ

孝

義

上

一七九七

吳 称范 法恂妻褚 公孫僧遠 吳欣之 韓係伯 丘冠先 孫淡

華 寶 薛天生 劉懷胤 解叔謙宗元卿 庾震 朱文濟 匡昕 魯康 祚

謝 昌寓 韓靈敏 劉渢 弟濂 柳叔夜 封延伯 陳玄子 邵 榮興

文獻叔 徐生之 范安祖 李聖伯 范道 根 譚弘寶 何弘 陽黑頭 王續日 祖

郝道福 吳達之 蔡曇智 何伯嶼 王文殊 樂頤之 弟預 沈昇之

江泌 庾道愍 族孫沙彌 沙彌子持

閻,無聞視聽,考于載籍,何 代 無之。 故宜被之圖篆,用存旌勸。**今搜綴湮落,以備闕文** 乎己,捐軀捨命,濟主安親,雖乘理闇至,匪由勸賞,而宰世之人,會微誘激。乃至事隱閭 於心,名節不變,戎車遽爲其首,斯並軌訓之理未弘,汲引之塗多闕。若夫情發於天,行成 之甿、權利相引、仕以勢招、榮非行立。乏翺翔之感,棄含生之分、行了霜露未改,大痛已忘 情非外感,然企及之旨,聖哲貽言。至於風瀉化薄,禮違道喪,忠不樹國,孝亦愆家,而一代 [易曰:「立人之道,曰仁與義。」夫仁義者,合君親之至理,實忠孝之所資。雖義發因心,

節 其後刺史至,輒加辟引。 救之得免。 亡不能死,何忍舉觴聞樂,蹈跡逆亂乎。」縱大將讓道福引出將斬之,道福 亡,顯號哭奔赴,殯送以禮。 義,遂不被朝命,終於家。 遂寧人也。 及縱僭號,備禮徵又不至,乃脅以兵刃,執志終無回改,至于燭平,遂不屈節 少好學, 歷府參軍,州別駕從事史。 縱後設宴延穎,不獲已而至。 益州刺史毛璩辟爲勸學從事。 宋文帝元嘉二十四年,刺 樂奏, 璩爲 譙縱所殺,故佐吏並逃 類流涕 母 起曰:「北 即類姑也 史陸徽表穎 面 事人, 一、跳出

違。 晝夜不絕聲,動身力以營葬 宋文帝元嘉初卒。 劉瑜,歷陽 歷陽人也。 事。 七歲喪父,事母至孝。 服除,二十餘年, 布衣蔬食, 年五十二,又喪母,三年不進鹽酪, 言輒流涕, 常居墓側, 未嘗暫 號泣

叉元嘉七年, 南 豫州 舉所統西陽縣人董陽三世同居, 外無異門, 內無異煙。 韶榜門日

列傳第六十三 孝義上

篇

行董氏之閭」,

蠲

門

租

布

世。 妻桓氏號哭奔救,隣近赴助,棺櫬得免,恩及桓俱燒死。 追贈恩天水郡顯親左尉。 賈恩,會稽諸暨人也。少有志行。 元嘉三年母亡、居喪過禮。 有司奏改其里爲孝義里,獨租布三 未葬,爲隣火所逼,恩及

歎,以半直與之,世通委之而去。 元嘉四年,大使巡行天下,散騎常侍袁楡表其淳行,文帝 其名者。嘗與人共於山陰市貨物,誤得一千錢,當時不覺,分背方悟,追還本主。錢主驚 嘉之,敕榜表門閭,蠲其租調,改所居獨楓里爲孝行焉。太守孟顗察孝廉,不就。 還先直。服除後,思慕終身如喪者,未嘗釋衣幍。仁孝之風,行於鄕黨。隣村小大莫有呼 男,夫妻恐廢侍養,乃垂泣瘞之。母亡,負土成墳。親戚或共賻助,微有所受,葬畢,傭賃 郭世通,自會稽永興人也。年十四喪父,居喪殆不勝哀。家貧,傭力以養繼母。婦生

子原平字長恭,又稟至行,養親必以己力,傭賃以給供養。 性甚巧,每為人作正,取散

價 主人設食,原平自以家貧,父母不辦有肴味,唯飱鹽飯 而已。 若家或無食, 則虚中

堂 遣 之。 有營墓· 丞還 者盈門。 性 敷 竟日 無術 H 毎至 う義不 家 方蘇。 **父**篤 者,助· 原平服勤未嘗暫替,傭賃養母, 學,因心自然。 以綿 節 疾 原平 獨 歲, 以爲奉終之義,情禮自畢,塋壙 彌 人運力, 飽。 年 一斤遺之,不受。 所起必自貧始,旣 常於此數日 - , 原平 須日暮 經時展勤, 葬畢 衣不解帶,口不嘗鹽菜者,跨積 作 一,詣所 中哀 畢 一,受直 瑶之乃自往, 曰: 思, 取 買主 **人乃閑練。** 、賤價、 絕飲 歸家,於里糴買,然後舉 執役無懈, 有餘聚以 粥。 叉以 凶功,不欲假人。 又自賣十夫以 父服 夫 日 自 與諸 「今歲 除後, 助之。 贖。 寒暑,又未嘗睡臥。 奴分務, 旣 過寒,而 不 及父 學構 供衆費、 復食肉。 本雖巧 一喪終, 家,尤善其 讓逸取勞。 建安綿好, 而不解作墓 電穸之事 高 自 陽 起 許 事, 父亡,哭踊 兩 主人不 以 間 瑶 毎 此 之 小 一,乃訪邑中 至吉歲, 儉 奉尊 罷 屋 忍使,每 而 建 以 慟 當 上下 安 爲 求 郡 諞

原平 木 及 欲 母: 使 終,毀瘠彌 人 慢其墳墓 甚, ,乃貿家資,貴買此田 僅乃発喪。 墓前· 有數· ,三農之月,輒 十畝田,不屬原平,每至農月,耕者 東 帶 垂泣 躬 自 耕 墾 恒 裸袒

耳。

原平乃拜而

受之。

宅上 一種竹, 毎 出 賣 夜 物 有 裁求半價 盜其筍者, ,邑人皆共 原平遇見之,盜者奔走墜溝。 識 悉,輒加 本 價 與 (之)被 原平乃於所植竹處溝 此 相 譲 要使 微 賤 上立小橋令 然後 取 直

列

傳

第

六

+

Ξ

孝

義

Ŀ

通,又採筍置籬外,隣里慚愧,無復取者。

而答曰:「吾家見異先朝,蒙襃贊之賞,不能報恩,私心感動耳。」「哥 宋文帝崩,原平號慟,日食麥鉡一枚,如此五日。 人曰:「誰非王臣,何獨如此。」原平泣

平及山陰朱百年妻各百斛。

原平誓死不受,百年妻亦固辭。 請救,然後得免。 吏執以送縣。縣令新到,未相諳悉,將加嚴罰,原<u></u>解衣就罪,義無一言。 左右大小咸稽額 須待,以此爲常。嘗於縣南郭鳳埭助人引船,遇有鬭者爲吏所錄,鬭者逃散,唯原平獨住, 每行來見人牽埭未過,輒迅檝助之。己自引船,不假旁人。若自船已度,後人未及,常停住 原平曰:「普天大旱,百姓俱困,豈可減漑田之水,以通運瓜之船。」乃步從他道往錢唐貨賣。 又以種瓜爲業,大明七年大旱,瓜瀆不復通船。縣令劉僧秀愍其窮老,下瀆水與之。 由來不謁官長,自此乃始修敬。太守察興宗臨郡,深加貴異,以私米饋原

故二選並寢。興宗徵還都,表其殊行,舉爲太學博士。會興宗薨,事不行。卒於家。三子一 爲望計,原平次息爲望孝。仲智會土高門,原平一邦至行,欲以相敵。會明帝別敕用人, 會稽郡貴重望計及望孝、盛族出身、不滅秘、著。明帝泰始七年,興宗欲舉山陰孔仲智

弟,並有門行。

列傳第六十三 孝義上

期飴之二十年,死並殯葬。宗親嚴弘、鄉人潘伯等十五人,荒年並餓死,露骸不收。 分食解衣以贍其乏,三子並得成長。 棺殯埋, 嚴世期,會稽山陰人也。 存育孩幼。 宋元嘉四年,有司奏 榜 門 日「義行嚴氏之門」。 復其身徭役,蠲租稅 性好施,同里張邁等三人妻各產子,歲饑,欲棄而不舉。 同縣食陽妻莊年九十,莊女驥七十,並老病無所依,世 世期買 世期

十年。

逆取 守王韶之擢補功曹史。 之。朞年中成七墓,葬十三棺,隣里嘉之。葬日,悉出赴助,送終之事,亦儉而 無被袴,晝則傭賃,夜則伐木燒塼,妻亦同達此誠,無有懈倦。逵夜行遇猛獸,猛獸輒下道 人,達時病困,隣里以葦席裹之,埋于村側。旣而親屬皆盡,唯達夫妻獲全。家徒四壁立,冬 獬 吳達,吳興烏程人也。經荒饑饉,係以疾疫,父母兄嫂及羣從小功之親男女死者十三 人夫直,葬畢,衆悉以放之,達一無所受,皆傭力報答焉。 逵以門寒,固辭不就。 舉爲孝廉。 太守張崇之三加禮命,太 周禮。逵時 避

轉逼 租 上 旭 舉 賊 乞賜生命。」 一州臺 廷 因 大事,此 潘綜 驃。 斫 戸尉 世。 一,陳 際,綜抱父於腹下, 沈 驃語線:「 其行 赤 兒 吳興烏程人也。 | 賊至,驃亦請賊曰:「兒年少 黔 辺 以綜 跡。 死救父, 我不能 及將行 異行,薦補左戶令史,除遂昌長。 云何可 去,汝 賊斫綜 設 孫恩之亂 祖 殺? 走可 道 頭 殺孝子不祥。」賊乃止, 面 脫,幸勿俱 ,
祇黨攻破村邑,
綜與父
驃共走避 贈以四言詩。 /自能 凡 四 創 走, 綜當時悶絕。 死。」驃困乏坐地 **今爲老子不** 元嘉四 歲滿還家, 年, 父子 去。 有 有司奏改其 並得免。 線線 太守王韶之臨 老子不惜死, 賊從傍來 迎 賊。 賊 叩 鄕 里為純 頭 驃年老行遲,賊 相 人 日 謂 乞活此兒。」 秘 郡 :「父年老, 書 日 孝里 監 發 教 卿欲 丘 蠲 列 系

目 貽 爲 母。 失明,耳 又宋初吳郡 後 孫 恩 無所聞。 亂 ,聚得數升 人陳遺, 遺還入戶 少爲郡 ',恒帶 , 再拜號咽 吏,母好 自 隨。 食鎗 及敗 ,母豁然 逃 底 鼠 飯。 卽 多 遺在役,恒帶 明 有 餓 死 遺以此 囊,每煮 得活。 食輒錄 母 晝夜泣涕 其 焦以

人曰:「若死者無知,固不宜獨存,有知則大獲吾志。」 食粥,無米食菜而已。 哀號之聲,行者爲之潸淚。 服訖猶不還家,遇疾不療,卒。臨亡,告

韶在所蠲其徭役。 之家,供奉經時,盡其誠力。味之嘗避地墮水沈沒,進之投水拯救,相與沈淪,久而得免。 世富足、經荒年、散財救贍鄉里、遂以貧罄、全濟者甚多。太守王味之有罪、當見收、逃避進 時劫掠充斥,每入村抄暴,至進之門,輒相約勒,不得侵犯,其信義所感如此。 張進之,永嘉安固人也。 爲郡大族,少有志行,歷五官主簿,永寧安固二縣領校尉。 家

財冒難棺斂逸之等六喪送致都。葬畢,乃歸鄕里。元嘉中老病卒。 又孫恩之亂,永嘉太守司馬逸之被害,「Ki妻子並死。兵寇之際,莫敢收藏,郡吏兪僉以

見榜門曰「孝行張氏之閭」,易其里爲孝行里。 時又有益州梓潼人張楚,母疾,命在屬纊,楚祈禱苦至,燒指自誓,精誠感悟,疾時得 蠲租布三世,身加旌 命。

列

驚起,果得甌,甌中有藥,服之下科斗子數升。 曰:「死止是分別耳,何事乃爾荼苦。 丘傑字偉時,吳興烏程人也。十四遭母喪,「引以熟菜有味,不嘗於口。 汝噉生菜,遇蝦蟇毒,靈牀前有三丸藥可取服之。」傑 丘氏世保此甌。大明七年,災火焚失之。 歲餘忽夢見母

後撰孝子傳八卷。宋臨川王義慶辟爲州祭酒、主簿,並不就。乃表薦之,會卒。 持書一函,題曰「至孝師君苫前」。俄而不見。捨車奔歸,聞家哭聲,一叫而絕,良久乃蘇。 師覺授字覺授,南陽湼陽人也。與外兄宗少文並有素業,以琴書自娛。 於路忽見一人

畫則 世。 **'傭力,夜則號感,鄉里並哀之,乃各出夫力助作塼。 塼須水而天旱,穿井敷十丈,泉不** 墓處去淮五里,荷擔遠汲,困而不周。彭號天自訴,如此積日。一旦大霧,霧歇,塼竈 王彭,盱眙直瀆人也。少喪母,元嘉初,父又喪亡。家貧力弱,無以營葬。兄弟二人,

前忽 劉 伯 龍依事表言,改其里爲通靈里,蠲租布三世。 生泉水、鄉隣助之者並嗟神異、縣邑近遠悉往觀之。 葬竟,水便自竭。 元嘉九年,太守

不合罪。 協。 協 先行不在,本村遇水,妻息避水,移寄祛家。 並款舍住晞張家口,而不知劫情。 協 蔣恭,義興臨津人也。 列是戶主,求発弟恭。 後除恭義成令,協義招令。 元嘉中, 晉陵蔣崇平爲劫見禽, 云與恭妻弟吳晞張爲侶。 兄弟二人爭求受罪,郡縣不能判,〔八〕依事上詳。 | 恭列縣張妻息是婦之親、親今有罪、恭身甘分、求免兄 時錄晞張不獲,禽收恭及兄協 付獄 州議 科罪。 以 為並 晞張

爲言 上,當 徐耕, 時 晉陵延陵 議 以耕 比漢 人也。 卜式。 元嘉二十一年,大旱人飢,耕詣縣陳辭,以米千斛助官 詔書褒美,酬以縣 令。 1振貸。

大明八年,東 土饑旱,東海嚴成、東莞王道蓋各以私穀五 百餘斛助官振 卹

謝,行創本不關善人,使者遠相及。 饋遺無所受。 以父屍不測,入海尋求。聞世間論是至親以血瀝骨當悉漬浸,乃操刀沿海見枯骸則刻肉灌 小 悉馴附。 血,如此十餘年,臂脛無完皮,血脈枯竭,終不能逢。 流迸,至十六方得還。單身勤苦,霜行草宿,營辦棺槨,造立冢墓,葬送母兄,儉而有禮。 孫法宗一名宗之,吳興人也。父隨孫恩入海澨被害,屍骸不收,母兄並餓死。 毎鷵 宋孝武初、揚州辟爲文學從事、不就、卒。 鹿觸網,必解放之,償以錢物。 取牛糞煮傅之卽驗。」一 後忽苦頭創,夜有女人至曰:「我是天使來相 **逐衰経終身,常居墓所,山禽野獸,皆** 傅便差,一境賴之。 終身不娶, 法宗年

|孫 父 唯 並 死 餘 不 法先,病又危篤, 爲 范叔孫,吳郡錢唐人也。少而仁厚,周窮濟急。 殯 殯 瘞,躬卹病者,並皆得全。 范苗父子 並亡。 喪屍經 范敬宗家口六人俱得病,二人喪沒, 月不收。云 鄉曲貴其義行,莫有呼其名者。 叔孫悉備棺器, 同里范法先父母兄弟七人同時疫死, 親爲殯埋。 親隣畏遠, 宋孝武孝建初,除竟陵 又同里施夫疾病、「〇〇 莫敢營視。 叔

王國中軍,不就

ト天與, 吳興餘杭人也。父名祖,宋武帝聞其有幹力,召補隊主。 從征伐,封關中侯,

歷二縣令。

十九 諡 隊 來 與 將張 日 不暇被甲,執刀持弓,疾呼左右出戰。 去,云何即 壯侯 (年)爲廣威將軍,領左細仗。 元凶入弑,事變倉卒,舊將羅訓、徐罕皆望風屈附。[lil]天 天與善射,弓力兼倍,容貌嚴毅,笑不解顏。文帝以其舊將子,自己使敎皇子射。元嘉二 弘之、朱道欽、陳滿與天與同出拒戰,並死。 ,車駕臨哭。 時方作此語,只汝是賊手。」射劭於東堂,幾中。 弘之等各贈郡守。 徐罕曰:「殿下入,汝欲何爲。」天與駡曰:「殿下常 給天與家長禀。 孝武卽位,贈天與龍驤將軍、益州刺史, 逆徒擊之,臂斷, 乃見殺。 其

守、直閣,領細仗隊主。 子 伯宗殿中將軍。 明帝 昇明元年,與袁粲同謀伏誅 泰始初領幢,擊南賊於赭圻,戰沒。 伯宗弟伯興官至南平昌太

灭與弟天生, 少為 隊將, 十人同火。 屋後有一坑廣二丈餘,十人共跳之皆度, 唯天生

1八1〇

之、往反十餘、曾無留礙、衆並歎服。 天生乃取實中苦竹,剡其端使利,交橫布坑內,更呼等類共跳,並懼不敢。 以兄死節,爲孝武所留心。 大明末,爲弋陽太守。 天生乃復跳 明

帝泰始初,與殷琰同逆被斬

獨 無有懈息,如是七載。尚書沈演之嘉其操行,肇之事由此得釋。 料訴,無日在家,餉饋肇之,莫非珍新。資產旣盡,賣宅以充之。 許昭先,義興人也。叔父肇之坐事繫獄,七年不判。子姪二十許人,昭先家最貧薄,專 肇之諸子倦怠,唯昭先

 皆得 劉眞道板爲征虜參軍,昭先以親老不就,補迎主簿,昭先以叔未仕,又固辭。 成長。昭先父母皆老病、家無僮役、竭力致養、甘旨必從。 昭先舅夫妻並疫病死亡,家貧無以殯送,昭先賣衣物以營殯葬。 宗黨嘉其孝行。 舅子三人並幼,贍護 雍州 刺史

齊人謂人曰:「比肉痛心煩,有如割截。 余齊人,自己晉陵晉陵人也。少有孝行,爲邑書吏。 居常惶駭,必有異故。」信尋至,以父病報之。 宋大明二年,父殖在家病亡,信未

終,恨不見汝。」齊人卽曰:「相見何難。」於是號叫殯所,須臾便絕。 州縣上言,有司奏改其 里爲孝義里,蠲租布,賜其母穀百斛。 四百餘里,一日而至。 至門,方知父死,號踊慟絕,良久乃蘇。問父所遺言,母曰:「汝父臨

依 委罪小郎。且大家臨亡,以小郎屬君。 各置一處,報云「聽其相代」。顏色並悅,甘心赴死。 爲家長,令弟不行,罪應百死,乞以身代臟。」臟又辭列自引。 事表 孫棘,彭城人也。 上,孝武詔特原罪。州加辟命,幷賜帛二十疋。 宋大明五年,發三五丁,弟薩應充行,坐違期不至。 竟未妻娶, 家道不立。 棘妻許又寄語屬棘:「君當門戶,豈可 太守張岱疑其不實,以棘 君已有二兒,死復何恨。」岱 棘詣郡辭列:「棘 薩

誓不 季。 行,父逼載送買。 元嘉中,八十餘卒。 先是,新蔡徐元妻許二十一喪夫,子甌年三歲,父攬愍其年少,以更適同縣張買。 許自經氣絕,家人奔赴,良久乃蘇。 買夜送還攬。 許歸徐氏,養元父 許自

| 康隆恩, 「图手刃殺之, 自繫鳥程獄。 又明帝泰始二年,長城吳慶恩殺同郡錢仲期。子延慶屬役在都, 吳興太守郗顒表不加罪,許之。 聞父死馳還,於庾浦

何子平,廬江鸞人也。曾祖楷,晉侍中。祖友,會稽王道子驃騎諮議參軍。父子先,建

安太守。

子平日:「公家正 鎭 若不可寄致至家,則不肯受。母本側庶,籍注失實,實未及養,而籍年已滿,便去職歸家。時 曰:「所利 軍 ·將軍顧覬之爲州上綱,謂曰:「尊上年實未八十,親故所知,州中差有微祿,當啓相留。」 子平世居會稽,少有志行,事母至孝。揚州辟從事史,月奉得白米,輒貨市粟麥。人 無幾,何足爲煩。」子平曰:「尊老在東,不辦得米,何心獨饗白粲。」每有贈鮮肴者, 取信黃籍,籍年旣至,便應扶侍,何容苟冒榮利。」乃歸家竭力供養。

寧自 東 土饑荒、繼以師旅、八年不得營葬。 ·在養親,不在爲己。」問者慚而 解。 元嘉三十年,元凶弑逆,隨王誕入討,以爲行參軍。子平以凶逆滅理,故廢己受職,事 末除吳郡海虞令,縣祿唯供養母一身,不以及妻子。人疑其儉薄,子平曰:「希祿 退。 母喪去官,哀毀踰禮,每至哭踊,頓絕方蘇。屬大明末 晝夜號哭,常如袒括之日。 冬不衣絮,暑避清凉,气息

懷順孤貧、宗黨哀之,日斂給其斗米。

永明中卒。

日以數合米爲粥,不進鹽菜。 所居屋敗, 不蔽風日, 兄子伯興欲爲葺理, 子平不肯, 日

堅明,處之以默,安貧守善,不求榮進。 我情事未申,天地 子平居喪毁甚,及免喪,殆至不立。 一罪人耳,屋何宜覆。」蔡興宗爲會稽太守,甚加矜賞,爲營冢壙 好退之士彌以此貴之。 幼持操檢,敦厲 名行,雖處闇室, 卒年六十。 如接大賓。 學義

許 子姪 **篤愛,聞**父見虜,卽日遣妻,布衣蔬食如居喪禮,歲時北向 徒跣氷雪,土氣寒酷,而手足不傷,時人以爲孝感。 官。 如 宋大 此。 [出處不同,義將安在。]元孫曰:「王尊驅驥,王陽回車,欲令忠孝並弘,臣子兩遂。」 崔懷順、日日清河東武城人也。 泰始初, 一明中,懷順宗人冀州刺史元孫北使魏,魏人問之曰:「崔邪利、模並力屈歸命,二家 懷順得書更號泣。 淮北入魏,懷順因此歸北,至代都而邪利已卒,懷順絕而 懷順從叔模爲滎陽太守,亦入魏,模子雖居處改 父邪利,魯郡太守,宋元嘉中爲魏所獲。 喪畢,以弟在南,齊建元初又逃歸,而弟 流涕。 邪利後仕魏, 後蘇,載喪還靑州。 懷順與妻房氏 節,不廢 書戒懷順 婚 不

實,又每夜所居有光如燭,墓上橘樹一冬再實,時人咸以爲孝咸所致。齊永明中,詔榜門, 著牀,忽有一人來問疾,謂之曰:「君病尋差。」俄而不見,病果尋差。 庭中 楊 梅 樹 隆 冬三 王虚之字文靜,廬江石陽人也。十三喪母,三十三喪父,二十五年鹽酢不入口。疾病

子曰:「昌衍旣有至行,且張永之甥,宜居禮闡,以光郎署。」乃以爲尚書庫部郎。」柔之、軻並 豪侈,唯見軻則敬挹焉。 |濟陽人。|柔之字||叔遠,孝悌通亮,亦至臺郎。||軻字||伯倫,貞嚴有行。宗人||江縣位至侍中,性 時又有顧昌衍、江柔之、江軻並以篤行知名。昌衍吳人,居喪幾致滅性。王儉言之天

「走素無人世情,直以明府見接有禮,所以奔走歲時。若欲見吏,則是蓄魚於樹,栖鳥於泉 **|恭誅,慶之自傷爲更無狀,不復肯仕,終身蔬食。後王琨爲吳興太守,欲召爲功曹。** 吳慶之字文悅,濮陽人也,寓居吳輿。「日」宋江夏王義恭爲揚州,召爲西曹書佐。及義

冰如筯,額上叩頭血亦冰不溜。[15]忽有一人以小石函授之,曰:「此療夫人病。」叡明跪受 之,忽不見。 以函奉母,函中唯有三寸絹,丹書爲「日月」字,母服之卽平復。 蕭叡明字景濟,南蘭陵人也。 母病風,積年沉臥。 叡明晝夜祈禱、時寒、叡明下淚爲之

欲手自戮之。 緒聞便心中介介然,日也即利血,明日而死。 食。」先嘗之,遂倂食盡。 于時秣陵朱緒無行,母病積年,忽思菰羹,緒妻到市買菰爲羹欲奉母,緒曰:「病復安能 旣而曰:「洿吾刀。」乃止。 母怒曰:「我病欲此羹,汝何心倂啖盡。天若有知,當令汝哽死。」 永明五年,居母喪,不勝哀,卒,詔贈中書郎。 叡明聞之,大悲慟,不食積日。 問緒尸在何處

終身。 時 姊文英適荀氏,七日而夫亡,執節不嫁。 又有鮮于文宗,漁陽人,年七歲喪父。父以種芋時亡,至明年芋時,對芋嗚咽, 及母卒,晝夜哭泣,遂喪明 如此

一八一六

在樹下自稱|枯桑君,曰:「若人無患,今泄氣在亥,〔三〕西南求白石鎭之。」言訖不見。 蕭燆妻洋字淑禕,性至孝,居父喪,哭輒吐血。 母嘗有疾,淑禕於中夜祈禱,忽見一人 明日如

言而疾愈。

又時有洋緝之女佩任者,鳥程人。隨母還舅氏,母亡,晝夜號哭,不飲食三日而亡,鄉

里號曰「女表」。

憐之,各分升米,遂得免。及嫁康之,少時夫亡,家欲更嫁,誓言不貳焉。CIII 又有晉陵吳康之妻趙氏,父亡弟幼,遇歲饑,母老病篤,趙詣鄉里告乞,言辭哀苦,鄕里

又義興蔣儁之妻黃氏,夫亡不重嫁,家逼之,欲自殺,乃止。 建元三年,韶蠲表門閭。

徐氏,荒年客死山陰,丁爲買棺器,三三自往斂葬。 里求借未嘗遠。 又會稽永興吳翼之母丁氏,自己少喪夫。性仁愛,遭年荒,分衣食以飴里中飢餓者,隣 同里 陳攘父母死,孤單無親戚,丁收養之。 元徽末,大雪,商旅斷行,村里比室飢餓, 及長爲營婚娶。 又同里王禮妻

丁自 送。[三]丁長子婦王氏守寡,執志不再醮。 出鹽米,計口分賦。同里左僑家露四喪無以葬,丁爲辦冢椁。 州郡上言,詔表門閭,蠲租稅。 有三調不登者,代爲輸

遇 長女自傷榮獨,誓不肯行。祖父母尋相繼卒,三女自營殯葬,爲菴舍居墓側。 一歲饑,三女相率於西湖採菱蓴,更日至市貨賣,未嘗虧怠,鄉里稱爲義門, 又會稽寒人陳氏,有三女,無男,祖父母年八九十,老無所知,父篤癃病,母不安其室。 多欲娶爲婦。

皆血 出。 叉永興概中里王氏女年五歲,得毒病,兩目皆盲。 小妹娥舐其血,左目即開,時人稱爲孝感。 性至孝,年二十父死,臨尸一叫,眼

中溪 **畫採樵,夜紡績,以供養。父母俱卒,親營殯葬,負土成墳。忽空中有聲云:「汝至性可重,** Щ 神 蜮 欲 又諸暨東洿里屠氏女,父失明,母痼疾,親戚相棄,鄉里不容。女移父母遠住苧羅,至時 女以 毒者,「云」女試療之,自覺病便差,遂以巫道爲人療疾,無不愈。 相驅使,汝可爲人療病,必得大富貴。」女謂是魅魅,弗敢從。遂得病積時。隣舍人有 無兄弟,誓守墳墓 一不嫁,爲山劫所殺。 家產日益,鄉里多欲

列

宅爲取婦,自與二男寄止隣家。 明帝詔爲其二子婚,表閭復徭役。 又吳興乘公濟妻姚氏,生二男,而公濟及兄公願、乾伯並卒,各有一子,姚養育之,賣田

殯舉尸不起,尋而僧簡至焉。 尋伏法,褚氏令僧簡往斂葬。年七十餘,永明中卒。僧簡在都聞病馳歸,未至,褚已卒,將 「孫越州先姑之姊子,與汝父親則從母兄弟,交則義重古人,逃竄脫不免,汝宜收之。」曇瓘 又吳郡范法恂妻褚氏,亦勤苦執婦業。宋昇明中,孫曇瓘謀反亡命,褚謂其子僧簡曰:

婚嫁,乃自賣爲之成禮。名聞郡縣。齊高帝即位,遣兼散騎常侍虞炎等十二部使行天下,公司 表列僧遠等二十三人,韶並表門閭,蠲租稅。 及伯父。弟亡,貧無以葬,曰引身自販貼與隣里,供斂送終之費,躬負土,手種松柏。兄姊未 公孫僧遠,會稽剡人也。居父喪至孝,事母及伯父甚謹。年饑,僧遠省飱滅食以養母

吳欣之,晉陵利城人也。〔三〕宋元嘉末,弟慰之爲武進縣吏。 隨王誕起義,元凶遣軍主

華欽討之,如可東人皆散,慰之獨留見執。將死,欣之詣欽乞代弟命,辭淚哀切,兄弟皆見原。

齊建元三年,有詔蠲表之。

永明初,廣陵人宣超之二息犯罪爭死,至三太守劉悛表以聞。

韓係伯,襄陽人也,事父母謹孝。 襄陽人隣居種桑樹於界上為誌,係伯以桑枝蔭妨他

齊建元三年,蠲表門閭,以壽終。

地,遷界上開數尺,隣畔隨復侵之,係伯輒更改種。

久之, 隣人慚愧, 還所侵地, 躬往謝之。

時有吳興人聞人夐,年十七,結客報父仇,爲高帝所賞,位至長水校尉。

丘冠先字道玄,吳興烏程 人也,少有節義。 齊永明中,位給事中。時求使蠕 蠕國、三三

尚書令王儉言:「冠先 雖名位未升,而義行甚重。若爲行人,則蘇武、鄭衆之流也。」於是使蠕

列

蠕。 戎狄者,我也。」遂見殺。 蠕蠕逼令拜,冠先執節不從。 武帝以冠先不辱命、賜其子雄錢一萬、布三十疋。 以刃臨之,冠先曰…「能殺我者蠕蠕也,不能以天子使拜 雄不受,詣闕上

八二〇

元四年,車僧朗銜使不異,抗節是同,詔贈正員外郎,此天朝舊準,臣父成例也。 書曰:「臣父執節如蘇武,守死如谷吉,遂不書之良史,甄之襃策,萬代之後,誰死社稷。 今僧朗反 建

葬冢塋,臣父湮棄絕域,語忠烈則亦不謝庫,論荼苦則彼優而此劇,名位不殊,禮數宜等,乞

申哀贈。」書奏不省。

孫淡,太原人也,世居長沙。 事母至孝,母疾,不眠食,以差爲期。 母哀之,後有疾不使

知也。齊建元三年,蠲表門閭。卒於家。

華寶,晉陵無錫 人也。 父豪, 晉義熙末戍長安, 寶年八歲, [三] 臨別謂寶曰: 「須我還當

爲汝上頭。」長安陷,實年至七十不婚冠。 或問之,實輒號慟彌日,不忍答也。

同郡薛天生,母遭艱菜食,天生亦菜食。 母未觅喪而死,天生終身不食魚肉。

又同郡劉懷胤與弟懷則,年十歲遭父喪,不衣絮帛,不食鹽菜。 齊建元三年,並表

門閭。

以奉朝請徵,不至。 與之,幷示以漬酒法。 問其所用,答曰:「此丁公藤,療風尤驗。」叔謙便拜伏流涕,具言來意。 丁公藤爲酒便差。」卽訪醫及本草注,皆無識者。 解叔謙字楚梁,雁門人也。〔一旦母有疾,叔謙夜於庭中稽顙祈福,聞空中語云:「此病得 叔謙受之,顧視此人,不復知處。 乃求訪至宜都郡, 依法爲酒,母病卽差。 遙見山中一 此公愴然, 老公伐木, 齊建武初, 以四段

痛,以此爲常。 蔣,南陽 時 又有宗元卿、庾震、朱文濟、匡昕、魯康祚、謝昌寓皆有素履,而叔謙尤高。 有至行。 鄉里宗事之,號 早孤 ,爲祖母所養。 日宗曾子。 祖母病,元卿在遠輒心痛,大病則大痛,小病則小 元卿字希

震字彥文,新野人。 喪父母,居貧無以葬,賃書以營事,至手掌穿然後葬事獲濟。 南陽

劉虬因此爲撰孝子傳。

文濟字敬達,吳興人。 自賣以葬母,太守謝滿命爲儒林,不就。

断字<u>令先,廬陵人,有至性,隱金華山,服食不與俗人交。</u> 母病亡已經日,断奔還號叫,

母卽蘇。 皆以爲孝威所致。

小寬,因此漸差。 康祚,扶風人,亦有至行。 時人以其有冥應。 母患乳癰,諸醫療不愈,康祚乃跪,兩手捧癰大悲泣, 康祚位至屯騎校尉。 母即覺

昌寓, 陳郡人也,爲劉悛廣州參軍。 孝性甚至。 嘗養一鵠, 昌寓病二旬,而鵠二旬不

食。 昌寓亡而鵠遂飛去。

瓜,朝採瓜子,暮生已復,言言遂辦葬事。 韓靈敏,會稽剡人也。早孤,與兄靈珍並有孝性。 靈珍亡無子,妻朝氏守節不嫁,公長己慮家 母尋又亡,家貧無以營凶,兄弟共種 人奪其志,

未嘗告歸。

靈敏事之如母。

苦。 室。 夜不離左右,每有增加,輒流涕不食。 立齋宇,筵席不減侯王。 。溫年數歲,路氏不以爲子,奴婢輩捶打之無期度。 路氏生津,兄渢憐愛之不忍捨,恒在牀帳側, 劉 **渢字處和,南陽** 人也。 父紹, 仕床位中書郎。 廉有識,事渢過於同產,事無大小,必諮兄而後行。 路氏病差,感其意,慈愛遂隆。 輒被驅捶,終不肯去。 **渢母早亡,紹被敕納路太后兄女爲繼 胍母亡日**,輒悲啼不食,彌爲婢輩所 路氏富盛,一 路氏病經 年,渢晝 旦爲渢

爲諮議,領錄事。及召入,遙光謂曰:「劉暄欲有異志,今夕當取之。」遙光去歲暴風,性 光任當顧託,朝野向濕如雲。濕忌之,求出爲丹陽丞,至即雖外遷而意 事,旦方召渢,渢以爲宜悉呼佐史。 渢妹適江 而弟禧,與 而兄弟異常。 渢之徙丹陽丞也,

遙光以蕭懿第四弟晉安王之文學暢 自尚書比部郎,後爲遙光諮議,專知 任 無改。 腹 心任。 及遙光學 時遙 理乖

列

作異邪 肯去。 禍, 趸, 錯,多時方愈。 而 何 而 坐守此城, 美哉。」 今旣相逢,何忍獨生。」因以衣帶結兄衣,俱見殺。 作 此 」因訶令出。 渢 語。」及迎 曰:「吾爲人作吏,自不避死,汝可去,無相守同盡。」答曰:「向若不逢兄,亦草間 今年坐公滅族矣。」及遙光敗,渢靜坐圍舍。 暢曰:「公去歲違和,今欲發動。」顧左右急呼師視脉。 垣歷生至,與渢俱勸夜攻臺。 須與渢入,暢謂曰:「公昔年風疾, 旣不見納,濕、歷生並撫膺曰:「今欲作賊 何胤聞之歎曰:「兄死君難, 今復發。」渢 濂爲度支郎亦奔亡,遇渢仍不復 曰:「卿視今夕處分,云 遙光厲聲曰:「諮議欲 弟死兄 荷

參軍 o 又柳叔夜,河東人。 及 事 ·敗,左右扶上馬,欲與俱亡,答曰:「吾已許始安以死,豈可負之邪。」遂自殺。 父宗,宋黃門郎。 叔夜年十六爲新野太守,甚有名績,補遙光諮議

延伯 爲豫州, 好學退 封 延伯字仲連、「弐」勃海人也。 上表薦之,詔書優禮。 譲 ,事寡嫂甚謹 垣崇祖 起家爲平西長史、梁郡太守。 世爲州郡著姓,寓居東海,三世 為兗州 請爲 長史, 不就。 爲政淸靜,有高 崇祖 | 載其門,不肯相 同 財 爲 土風 北 州 所宗附。 俄以疾 見。 後

免,還東海。 于時四州入魏,士子皆依海曲,爭往宗之,如遼東之仰邴原也。

八世同居。 建元三年,大使巡行天下,義興陳玄子四世同居,一 東海徐生之、武陵范安祖、李聖伯、范道根, 並五世同居。零陵譚弘寶、衡陽何 百七口。〔三〕武陵邵榮興、文獻叔並

弘、華陽陽黑頭,疎從四世同居。 詔俱表門閭,蠲租稅。

又蜀郡王續祖、華陽郝道福並累世同爨,建武三年,明帝詔表門,蠲調役。

略賣江北,達之有田十畝,貨以贖之,與同財共宅。郡命爲主簿,固以讓兄。 與族弟,「四〕弟亦不受,田遂閑廢。 吳達之,義興人也。嫂亡無以葬,自賣爲十夫客,以營冢椁。 齊建元三年,詔表門閭。 從祖弟敬伯,夫妻荒年被 又讓世業舊田

重。 常云「聞蔡曇智之風,怯夫勇,鄙夫有立志。 先是有蔡曇智,鄉里號蔡曾子,廬江 何伯璵兄弟,鄉里號爲何展禽,並爲高 聞何伯璵之風,僞夫正,薄夫厚」云。 士沈顗所

伯璵與弟幼璵俱厲節操,養孤兄子,及長爲婚,推家業盡與之。 安貧枯稾,誨人不倦,

列傳第六十三 孝義上

一八二六

郡守下車莫不 修謁。 伯璵卒,幼璵末好佛法,翦落長齋,持行精苦,梁初卒。 兄弟年八

臘,月朝十五,未嘗不北望長悲,如此三十餘年。 爲孝行里。 不婚,不交人物。 王文殊字令章,吳興故鄣人也。 吳興太守謝滿聘爲功曹, 父沒魏,文殊思慕泣血,終身蔬食, 不就。 太守孔琇之表其行, 立小 屋於縣西, 鬱林韶榜門, 端拱其 不衣帛、服麻縕 中, 改所居 歲 一時伏 而

菜菹 附載 病亡。 州 刺 史王 西 樂頤之字文德,留了南陽湼陽 杲之曰:「我不能食此。」母聞之,自出常膳魚羹數種。 上,水漿不入口數日。 頤之忽悲戀涕泣,因請假還,中路果得父凶問,便徒跣號咷,出陶家後渚,圖過邁商人 僧虔引爲主簿,以同 僚非 嘗遇病,與 人也,世居南郡,少而言行和謹。 人,棄官去。 母隔壁,忍病不言,嚙被至碎,恐母之哀已也。 吏部郎庾杲之嘗往候,頤之爲設食,唯枯 杲之曰:「卿過於茅季偉,我非 **仕爲京府參軍**, 父在 湘 魚

弟預字文介,亦至孝。父臨亡,執手以託郢州行事王奐。自己預悲處悶絕,吐血數升,遂

發病。官至驃騎錄事參軍。

付之重,恐不得同人此事。人笑褚公,至今齒冷,無爲效尤。」孝嗣故吏吳興沈昇之亦說之 高枕家園,則與松柏比操,風霜等烈,豈不美邪。」孝嗣並改容謝之。 之政,以君爲反覆人,事成則無處逃咎矣。昇之草萊百姓,言出禍已隨之,孰與超然謝病, 曰:「昇之與君俱有項領之功,今一言而二功俱解,豈願聞之乎。君受恩二祖,而更參惟新 隆昌末,預謂丹陽尹徐孝嗣曰:「外傳藉藉,似有伊、周之事。君蒙武帝殊常之恩,荷託

聞預亡大泣,棄溪中,曰:「失樂令,我輩孤獨老姥政應就死耳。」 市人亦皆泣,其惠化如此。 預建武中爲永世令,人懷其德,卒官。 時有一媼年可六七十,擔檞蔌葉造市貨之,四日

光,光斜則握卷升屋,睡 江泌字士清,濟陽考城人也。父亮之,員外郎。 極墮地則更登。性行仁義,衣弊蝨多,綿裹置壁上,恐蝨飢死,乃復 泌少貧,晝日斫屧爲業,夜讀書隨月

意,唯食老葉而已。 置衣中。 數日間,終身無復蝨。母亡後,以生闕供養,遇鮭不忍食。菜不食心,以其有生 母墓爲野火所燒,依「新宮災,三日哭」。 淚盡係之以血

下車載之,躬自步去染。武帝以爲南康王子琳侍讀。四五 死,泌爲買棺。 歷仕南中郎行參軍,所給募吏去役,得時病,莫有舍之者。 更扶杖投祕,必自隱卹。 無僮役,兄弟共輿埋之。後領國子助教,乘牽車至染鳥頭,見一老公步行, 吏

從事泌,黃門郎念子也,與泌同名,世謂泌爲「孝泌」以別之。 都盡無餘。」及子琳被害,泌往哭之,淚盡續以血,親視殯葬畢乃去。必尋卒。族人兗州中 建武中,明帝害諸王,後泌憂念子琳,訪誌公道人,問其禍福。誌公覆香鑪灰示之曰:

其所生母流漂交州,道愍尚在襁褓。及長知之,求爲廣州級寧府佐。至南而去交州尙遠, 乃自負擔冒嶮,僅得自達。及至交州,尋求母雖經年,日夜悲泣。嘗入村,日暮雨驟,乃寄 家。旦有一嫗負薪外還,而道愍心動,因訪之,乃其母也。於是行伏號泣,遠近赴之, 庾道愍,潁川隱陵人,晉司空冰之玄孫也。有孝行,頗能屬文。少出孤悴,時人莫知。

莫不揮淚。

愍占之。 道愍尤精相板,宋明帝時,山陽王休祐屢以言語忤顏,見道愍,託以己板爲他物, 道愍曰:「此乃甚貴,然使人多愆忤。」休祐以褚彦回詳密, 求換其板。 他日, ,令道

侍明帝,自稱下官。帝多忌,甚不悅。 休祐具以狀言,帝乃意解。

道愍仕齊,位射聲校尉。族孫沙彌亦以孝行著。

號哭、俄而風靜、咸以爲孝感所致。後卒於長城令。子持。 或應針灸,輒以身先試。及母亡,水漿不入口累日。初進大麥薄飲,經十旬方爲薄粥。終 王參軍事,隨府會稽,復丁所生母憂,[熙]喪還都,濟浙江,中流遇風,舫將覆沒。 爲了及長,終身布衣蔬食。爲中軍田曹行參軍。嫡母劉氏寢疾,沙彌晨昏侍側,衣不解帶。 淚霑爲爛。墓在新林,忽生旅松百許株,枝葉鬱茂,有異常松。劉好噉甘蔗,沙彌遂不食 喪不食鹽酢,冬日不衣綿纊,夏日不解衰絰。不出廬戶,晝夜號慟,隣人不忍聞。所坐薦, | 彌始生。及年五歲,所生母爲製采衣,輒不肯服。 宗人都官尚書詠表言其狀,應純孝之舉,梁武帝召見嘉之,以補歙令。還除輕車邵陵 沙彌,晉司空冰之六世孫也。父佩玉,仕宋位長沙內史,昇明中,坐沈攸之事誅。時沙 母問其故,流涕對曰:「家門禍酷,用是何 沙爾抱柩

善字書,每屬辭,好爲奇字,文士亦以此譏之。 事黃門侍郎,歷鹽官令,祕書監,知國史事。 之日,請令史爲客,受其餉遺,文帝怒之,因坐免。後爲臨安令,坐杖殺人免封。同己還爲給 康監。陳文帝爲吳興太守,以爲郡丞,兼掌書翰。 持字元德,四少孤,性至孝,父憂,居喪過禮。 又爲少府卿,遷太中大夫,領步兵校尉,卒。 有集十卷。 天嘉初,爲尚書左丞,封崇德縣子。 篤志好學, 仕梁爲尚書左戶郎, 後兼建 拜封 持

校勘記

- (1) 棄含生之分 「含生」各本作「捨生」、據宋書改。
- [1] 郭世通 「世通」宋書前後並作「世道」。
- 毎爲 人作正取散夫價 「正」殿本作「止」。 張元濟南史校勘記:「按正疑正夫之簡稱,對下散夫
- 言。」按宋書作「匠」。
- 以此奉尊上下耳 之母曰「尊上下」,自稱其母曰「上下」,蓋當時之習用語。 或疑「下」字爲衍文。然本書劉瓛傅有「上下年尊,益不願居官次廢晨昏也」之語,是六朝人稱人 「尊上下」通志作「尊上」,無「下」字。下何子平傳亦有「尊上年未八十」語,故
- (m) 私心感動耳 「感動」朱書作「感慟」。

- 又孫恩之亂永嘉太守司馬逸之被害 「司馬逸之」晉書安帝紀無「之」字,孫恩傳作「謝逸」。
- 十四遭母喪 「母」字各本並脫,據太平御覽九四九引補。
- 【八〕郡縣不能判 「判」各本作「制」、據宋書、通志改。
- [A] 喪屍經月不收 「經月」各本作「經日」,據宋書改。
- 又同里施夫疾病 「施夫」、朱書作「施淵夫」,此避唐諱而省。
- 文帝以其舊將子 「子」字各本並脫,據宋書補。按天與父名祖爲宋武帝隊主,故云「舊將子」。
- 舊將羅訓徐罕皆望風屈附 「徐罕」、「屈附」各本作「徐牢」、「屈謝」,據宋書、册府元龜二一〇

及通鑑改,下同。

- [1] 余齊人 「齊人」宋書作「齊民」,有傳。此避<u></u>唐諱改。
- 長城吳慶恩殺同郡錢仲期子延慶屬役在都聞父死馳還於庾浦埭逢慶恩 「吳慶恩」、「同郡」、

暑避淸涼 「暑」下各本行「不」字,據宋書删。 「庾浦埭」朱書作「奚慶思」、「同縣」、「庚浦埭」。 按長城爲吳興郡屬縣「同縣」是。

- 崔懷順 「懷順」南齊書作「懷愼」、蓋蕭子顯避梁武帝父諱而改。
- 寓居吳興 「吳興」各本作「江興」,據通志改。 按揚州領郡有吳興、無江興、且下出「後王琨爲吳

興太守,欲召爲功曹」,則當作吳興。

列

傳第

- 叡明下淚爲之冰如筯額上叩頭血亦冰不溜 册府元龜五七五「爲」下無「之」字,「亦」下有「爲」
- (14) 緒聞便心中介介然 「聞便」二字各本互倒,今乙正。

字。

- [110] 今泄氣在亥 「今」各本作「令」,據通志改。
- [二] 誓言不貳焉 「誓言」南齊書作「誓死」。
- 又會稽永興吳翼之母丁氏 「吳翼之」,南齊書作「倪翼之」。
- \subseteq 荒年客死山陰丁爲買棺器 「丁」字各本並脫,據南齊書補。
- 代為輸送 「輸」字各本並脫、據南齊書補。按上云「三調不登」,則此當有「輸」字。
- **全** 女移父母遠住苧羅 「苧羅」各本作「紵舍」,據南齊書改。 按苧羅即苧蘿山,在諸暨縣南。
- CIKJ 鄰舍人有中溪蜮毒者 「中」字各本並脫,據南齊書補。
- 四出 弟亡貧無以葬 「弟」上各本衍「兄」字,據南齊書删。按下「兄姊未婚嫁」,是兄並未亡。
- 遣無散騎常侍虞炎等十二部使行天下 「行天下」三字各本並脫,據南齊書補
- 晉陵利城人也 異「利成縣本屬東海、晉南渡、僑立江南、朱、齊州郡志俱屬南東海郡。」 按南齊書州郡志南徐州晉陵郡無利成縣, 而南東海郡有之。 錢大昕廿二史考
- [m0] 元凶遣軍主華欽討之 「華欽」朱書二凶傳作「燕欽」。

- 廣陵 人童超之二息犯罪爭死 「童超之」,南齊書作「章起之」。
- 時 求 使 蠕 蠕 國 按南齊書河南 傳謂冠先 兩 次使 河 南 與與 此 異。
- 籫 年 八 歲 寳」字各本 並 脫,據南齊書補
- 解 叔 謙字 楚梁雁 門 人也 張 森楷南史校勘記: 南齊書樂頤 傳末所附解仲 恭 事 與叔謙 同

不

知 何 以 駁 文。

呈 暮 生 已復 {南 齊書作「暮已復生」,疑 此誤倒。

呈合 妻朝 氏 守 節 不嫁 朝 氏 」南齊書作「卓氏」。

封 延 伯 字 仲 連 仲 連 南齊書作「仲 懋兹讀書記疑謂「忌當作患」。 璉」。

渢

忌之求

出

爲丹陽

丞

王

百 七 口 {南 齊書作「一 百七十口」。

叉讓 世 業 舊 田 與族 弟 業」字各本並 脫,據南齊書補。

樂頤 之字文德 樂頤 之」南齊書作「樂頤 有 傳。

出 陶 家 後 渚 「家」字各本 ·並脫, 據南 齊書 補

執手 以 託 郢 州 行 事王奐 「王奐」各本作「王英」,據南齊書改。 按南齊書王 奥傳, 奥宋 末爲晉熙

王鎭 西 長 史, 加 冠 軍 將 軍 江夏武 昌太守。 叉宋書晉熙 王 昶 傳 嗣子燮, 元徽 元 年 為 郢州 刺 史

列 傳 第 六 + Ξ 校 勘 記

「以黄門郎王與爲長史,總府州之任」。即此所謂「郢州行事」。

擔檞蔌葉造市貨之 「檞蔌葉」宋本、毛本、殿本南齊書作「斛若葉」,南監本・局本南齊書作「斛

蔌葉」。

乘牽車至染烏頭見一老公步行下車載之躬自步去染武帝以爲南康王子琳侍讀 下一「染」字各

<u>烏頭。武帝,南齊書作世祖。」其南史跋云:「按本史梁武帝諸子傳有南康簡王續而無子琳其人。</u> 本作「梁」、大德本作「染」。王懋竑、錢大昕並以爲「梁當作齊」。張元濟南史校勘記:「按染即染

子琳實爲齊武帝第十九子,見齊武帝諸子傳。 染為上染鳥頭之省文,『步去』下綴此一字,於文

義亦較完足。是知『梁』誤而『染』實不誤也。」

公司 復丁所生母憂 「母」字各本並脫、據梁書、册府元龜七五七補。

持字元德 「元」陳書作「允」。

坐杖殺人免封 「封」字各本並脫,據陳書補。按上「因坐免」指免官,此「免封」乃免封爵。

南史卷七十四

列傳第六十四

孝義下

滕曇恭 徐普濟 張悌 陶季直 沈崇傃 荀匠 吉猕 甄恬

韓懷明 褚脩 張景仁 宛陵女子 衛敬瑜妻王 劉景昕

趙拔扈

陶子鏘 成景儁 李慶緒 謝藺 子貞 殷不害 弟不佞

司馬暠 張昭 弟乾 王知玄

得,銜悲哀切。 滕曇恭,豫章南昌人也。年五歲,母楊氏患熱,思食寒瓜,土俗所不產。 俄遇一桑門問其故, 曇恭具以告。 桑門曰:「我有 兩瓜, 分一 相遺。」還以 曇恭歷訪不能 與

母,舉室驚異,尋訪桑門,莫知所在。 及父母卒、曇恭並水漿不入口者旬日、感慟嘔血、絕而

列傳第六十四 孝義下

在 禮 株,時忽有神光自樹而 復 拜, 郡 蘇。 久之乃滅。 隆冬不著繭絮,蔬食終身。 號爲滕曾子。 遠近道俗咸傳之。 梁天監元年, 起,俄見佛像及夾侍之儀,容光顯著,自門而 每至忌日, 陸璉奉使巡行風俗, 太守王僧虔引曇恭爲功曹,固辭不 思慕不自堪, 表言其狀。 晝夜哀慟。 入。 **曇**恭有子三人, 曇恭家 就。 其門外有冬生樹 王儉 人 大小 時隨僧 皆有 咸 虔 共

身蔽 火。 時 有徐普濟者,長沙臨湘 隣人往救之,焚炙已悶絕,累日方蘇。 人。 居喪未葬,而隣家火起,延及其舍。 普濟號慟伏棺 上,以

行業。

亦請: 唯 所 上讞,帝以爲孝義,特降死,後不得爲例。 生悌、松長不能教誨、乞代悌死。」景又曰:「松是嫡長、後母唯生悌。 得 衣物,三劫持去,實無一錢入己。 代死。[1] 母叉云:「悌應死,豈以弟罪枉及諸兄。 又有建康 人張悌,家貧無以供養,以情告隣富人。 縣抵悌死罪。 悌兄松訴稱"「與弟景 悌亦引分,乞全兩兄供養。」三縣以 富人不與, 不勝忿, 若從法,母亦不 遂結 是前 母子,後母 几 人 作劫, 全。

陶 季直,丹陽秣陵人也。 祖愍祖、宋廣州刺史。父景仁、中散大夫。

季直 早慧,愍祖甚愛異之,嘗以四函 銀列置於前,令諸孫 各取 其 季直時年四歲,獨

不取,曰:「若有賜,當先父伯,不應度及諸孫,故不取。」 愍祖益奇之。

·酸感。 五 歲 喪母,哀若成人。 及長好學,澹於榮利,徵召不起,時人號曰聘君。 初母未病,令於外染衣,卒後,家人始贖。 後爲望蔡令,以病免。 季直抱之號慟, 聞者

時 劉彦節、袁粲以齊高帝權盛,將圖之。 **彦節素重季直,欲與謀。** 季直 以袁、劉儒者,

致顚殞,固辭不赴。

俄

而彥節等敗。

其 事。 太守,在郡 入 非具美,不如 彦 |齊 初 回 卒,尚書令王儉以彥回有至行, 爲尙書比部郎,時褚彥回爲尙書令,素與季直善,頻以爲司空司徒主簿,委以府 號爲清和。 文館。」 後爲鎭 儉從之。 西路 議參 季直叉請爲彥回立 軍 欲諡「文孝公」。 一碑,始終營護, 季直日二文孝是司馬道子諡,恐 甚有吏節。 再遷東莞

海 左 太守。 一丞,遷: 齊 武 建安 帝崩,明帝作相,誅鋤異己。 邊 職 大大守。 上佐,素士罕爲之者,或勸季直造門致謝,明帝留以爲驃騎諮議參軍,兼尚書 爲 政淸靜,百姓便之。 季直 不能阿意取容,明帝頗忌之,出爲輔國長史、北

列

清苦絕倫,又屛居十餘載,及死,家徒四壁,子孫無以殯斂,聞者莫不傷其志事云。 里。 梁臺 梁天監初,就拜太中大夫。 建, 爲給事黃門侍郎,常稱仕至二千石始願畢矣,無爲久預人間事, 武帝曰:「梁有天下,遂不見此人。」十年,卒于家。 乃辭疾還鄉

服三年。久食麥屑,不噉鹽酢,坐臥於單薦,因虛腫不能起。 哀至輒之瘞所,不避雨雪。每倚墳哀慟,飛鳥翔集。 辭不受官,乃除永寧令。 書舍人慰勉之,乃詔令釋服,擢補太子洗馬,旌其門閭。 兄弟謂曰:「殯葬未申,遽自毀滅,非全孝道也。」崇傃心悟,乃稍進食。母權瘞,去家數里, 迎其母,未至而母卒。崇傃以不及侍疾,將欲致死,水漿不入口,晝夜號哭,旬日殆將絕氣。 及長,事所生母至孝,家貧,常傭書以養。天監二年,太守柳惲辟爲主簿。 家貧無以遷厝,乃行乞經年,始獲葬焉。旣而廬于墓側,自以初行喪禮不備,復以葬後更行 沈崇傃字思整,吳興武康人也。 自以祿不及養,哀思不自堪,未至縣,卒。 父懷明,宋兗州刺史。 夜恒有猛獸來望之,有聲狀如歎息者。 崇傃奉韶釋服,而涕泣如居喪。 郡縣舉至孝。 崇傃六歲丁父憂,哭踊 崇傃從惲 梁武聞,卽遣中 到郡,還 過禮。 古

元嘉末度淮,逢武陵王舉義,爲元凶追兵所殺,贈員外散騎侍郎。 荀匠字文師,潁陰人,晉太保勗九世孫也。 祖瓊,年十五復父仇於成都市,以孝聞。 父法超, 仕齊爲安復令,

匠號慟氣絕,身體皆冷,至夜乃蘇。 旣而奔喪,每宿江渚,商侶不忍聞其哭聲。

家人不復識。郡縣以狀言,武帝詔遣中書舍人爲其除服,擢爲豫章王國左常侍。 命難拒,故亦揚名後世,所顯豈獨汝身哉。」匠乃拜,竟以毁卒。 而毁顇逾甚,外祖孫謙誡之曰:「主上以孝臨天下,汝行過古人,故擢汝此職。 自括髮不復櫛沐,髮皆禿落。哭無時。聲盡則係之以泣,目眥皆爛,形骸枯顇,皮骨裁連,雖 舟投水,傍人赴救,僅而得全。及至,家貧不得時葬,曰居父憂幷兄服,歷四年不出廬戶。 |梁天監元年,其兄||斐爲鬱||林太守,征||俚賊,爲流矢所中,死於陣。 喪還,匠迎于豫章,望 非唯君父之 匠雖卽吉

吉翂字彥霄,馮翊蓮勺人也。 家居襄陽。 **勠幼有孝性,年十一遭所生母憂,水漿不入**

口,殆將滅性,親黨異之。

梁天監初,父爲吳興原鄉令,爲吏所誣,逮詣廷尉。 **獨年十五,號泣衢路,**所請公卿,行

日:「 刑 還寺,盛陳徽纆,厲色問曰:「爾求代父死,敕已相許,便應伏法;然刀鋸至劇,審能死不? 知 爾童孺,志不及此,必爲人所敎,姓名是誰。若有悔異,亦相聽許。」對曰:「囚雖蒙弱,豈不 量 此 今欲殉身不測,委骨泉壤,此非細故,奈何受人教邪。」法度知不可屈撓,乃更和顏誘語之, 代父命。 人 小者。 書、故 |妙年苦求湯鑊。」|翂曰::「凡鯤鮞螻蟻尙惜其生,况在人斯,豈願韲粉。 **、死可畏憚,顧諸弟幼藐,唯囚爲長,不忍見父極刑,自延視息,所以內斷胸臆,上干萬乘。** 見者皆爲隕涕。 主 之薄,夫父辱子死,斯道固然,若翂有靦面目,當其此舉,則是因父買名,一何甚辱。」拒 丹陽 一上知尊侯無罪,行當釋亮。 思殞仆,冀延父命。」勝初見囚,獄掾依法備加桎梏,法度矜之,命脫其二械,更令著 尹王志求其在廷尉故事,幷請鄉居,四欲於歲首舉充純孝。 **肦弗聽,曰:「肦求代父死,死囚豈可減乎。」竟不脫械。** 武帝異之,尙以其童幼,疑受敎於人,敕廷尉蔡法度嚴加脅誘,取其款實。 其父理雖清白,而恥爲吏訊,乃虛自引咎,罪當大辟。 觀君神儀明秀,足稱佳童,今若轉辭, 法度以聞,帝乃宥其父。 獨曰:「異哉王尹,何 幸父子同濟,奚以 但父挂深刻,必正 **勠乃撾登聞鼓,乞** 法度乃

忱 復召爲主簿。 年 十 七,應辟爲本州主簿,出監萬年縣。 後秣陵鄉人裴儉、丹陽尹丞臧盾、臣揚州中正張仄連名薦獨,以爲孝行純 攝官朞月,風化大行。自確還野,湘州刺史柳

止。

樹、恬哭則鳴、哭止則止。又有白鳩白雀栖宿其廬。 加以爵位。 汁 則其父也,時以爲孝感。家貧養母,常得珍羞。及居喪,廬於墓側,恒有鳥玄黃雜色集於廬 和飯飼之,恬不肯食。年八歲,嘗問其母,恨生不識父,遂悲泣累日。 甄恬字彥約,中山無極人也,世居江陵。 恬官至安南行參軍。 數歲喪父,哀感有若成人。 州將始興王憺表其行狀,詔旌表門閭, 忽若有見,言形貌 家人矜其小,以肉

茂,轉攻傍邑。將至成都,十餘日戰敗,退保<u>新城求降。|文茂,黎州刺史文</u>熾弟,襄陽人也。 若事克,斫樹處更生,不克卽死。」三宿三枿生十丈餘,人間傳以爲神,附者十餘萬。旣殺文 文茂聞其語,聚其族誅之。拔扈走免,亡命聚黨,至社樹咒曰:「文茂殺拔扈兄,今欲報之, 趙拔扈,新城人也。兄震動富於財,太守樊文茂求之不已,震動怒曰:「無厭將及我。」 史始興王憺表言之。州累辟不就,卒于家。 巢其廬上,字乳馴狎,若家禽焉,服釋乃去。 下,朝夕不離母側。母年九十,以壽終。「引懷明水漿不入口一旬,號哭不絕聲。有雙白鳩 明聞之,卽日罷學,還家就養。則歎曰:「韓生無丘吾之恨矣。」家貧,肆力以供甘脆,嬉怡膝 <u>虬。[k] 虬嘗一日廢講,獨居涕泣,懷明竊問虬家人,答云是外祖亡日。時虬母亦已亡矣,懷</u> 以此異之。十五喪父,幾至滅性,負土成墳,賻助無所受。免喪,與鄉人郭麻俱師南陽劉 禱,時寒甚切,忽聞香氣,空中有人曰:「童子母須臾永差,無勞自苦。」未曉而母平復,鄉里 韓懷明,上黨人也。 客居荆州。 十歲,母患尸疰,每發輒危殆。 及除喪,蔬食終身,衣衾無所改。梁天監初,刺 懷明夜於星下稽賴祈

傳父業,武陵王紀爲揚州,引爲宣惠參軍,兼限內記室。脩性至孝,父喪毀瘠過禮,因患冷 及丁母憂,水漿不入口二十三日,每號慟輒嘔血,遂以毁卒。 褚脩,吳郡錢唐人也。 **父仲都,善周易,爲當時之冠。梁天監中,歷位五經博士。脩少**

耳置 魓 普通 乃起樓於門,題 爲 曰:「昔年 去,後忽孤飛。 上,印詔榜其門閭。 言於州,時簡文在鎭,乃下敎襃美之,原其罪,下屬長蠲其一戶租 詩曰:「墓前 毛 盡落, 盤 叉霸 叉天監中,宣城宛陵女子與母同床眠,母爲猛獸所取,[<]女啼號隨挐猛獸,行數十里, 七年,遇 中爲誓乃止。 ·無偶· 城王整之姊嫁爲衞敬瑜妻,年十六而敬瑜亡,父母舅姑咸欲嫁之,誓而 獸乃置其 法於公田渚,手斬其首以祭父墓。 廣平人也。 去,今春猶 日貞 女感其偏栖, 株栢,根連復並枝。 義 母而 逐手爲亡壻種樹數百株,墓前 衛婦之閭」。又表於臺 獨 去。 父梁天監初爲同縣韋法所殺,景仁時年八歲。 歸。 乃以縷繋脚 女抱母猶有氣息, 故 人 (恩旣 妾心能感 爲 重, 誌。 不 木, 事竟,詣郡自縛,乞依刑法。 忍復雙飛。」 後歲此灩果 經時乃絕。 頹城 柘樹忽成連 何足奇。」所住戶 雍州刺史西昌侯藻嘉其美節 復更來, 郷里言於郡縣, 理 調,以旌孝行。 一,一年許還復分散。 猶帶 有뽾巢, 及長,志在復讎 前 縷。 太守蔡天起上 太守蕭琛表 不許,乃截 常雙 女復

列

傳

第

六

為詩

~飛來

女

刺史湘東王釋辟爲主簿。 後有 河東劉景昕事母孝謹,母常病癖三十餘年, 朝而瘳,鄉里以爲景昕誠感。 荆州

鏘 冬營蓴不得,子鏘痛恨,慟哭而絕,**外之乃蘇。遂長斷蓴**味。 動容改色,欲相申薦。會雲卒。初,子鏘母嗜蓴,母沒後,恒以供奠。 見人昆季如此而不留心。」勞感之,兄得釋。母終,居喪盡禮。 公私緣訴,流血稽顙,行路嗟傷。 陶子鏘字海育,丹陽秣陵人也。 逢謝超宗下車相訪,回入縣詣建康令勞彥遠曰:「豈忍 **父延,尚書比部郎。** 兄尚,宋末爲倖臣所怨,被繫。子 與范雲隣,雲每聞其哭聲,必 梁武義師初至,此年

邕和殺安樂,以城內附。景儁謀復讎,因殺魏宿預城主,以地南入。普通六年,邕和爲鄱陽 內史,景儁購人刺殺之。未久,重購邕和家人鴆殺其子弟,噍類俱盡。武帝義之,每爲屈 成景儁字超,范陽人也。祖興,仕魏爲五兵尚書。父安樂,淮陽太守。 梁天監六年,常

兼有 法。 政績見懷,北豫州吏人樹碑紀德。 景儁家讎旣雪,每思報効, 後除北豫州刺史, 卒, 諡曰 忠烈云。 侵魏,所向必推其智勇,時以比馬仙碑

復讎。 陸縣侯。 太守。 李慶緒字孝緒,廣漢郪人也。 投 州將 1 益州三百年無復貴仕,慶緒承恩至此, 母憂去職、廬于墓側、每慟嘔血數升。 陳顯達,仍於部伍白日手刃其仇,自縛歸罪,州將義而釋之。 父為 人所害,慶緒九歲而孤,爲兄所養, 便欲西歸。 後爲巴郡太守、號良吏。 尋徙太子右衞率, 日夜號泣,志在 累遷衞尉,封安 梁天監中,為 未拜 、而卒。 東

法 夜 生之匹。」因名曰藺。 父 曹行 號 未 慟 食,乳媼欲令先飯,藺終不進。 謝 |参軍 藺 、毁瘠! 字希如,陳郡陽夏人,晉太傅安之八世孫也。 骨立。 累遷 外兵、記室 母阮 稍 授以經史,過目便 氏常自守視 舅阮孝緒聞之,歎曰:「此 譬抑之。 能 諷 服闋, 誦, 孝緒毎日:「吾家陽元也。」及丁 吏部尚書蕭 父經,北中郎諮議參軍。 兒在 子 「家則曾子之流,事 顯嘉其至行, 藺 擢 ·父憂, 五. 君則 爲王府 一歲時, 藺 畫

列

宣城王奉述中庸頌。 每哭,眼耳口鼻皆血流,經月餘日,因夜臨而卒。 氣 而 卒。 時甘露降士林館,藺獻頌,武帝嘉之。 及藺還,入境夜夢不祥,旦便投列馳歸。 後爲兼散騎常侍,使魏。 有詔使製北兗州刺史蕭楷德政碑。 會侯景入附,境上交兵,藺母旣慮不得還,感 所製詩賦碑頌數十篇。 及至,號慟嘔血,氣絕久之,水漿不入口 子貞 又奉詔令製

秋、工草隸蟲篆。 居詩、從舅王筠奇之、謂所親曰:「至如『風定花猶落』、乃追步惠連矣。」年十三、尤善左氏春 歲、祖母不食、貞亦不食、往往如此。 貞字元正,幼聰敏,有至性。 祖母阮氏先苦風眩,每發,便一二日不能飲食。 母王氏授以論語、孝經,讀訖便誦。 八歲,嘗爲春日閑 貞時年七

父洽、族兄暠乃共請華嚴寺長爪禪師爲貞說法。 母,將二十年。 及魏剋江陵,入長安。 十四,丁父艱,號頓於地,絕而復蘇者數矣。 圖逃難番禺,貞母出家于宣明寺。及陳武帝受禪,暠還鄉里,供養貞 仍譬以母須侍養,不宜毀滅,乃少 初貞父藺以憂毁卒,家人賓客復憂貞,從 進饘粥

鄉,乃謂曰:「寡人若出居藩,當遣侍讀還家。」後數年,招果出,因辭,面奏請放貞還。 初貞在周,嘗侍周武帝愛弟趙王招讀,招厚禮之。 聞其獨處,必畫夜涕泣,私問 知母在 帝奇

招仁愛,遣隨聘使杜子暉歸國。是歲陳太建五年也。

錄 事參軍,領丹陽丞。 ,叔陵雅重之,弗之罪也。及叔陵肆逆,唯貞與卓不坐。 始自周還時,始興王叔陵爲揚州刺史,引祠部侍郎阮卓爲記室,辟貞爲主簿。 貞知叔陵有異志,因與卓自疎於王。[10]每有宴遊,輒以疾辭,未嘗參 尋遷府

之。 頃之,敕起還府,累啓固辭,敕不許。」貞哀毀羸瘠,終不能之官舍。 及問知貞所作,因敕舍人施文慶曰:「謝貞在王家未有祿秩, 再遷南平王友,掌記室事。府長史汝南周確新除都官尚書,請貞爲讓表,後主覽而奇 可賜米百石。」以母憂去

板周 凱等粗自成立,己有疏付之,此固不足仰塵厚德。弱兒年甫六歲,名靖,字依仁,情累所不 香 之病,有遺疏告族子凱:「氣絕之後,若依僧家尸陁林法,是吾所願,正恐過爲獨異。可用薄 能忘,敢以爲託。」是夜卒。後主問察曰:「謝貞有何親屬。」察以媾答,即敕長給衣糧。初貞 (水) 盡卿兄弟相厚之情。卽除之,無益之事,勿爲也。」 身,載以露車,覆以草席,坎山次而埋之。又憐年尙小,未閱人事,但可三月施小床,設 吏部尚書姚察與貞友善,及貞病篤,問以後事。貞曰:「孤子釁禍所集,將隨灰壤,族子

不害性至孝,居父憂過禮,由是少知名。 殷不害字長卿,陳郡長平人也。 祖汪,齊豫章王行參軍。 家世儉約,居甚貧寠。 父<u>高</u>明,梁尚書中兵郎。[11] 有弟五人,皆幼弱。不害事

老母,養小弟,勤劇無所不至,士大夫以篤行稱之。

|帝嘗謂肩吾曰:「卿是文學之士,東事非卿所長,何不使殷不害來邪。] 其見知如此。 簡文以 納用。大同五年,兼東宮通事舍人。時朝政多委東宮,不害與舍人庾肩吾直日奏事,梁武 不害善事親,賜其母蔡氏錦裙襦氈席被褥,單複畢備。 年十七,仕梁爲廷尉平,長於政事,兼飾以儒術,名法有輕重不便者,輒上書言之,多見

簡文,衝突左右,甚不遜,自己侍衞者莫不驚恐辟易,唯不害與中庶子徐摛侍側不動。 侯景之亂,不害從簡文入臺。及臺城陷,簡文在中書省,景帶甲將兵,入朝陛見,過謁 簡文

爲景所幽,遣人請不害與居處,景許之,不害供侍益謹

信俱入長安。自是蔬食布衣,枯槁骨立,見者莫不哀之。 溝壑。

不害行哭尋求,聲不暫輟。

遇見死人溝中,

(1三即投身捧視,舉體凍僵,水漿不入口 者七日,始得母屍。憑屍而哭,每舉音輒氣絕,口回行路皆爲流涕。 梁元帝立,以不害爲中書郎,兼廷尉卿。。魏平江陵,失母所在。 即江陵權殯,與王襃、庾 時甚寒雪,凍死者塡滿

太建七年,自周還陳,除司農卿。 遷晉陵太守。在郡咸疾,詔以光祿大夫徵還養疾

後主即位,加給事中。 初,不害之還也,周留其長子僧首,因居關中。 頑明三年,陳亡,僧首

來迎,不害道卒,年八十五。不害弟不佞。

第四兄不齊始於江陵迎母喪柩歸葬。 時兵荒饑饉,百姓流移,不佞循撫招集,繦負至者以千數。會覷剋江陵,而母卒,道路隔絕, 久不 得 奔 赴。 土,手植松栢,每歲時伏臘,必三日不食。 不佞字季卿,少立名節,居父喪以至孝稱。 四載之中,晝夜號泣,居處飲食,常爲居喪之禮。陳武帝受禪,除婁令。 不佞居處之節, 好讀書,尤長吏術。 如始聞問,若此者又三年。 梁承聖初,爲武康令。 身自負 至是

嫂張氏 朝望所歸。 事發,仲舉等皆伏誅,宣帝雅重不佞,特赦之,免其官而已。 王暹等謀,矯詔出宣帝。衆人猶豫未敢先發,不佞乃馳詣相府,面宣詔旨,令相王還第。 文帝時,兼尚書右丞,遷東宮通事舍人。及廢帝嗣立,宣帝爲太傅、錄尚書輔政,甚爲 甚謹 後兼尚書左丞,加通直散騎常侍,卒官。 一,所得祿奉,不入私室。 不佞素以名節自立,又受委東宮,乃與僕射到仲舉、中書舍人劉師知、尚書左丞 長子梵童,位尚書金部郎。 不佞兄不疑、不占、不齊並早亡,事第二寡 及卽位,以爲軍師始興王諮議 及

馬暠字文昇,河內溫人也。 高祖柔之,晉侍中,以南頓王孫紹齊文獻王攸後。

產,即梁武帝之外兄也,位岳陽太守。

猛獸,暠結廬數載,豺狼絕迹。常有兩鳩栖宿廬所,馴狎異常。 累遷正員郎。丁父艱,哀毀愈甚,廬于墓側,日進薄麥粥一升。 悶絕,父每喩之,令進粥,然猶毀瘠骨立。服闋,以姻戚子弟入問訊,梁武帝見其羸疾,歎息 久之。字其小字謂其父曰:「昨見<u>羅</u>兒面顏顦頓,使人惻然,便是不墜家風,爲有子矣。」後 **暠幼聰警,有至性。年十二,丁內艱,哀慕過禮,水漿不入口,殆經一旬。** 墓在新林,連接山阜,舊多 每號慟,必至

建八年,自周還,宣帝特降殊禮。 禪,暠以宮臣,乃抗表求還江陵改葬,辭甚酸切。周朝優詔答之,卽敕荆州以禮安厝。 承聖中,除太子庶子。 魏剋江陵,隨例入長安。 歷位通直散騎常侍、太中大夫,卒。 而梁宗屠戮,太子殯瘞失所,及周受 有集十卷。

負靈櫬, 畫伏宵行, 胃履冰霜, 手足皸瘃。 至都, 遂致攣廢, 數年乃愈。 子延義字希忠,少沉敏好學。 初隨父入關,丁母憂,喪過于禮。 及暠還都,延義乃躬 位司徒從事中郎。

陽王伯信臨州、江邑舉乾孝廉,固辭不就。兄弟並因毀成疾,昭一眼失明,乾亦中冷苦癖,年 六年哀毁,形容骨立。家貧,未得大葬,遂布衣蔬食,十有餘年,杜門不出,屏絕人事。 供朝夕。 並未五十,終于家,子胤俱絕。 升麥屑粥。每一感慟,必致歐血,隣里聞之,皆爲涕泣。父服未終,母陸氏又卒,兄弟遂 張昭字德明,吳郡吳人也。 ' 弟乾字玄明,聰敏好學,亦有至性。 及父卒,兄弟並不衣綿帛,不食鹽酢,日唯食 幼有孝性,父熯常患消渴,嗜鮮魚,昭乃身自結網捕魚,以 時衡

嘉之,韶改所居<u>青苦里爲孝家里。</u>CH 宣帝時,有太原王知玄者,僑居會稽剡縣,居家以孝聞。 及丁父憂,日日哀毁而卒。

膏腴。若使孝立閨庭,忠被史策,多發溝畎之中,非出衣簪之下。以此而言聲敎,不亦卿大 士務修身,故忠孝成俗,至于乘軒服冕,非此莫由。晉、宋以來,風衰義缺,刻身厲行,事薄 論曰:自澆風一起,人倫毀薄,蓋抑引之敎,導俗所先,變里旌閭,義存勸獎。是以漢世

列傳第六十四 孝義下

夫之恥乎。

校勘記

- 〔1〕亦請代死 「代」字各本並脱,據通志補。
- [1] 悌亦引分乞全兩兄供養 「乞」字各本並脫,據通志補。
- C N)家貧不得時葬 「得」字據梁書、册府元龜七五三補。
- [8] 幷請鄕居 「請」各本作「諸」,據梁書改。
- ファン 丹陽尹丞臧盾 「尹丞」各本作「郡守」,據梁書改。按梁書臧盾傳,亦言盾兩爲丹陽尹丞。
- 「よし 母年九十以壽終 梁書、册府元龜七五七作「九十一」。

フベン

與鄉

人郭麻俱師南陽劉虬

「郭麻」梁書安成王秀傳同。

梁書孝行韓懷明傳作「郭磨」。

- [<】母爲猛獸所取 「猛獸」即「猛虎」,此避唐諱改。
- 太守蕭琛表 上 「蕭琛」各本作「蕭琮」,據梁書、册府元龜二一〇改。按梁書蕭琛傅,琛天監元

年出爲宣城太守。

- [10] 因與卓自疎於王 「於王」二字各本並脱,據陳書補。
- 郎」、據陳書改。 祖汪齊豫章王行參軍父高明梁尚書中 按南齊書百官志尚書臺有中兵、無兵部。「兵部郎」起於隋、前此未有。 - 兵郎 「祖汪」陳書作「祖任」。「中兵郎」各本作「兵部

記

- [15] 衝突左右甚不遜 「衝突」二字各本並脫,據陳許補。
- [1三] 遇見死人溝中 「遇」各本作「過」,據陳書改。
- [18] 每舉音輒氣絕 「舉音」二字各本並脫,據陳書補。
- 三 時衡陽王伯信臨州 「臨州」各本作「臨郡」。按陳書世祖九王衡陽王伯信傅,伯信曾爲丹陽尹、 揚州刺史、未爲郡守。吳郡屬揚州、則此當是「臨州」,今訂正。
- [1六] 及丁父憂 「父」字各本並脫,據陳書補。
- [14] 韶改所居青苦里爲孝家里 「青苦里」陳書作「淸苦里」。

南史卷七十五

列傳第六十五

隱逸上

戴顒 陶 潛 宗少文 翟法賜 孫測 雷次宗 從弟彧之 郭希林 沈道虔 劉凝之 孔淳之 龔祈 周續之 朱百年

關康之 辛普明 樓惠 明 漁 父 褚伯玉 顧歡 盧度 杜京產

孔道徽 京產子栖 剡縣小兒

教之外別有風猷。 迹萬品。 易有君子之道四焉,語默之謂也。 若道義內足,希微兩亡,藏景窮巖,蔽名愚谷,解桎梏於仁義,示形神於天壤,則名 故堯封有非聖之人,孔門謬鷄黍之客。 故有入廟堂而不出, 次則揚獨往之高節,重去就之虛 徇江湖而永歸。 隱避紛紜,情

列

倳

第

六 十

五

隱

逸

上

下,斯並向時隱淪之徒歟。今並綴緝,以備隱逸篇焉。又齊、梁之際,有釋實誌者,雖處非 潛之徒,或仕不求聞,退不譏俗,或全身幽履,服道儒門,或遁迹江湖之上,或藏名巖石之 志達道、未或非然、故須含貞養素、文以藝業。不爾、則與夫樵者在山、何殊異也。 顯晦,而道合希夷,求其行事,蓋亦俗外之徒也。故附之云。 或慮全後悔,事歸知殆,或道有不申,行吟山澤,皆用宇宙而成心,借風雲以爲氣。求 若夫陶

陶潛字淵明,或云字深明,名元亮。[1] 尋陽柴桑人,晉大司馬侃之會孫也。少有高趣,

宅邊有五柳樹,故常著五柳先生傳云

在必醉。 如 意,欣然忘食。性嗜酒,而家貧不能恒得。親舊知其如此,或置酒招之,造飲輒盡,期 也。常著文章自娛,頗示己志,忘懷得失,以此自終。 先生不知何許人,不詳姓字。閑靜少言,不慕榮利。好讀書,不求甚解,每有會 旣醉而退,曾不吝情去留。環堵蕭然,不蔽風日,桓褐穿結,三道瓢屢空,晏

其自序如此。 蓋以自況, 時人謂之實錄。

親老家貧,起爲州祭酒,不堪吏職,少日自解而歸。 州召主簿,不就,躬耕自資,遂抱羸

道則至。今子生文明之世,奈何自苦如此。」對曰:「潛也何敢望賢,志不及也。」道濟饋以梁 江州刺史檀道濟往候之,偃臥瘠餒有日矣,道濟謂曰:「夫賢者處世,天下無道則隱,有

肉,麾而去之。

秫,五十畝種粳。 水之勞。 彭澤令。不以家累自隨,送一力給其子,書曰:「汝旦夕之費,自給爲難,今遣此力, 後爲鎭軍、建威參軍,謂親朋曰:「聊欲絃歌,以爲三徑之資,可乎。」執事者聞之,以爲 此亦人子也,可善遇之。」公田悉令吏種秫稻,妻子固請種粳,乃使二頃五十畝種 助汝薪

解印綬去職,賦歸去來以遂其志,曰: 郡遣督郵至縣,吏白應束帶見之。 潛歎曰:「我不能爲五斗米折腰向鄉里小人。」卽日

荒,松菊猶存,攜幼入室,有酒盈罇。引壺觴而自酌,眄庭柯以怡顏,倚南牕而寄傲,審 征夫以前路, 恨晨光之熹微。乃瞻衡宇, 載欣載奔, 僮僕歡迎, 弱子候門。 🗈 三徑就 諫,知來者之可追。實迷塗其未遠,覺今是而昨非。舟遙遙以輕颺,風飄飄而吹衣,問 容膝之易安。 以出岫,鳥物 歸去來兮,田園將蕪胡不歸?旣自以心爲形役兮,奚惆悵而獨悲。 飛而 園日涉而成趣,門雖設而常關。策扶老以流憩,時矯首而遐觀。 知還。 景翳翳其將入,撫孤松而盤桓。 悟已往之不 雲無心

崎 以 消 嶇 而 憂,農人告余以春及,將有事於西疇。 經丘。 去 「來兮,請息交以絕遊,世與我而相遺,復駕言兮焉求。 木欣欣以向榮,泉涓涓而始流,善萬物之得時,感吾生之行休。 或命巾車,[四]或棹扁舟,旣窈窕以窮壑,亦 悅親戚之情話,樂琴書

盡,樂夫天 期。 已矣乎,寓形宇內復幾時,曷不委心任去留,胡爲遑遑欲何之。 懷良辰以孤往,或植杖而芸耔。登東皐以舒嘯,臨淸流而賦詩,聊乘化以歸 命復奚疑。 富貴非吾願,帝鄉

人龐 義 通之齎酒具於半道栗里要之。 熙末,徵爲著作佐郎,不就。 江州刺史王弘欲識之,不能致也。潛嘗往廬山,弘令潛 潛有脚疾,使一門生二兒舉籃舉。 及至,欣然便共飲

故

,俄頃弘至,亦無忤也。

醉。 月 九 日 弘 先是,顏延之爲劉柳後軍功曹,在尋陽與潛情欵。後爲始安郡,經過潛,每往必酣飲致 1無酒 欲要延之一坐,彌 ,出宅邊菊叢 中坐久之。 日不得。 延之臨去,留二萬錢與潛,潛悉送酒家稍就 逢弘送酒至,即便就 酌,醉而 後 歸。 取酒。 嘗九

潛若先醉 酒,畢,還復著之。 潛 不解音聲, 便 語客:「我醉欲眠 而 潛弱年薄宦,不潔去就之迹。 畜 素琴一張。 卿可 去。」其真 毎 有酒適,輒撫 率 如 此。 自以會祖晉世宰輔,恥復屈身後代,自宋 弄以寄其意。 郡將候潛,逢其酒熟, 貴賤造之者,有 取 頭 酒 「輒設。 1 漉

武帝王業漸隆,不復肯仕。 所著文章,皆題其年月。 義熙以前,明書晉氏年號, 自永初以

來,唯云甲子而已。與子書以言其志,幷爲訓戒曰:

救,自恐大分將有限也。 家 舊,遂能以敗爲成,因喪立功。 恨隣靡二仲,室無|萊婦,抱茲苦心,良獨罔罔。 少來好書,偶愛閑靖,開卷有得,便欣 事,善使汝幼而飢寒耳。 處卿佐,八十而終,兄弟同居,至於沒齒。 自謂是一義皇上人。意淺識陋,日月遂往,疾患以來,漸就衰損。 然忘食。 可言。然雖不同生,當思四海皆兄弟之義。 人無怨色。詩云「高山景行」,汝其慎哉。 吾年過五十,而窮苦荼毒。 見樹木交蔭,時鳥變聲,亦復歡爾有喜。 汝輩幼小,家貧無役,柴水之勞,何時可免。念之在心,若何 常感孺仲賢妻之言,敗絮自擁,何慚兒子。 佗人尙爾,況共父之人哉。 性剛才拙, 濟北氾幼春,日晉時操行人也。 與物多件。 鮑叔、敬仲,分財無猜,歸生、伍舉,班荆道 嘗言五六月北窗下臥,遇凉風暫至, 自量爲己,必貽俗患。 潁川韓元長,漢末名士,身 親舊不遺,每有藥石見 此旣一事矣。 七世同財, **僶俛辭** 但

又爲命子詩以貽之。

元嘉 四 年,將復徵命,會卒。 世號靖節先生。 其妻翟氏,志趣亦同,能安苦節,夫耕於

前,妻鋤於後云。

列傳第六十五 隱逸上

八六〇

宗少文,[刊] 南陽湼陽人也。祖承,宜都太守。父繇之,湘鄉令。 母同郡師氏、聰辯有學

義,敎授諸子。

少文爲主簿,不起,問其故。答曰:「栖丘飲谷,三十餘年。」」武帝善其對而止。 何 施 「而可°」|永日:「除其宿釁,倍其惠澤,貫敍門次,顯擢才能,如此而已。」|武帝納之,乃辟 少文善居喪,爲鄕閭所稱。宋武帝旣誅劉毅,領荆州,問毅府諮議參軍申永曰:「今日

宅,閑居無事。 彌 日也。乃下入廬山,就釋慧遠考尋文義。兄臧爲南平太守,逼與俱還,乃於江陵三湖立 少文妙善琴書圖畫,精於言理,每游山水,往輒忘歸。 武帝召爲太尉行參軍,驃騎道憐命爲記室參軍,並不就。 征西長史王敬弘每從之,未嘗不

並爲太尉掾,皆不起。 東役,又數致餼賚。後子弟從祿,乃悉不復受。

武帝開府辟召,下書召少文與雁門周續之 一兄早卒,孤累甚多,家貧無以相贍,頗營稼穡。人有餉遺,並受之。武帝敕南郡長給 朱受禪及元嘉中頻徵,並不應。

...「死生之分,未易可達,三復至敎,方能遣哀。」 妻羅氏亦有高情,與少文協趣。 羅氏沒,少文哀之過甚,旣乃悲情頓釋,謂沙門釋慧堅

古有金石弄,爲諸桓所重,桓氏亡,其聲遂絕,唯少文傳焉。文帝遣樂師楊觀就受之。少文 覩,唯澄懷觀道,臥以游之。」凡所游履,皆圖之於室,謂之「撫琴動操,欲令衆山皆響」。 <<! 荆、巫,南登衡岳,因結宇衡山,欲懷尚平之志。 有疾還江陵,歎曰:「老疾俱至,名山恐難徧 **衡陽王義季爲荆州,親至其室,與之歡宴,命爲諮議參軍,不起。好山水,愛遠遊,西陟**

先哲以爲美談,余竊有惑。誠不能潛感地金,冥致江鯉,但當用天之道,分地之利。孰能食 測字敬微,一字茂深,家居江陵。少靜退,不樂人間。歎曰:「家貧親老,不擇官而仕,

人厚祿,憂人重事乎。」

孫測,亦有祖風。

土,植松柏。處復遺書請之,辟爲參軍。測答曰:「性同鱗羽,愛止山壑,眷戀松雲,輕迷人 縱宕巖流,有若狂者,忽不知老至。而今鬢已白,豈容課虛責有,限魚鳥慕哉。」「む 齊驃騎豫章王嶷徵爲參軍,不起,測答府云:「何爲謬傷海鳥,横斤山木。」母喪,身自負

以下皆贈送之,測無所受,齎老子,莊子二書自隨。子孫拜辭悲泣,測長嘯不視,遂往廬山, 子賓宦在都,知父此旨,便求祿還爲南郡丞,測遂付以家事。[10]刺史安陸王子敬、長史劉寅 永明三年,詔徵太子舍人,不就。欲游名山,乃寫祖少文所作尚子平圖於壁上。測長

止祖少文舊宅。

探微畫其形與己相對,又貽書曰:「昔人有圖畫僑、札,輕以自方耳。」王儉亦雅重之,贈以蒲 奄至所住,測不得已,巾褐對之,竟不交言。子響不悅而退。侍中王秀之彌所欽慕,乃令陸 术,度形而衣薜蘿,淡然已足, 豈容當此橫施。」<u>子</u>響命駕造之, 測不見。後子響不告而來, 褥筍席。 魚復侯子響爲江州,厚遣贈遺。測曰:「少有狂疾,尋山採藥,遠來至此,量腹而進松

講說。荆州刺史隨王子隆至鎭,江江遣別駕宗忻口致勞問。測笑曰:「貴賤理隔,何以及此。」 竟不答。 頃之,測送弟喪還西,仍留舊宅永業寺,絕賓友,唯與同志庾易、劉虬、宗人尚之等往來 建武二年,徵爲司徒主簿,不就,卒。

善易、老,續皇甫謐高士傳三卷。 測善畫,自圖阮籍遇蘇門於行鄣上,坐臥對之。 嘗游衡山七嶺,著衡山、<u>廬</u> 又畫永業佛影臺,皆爲妙作。 山記。 好音律,

尚之字敬文,自己亦好山澤,徵辟一無所就,以壽終。

之。 徵辟一無所就。宋元嘉初,大使陸子眞觀採風俗,三詣或之。每辭疾不見,告人曰:「我 彧之字叔粲,少文從父弟也。 早孤,事兄恭謹。家貧好學,雖文義不逮少文,而眞澹過

|之 困 不 改節。 出縣南廢頭里,爲立宅臨溪,有山水之玩。 沈道虔,吳興武康人也。 受琴於戴達,王敬弘深貴重之。 少仁愛,好老、湯,居縣北石山下。 郡州府凡十二命,皆不就。 時復還石山精廬,與諸 孫恩亂後饑荒,縣今庾肅 孤兄子共釜庾之資,

門內 身 每 之, 曰:「惜此筍欲令成林, 更有佳者相與。」乃令人買大筍送與之, 盜者慚 上 爭輒云「勿令居士知」。ここ冬月無複衣、戴顒聞而迎之、爲作衣服、幷與錢 衣 一流還。 有 及錢悉供諸兄弟子無衣者。 人竊其園菜者,外還見之,乃自逃隱,待竊者去後乃出。 常以捃拾自資,同捃者或爭穟,道虔諫之不止,悉以其所得與之。 人又拔其屋後大筍,令人止 不取 萬。 ,道虔使置 爭者愧恧,後 及還,分

其

成。 鄉 宋文帝聞 里 少 年 Ż, 相率受學, 遣使存問, 道虔常無食以立學徒。 賜錢三萬,米二百斛,悉供孤兄子嫁娶。 武康令孔欣之厚相資給, 徴員外散騎侍郎, 受業者咸得有

累 世 列 傅 事佛,推父祖 第 六 + 五 舊宅爲寺。 飋 逸 上 至四月八日每請像、請像之日,輒舉家 感慟焉。 不就。

道虔年老菜食,恒無經日之資,而琴書爲樂,孜孜不倦。 文帝敕郡縣使隨時資給。

子慧鋒,修父業,不就州辟。

孔淳之字彥深,魯人也。 祖惔,尚書祠部郎。 父粲,祕書監徵,不就。

共幽 三十年矣,今乃傾蓋于茲,不覺老之將至也。」及淳之還,乃不告以姓。 峻,或旬日忘歸。 淳之少有高尙,愛好墳籍,爲太原王恭所稱。 嘗游山,遇沙門釋法崇,因留共止,遂停三載。 居會稽剡縣。 性好山水,每有所游,必窮 法崇歎曰:「緬想 除著作佐郎、太尉參 人 外

或怪 姻。 其如 敬弘以女適淳之子尚,遂以烏羊繫所乘車轅,提壺爲禮。 居喪至孝,廬于墓側。服闋,與徵士戴顒、王弘之及王敬弘等共爲人外之游,又申以婚 此,答曰:「固亦農夫田父之禮也。」 至則盡歡共飲, 迄暮 而

軍,並不就

牀上 者不 識 一有數帙書。 會 其水,巢栖者非辯其林,飛沈所至,何問其主。」終不 稽 太守謝方明苦要之不能致,使謂曰:「苟不入吾郡,何爲入吾郭。」淳之笑曰:「潛游 元嘉初,復徵為散騎侍郎,乃逃于上虞縣界,家人莫知所在。 ·肯往。 茅室蓬戶,庭草 弟默之為廣 ·燕徑, 唯

州 刺史,出都與別,司徒王弘要淳之集冶城,即日命駕東歸,遂不顧也。 元嘉七年卒。

默之儒學,注穀梁春秋。默之子熙先,事在范曄傳。

毅鎭 廬山 成 姑 事 周續之字道祖 奉兄如事父。 孰 沙門釋慧遠。 常以嵇康高士傳得出處之美,因爲之注 居學數年,通 ,命爲撫軍參軍,徵太學博士,並不就。 ,雁門廣武人也。 豫章太守范甯於郡立學,招集生徒,遠方至者甚衆。 五經、五緯、號日 時彭城劉遺人遁迹廬山、江西陶深明亦不應徵命, ·十經,名冠同門,稱爲顏子。CIED旣 其先過江,居豫章建昌縣。 江州刺史每相招請,續之不尚峻節,頗從 續之八歲喪母,哀戚過於 而閑居讀老、易, 謂之尋陽三隱。 續之年十二,詣甯

記物不 復南 武帝 還。 ,俄辟太尉掾,不就。 武 帝北 可長」、「 武帝 一計,世子居守,迎續之館于安樂寺,延入講禮,月餘復還山。 踐阼,復召之。 與我九齡」、「射於矍圃」之義,辯析 武 帝 上爲開館東郭外,招集生徒,乘輿降幸, 北伐,還鎭彭城,遣使迎之,禮賜 精奥 稱爲 名通 甚厚,每日「真高 幷見諸生,問 江州刺史劉柳薦之 士也」。 | 續之禮 葬

續之素患 風 痺,不復堪 一講,乃移病鍾山。 景平元年卒。 通毛詩六義 及禮論,注公羊傳,

皆傳於世。日於無子。兄子景遠有續之風。

綏曰:「聞卿善琴,試欲一聽。」不答,**綏**恨而 五部、願制十五部、願又制長弄一部,並傳於世。 縣 此長抱羸患。 多名山、故世居剡下。 戴顒字仲若,譙郡铚人也。父逵,兄勃,並隱遁有高名。 以父不仕,復修其業。父善琴書,顒並傳之。 問及兄\勃並受琴於父,父沒,所傳之聲不忍復奏,各造新弄。 去。 中書令王綏嘗攜客造之,勃等方進豆粥, 凡諸音律,皆能揮手。 顒十六遭父憂,幾於毀滅, 會稽剡 勃制 因

其同游野澤,堪行便去,不爲矯介,衆論以此多之。 時繁密,有若自然。乃述莊周大旨,著逍遙論、注禮記中庸篇。[12]三吳將守及郡內衣冠,要 得閑,非有心於語默,兄今疾篤,無可營療,、關當干祿以自濟耳。」乃求海虞令, 卒,乃止。 桐廬縣又多名山,兄弟復共游之,因留居止。 桐廬僻遠,難以養疾,乃出居吳下。 吳下土人共爲築室,聚石引水,植林開澗,少 勃疾,患醫藥不給。 顒謂勃曰:「顒隨兄 事 ·垂行 而 勃

山,山北有竹林精舍,林澗甚美,顒憩于此澗。 宋國 初建、元嘉中徵,並不就。 衡陽王義季鎮 義季亟從之游,顯服其野服,不改常度。 京口,長史張邵與顯 姻通, 迎來 止黄 爲 鵠

侍郎張敷曰:「吾東巡之日,當宴戴公山下也。」以其好音,長給正聲伎一部。 顒合何嘗、白 義季鼓琴,並新聲變曲,其三調游弦、廣陵、止息之流,皆與世異。 文帝每欲見之,嘗謂黃門

器二聲以爲一調、號爲淸曠。

成,面恨瘦,工人不能改,乃迎顒看之。顒曰:「非面瘦,乃臂胛肥耳。」及減臂胛,瘦患卽除, 無不歎服。十八年卒,無子。景陽山成,顒已亡矣。上歎曰:「恨不得使戴顒觀之。」 自漢世始有佛像,形制未工,逵特善其事,顒亦參焉。 宋世子鑄丈六銅像於瓦官寺、旣

徵辟一無所就。後家人至石室尋求,因復遠徙,違避徵聘,**遁**跡幽深,卒於巖石間。 立室廬山頂。 翟法賜,尋陽柴桑人也。曾祖湯,祖莊,父燆,並高尚不仕,逃避徵辟。 喪親後,便不復還家,不食五穀,以獸皮及結草爲衣,雖鄉親中表莫得見焉。 法賜少守家業,

雷次宗字仲倫,豫章南昌人也。少入廬山,事沙門釋慧遠,篤志好學,尤明三禮、毛詩。

隱退不受徵辟。

列傳第六十五 隱逸上

蔚之並以儒學總監諸生。 還廬山,公卿以下並設祖道。後又徵詣都,爲築室於鍾山西巖下,謂之招隱館,使爲皇太 令何承天立史學,司徒參軍謝元立文學,凡四學並建。 子肅之頗傳其業。 子、諸王講喪服經。 宋元嘉 十五年,徵至都,開館於寫籠山,聚徒教授,置生百餘人。 次宗不入公門,乃使自華林東門入延賢堂就業。二十五年,卒于鍾山 時國子學未立,上留意藝文,使丹陽尹何尚之立玄學,太子率更 車駕數至次宗館,資給甚厚。久之, 會稽朱膺之、潁川庾

亦隱居不仕。 郭希林,武昌人也。 會祖翻,晉世高尙不仕。一希林少守家業,徵召一無所就,卒。子蒙

凝之慕老萊、嚴子陵爲人,推家 劉疑之字隱安,小名長生,自己南郡枝江人也。父期公,衡陽太守。兄盛公,高尙不仕。 財與弟及兄子,立屋於野外,非其力不食。 州里重其

行,辟召一 無所就。 妻梁州刺史郭銓女也,遣送豐麗,凝之悉散之屬親。 妻亦能不慕榮華,

輸 與 凝之共居儉苦。 公 調 求 輒與之。 夫妻共乘蒲笨車,出市買易,周用之外,輒以施人。 又嘗有人認其所著展,日也笑曰:「僕著已敗, 令家 中電新 爲村里所誣,一 者備君。」[110]

此

人後

田

中得所失展,送還不肯復取。

與衡 或譏焉。 陽 飢色者悉分與之,俄頃立 臨 王義]|| 王義慶、衡陽王義季鎭江陵, 凝之日:「昔老萊向楚王稱僕,嚴陵 季書亦稱僕。 荆州 盡 年饑,義季慮凝之餒斃,餉錢 並遣使存問。 亦抗禮光武,未聞巢、許稱臣堯、舜。」時戴顒 凝之答書頓首稱僕、三三不爲百姓禮, 十萬。 凝之大喜,將錢至市門,

食,妻子皆從其志。 性好 山 水,一旦攜 卒年五十九。 妻子泛江湖,隱居衡山之陽,登高嶺,絕人迹,爲小屋居之。 採藥服

觀

有

而 止 言 可 不 觀。 龔 及 世 中 事 書郞 卒年 范述 四十二。 見之歎 日 人也。 此荆楚之僊人也。」自少及長, 從祖玄之,父黎人, 並不應徵辟。三三前風 徴辟一 無所就 姿端雅,容 時 或賦

朱百年,會稽山陰人也。 祖凱之,晉左衞將軍。 父濤,揚州主簿。

山陰 爲行 錢 迹避 取 樵箬 爲萋買繒采五三尺,好飲酒,遇醉或失之。頗言玄理,時爲詩詠,往往有高勝之言。 人,唯與同縣孔覬友善。至思覬亦嗜酒,相得輒酣對盡歡。 人所取,回到明旦已復如此,人稍怪之,積久方知是朱隱士所賣,須者隨其所堪多少,留 百年少有高情,親亡服闋,攜妻孔氏入會稽南山,伐樵採箬爲業,每以樵箬置道頭,輒 而 去。 或遇寒雪,樵箬不售,無以自資,輒自榜船送妻還孔氏,天晴迎之。 有時出

慟,覬亦爲之傷感。 百年室家素貧,母以冬月亡,衣並無絮,自此不衣緜帛。 除太子舍人,不就。 百年不覺也。 **旣覺,引臥具去體,謂閱曰:「緜定奇溫。」因流涕悲** 顏竣爲東揚州,發敎餉百年穀五百斛,不受。 **嘗寒時就**閱宿,衣悉挾布,飲

時山陰 又有寒人姚吟亦有高趣、爲衣冠所重。 竣餉吟米二百斛,吟亦辭之。

百年卒 Щ 中。 蔡興宗爲會稽太守,餉百年妻米百斛。 百年妻遣婢詣郡門奉辭固讓,時

人美之,以比梁鴻妻。

帊,席松葉,枕一塊白石而臥,了不相眄。 延之等咨嗟而退,不敢干也。 晉陵顧悅之難王弼 趙繹以文義見稱,康之與友善。 昴 康之字伯愉,河東楊人也。 '特進顏延之等當時名士十許人入山候之,見其散髮被黃布 世居京口,寓屬南平昌。〔三六〕少而篤學,姿狀豐偉。 下邳

| 過義四十餘條,康之申王難顧,遠有情理。又爲毛詩義,經籍疑滯,多所論釋。 俱下至赭圻,病卒,瘞於水濱。 僧納學算,妙盡其能。 徵辟一無所就,棄絕人事,守志閑居。弟雙之爲臧質車騎參軍,與質 康之時得病小差,牽以迎喪,因得虛勞病,寢頓二十餘年。 嘗就沙門支

時有閒日,輒臥論文義。

之以宋明帝泰始初與平原明僧紹俱徵,辭以疾。時又有河南辛普明、 學,送本與康之,康之手自點定。又造禮論十卷,高帝絕賞愛之,及崩,遺詔以入玄宮。 室,希與妻子相見,不通賓客。弟子以業傳受,尤善左氏春秋。 宋孝武卽位,遣大使巡行天下。使反,薦康之宜加徵聘,不見省。康之性清約,獨處一 齊高帝爲領軍時,素好此 東陽樓惠明皆以篤 康

行問。

甚多,通夕不得寢,而終不道侵螫。 僑居會稽,會稽士子高其行,當葬兄,皆送金爲贈,後至 普明字文達,少就康之受業,至性過人。居貧與兄共處一帳,兄亡,仍以帳施靈。[ll-]]蚊

列

贈邪。」齊豫章王嶷爲揚州,徵爲議曹從事,不就。 者不復受。 人問其故,答曰:「本以兄墓不周,故不逆親友之意。 今實已足,豈可利亡者餘

좕 藏名匿迹,人莫之知。 全,時人以爲有先覺。 歸。 **惠明字智遠,立性貞固,有道術。居金華山,舊多毒害,自惠明居之,** 俄自金華輕棹西下,及就路,回之豐安。 宋明帝召不至,齊高帝徵又不至。 齊武帝敕爲立館。 旬日之間,唐寓之祆賊入城塗地,唯豐安獨 文惠太子在東宮,苦延方至,仍又 無復辛螫之苦。

杊 未辨賤貧,無論榮貴。」乃歌曰:「竹竿籊籊,河水浟浟。 之士,靡然 陵波隱顯。 曰:「其 ,良亦勞止。 漁父者,不知姓名,亦不知何許人也。 釣 非釣,寧賣魚者邪。」緬益怪焉。 向 俄而 風。 吾聞黃金白璧,重利也,駟馬高蓋,榮勢也。 漁父至, 子胡 「不贊緝熙之美」何晦用其若是也。」漁父曰:「僕 神韻 蕭灑, 垂綸長嘯, **塗褰裳涉水**, 太康 緬甚異之。 孫緬爲尋陽太守,落日逍遙渚際,見一 相忘爲樂,貪餌吞鉤。 謂曰:「竊觀先生有道者也, 今方王道文明,守在 乃問:「有魚賣乎。」漁父笑 Щ 海狂 人,不 非夷非惠 海 達世務, 外,隱鱗 終朝 輕舟 而 J'A 答 鼓

以忘憂。」於是悠然鼓棹而去。

緬字伯緒,太子僕興曾之子也。 有學義,宋明帝甚知之。 位尚書左丞,東中郎司馬。

十載。 此子 步,成其羽化。望其還策之日,暫紆淸塵,亦願助爲譬說。」僧達答曰:「褚先生從白雲游舊 城,安道入昌門,於茲而三焉。却粒之士,飡霞之人,乃可暫致,不宜久羈。君當思遂其高 |Щ ,滅景雲棲,不事王侯,抗高木食,有年載矣。自非折節好賢,何以致之。 褚伯 伯玉 古之逸人,或留慮兒女,或使華陰成市,而此子索然,唯朋松石,介於孤峯絕嶺者,積數 得已,停郡信宿,纔交數言而退。寧朔將軍丘珍孫與僧達書曰:「聞褚先生出居貴館, 性耐寒暑,時人比之王仲都。 近故要其來此,冀慰日夜。 少有隱操、寡慾。年十八、父爲之昏。婦入前門、伯玉從後門出。遂往剡、居瀑布 玉字元璩,吳郡錢唐人也。高祖含,始平太守。父逿,征虜參軍。 比談討芝桂,借訪荔蘿,若已窺煙液,臨滄洲矣。 在山三十餘年,隔絕人物。王僧達爲吳郡,苦禮致之,伯 昔文舉棲冶 知君欲

玉

宋孝建二年,散騎常侍樂詢行風俗,表薦伯玉,加徵聘本州議曹從事,不就。 列 傳 第 六 + Ъ. 際 逸 Ŀ 八七三 齊高帝即

之,輒當申

譬。」

元年卒,年八十六。 位,手韶吳、會二郡以禮迎遣,又辭疾。上不欲違其志,敕於剡白石山立太平館居之。 伯玉常居一樓上,仍葬樓所。 孔珪從其受道法,爲於館側立碑

乃止。 照。及長,篤志不倦。聞吳興東遷邵玄之能傳五經文句,假爲書師,從之受業。 七歲,知推六甲。家貧,父使田中驅雀,歡作黃雀賦而歸,雀食稻過半。父怒欲撻之,見賦 顧歡字景怡,一字玄平,吳郡鹽官人也。曰云家世寒賤,父祖並爲農夫,歡獨好學。 鄉中有學舍,歡貧無以受業,於舍壁後倚聽,無遺忘者。夕則然松節讀書,或然糠自 同郡 顧顗

嗽早孤,讀詩至「哀哀父母」,輒執書慟泣,由是受學者廢蓼莪篇,不復講焉。 母亡,水漿不入口六七日,廬于墓次,遂隱不仕。於剡天台山開館聚徒,受業者常近百 諸義。

効驗。 「記刻以元嘉中出都, 晚節服食,不與人通。每旦出戶,山鳥集其掌取食。好黃、老,通解陰陽書,爲數術多 寄住東府。忽題柱云「三十年二月二十一日」,因東歸。 後元

凶弑逆,是其年月日也。

列傳第六十五 隱逸上

甚 石村 多 多邪 弟子 卽 命殺之。 鮑 病 ·,村人告訴求哀,

歡往村中爲講

幾子,規地 靈綬門前有一株樹,大十餘圍,上有精魅,數見影。 病者皆愈。 又有病邪者問歡,歡曰:「家有 作 獄。 何書。」答曰:「唯有孝經 有頃 歡印樹 ',見狐 一樹卽枯 狸 黿 鼉 自 死。 入 山陰白 而 獄 中者

歡 可取仲尼居置病 人枕邊恭敬之,自差也。」而後病者果愈。 後人問其故,答曰:「善禳

惡,正勝邪,此病者所以差也。」

外 郞 劉 齊高 思 効 帝 輔 表 陳讜言,優韶 政 微爲 揚州主簿。 並 稱美之。 及踐阼乃至,稱「山谷臣顧歡上表」,進政綱一 歡 東 歸,上賜麈尾、素琴。 時員

朱廣 理 會稽 而 唯 意 之, 斷 總 孔 永 , 珪 明 南 而 並 豈容有二? 嘗 北。 言之,其失則同,曲 元 立 登嶺尋歡,共談四本。 年,詔徵爲 論 **羣迷暗爭,失得無準,情長則** 難,與之往 四本 太學博 無正, 復,而廣之才 而辯之,其塗 士,同郡 失中故 歡 曰:蘭石 顧黯爲散騎侍郎。 心。」於 理尤精詣 則 、申、意 異。 是著三名論 危 也 短 何者? 而 則 密,宣國安而 廣之字 屈。 同昧 黯字長孺, 所 以 E 處深,吳郡錢唐人也,善淸言 以 其 四本 之。 本而 疎, 尙書 士季似而 競談 並 有隱 通 劉澄 一,莫能 其末,猶 操, 、臨川 非 與歡不 相 公深 未 塞。 識 王常侍 就徵 謬 夫 辰 緯 中 而

初 歡 以佛 道二家教異,學者互 相 非 毁, 乃著夷夏論

辯 是與 非, 宜據 淫典。 道經云:「老子入關之天竺維衞國」「同]國王夫人名曰淨

七步 妙 っ, 於 是佛 因 其 道 畫寢,乘日精入淨妙口 興 活。」 此出玄妙內篇。 中,後年四月八日夜半時,剖 佛 經 云 釋迦 成成 (佛) 有 塵劫之數」,出 | 右腋 而 生。 法 墜地即 華 無 量 行

漂。或「爲國師道士,儒林之宗」。出瑞應本起。

道也, 性, 衣,羣 伸,孝敬 鬻 水沉 不爲 則反。 而 王 孔 吼 選 有 老 劾西戎 :夷夏 教 長、往 西西 歡 事之可賤者俗也, 夷之服。 非聖,誰 或和 其 論之日 之典, 華 戎 之別。 入不 之俗。 往 之法, 而 光 華言,化 是佛。 獨 以 五帝三皇,不聞有 同,其爲必 則當之。然二經所 擎 若謂: 以 明近,或曜靈以示遠。 旣不 全形 法 無窮 夷 屈 其致旣 全 守 而 捨華効夷, 同, 禮、繼 一、侯 世 異,各成其性, 悖禮 夷語 界,聖 均, 甸 叉不全 犯順 善之敎,毀貌 之恭,狐 耳。 其法 人 說, 佛; 義將安取? 雖舟 ,曾莫之覺, 代興,或昭五 異。 如 國 可 蹲狗 道濟天下,故無方而 合符契。 換 師 不易其 車 下 道 者, ·均於致遠, 棄妻孥,〔三〕上絕宗 易性 踞,荒流 士,無過老、莊,儒林 而車 事。 若以道邪? 弱 典, 絕 道則 喪忘 可 是以端 之肅 或布 惡之學。 沙川 佛 而 歸 也,佛 有 三乘。 jij 孰 委搢紳, 道固符合矣。 棺殯槨 舟 不入,智周 陸 識其 岀 可 則 祀 之節, 行 一伊同 道 之宗、孰出周、孔。 在鳥 葬,中 舊。 也,其 陸 嗜欲 諸 乎? 人,爱及 而 佛 萬 華 且 之物 鳥 夏 物,故 道 之容,剪 聖則符,其跡 若以俗 今以 理 鳴, 齊 之風 之可 乎達化 異物, 中夏之 皆 在 無 气,火焚 邪 獸 貴 以 髮 物 者 鳥 而 曠 而

列傳第六十五 隱逸上

俗 以爲一,是牽異以爲同,破同以爲異,則乖爭之由,淆亂之本也。 則大乖矣。 屢見刻舷沙門,守株道士,交諍小大,互相彈射。 或域道以爲兩,或混俗

切法 簡 人 道 所能。 稱正一,一 而 幽,幽則妙門難見,顯則正路易遵。此二法之辨也。 可以進謙弱, 赊法可以退夸强。 **尋聖道雖同,而法有左右,始乎無端,終乎無末,泥洹仙化,各是一術。 佛號正眞,** 佛言華而引,道言實而抑,抑則明者獨進,引則昧者競前。佛經繁而顯,道經 歸無死,眞會無生。在名則反,在實則合。但無生之敎賒,無死之化切, 佛教文而博,道教質而精,精非粗人所信,博非精

則 (自然爲高) 破惡則勇猛爲貴。佛跡光大,宜以化物。道跡密微,利用爲己。優劣之 匠無心,方圓有體,器旣殊用,敎亦易施。佛是破惡之方,道是興善之術,興善

雖同二法,而意黨道教。宋司徒袁粲託爲道人通公駁之。 其略曰

夫蹲夷之儀,婁羅之辯,各出彼俗,自相聆解。

猶蟲躍鳥聒,何足述効。

歡

分,大略在茲。

經之說,俗以膝行爲禮,不慕蹲坐爲恭。 亦茲方。 白 日停光,恒星隱照,誕降之應,事在老先,似非入關,方昭斯瑞。又西域 襄童 高帝,膝行而進,趙王見周,三環而止。 道以三遶爲虔,不尙踞傲爲肅。 今佛法垂化,或因或革。 豊 專 戎土,爱 之記,佛 清信之

八七八

士,容衣不改,息心之人,服貌必變。 變本從道,不遵彼俗,俗風自殊,無患其亂

未能 宗,發軫旣殊,其歸亦異。 無死,陶神者使塵惑日損,湛然常存。泥洹之道,無死之地,乖詭若此,何謂其同? 孔、老、釋迦,其人或同,觀方設敎,其道必異。 又仙化以變形爲上,泥洹以陶神爲先。 孔、老教俗為本、三三釋氏出世為 變形者白首還緇,而

歡答曰:

雖久 貴,故戒業可遵,戎俗實賤,故言貌可棄。 左跂 道出於譁,豈非譁風本善邪? 右,全是蹲踞。 而濫在釋前,是呂尚盜陳恒之齊,劉季竊王莽之漢也。 案道經之作,著自西周,佛經之來,始乎東漢。 故周公禁之於前,仲尼誠之於後。又佛起於戎,豈非戎俗素惡邪。 今華風旣變,惡同戎狄,佛來破之, 今諸華士女,氏族弗革,而 年踰八百,代懸數十。 叉夷俗 良有以矣。 長跽,法與華異,翹 露首偏踞, 若謂黃、老 佛道 濫 用 實

落矣,若以立像爲異,則俗巫立像矣。 道教 安得述、釋二教,交行八表。 執本以領末,佛教救末以存本。 叉若觀 風流敎,其道必異。 今佛旣 佛非東華之道,道非西夷之法,魚鳥異川, 東流,道亦西邁, 請問 此非所歸,歸在常住,常住之象,常道孰異 所歸, 異在 何許? 故知俗有精粗, 若以翦落 敎有文質。 :為異, 永不 則胥靡翦 相關。 然則

列傳第六十五 隱逸上

二十 食茹 七品 神 仙 芝,延壽萬億,壽盡 。四言仙變成眞,眞變成 有 死,權便之說。 神仙 則 死,藥極 神 是大化之總稱, ,或謂之聖,各有九品。 則 非窮妙之至名。 品極 仙之流 則 至名無名, 入空寂, 也 無爲 其有名者 無名。

之與 編成 須導 象。 難亮,越 論,大略曰:「寶積 玄絕於有境,神化贍於無窮。 死,名補天曹,大乖 改,絕學 太子召入玄圃,衆僧大會。 曰『實相 但物 歸 聖, 若服 明 僧 _<u>_</u> ·無憂。 一,在 雖 人以 逗 有 紹 + 極 八萬 歸 正 道 爲 號 無 二教 鳧, 千 曠 曰『玄牝』。 二。〔三吾見道士 日 四千行, 幼諸聖 稱, 云。『佛以 論,以 老、莊立言本 楚人以爲乙。 回 . 向, 終不能盡。 一,共遵斯 向正 爲 說有八萬 子良 道之大象, 一音廣說法 佛明其宗,老全其生。 刨 爲萬物 使景翼 無邪。 與道人戰 理」。文惠太子 人自煙、越,鴻常一耳。」以示太子僕周顒。 終不 <u>-</u> 四千法。 而 老、釋未始於嘗分, 能 即佛之法身。 邪觀 禮佛,景翼不肯。子良送十地經與之, 無爲,處一數而 盡, 儒 老子云,『聖人抱一以爲天下式』。 墨, 既遣,億善日新。 法乃至於無數, 豈可思議。」司徒從事 、竟陵王子良並好釋法,吳興孟景翼爲道士 枯,此修考之士,非神 道人與道 守生者蔽,明宗者通。 以不守之守守法身, 無數。 迷者分之而 土 辨 行亦達於無央,「邑」等級 三五四六,隨用 是非。 莫之能名, 中 郞 昔有 未 張融作門律 合。 以不 强號 今道家稱長 鴻 **顒難之曰:「虛** 飛 億善偏 而 執 爲一。 景翼造正一 天首, 之爲妙,空 施,獨立不 之執 修 隨緣 積遠 在 執 一,修 道 佛

無法 法 性 邪。 性,其寂雖同,位寂之方,其旨則別。論所謂『逗極無二』者,爲逗極於虛無,當無二於 足下所宗之本一物爲鴻乙耳,驅馳佛道,無免二末,未知高鑒,緣何識本。輕而宗

之,其有旨乎。」往復文多不載。

|山||圖 剡山、時年六十四。 均日夜。 宅,三淸有常舍。 表狀 歡 口不辯,善於著論。又注王弼易二繫,學者傳之。 ,武帝詔歡諸子撰歡文議三十卷。 委命安所乘,何方不可駕。 精氣因天行,游魂隨物化。 身體 一香軟,道家謂之屍解仙化焉。 翹心企前覺,融然從此謝。」自剋死日,自擇葬時,卒於 鵬鵾適大海、蜩鳩之桑柘。 還葬舊墓,木連理生墓側。 知將終,賦詩言志曰:「五塗無恒 達生任去留,善死 縣令江

呼之,次第來取食乃去。 Щ 度 「気息獣隨之。 心誓曰:「若得免死,從今不復殺生。」須臾見兩 又始興人盧度字孝章,亦有道術。 夜有 鹿觸其壁,度曰:「汝勿壞 逆知死年月,與親友別。 少隨張永北侵魏。 我壁。」應應聲去。[計]屋前有池養魚,皆名 楯流來,接之得過。 永明末,以壽終。 永敗,魏人追急,阻淮水不得過。 後隱居廬陵西昌三顧

列傳第六十五 隱逸上

京產字景齊,吳郡錢唐人也。 祖 運 劉 毅衛軍 一參軍。 **父**道 鞠 州 從事 ,善彈 棊

中,武 尚 款 也。」 陵王 京產請職至 郡 產 命 少恬 曄 主 爲 簿 靜 會稽,齊高帝遣儒 州 一, 閉 Щ 辟 意 含講書、 從事 樂宦 不稱 頻 傾資 疾 涉文義,專修黃、老。 土 去。 (供待。 劉瓛 與同 入東 子栖 郡 顧 爲 躬自屣履,為瓛生徒下 歡 | 曄講, 蠍故往與之游, 曰: 「杜生 同 契。 會稽 於始 孔 覬,[三清剛 寧東山 į 食。 開 舍授學。至三齊建元 有 孔珪 峻 節 一,當 周顒 今之臺 見 而 爲

生持 產 徵 釣 永 爲 党島 明 奉 十年 朝 白璧所回。」辭疾 請 珪 不 及 至。 光 一般大夫陸澄、祠部尚書虞悰、 於 會稽 不 就 日 門山 聚徒 教 授。 建武 太子 初, 右率沈約、司徒右長史張 徴 員外散騎侍郎。 京産 融 表薦京 百三脏

並

致

書

以

通

殷

勤

窺 祐 Щ 桂 都邑。 谷 爲 引 之養 會稽 中 爲 有 主 豫章 山陰 創 數 簿 愈然後 百 逐不 觓 Ŧ 人孔道徽,守志業不仕,與京產 寲 錢 可屈 爲 去。 視 揚 之如 州 太守 ,辟西曹書佐,不至。 此古之遺德也。」 瓦 王僧虔 石 不 異。 與 八張緒書 采樵. 道徽 者 友善。 日 競 郷里宗慕之。 少 孔 取, 厲 道徽 高 **陆** 入手即 行 父站 能 敬 康 世 成 道徽兄子 至 曾 其家 沙 一行通 孫 ·礫。 也 風 神,隱於 曾 總 行 隱 有 動 有 居 應 幽 操 四 南 中 祗 行, 箭 Щ 明 來 Щ 德標松 遇 終 投站 飢寒 身 不 見

不可得衣食,縣令吳興丘仲孚薦之,除竟陵王侍郎,竟不至。

狂易,時謂之謫仙,不知所終。 永明中,會稽鍾山有人姓際,不知名,隱山中,養鼠數千頭,呼來卽來,遣去卽去。 言語

朔望節歲,絕而復續,嘔血數升。時何胤、謝朏並隱東山,遺書敦譬,誠以毀滅。 京產亡,水漿不入口七日,晨夜不罷哭,不食鹽菜。每營買祭奠,身自看視,號泣 十六,當時咸嗟惜焉。 夢見其父,慟哭而絕。 又重栖,以爲學士,掌昏冠儀。 ||嶷聞其名,辟議曹從事,仍轉西曹書佐。||竟陵王子良數致禮接。 京產高祖子恭以來及子栖世傳五斗米道不替。 初,胤兄點見栖歎曰:「卿風韻如此,雖獲嘉譽,不永年矣。」卒時年三 以父老歸養。 栖肥白長壯,及京產病,旬日間便皮骨自支。 栖字孟山,善淸言,能彈琴。 國子祭酒何胤掌禮, 至祥禪,暮 刺史齊豫 不 - 自持。

側,頓絕而死。 小 兒疑之,問云:「母嘗數問 建武二年,剡縣有小兒年八歲,與母俱得赤班病,母死,家人以小兒猶惡,不令其知。 鄉隣告之縣令宗善才,求表廬,事竟不行。 我病,昨來覺聲羸,今不復問, 何 也。」因自投下牀,扶匐至母尸

陶潛字淵明或云字深明名元亮 按宋書隱逸傳本作「陶潛字淵明,或云淵明字元亮」,與此異。

又「或云字深明」,乃南史避唐諱,改「淵」作「深」。 傳文首句「字淵明」,據例亦當作「字深明」,

今作「淵明」、蓋經後人追改。

裋褐穿結 「裋裼」各本作「短褐」,據宋書改。 按漢書貢禹傳注:「短,僮豎所著布長襦;褐,毛

布之衣。」指粗服。

[川] 弱子候門 「弱子」宋書作「稚子」,此避唐高宗小名而改。

图〕或命巾車 文選江文通擬陶徵君詩注引作「或巾柴車」。

日] 佩俛辭事 「辭事」宋書作「辭世」,此避唐諱改。

メ 濟北氾幼春 「氾幼春」朱書作「氾稚春」,此避唐諱改。 王應麟困學記聞:「氾稚春,謂氾毓 }曾

書有傳。」

47 宗少文 宗少文本名炳,此避唐諱以字行。 宋書隱逸有宗炳傳。

謂之無琴動操欲令衆山皆響 「謂之」宋書作「謂 人日」,是。

列

傳

第

六

+

Ŧī.

校

勘記

. 1. 限魚 鳥 慕哉 限 魚鳥慕」南齊書作「限魚慕鳥」。 册府元龜二九二、八一○作「恨魚慕鳥」。

- [10] 測遂付以家事 「測遂」二字各本並脫,據通志補。
- 荆州 刺 史隨王子隆至鎮 「鎭」字各本並脫,據南齊書補。
- (三)尚之字敬文「敬文」各本作「敬之」,據南齊書改。
- [1] 後每爭輒云勿令居士知 「爭」各本作「事」、據宋書改。
- 名冠 同門稱爲顏子 建康實錄作「名冠當時,同門稱爲顏子」。
- 時彭城劉遺 人遁迹廬山 「遺人」朱書作「遺民」、此避唐諱改。
- 通毛詩六義 及禮 論注公羊傳皆傳於世 「皆傳」二字各本並 一脫,據宋書補。 按此因上下兩「傳」
- 字相混而誤奪。
- 注禮 劉疑之字 記中 隱安小 ·庸篇 名長 「注」字各本並脫、據宋書補。 生 「隱安」、「長生」朱書作「志安」、「長年」。
- 一たし 义 嘗 有 人 認其所著展 一有 人」二字,各本並脱,據宋書補 按下「此 人後田 中得所失展」, 明此

爲脫文。

- 作「備」 令家中覓新者備君 君」,李慈銘南史札記:「備即今賠 「令」各本作「今」、據通 字。 志改。 備君」汲古閣本、局本作·償君」,其他各本
- [三] 凝之答書頓首稱僕 「答書」下各本有「曰」字,據宋書删。

- [三] 襲祈字孟道 「孟道」各本作「蓋道」,據宋書改。
- 從 祖 玄 之父黎 人並 不 應 徴 辟 黎 人」朱書作「黎民」,此避唐諱 改
- 毎 以 樵 箬置 道 頭 輒 爲行 人所取 「每」字各本並脱,據太平御覽 五. 20 引
- 至 唯 與 同 縣 孔 覬 友善 孔 | 覬」各本作「孔顗」,據宋書孔覬傳改 一下同
- 世 居京 口 寓屬 南平 昌 「屬」各本作「居」,據宋書改。 錢大昕 廿二史考異 宋書孟懷玉 平昌安

丘人,而世居京口。蓋南平昌即僑立京口,非有兩地。」

- 宝 仍以 帳 施靈 「以」字各本並 脱,據南齊書孝義傳、通志 補。
- 顧 歡 字 景怡 字玄平吳郡 鹽官 人也 「吳郡」各本 作「吳興」。 按鹽官屬吳郡,下「同 郡顧 顗 之臨

縣」,與之亦吳郡人。今改正。

- 三艺 老子入 好黃 老 關 通 之天竺 解 陰 陽 維 書 爲 衞 數 國 術 多效驗 王鳴盛十七史商権六四 「好黄、老, 通解陰陽 以 爲 入關當作出 書 南齊書作 關 事 下引袁粲駁語 黄老道 一解陰 亦誤、 陽
- [11] 下藥妻孥 「棄」各本作「育」,據弘明集七改。
- 孔老教俗 爲本 「教俗」南齊書作「治世」,此因 避 唐諱 丽
- [訓] 其有名者二十七品 「名」字各本並脫,據南齊書補
- [ME] 行亦達於無央 「達」南齊書作「逮」。

列

傳

第

六

+

五

校

勘

記

に発う 道之與佛逗極無二「逗」各本作「遙」、據南齊書改。按「逗極」謂投合無間,作「遙」譌。

後隱居廬陵西昌三顧山 「後」字上各本衍「然」字,據南齊書删。

汝勿壞我壁鹿應聲去 「勿」字各本並脫,據太平御覽九〇六引、通志補。

會稽孔覬 「覬」各本作「顗」,據南齊書改。按宋書有孔覬傳。

Cltc)於始寧東山開舍授學 「於」字各本並脫,據通志補。

南史卷七十六

列傳第六十六

隱逸下

臧榮緒 吳苞 趙僧巖 蔡薈 孔嗣之 徐伯珍 婁幼瑜 沈麟士

阮孝緒 鄧郁 陶弘景 釋寶誌 諸葛璩 劉慧斐 兄慧鏡

慧鏡子曇淨 范元琰 庾詵 張孝秀 庾承先 馬樞

臧榮緒,東莞莒人也。 祖奉先,建陵令。父庸人,國子助教。[1]

榮緒幼孤,躬自灌園,以供祭祀。 母喪後,乃著嫡寢論,掃洒堂宇,置筵席,朔望輒拜薦

焉,甘珍未嘗先食。 齊高帝爲揚州刺史,徵榮緒爲主簿,不到。 純篤好學,括康、西晉爲一書,紀錄志傳百一十卷。 建元中,司徒褚彦回啓高帝稱述其美,以置 隱居京口 教授

列傳第六十六 隱逸下

秘 因甄明至道。」乃著拜五經序論。常以宣尼庚子日 閣。 樂緒惇愛五經,謂人曰:「昔呂尚奉丹書,武王致齋降位,李、釋教誡,並有禮敬之儀, 生,其日陳五經拜之。 自號披褐先生。

又以飲酒亂德,言常爲誠。 永明六年卒。

初,榮緒與關康之俱隱在京口,時號爲二隱。

教學。 孝經,諸生朝聽瓛,晚聽苞也。 吳苞字天蓋,一字懷德,濮陽鄄城人也。 冠黃葛巾,竹麈尾,蔬食二十餘年。 與劉瓛俱於褚彦回宅講授。 儒學,善三禮及老、莊。 宋泰始中過江、聚徒 職講禮, 苞講論語、

趙僧嚴、蔡薈,皆有景行,慕苞爲人。 授,朝士多到門焉,當時稱其儒者。 齊隆昌元年,徵爲太學博士,不就。始安王遙光及江祏、徐孝嗣共爲立館於鍾山 自劉瓛以後,聚徒講授,唯一一人而已。 以壽終。 時有 .下教

拂 :衣而去。後忽爲沙門,栖遲山谷,常以一壺自隨。 **僧嚴,北海人。寥廓無常,人不能測。** 與劉善明友。 一旦謂弟子曰:「吾今夕當死。 善明爲靑州, 欲舉爲秀才,大整, 壺中六

不緇日白,至如蔡休明者,可不謂之夷白乎。」 蔡薈字休明,陳留人。清抗不與俗人交。 李撝謂江數曰:「古人稱安貧清白曰夷,湟而

隱居鍾山。 又有魯國孔嗣之字敬伯,宋時與齊高帝俱爲中書舍人,並非所好。 朝廷以爲太中大夫,卒。 自廬江郡守去官,

箬葉、甘蕉及地上學書。山水暴出,漂溺宅舍,村鄰皆奔走,伯珍累牀而坐,誦書不輟。叔 老、莊,無明 膝談論,「三申以素交。吳郡顧歡擿出尚書滯義,伯珍訓答,甚有條理,儒者宗之。 之。太守琅邪王曇生、吳郡張淹並加禮辟,伯珍應召便退,如此者凡十二焉。徵士沈儼造 父璠之與顏延之友善,還祛蒙山立精舍講授,伯珍往從學。積十年,究尋經史,游學者多依 徐伯珍字文楚,東陽太末人也。祖、父並郡掾史。伯珍少孤貧,學書無紙,常以竹箭、 道 術。 歲嘗旱,伯珍筮之,如期而雨。 舉動有禮,過曲木之下,趍而避之。 好釋氏、

列傅

第

六 十

六

隱逸下

妻,晚不復重娶,自比會參。

豫章王辟議曹從事,不就。家甚貧窶,兄弟四人皆白首相對,時人呼爲「四皓」。 館東石壁,夜忽有赤光洞照,俄爾而滅。白雀一雙棲其戶牖,論者以爲隱德之感焉。刺史 呼爲婦人巖。二年,曰怕珍移居之,階戶之間,木生皆連理。門前生梓樹,一年便合抱。 率,年八十四。受業生凡千餘人。 宅南九里有高山,班固謂之九巖山,後漢龍丘萇隱處也。 山多龍鬚檉柏,望之五采,世 建武四年

伯珍同郡婁幼瑜字季玉,图亦聚徒教授,不應徵辟,彌爲臨川王映所賞異,著禮捃拾

三十卷。

沈麟士字雲禎,吳興武康人也。「三祖膺期,晉太中大夫。父虔之,宋樂安令。

絕, 居貧織簾誦書,口手不息,鄉里號爲織簾先生。 其在爾乎。」及長,博通經史,有高尚之心。親亡,居喪盡禮。 麟上幼而 **嘗爲人作竹誤傷手,便流淚而還。**同作者 服闋,忌日輒流淚彌旬。

所著屐 謂 曰:「此不足損,何至涕零。」答曰:「此本不痛,但遺體毀傷,感而 曰:「是卿 展邪』即跣 而 反。 隣 人得展, 送前者還之, 悲耳。」嘗行路,隣 麟士 曰:「非 卿 屐 邪 人 認 其

而

受之。

汝 深 師 相 之。 接。 宋元 嘉末,文帝令僕射何尚之抄撰五經,訪舉學士,縣以麟士應 及至,尚之謂子偃 曰:「山藪故 多奇 士,沈麟士,黃叔度之流 選。 也, 不得 豈可澄淸淆 已至都,尚之 濁

宗人徐州 履吉先。 物 通 麟士 嘗苦 養孤 吾誠 刺 史曇慶 未能景行坐忘, 無書,因游都下,歷觀四部畢,乃歎曰:「古人亦 兄子,義著 、侍中懷文、左率勃來候 郷曲 何爲不希企 或勸之仕,答曰:「魚縣獸檻,天下 日損。」乃作玄散賦 之,麟士未嘗答也 以 何人哉。」少 絕 世 契。 太守 時 聖 稱疾歸 孔 人 玄 山 士辟不 悟 鄉,不 , 所 以每 與

往 差山 請 必 麟 停 欲 飾 中 數 土 隱 渾 有賢士, 居 月。 入 餘不 沌 郡 永 以 ·吳差山,講經 蛾眉 欲 麟士聞郡 開門教授居 請 冠 爲 功曹,麟士 越客於文冕,走雖不敏, 後堂有好山 成市。」(公 教授,從學 曰:「明府德履冲素、留心 水,即戴安道游吳興, 麟士 土 數 十百人,各營屋宇,依止 重 陸機連珠,每爲諸 請附 高節 山谷, 因古墓為 有蹈 生講 東海死耳,不忍受此黔劓。」 是以被 山 一其側, 之。 池 褐 也。 征北 .負杖, 時爲之語 欲 張 永爲吳興 忘其疲病。 觀之,乃 日二吳

列

傳

永乃止。

賓,本所不庶。中央無心,空勤南北。 昇 明志、太守王奐、永明中、中書郎沈約並表薦之、徵皆不就。 爲惠反凶,將在於斯。」 乃與約書曰:「名者實之

[訓 制 徵,又不就。二年,卒於家,年八十五。以楊王孫、皇甫謐深達生死而終禮矯俗,乃自 終老,讀書不倦。遭火燒書數千卷,年過八十,耳目猶聰明,以反故抄寫,火下細書,復成二 棺 1 以 三千卷,滿數十篋。時人以爲養身靜默所致。製黑蝶賦以寄意。著周易兩繫、莊子 周上,不復製覆被。 相 中 遺令:「氣絕剔被,取三幅布以覆屍。及斂,仍移布於屍下,以爲斂服。 唯 冢 承 註易經、禮記、養秋、尚書、論語、孝經、喪服、老子要略數十卷。梁天監元年,與何 麟士無所營求,以篤學爲務,恒憑素几鼓素琴,不爲新聲。負薪汲水,幷日而食。守操 此。 漆棺,今不復爾。亦不須旐。成服後卽葬,作冢令小,後祔更作 祭奠之法,至于葬,唯清水一盃。」子摩奉而行之,州鄉皆稱歎焉。 不 須 依土安用孝經。旣殯不復立靈座,四節及祥,權鋪席於地,以設玄酒 、聚土成墳,使上與地平。 不須沐浴晗珠。以本裙衫、先着褌,凡二服,上加單衣幅巾 王祥終制 亦爾。 葬不須 (轜車 、靈舫、魌頭也。不得朝夕 小冢於濱。 反被左 履枕、[十] 合葬非古 之奠。人 右 · 內篇 兩際 I 為 終 點 同

阮 孝緒字士宗,陳留尉氏人也。父彦之,宋太尉從事中郎,以清幹流譽。

胤之姊琅邪王晏之母,聞者咸歎異之。乳人憐其傳重辛苦,輒竊玉羊金獸等物與之。 緒 七歲 出繼從伯胤之,胤之母周氏卒,遺財百餘萬應歸孝緒,孝緒一無所納,盡以歸

見而駭愕,啓彥之送還王氏。

海,追 其 親 友因 父彦之, 彦之誠曰:「三加彌尊, 幼至孝,性沉靜,雖與童兒游戲,恒以穿池築山爲樂。 許由 呼爲居士。 於穹谷,庶保促生,以免塵累。」自是屏居一室,非定省未嘗出戶,家人莫見其面 人倫之始, 宜思自勗,以庇爾躬。」答曰:「願迹松子 年十三,福通五經。十五冠 一而見 於瀛

誅,親 顚 年十六,父喪不服緜纊,雖蔬菜有味亦吐之。外兄王晏貴顯,屢至其門,孝緒度之必至 戚 聞其笳管,穿籬逃匿,不與相見。 咸 爲之懼。 孝緒曰:「親而 不黨,何坐之及。」竟獲免。 曾食醬美,問 之,云是王家所得,便吐餐覆醬。 及晏

望而 而 炊。 梁武 歎曰:「 所 起兵圍 居 其 以 室 ___ 建鄴 雖 鹿牀爲精 邇 家 其 貧 人甚遠。」 舍,以樹 無以爨,僮妾竊隣人墓樵 環繞。 其爲名流所欽尙如此。 天監初,御 以繼 史中 火。 丞 自是欽慕 任 孝緒 **昉**尋其兄履之, 知之,乃不食,更令撤屋 風 譽 者, 欲造 莫不懷刺斂 m 不敢,

列

交。子野薦之尚書徐勉,言其「年十餘歲隨父爲湘州行事,不書官紙,以成親之淸白。 而息。 殷芸欲贈以詩, 防曰:「趣舍旣異, 何必相干。」芸乃止。 唯與比部郎裴子野

志行粗類管幼安,比以采章如似皇甫謐」。「公

|峻謂曰:「往者天地閉,賢人隱。今世路已淸,而子猶遁,可乎。」答曰:「昔周德雖興,夷、齊 雕及伏暅應徵,天子以爲隱者苟立虛名,以要顯譽,故孝緒與何胤並得遂其高志。 不厭薇蕨。漢道方盛,黃、綺無悶山林。爲仁由己,何關人世。況僕非往賢之類邪。〕初,謝 天監十二年,詔公卿舉士,祕書監傅照上疏薦之,與吳郡范元琰俱徵,並不到。 陳郡袁

驚而反,
隣里嗟異之。
合藥須得生人葠,舊傳鍾山所出。
孝緒躬歷幽險,累日不逢。
忽見 一鹿前行,孝緒感而隨後,至一所遂滅,就視,果獲此草。母得服之遂愈,時皆言其孝感 後於鍾山聽講,母王氏忽有疾,兄弟欲召之。母曰:「孝緒至性冥通,必當自到。」果心

道歎曰:「此所謂『肥遯無不利』,象實應德,心迹幷也。」孝緒曰:「雖獲遯卦,而上九爻不發, 升遐之道,便當高謝許生。」乃著高隱傳,上自炎皇,終于天監末,斟酌分爲三品:言行超逸, 爻,曰:「此將爲成,應感之法,非嘉遯之兆。」孝緒曰:「安知後爻不爲上九。」果成遯卦。有 有善筮者張有道曰:「見子隱迹而心難明,自非考之龜蓍,無以驗也。」及布卦,旣揲五

名氏 忠臣傳、集釋氏碑銘、丹陽 ,弗傳,爲上篇,始終不耗,姓名可錄,爲中篇; 尹錄、研神記, 並先簡孝緒而 挂冠人世,栖心塵表,爲下篇。 後施 行。 南平元襄王 聞 其名,致書 湘 東 王著

要之,不赴,日:「非志 屬富貴,但性畏廟堂,若使譽麚可驂,何以異夫驥 験。

建武末,青溪宮東門無故自崩,大風拔東宮門外楊樹,或以問孝緒。

孝緒曰:「靑溪

一家舊宅,齊爲木行,東爲木位。 今東門自壞,木其衰 矣。」

初

杜瓊 所謂 武 不 如不 知,此言美矣。」客有求之,答曰:「己所不欲,豈可嫁禍於人。」乃焚之。 答曰:「昔劉德重淮南秘要,適爲更生之禍,

衆並 之。 息。 本素賤, 異之。 末 鄱陽 王諸子篤渭陽 年蔬 忠烈王 食斷酒,亞其恒供養石像先有損 不應爲王侯姻戚, 一妃,孝緒姊 之情,歲時之貢,無所受納,未嘗相見, 也。 邂逅 王嘗命駕欲就之游,孝緒鑿垣而逃,卒不肯見。 ·所逢, 豈關始願。」劉歊曾以 壞, 心欲補之,罄心敬禮, 竟不 之識。 米饋之, 或問其故,孝緒 經一 孝緒 夜忽然完復 不納,歐亦棄 王悵然歎

吾其 以爲恩異常均, 幾 大 何。」 同 其 年 Ė 年十月卒,年五十八。 議令恭受。 月,孝緒自筮卦,「吾壽 門徒追論德行, 梁簡文在東宮, 與劉著作 諡曰文貞處士。 同年」。[10]及劉杳卒,孝緒曰:「劉侯 隆恩厚贈, 所著迟錄、削繁等一百八十一 子恕等述先志 不受。 逝矣, 顧協

列

卷,並行於世。

日,輒獲麟於二子。」歐、詩果卒,乃益二傳。及孝緒亡,詩兄絜錄其所遺行次篇末,成絕筆 自 擬,今四十之數,將待吾等成邪。」對曰:「所謂荀君雖少,後事當付鍾君。 初 ,孝緒所撰高隱傳中篇所載一百三十七人,劉畝、劉訏覽其書曰:「昔嵇康所贊,缺一 若素車白馬之

日二 内 從 不敢服,起五嶽樓貯之供養,道家吉日,躬往禮拜。白日,神仙魏夫人忽來臨降,乘雲而至, 下 Щ 唯聞香氣,世未嘗有。武帝後令周拾爲鄧玄傳、三三具序其事。 方去。謂弟子等曰:「求之甚勞,得之甚逸。 少嫗三十,並着絳紫羅繡桂欘,年皆可十七八許。色豔桃李,質勝瓊瑤,言語良久,謂郁 ·君有仙分,所以故來,尋當相候。」至天監十四年,忽見二青鳥悉如鶴大,鼓翼鳴舞,移 .) 斷穀三十餘載,唯以澗水服雲母屑,日夜誦大洞經。 梁武帝敬信殊篤,爲帝合丹,帝 南嶽鄧先生名郁,荆州建平人也。少而不仕,隱居衡山極峻之嶺,立小板屋兩間,足不 近青鳥旣來,期會至矣。」少日無病而終。 Щ

陶弘景字通明,丹陽秣陵人也。 祖隆,王府參軍。 父貞, 孝昌令。

作相 身長 有養 所 數 生。 十黑子作七星文。 取 引 七尺七寸,神儀明秀,朗目疎眉,細形長額聳耳,耳孔各有十餘毛出 生之志。 幼有異操,年四 初,弘景母 爲諸王侍讀,除奉朝請。 謂人曰:「仰靑雲,覩白日,不覺爲遠矣。」父爲妾所害,弘景終身不娶。 郝氏 五歲,恒以获爲筆,畫灰中學書。 夢兩天人手執香鑪來至其所,已而 讀書萬餘卷,一事不知,以爲深恥。 雖在朱門,閉影不交外物,唯以披閱爲務。 至十歲,得邁洪神仙傳,畫夜研尋,便 有娠。 善琴棊,工草隸。 以宋孝建三年丙申歲夏至日 外二寸許, 右膝有 未弱 朝儀故事,多 冠 ,齊高帝 及長,

自 所 之天,公言周 云宋 在 華陽 、齊以來未 月給伏苓五斤,白蜜二升,以供服餌。 家貧,求宰縣不遂。 陶隱居。 回 一百五十里。 有斯 人間 事。 書札,卽以隱居代名。 於是: 永明十年,脫朝服挂神武門,三三上表辭祿。 昔漢有咸陽 止于句容之句曲山。 三茅君得道來掌此山,故謂之茅山。」乃中山 及發,公卿祖之征虜亭,供帳甚盛,車馬塡咽,咸 恒 曰:「此山下是第八洞宮,名金壇華陽 韶許之,賜以束帛,敕 立館,

始從 東 陽 孫 游 嶽 受符 圖 經法 福 歷名山,尋訪仙藥。 身旣輕捷,性愛山水,每經澗谷,

列

傳

第

大

1

六

湿

逸

下

今日之事。豈唯身有仙相,亦緣勢使之然。」沈約爲東陽郡守,高其志節,累書要之,不至。 必坐臥其間,吟詠盤桓,不能已已。謂門人曰:「吾見朱門廣厦,雖識其華樂,而無欲往之 望高巖,瞰大澤,知此難立止,自恒欲就之。且永明中求祿,得輒差舛,若不爾,豈得爲

游泉石、望見者以爲仙人。 馬善射,晚皆不爲,唯聽吹笙而已。特愛松風,庭院皆植松,每聞其響,欣然爲樂。有時獨 更築三層樓,弘景處其上,弟子居其中,賓客至其下。與物遂絕,唯一家僮得至其所。本便 弘景爲人員通謙謹,出處冥會,心如明鏡,遇物便了。言無煩舛,有亦隨覺。永元初,

「古賢無比」。 冬至,加時在夜半,凡差三十八刻,是漢曆後天二日十二刻也。又以歷代皆取其先妣母后 物、醫術本草,著帝代年曆,自己以算推知漢熹平三年丁丑冬至,加時在日中,而天實以乙亥 配饗地祇,以爲神理宜然,碩學通儒,咸所不悟。又嘗造渾天象,高三尺許,地居中央,天轉 而地不動,以機動之,悉與天相會。云「修道所須,非止史官是用」。『三深慕張良爲人,云 性好著述,尚奇異,顧惜光景,老而彌篤。 尤明陰陽五行、風角星算、山川地理、方圖產

禪代,弘景援引圖讖,數處皆成「梁」字,令弟子進之。武帝旣早與之游,及卽位後,思禮愈 齊末為歌曰「水丑木」爲「梁」字。及梁武兵至新林,遣弟子戴猛之假道奉表。及聞議

篇, 書問不絕,冠蓋相望。

年曆, 縱 中常有 出,唯畫作兩牛, 人 無所 留 飛 者 丹,色如霜雪,服之體輕。 弘景旣得神符秘訣, 至己巳歲而加朱點,實太清三年也。 卽 數 不作,欲斆曳尾之龜,豈有可致之理。」國家每有吉凶征討大事,無不前 作 信,時人謂爲山中宰相。 功德。 一牛散放水草之間,一牛著金籠頭,有人執繩,以杖驅之。 以爲神丹可成,而苦無藥物。 及帝服飛丹有驗,益敬重之。 二宮及公王貴要參候相繼,贈遺未嘗脫時。 帝手敕招之,錫以鹿皮巾。 帝給黃金、朱砂、曾青、雄黃等。 毎得其書,燒香虔受。 後屢加 武帝笑曰:「此 以諮詢。 禮聘, 多不納受, 帝使造 月

壯 巾 力菩薩。 進見,與談 容。 名善勝, 天監 仙 :書云::「眼方者壽千歲。」弘景末年一眼有時而方。 四 乃詣鄮縣 一名威勝,並爲 年,移居積金東澗。 論數日而去,簡文甚敬異之。 阿育王塔自誓,受五大戒。 佳 實。二世 弘景善辟穀導引之法,「云自隱處四十許年,年逾八十而有 天監中,獻丹於武帝。 後簡文臨南徐州,欽其風素,召至後堂,以葛 曾夢佛授其菩提記云, 中大通初,又獻二刀,其 名 爲

申 如常,香 無疾, 列 傳 自 氣 第 、累日 知 六 應逝,逆剋亡 + 氛 六 氳滿 戀 逸 Щ 下 日,仍爲告逝詩。 遺令:「既沒不須沐浴,不須施牀,止 大同二年卒,時年八十一。日心顏色不 兩重席於地, 一八九九 因所著舊 變,屈

前, 衣, 士 釵 上 符 加加 百日內夜常然燈,旦常香火。」弟子遵而行之。 生 於髻上。 |被裙及臂衣靺冠巾法服。 通以大袈裟覆衾蒙首足。 左肘錄鈴, 右肘藥鈴, 明器有車馬。道人道士並在門中,道人左, 韶贈太中大夫,諡曰貞白先生。 佩符絡左腋下。繞腰穿環結於 道

作單于宮。」詩 弘景 妙 解 祕在篋裏,化後,門人方稍出之。 術數,逆知梁祚覆沒,預制詩云:「夷甫任散誕,平叔坐論空。 豈悟昭陽殿, 大同末,人士競談玄理,不習武事,後侯景 逐

篡,

果在昭陽殿

卷, 玉 圚 記 初, 弘景 {七 「論語集注、帝代年曆、本草集注、效驗方、肘後百一方、古今州郡記、**圖**像]曜新舊術疏、占候、合丹法式,共秘 母夢 **》青龍無尾,自己升天,弘景果不妻無子。從兄以子松喬嗣。** 密不傳,及撰而未訖又十部,唯弟子 所著學苑百 得 (集)要及

校 + 刀 17,猶 所 矣。 鑷 屬 時 在獄 遠 齊 挂 有 近 杖 、宋之交,稍顯 沙門釋寶誌者,不知何許人,有於宋泰始中見之,出入鍾山,往來都邑,年已五六 中。 驚赴,所居 負之而 其夜,又語獄吏三門外有兩輿食,金鉢盛飯,汝可取之。」果是文惠太子及竟 **趍**。[1]或徵索酒 「噂階。 靈跡 齊武 ,被髮徒跣,語默 帝 **肴**,或累日不食,預言未 忿其惑衆,收付建康 不 倫 或被錦袍、飲啖同於凡俗,恒 獄 兆,識 且 日,咸 他心智。[10] 見游 行 市 日日 里, 以 旣 中 銅 鏡剪 分 而 身 檢

陵王子良所供養。縣令呂文顯以啓武帝,帝乃迎入華林園。少時忽重著三布帽,亦不知於

何得之。 俄而武帝崩,文惠太子、豫章文獻王相繼薨,齊亦於此季矣。

靈 | <u>咊寺沙門釋寶亮欲以納被遺之,[ii]</u> 未及有言,實誌忽來牽被而去。 蔡仲熊嘗問仕

何 所至。了自不答,直解杖頭左索繩擲與之,莫之解。一熊至尚書左丞,方知言驗。

見害,果以犢車載屍出自此門,舍故閹人徐龍駒宅,而帝頸血流於門限焉。 永明中,住東宮後堂,從平旦門中出入。末年忽云「門上血汙衣」,褰裳走過。至鬱林

雖 ,剃鬚髮而常冠帽,下 紺納袍,〔三〕故俗呼爲誌公。 梁武帝尤深敬事,嘗問年祚遠近。答曰:「元嘉元嘉。」帝欣然,以爲享祚倍宋文之年。 好爲讖記,所謂誌公符是也。高麗聞

之,遣使齎緜帽供養。

先是琅邪王筠至莊嚴寺,寶誌遇之,與交言歡飲。至亡,敕命筠爲碑,蓋先覺也。 天監十三年卒。將死,忽移寺金剛像出置戶外,語人云:「菩薩當去。」旬日無疾而終。

臧 樂緒 諸葛璩字幼玫,琅邪陽都人也。 ,榮緒著晉書,稱璩有發擿之功,方之壺遂。 世居京口。 璩幼事徵士關康之, 博 涉 經 史。 復師徴

列傳第六十六 隱逸一

百斛。

梁天監中,舉秀才,不就。

一九〇二

厲俗,請辟爲議曹從事。 齊建武 初,南徐州行事江祀薦璩於明帝,言璩安貧守道,悅禮敦詩, 帝許之。 朦辭不赴。 陳郡謝朓爲東海太守,下教揚其風槪,餉 如其簡退,可揚清 穀

清正 十卷,門人劉暾集而錄之。 了,妻子不見喜慍之色,旦夕孜孜,講誦不輟,時人益以此宗之。 **醵性勤於誨誘,後生就學者日至。** 居宅狹陋,無以容之。太守張友爲起講舍。 卒於家。 糠所著文章二 璩處身

法曹行參軍。 不仕,居東林寺。 <u>劉慧斐字宣文,彭城人也。父元直,淮南太守。[三]慧斐少博學,能屬文,起家梁安成王</u> 嘗還都,途經尋陽,游於匡山,遇處士張孝秀, 又於山北構園 一所,號曰離垢園,時人仍謂爲離垢先生 相得甚歡, 遂有終焉 之志。 因

盛矣。 怠,遠近欽慕之。 慧斐尤明釋 元帝及武陵王等書問不絕。 典、工 簡文臨江州, 篆隸,在山手寫佛經 遺以几 大同三年卒。 杖。 二千餘卷,常所誦者百餘卷。 論者云, 自遠法師沒後將二百年,始有張 晝夜行道,孜孜不 劉之

孝行,武帝用爲海寧令。 曇淨又以兄未爲縣,因以讓兄,乃除安西行參軍。 日,絕而又蘇,每哭輒嘔血。服闋,因毁成疾。會有詔士姓各舉四科,曇淨叔父慧襲舉以應 子曇淨字元光,篤行有父風,解褐安成王國左常侍。父卒於郡,曇淨奔喪,不食飲者累

路、未朞而卒。 旬。 父亡後,事母尤淳至,身營飡粥,不以委人。母疾,衣不解帶,及母亡,水漿不入口者殆 母喪權瘞藥王寺,時天寒,曇淨身衣單布衣,廬於瘞所。 晝夜哭臨不絕聲, 哀感行

憂以 以所長驕人。祖母患癰,恒自含吮。與人言常恐傷物。居家不出城市,雖獨居如對賓客, · 毁卒。 元琰時童孺,哀慕盡禮,親黨異之。 及長好學,博通經史,兼精佛義,然謙敬不 范元琰字伯珪,一字長玉,吳郡錢塘人也。祖悅之,太學博士徵,不至。父靈瑜,居父

家貧,唯以園蔬爲業。嘗出行,見人盜其菘,元琰遽退走。 列 傳 第 六 十 六 圏 逸 下 母問其故,具以實答。 母問

見者莫不改容憚之。

盜者 其筍者,元琰因伐木爲橋以度之,自是盜者大慚,一鄉無復草竊。 ·為誰,答曰:「向所以退,畏其愧恥,今啓其名,願不泄也。」於是母子祕之。 或有涉溝盜

軍, 異,嘗表稱之。天監九年,縣令管慧辯上言義行,揚州刺史臨川王宏辟命,不至。 豈是禮賢之職。」欲以西曹書佐聘之,會<u>遙光敗,不果,時人以爲恨。</u>沛國劉瓛深加器 齊 建武初,徵爲曹武平西參軍,不至。于時始安王遙光爲揚州,謂徐孝嗣曰:「曹武參 卒于家。

出 人 有 有被誣爲盜,見劾妄歎。 書數簣 時之絕。而性託夷簡,特愛林泉,十畝之宅,山池居半。蔬食弊衣,不修產業。遇火,止 発謝 庾詵字彥寶,新野人也。幼聰警篤學,經史百家,無不該綜。緯候書射,棊算機巧,並 一號,
一號,
問題
一號
一
一
一
一</ 坐於池上,有爲火來者,答云「唯恐損竹」。乘舟從沮中山舍還,載米一百五十石。

與交,拒而弗納。 梁武帝 少與詵善,及起兵,署爲平西府記室參軍,詵不屈。平生少所游狎,河東柳惲欲 普通中,詔以爲黃門侍郎,稱疾不起。晚年尤遵釋教,宅內立道場,環繞

行先生,授香而去。 禮 而亡,年七十八。 一**懺**,六時不輟。 舉室咸聞空中唱「上行先生已生彌陁淨域矣」。武帝聞而下詔,諡貞節處 誦法華經,每日一偏。 中大通四年,因寢忽驚覺,曰:「願公復來,不可久住。」顏色不變,言終 後夜中忽見一道人自稱願公,容止甚異,呼詵爲上

行 於世 詵所撰帝歷二十卷,易林二十卷,續伍端休江陵記一卷,晉朝雜事五卷,總抄八十卷, 士,以顯高烈。

<u> 拜所製文章,凡九十五卷。子|季才|有學行,承聖中,位中書侍郎。|江陵平,隨例入|長安。</u> 曰:「荆南信多君子。」後轉諮議參軍。所著喪服儀,文字體例,老子義疏,算經及七曜歷術 子曼倩字世華,亦早有令譽。 元帝在荆州,爲中錄事。 每出,帝常目送之,謂劉之遴

襲之,事覺,逃於盆水側。有商人置諸褚中,展轉入東林。伯之得其母郭,以蠟灌殺之。孝 秀遣妻妾,入匡山修行學道。 孝秀長六尺餘,白皙美鬚眉,仕州中從事史。遇刺史陳伯之叛,孝秀與州中士大夫謀 張孝秀字文逸,南陽宛人也。徙居尋陽。曾祖須無,祖僧監,父希,並別駕從事 服闋,建安王召爲別駕。因去職歸山,居于東林寺,有田數十

列傳第六十

六

隱逸下

頃, 部曲數百人,率以力田,盡供山衆。 遠近歸慕,赴之如市

書,述其貞白云。 隸 書,凡諸藝能,莫不明習。 博涉羣書,專精釋典。 孝秀性通率,不好浮華,常冠穀皮巾,躡蒲履,手執幷閭皮麈尾,服寒食散,盛冬臥於石 僧有虧戒律者,集衆佛前,作羯磨而笞之,多能改過。 普通三年卒,室中皆聞非常香。 梁簡文甚傷悼焉,與劉慧斐 善談論

練。 圧在 窺 徐 相酬答,皆得所未聞。忠烈王尤所欽重。 也。弱歲受學於南陽劉虬,强記敏識,出於羣輩。玄經釋典,靡不該悉,九流七略,咸所精 一州,欽其風味,要與游處,令講送子。遠近名僧,咸來赴集,論難鋒起,異端競至,承先 辟功曹不就,乃與道士王僧鎭同游衡岳。晚以弟疾還鄉里,遂居土臺山。 庾承先字子通,潁川鄢陵人也。少沉靜有志操,是非不涉於言,喜慍不形於色,人莫能 梁鄱陽忠烈

年卒,刺史厚有贈賻。門人黃士龍讓曰:「先師平素食不求飽,衣不求輕,凡有贈遺,皆無 。三三湘東王親命駕臨聽,論議終日,留連月餘,乃還山。王親祖道,幷贈篇什,隱者美之。 中 大通三年,廬山劉慧斐至荆州,承先與之有舊,往從之, 荆陝學徒因請承先講老

操。 錢 布輒付使反。」時論高之。 臨終之日,誡約家門,薄棺周形,巾褐爲斂。 雖蒙賚及,不敢輕承教旨, 以違平生之

樞 字要理,扶風郿人也。 祖 靈慶,齊竟陵王錄事 參

{周 必 使 }摩 易 屈服,不得空立客主。」於是數家學者,各起 、老子、周易, 樞 數 歲 m 孤 梁 " 為其 邵 同 陵 日 王綸 ·發題 姑 所 爲南 養。 ,道俗聽者二千人。 徐州 **六歲**,能誦 刺 史,素聞 | 孝經 問端。 王 其名,引爲學士。 、論語、老子。 欲極觀優劣,乃謂衆 樞乃依 次剖 及長,博極 綸 判,開其宗旨 時 日二 自講大品 經史,尤善佛經及 與馬學士論義, 經 然後枝分 令樞

凊 尙, 虚 何 吾聞 則 尋 川 遇 糠 林之 侯景 粃 貴 席 爵位者以巢、由 無聞 之亂, 上之說, 甚乎。」乃隱 綸 稽之篤論 舉兵援臺, 爲 于茅 桎梏,愛山林者以伊 乃留書二萬卷付樞。 Щ 亦各從其好也。 有終焉 之志 、呂爲 北 求 管庫 樞肆志 志之士, 束 ·尋覽, 望塗 名實 殆將周遍, 則 而 息, 豈 天之不 下 ·之言, 乃喟然 - 惠高 翫 歎

派

別

轉變無窮,論者拱默

聽受而已,綸甚嘉之。

陳天嘉 元 年,文帝 徵爲度支尚書,辭不 應命。 時樞親故並居京口,每秋冬之際,時往游

列

疾。 焉。 門人勸請,不得已乃行。 及鄱陽 王爲南徐州刺史,欽其高尚,鄙不能致,乃卑辭厚意,令使者邀之,至恐樞固辭以 王別築室以處之,樞惡其崇麗, 乃於竹林間自營茅茨而居。

每以王公餽餉,辭不獲已者,率十分受一。

雙,巢其庭樹,馴狎櫚廡,時至几案,春來秋去,幾三十年。 樞 少屬亂離,凡所居處,盜賊不入,依託者常數百家。 目精洞黃,能視闇中物。 太建十三年卒。 撰道覺論行 有白 鵝

於世。

時來之運、豈其放情江海、取逸丘樊。不得已而然故也。 八襲,高城萬雉,莫不蓄壤開泉,髣髴林澤。 論曰:夫獨往之人,皆禀偏介之性,不能摧志屈道, 借譽期通。 故知松山桂渚,非止素玩,碧澗淸潭,翻成麗 且巖壑閑遠,水石淸華,雖復崇門 若使夫遇見信之主,逢

校勘記

挂冕東都,夫何難之有

父庸人國子助教 「庸人」南齊書作「庸民」,此避唐諱改。

- 徵士沈嚴造膝談論 「沈儼」南齊書沈驎士傳作「沈儼之」。
- . = U 錢大町、張元濟、張森楷並云二年於上下文不相屬,疑有誤脫。
- 同郡婁幼瑜字季玉 「婁」南齊書作「樓」。「玉」字各本並脫,據劉瓛傳補
- Ħ. 策趙策:「刳胎焚夭,而騏驎不至。」史記孔子世家作「麒麟」。 騏驎即麒麟之異體字。 沈麟士字雲禛吳興武康人也 「麟士」南齊書作「驎士」,有傳。梁書孔休源傳亦作「驎士」。按國
- 吳差山中有賢士開門教授居成市 顯係偶脫,今據上文補正。 「吳差山」各本作「差山」。按「吳」字不可省,且此七字爲句,
- 不須沐浴哈珠以本裙衫先着褌凡二服上加單衣幅巾履枕 「先着禪」頓「凡二服」句,謂以本來之裙衫,原先穿着之禪袴,總凡二服,其上加「單衣幅巾枕 爲句,謂以米代珠納亡者口中爲晗。 然「裙衫先着褲」不成語。 「以本」各本作「以米」,連上「啥珠」 通志作「以本」,則「以本裙衫」頓
- [八] 比以采章如似皇甫謐 「比」字各本並脫,據通志補。

履」。

今從改。

- 八九 末年蔬食斷酒 「末年」下各本行「以」字,據太平御覽六五七引删。
- 大同二年正月孝緒自筮卦吾壽與劉著作同年 劉著作同 年」,謂 與劉杳同年死。 按劉香傳香以大同二年卒,年五十。 此「吾壽與

列

傳

第

- 武帝後令周拾爲鄧玄傳 按鄧郁爲道士、此不欲斥其名、故云「鄧玄傳」。
- [三] 脫朝服挂神武門 「神武門」本「神虎門」、此避唐諱改。
- 此山下是第八洞宮名金壇華陽之天 「金壇」各本作「金陵」,據梁書改。王鳴盛十七史商権六

四:「考弘景所作眞誥第十一卷雜神樞篇云:『大天之內有地中洞天三十六所,

其第八是句曲山

之洞,名曰金壇華陽之天。』作『壇』是。」

- 尤明陰陽五行風角星算山川地理方圖產物醫術本草著帝代年曆 字各本並脫,據梁書改補。 「方圖」各本作「方圓」」「著
- CIED 非止史官是用 「是用」各本互倒,據梁書乙。
- (1会) 弘景善辟穀導引之法 「善」字各本並脫、據梁書補。
- 中大通初又獻二刀其一名養勝一名威勝並爲佳寶 王應麟玉海一五一引神劍錄略謂「大通中,弘景獻二刀於武帝,一名善勝,一名威勝」。此二刀 「二刀」、「威勝」各本作「二丹」、「成勝」。按

武帝仍賜與太宗簡文帝,藝文類聚六〇載梁簡文帝謝敕賷善勝威勝刀啓,可知「二丹」、「成勝」

爲譌,今從改。

[12] 大同二年卒時年八十一「八十一」各本作「八十五」,據全梁文載藝文類聚三七梁簡文帝華陽

至梁大同二年四五六——五三六,正八十一歲。

- 二九 恒以銅鏡剪刀鑷屬挂杖負之而趁 「銅鏡」二字各本互倒,據太平御覽八三〇引乙。
- 預言未兆識他心智 「識他心智」太平御覽八三〇引作「識之多驗」。
- 靈咊寺沙門釋寶亮欲以納被遺之「靈咊」啄,和本字各本作「靈味」,據通志改。
- 雖剃鬚髮而常冠帽下裙納袍「帽」各本在「裙」下、據通志移正。
- 劉慧斐宇宣文彭城人也父元直淮南太守 「宣文」梁書作「文宣」,太平御覽五○五、六五四引

南史並作「宣文」。「元直」册府元龜七五三作「元眞」。

- [118] 隣人有被誣爲盜見劾妄欵詵矜之 「誣」各本作「執」,「妄欵」下各本多一「詵」字,並據梁書 訂
- 至 荆陝學徒因請承先講老子 陝、故稱荆陝。 「荆陜」各本作「荆峽」,據梁書改。按梁以荆州在西,有如周之分
- [IK] 令使者邀之 「者」字各本並脱,據陳書補。

南史卷七十七

列傳第六十七

恩倖

戴法興 戴明寶 徐爱 阮佃夫 紀僧眞 劉係宗 茹法亮

施文慶 沈客卿 孔範

呂文顯

茹法

珍

梅蟲

兒

周石珍

陸驗

徐驎

司馬申

重。 易牙,小白掩陽門之扇。夫以霸者一身,且有洿隆之別,況下於此,胡可勝言者乎。 哲王,莫不斯慎。 至如中書所司, 夫鮑魚芳蘭,在於所習,中人之性,可以上下。
 自漢氏以來,年且千祀,而近習用事,無乏於時,莫不官由近親,情因 掌在機務。 漢元以令、僕用事,魏明以監、令專權,在晉中朝, 然則謀於管仲,齊桓有邵陵之師,邇於 故古之 常為重 狎

列

傳

四四

未改。 機嚴 有主書令史,舊用武官,宗改文吏,人數無員,莫非左右要密。 侍郎之局復見侵矣。 之徒,專爲佞倖矣。 遣尚之送尚書四十餘牒,宣敕論辯,義恭乃歎曰:「人主誠知人。」及明帝世,胡母顥、阮佃夫 孝武以來,士庶雜選,如東海鮑照以才學知名,又用魯郡巢尚之,江夏王義恭以爲 爲侍郎,而 寄,故公曾之歎,恨於失職。 秘,有如尙書外司。 其四代之被恩倖者,今立以爲篇,以繼前史之作云爾。 舍人亦稱通事。 齊初亦用久勞及以親信,關讞表啓,發署詔敕,頗涉辭翰者,亦爲詔文, 建武 領武官有 (世) 詔命始不關中書,專出舍人。 元帝用琅邪劉超,以謹慎居職。 于時舍人之任,位居九品,江左置通事郎,管司 制局監、外監,領器仗兵役,亦用寒人。 省內舍人四人,所直 宋文世,秋當、周赴並 天下 文簿板籍,入副 爱及梁、陳,斯風 韶誥,其後郎還 四省,其下 非選。 其省,萬 出寒門。

善書,法興好學。 戴法 興,會稽山陰 山陰有陳戴者,〔〕家富有錢三千萬,鄉人或云:「戴碩子三兒敵陳戴 人也。 家貧,父碩子以販紵爲業。 法興二兄延壽、延興並修立,延壽

萬錢。」

法興少賣葛山陰市,後爲尚書倉部令史。 大將軍彭城王義康於尚書中覓了了令史,得

御 中 興 史, 郎 追加爵封。 侍太子於東宮。 等五人,以法興爲記室令史。 典籤 同兼 中書通事舍人。 帝於巴口建義, 法興轉太子旅賁中郎將。 大明二年,以南下預密謀,封法興吳昌縣男, 法興 法 興 (等專管內 與典籤戴明寶、蔡閑俱轉參 義康敗, .務,權 仍爲孝武 重當 時。 征虜撫軍記 孝建 軍 元 ·督 年, 護。 室掾。 明寶湘鄉縣男。 爲南魯郡太守, 上 卽 及徙江州 位 ··, 並 爲 ,仍補南 閑時已 南 解含 臺

外 尚之參懷。 所 侍 服 知。 成 東宮,而意任隆密。 騎 市,家產 殿省 孝建初 武 於於 親覽朝政,不任大臣,而腹心耳目不得無所委寄。 甚 內外諸雜 「賴之。 並累千金。 車 了,補東海國侍郎,仍兼中書通事舍人。 凡選授遷轉誅賞大處分,上皆 左右 馳 而法興、明寶大通人事,多納貨賄,凡所薦達,言無不行, 事多委明寶。上性嚴暴,睚眦之間 驟去來。 魯郡巢尚之,人士之末,元嘉 明寶 驕 縱尤甚,長子 上大怒,賜敬 敬爲揚州 死,緊明實 中,侍始興王濬讀書,亦涉獵文史,爲上 從事,與上 ,動至罪戮。 〈尙方。 法興頗知古今,素見親待,雖出 尋被原釋,委任如 爭買御物。 尚之每臨 天下 六宮嘗出,敬 事解釋,多得 初 山與法興 輻湊,門

悉 决 尚 法 之執 武 興 之 手 崩 權 前 日 ,倘 廢 久,威行 . 書中 帝 刨 事 位, 內 無大 法興 外,義恭 小專斷之,顏師伯、義恭守空名而已。 遷越騎校尉。 積相畏服,至 時太宰江夏王義恭錄尚 是懾憚尤 甚 廢帝 未 尚之甚 書事 親萬機,凡 ,任同 聰敏,時百姓欲 詔 總己,而 敕 施爲, 法

爲孝 武 立 寺 疑其名。 尚之應聲曰:「宜名天保。 詩云:『天保,下報上也。 』時服其機速。

法興 在宫 之。 興 此告帝日 物。 與 一帝意 大太宰 帝嘗 臨 闡,今將他 廢帝 法 興 死, 能 顏 ...「外 使願 稍 年 封閉 爲文章,頗行 已漸 不 柳 間 能 兒 人作一 庫 出 平。 長、凶志轉 云宫中有 一藏, 體, 入市 所愛幸閹 使家 家,深恐此坐席非 往來門客恒有數百, 里,察聽 於 兩 世 人謹錄籥牡。 成,欲有 天子,官是一人,戴法興是一人。 人華願 風 謠,而 所爲,法興每相禁制 兒 復官許。」帝遂免法興官, 道路之言,謂法興爲眞天子,帝爲贋天子。 有盛寵,賜與 死一 內外士庶無不畏服之。 宿, 又殺其二子,截法興棺 金帛無算。 謂 帝曰:「官所爲 官在深宫中,人物不 法 徙付遠郡, 法興是孝武 興常加 兩 裁 如 和 尋 減 此, · 三 於 左 願 欲 家 一右,復久 相 作營陽 籍沒財 願 兒 賜死 甚 兒 法 因 恨

故。 尚之時爲新安王子鸞撫軍 死後 明 帝 ,帝敕巢尙之曰:「不謂法興積釁累愆, 初, 復以尚之兼中書通事舍人、南淸河太守。 中兵參軍、淮陵太守,乃解舍 遂至於此。 累遷黃門侍 人,轉爲撫 吾今自覽萬機, 郎, 軍諮 出 議 卿等宜竭 爲 參 新安太守, 軍 ·,太守如 誠 盡

戴明 寶、南東海丹徒人,亦歷員外散騎侍郎、給事中。 孝武時,帶南淸河太守。 前廢帝

病卒。

卽位,權任悉歸法興,而明寶輕矣。 明帝初,天下反叛,以明寶舊人,屢經戎事,復委任之。

後 坐納貨賄繫尙方,專被宥。 位宣城太守。 昇明初,年老,拜太中大夫, [三] 病卒

元凶 服遂死。 奉表於劭,旣而上舉義兵,劭詔責元嗣,元嗣答云:「始下未有反謀。」劭不信,備加考掠,不 、弑立、遣元嗣南還、報上以徐湛之等反。 武陵國典書令董元嗣與法興、明寶等俱爲孝武南中郎典籤,元嘉三十年,奉使還都,會 孝武事剋、贈員外散騎侍郎、使文士蘇寶生爲之誄焉。 上時在巴口,元嗣具言弑狀。 上遣元嗣下都

如此。 及踝脛,人間謠曰:「寧得建康壓額,不能受奚度拍。」又相戲曰:「勿反顧,付奚度。」其酷暴 人比之孫晧殺岑昏。 無道,動加捶撲,暑雨寒雪,不聽暫休,人不堪命,或自經死。 時建康縣考囚,或用方材壓額 大明中,又有溪顯度者,南東海鄉人,官至員外散騎侍郎。 前廢帝嘗戲云:「顯度刻虐爲百姓疾,比當除之。」左右因唱「爾」,即日宣殺焉。四時 孝武嘗使主領人功,而苛虐

邪王大司馬府中典軍,從北征,微密有意理,爲武帝所知。少帝在東宮,入侍左右。文帝 徐爱字長玉,南琅邪開陽人也。 本名瑗,後以與傅亮父同名,亮啓改爲爱。 初爲晉琅

悦,以兼太常丞撰立儀注。後兼尚書右丞,遷左丞。 励追義恭,因卽得南走。 時孝武將卽大位,軍府造次,不曉朝章,爰素諳其事,及至,莫不喜 初,又見親任,遂至殿中侍御史。 配爱五百人,隨軍隔磝,衡中旨臨時宣示。孝武至新亭,江夏王義恭南奔,爰時在殿內,詐 太子於東宮,遷員外散騎侍郎。 文帝每出軍,常懸授兵略。二十九年,重遣王玄謨等北侵, 元嘉十二年,轉南臺御史,始興王濬後軍行參軍。四復侍

成例。 年爲始。太學博士虞龢謂宜以開國爲宋公元年。詔曰:「項籍、聖公,編錄二漢,前史已有 踵成之。|孝建六年,又以|爱領著作郎,使終其業。|发雖因前作,而專爲一家之書。上表「起 人同爱,宜以義熙元年爲斷。 散騎常侍巴陵王休若、尙書金部郎檀道鸞二人謂宜以元興三 元義熙,爲王業之始,載序宣力,爲功臣之斷」。於是內外博議。太宰江夏王義恭等三十五 先是、元嘉中使著作郎何承天草創國史、孝武初又使奉朝請山謙之、南臺御史蘇寶生 桓玄傳宜在宋典、餘如爰議。」

亦不見從。 世,委寄尤重,朝廷大禮儀,非煖議不行。雖復當時碩學所解過之者,旣不敢立異議,所言 悉朝儀。元嘉初,便入侍左右,預參顧問。長於附會,又飾以典文,故爲文帝所任遇。大明 孝武崩,營景寧陵,以本官兼將作大匠。爰便僻善事人,能得人主微旨,頗涉書傳,尤 孝武崩,公除後,晉安王子勛侍讀博士諮煖宜習業與不。 爰答曰:「居喪讀喪

禮,習業何嫌。」少日,始安王子眞博士諮爱,爰曰:「小功廢業,三年喪何容讀書。」其專斷 乖

謬皆如此。

黃門侍郎,領射聲校尉,著作如故,封吳平縣子。 前廢帝凶暴無道,殿省舊人多見罪黜,唯爰巧於將迎,始終無忤。 寵待隆密, 羣臣莫二。 帝每出行, 誅羣公後, 常與沈 以爱爲

慶之、山陰公主同輦,爰亦預焉。

年八十二。 **外之聽還,仍除南康郡丞。** 其罪,徙交州。及行,又詔除廣州統內郡。 |**发**執權日久,上在蕃素所不悅,及景和世,屈辱卑約,|爰禮敬甚簡,益銜之。 明帝卽位,以黃門侍郎,改領長水校尉,兼尚書左丞。 明帝崩、還都,以爱爲濟南太守,復除中散大夫。元徽三年卒, 有司奏以爲宋隆太守。 明年,除太中大夫,著作並 除命旣下,爱已至交州 泰始三年、詔暴 一如故。

還。 希秀謂曰:「比當令卿父還。」希秀再拜答曰:「臣父年老, 恐不及後恩。」帝大嗟賞, 卽召爱 希秀位驍騎將軍、淮南太守。 爱子希秀,甚有學解,亦閑篆隸,正覺、禪靈二寺碑,即希秀書也。 子泓甚閑吏職,而在事刻薄,於人少恩。仕齊歷位臺郎, 爱之徙交州, 明帝召

|秣陵、建康令、湘東太守。

帝動止輒以告淳于文祖,令報佃夫。 諸 未知所奉。登之與明帝有舊,方盛等乃使登之結佃夫,佃夫大悦。 琅邪淳于文祖謀共廢立。時直閣將軍柳光世亦與帝左右蘭陵繆方盛、丹陽周登之有密謀, 王奄人,明帝左右錢藍生亦在例,事畢未被遣,密使藍生候帝。 明帝被拘於殿內,住在秘書省,爲帝所疑,大禍將至。 沉 佃夫, 會稽諸暨人也。 明帝初出閣, 選爲主衣,後又請爲世子師, 佃夫與王道隆、李道兒及帝左右 先是,帝立皇后,普暫撤 慮事泄,藍生不欲自出, 甚 見信 待。 景和

鎧主 明寶、幼欲取其日向曉,佃夫等勸取開門鼓後。 [k] 幼預約勒內外,使錢藍生密報建安王休 側 明帝猶在祕書省不被召,益懼。佃夫以告外監典事東陽朱幼,又告主衣吳興壽寂之、細 南彭城姜產之。產之又語所領細鎧將臨淮王敬則,幼又告中書舍人戴明寶,並響應。 景和元年十一月二十九日晡時,帝出華林園。建安王休仁、山陽王休祐、山陰主並侍

愈道龍、丹陽宋逵之、陽平田嗣,並聚於慶省。 佃夫慮力少,更欲招合,壽寂之曰:「謀廣或 柳 光世 時帝欲南巡,腹心直閣將軍宗越等,其夕並聽出外裝束,唯有隊主樊僧整防華林閣,是 |郷人。 光世要之,即受命。姜產之又要隊副陽平聶慶及所領壯士會稽富靈符、吳郡

泄,不 追 聞 後,淳于文祖 並 殺 從。 行 之。 聲甚疾,謂休祐曰:「作矣。」相隨奔景陽山。帝見寂之至,引弓射之,不中,乃走。 煩多人。」時巫覡言後堂有鬼,其夕帝於竹林堂前與巫共射之,建安王休仁等、山 帝素不悅寂之,見輒 事定,宣令宿衞曰:「湘東王受太后令除狂主,今已太平。」 、繆方盛、周登之、富靈符、聶慶、田嗣、王敬則、 切齒。 寂之旣與佃夫等成謀,又盧禍至,抽 **兪道龍、宋逵之又繼進。** 刀前入,姜產之隨其 休仁

决 <u>;</u> 淳 遷南 于文祖 明 慶建陽縣子,田嗣 臺侍 帝 陽城 即位,論功,壽寂之封應城縣侯,產之汝南縣侯,佃夫建城縣侯,王道隆吳平縣侯, 御 史。 縣侯,李道兒新渝縣侯,繆方盛 將樂縣子,王敬則重安縣子,兪道 劉 陽 縣侯,周登之曲 龍茶陵縣子,宋逵之零陵縣子。佃 陵縣侯, 富靈符 惠懷縣

兵校 衞 薛索兒 參 尉 員直 南 魯 (t) 度淮 郡太守,侍太子 次陽字崇基,平昌安丘人也,位冠軍 爲寇,山陽太守程天祚又反,佃夫與諸軍破薜索兒,降天祚。 於東宮。 泰始四年,以本官 將軍卒。 兼游 擊將軍 士, 及輔 國 將軍 後轉太子步 孟 次 陽 與

應 大 通貨賄, 合 朔 時 向 佃 夫 書奏遷元會。 凡 及王 事 非 道隆 重 賂 楊運 不 行。 佃 夫 長 並 人有餉絹二百正,嫌少不答書。 日::「元 執 權,公 IE 慶 (會)國 亞於人主,巢、戴 之大禮, 何不 大明之世,方之蔑 遷合朔 宅舍園 日邪 池,諸王 __? 其 如 邸第莫及。女 不 也。 稽 古 嘗 如 IE 此 日

列

傅

第

六

+

七

恩

倖

中路 於 妓 鄎。 始 數 宅內 + 數十,藝貌 初 相 朝 種 開 士貴賤,莫不自結,而矜傲無所降意,入其室者唯吳興沈勃、吳郡張澹數 逢,要休同反。 功旣多,爵秩無序,佃夫僕從附隸皆受不次之位:捉車 瀆 個夫常作數十人饌以待賓客,故造次便辦,類皆如此,雖晉世王、石不 東出十許里,塘岸整潔, 冠絕當時。 就席便命施設,一時珍羞,莫不畢備。 金玉錦繡之飾,宮掖不逮也。每製一衣,造一物,都下莫不法効焉。 汎輕舟,奏女樂。 中書舍人劉休嘗詣之,遇佃 凡諸火劑,並皆始熟, ·人武賁中郎將,傍馬 人而 能過也。 **夫出行**, 已。 者員外 如此者 泰

華 敢 不 故 美 可 執 得 明 而 欲 也。 用 有 張澹 晏駕,後廢帝卽位,佃夫權任轉重, 龍,爲廣州刺史將發,要佃夫飲,設樂,見張氏, |佃夫拂衣出戶,曰:「惜指失掌邪。」 遂諷有司 爲武陵郡,衞將軍袁粲以下皆不同,而 兼中書通事舍人, 佃夫稱敕施行。 悅之, 以公事彈恢。 加給 頻求。 事中、輔 又廬江 恢 凡如 日「恢 何恢有妓 此, 或 將軍,餘 可得,此 **桑等並不** 張 耀 人 如

猶管內任 隨,或出 元 徽 郊 \equiv 野 年,遷黃門侍郎,領右衞將軍。 時廢帝猖 , 或 入 市鄽,內外莫不憂懼。 狂, 好出 游走。 始出 佃夫密與直閣將軍申伯宗、 宮, 明 年,改領驍騎將軍,遷南豫州刺 **猶整** 羽 儀 隊仗, 俄 而 棄部 步兵校尉朱幼、 伍 單騎 史、歷陽太守, 與數 人相

寶謀共廢帝,立安成王。

謀,會帝不成向江乘,故事不行。 令喚隊仗還,閉 Ŧi. 年春,帝欲往江乘射雉。 城門,分人守石頭 帝每出,常留隊仗在樂游苑前, 、東府,遺人執帝廢之,自爲揚州 于天寶因以其謀告帝,帝乃收佃夫、幼、伯宗於光祿外部 棄之而去。 刺 史輔政。 佃夫欲 與幼 等已成 稱太后

守,封安浦縣侯。 幼泰始 初爲 外監配 衣, 諸軍征討,有濟辦之能,遂官陟三品,[5] 爲奉朝請、 南高 平太 賜死。

佃夫、幼等罪

止一身,其餘

無所問

軍。 昇明中,齊高帝以其反覆賜死。 于天寶,其先胡 人,豫竹林堂功,元徽中封鄂縣子。 發佃夫謀, 以爲清河太守、 右軍

常云「利刀在手,何憂不辦」。 壽寂之位太子屯騎校尉、南泰山太守,多納貨賄,請謁 鞭尉吏,斫邏將,後爲有司所奏,徙送越州。 無窮。 有一不從, 至豫章謀叛,乃 便切 齒罵詈,

殺之。

姜產之位南濟陽太守。後北侵魏,戰敗見殺。

夫, 而 如 王道迄, 王道隆,吳興烏程人。兄道迄涉學善書,形貌 和謹自保,不妄毀傷人。 無所少。」道隆亦知書,泰始二年,兼中書通事舍人。 執權旣久,家產豐積,豪麗雖不及佃夫,而精整過之。 又美,吳興太守王韶之謂人曰:「有子弟 道隆爲明帝所委,過於佃 元徽

列傳

第

年,桂陽王休範舉兵,乃以討佃夫、道隆及楊運長爲名。 休範奄至新亭見殺

甚清,不事園宅,不受餉遺。而凡鄙無識,唯與寒人潘智、徐文盛厚善。 廢帝卽位,與佃夫俱兼通事舍人。 人量議。文盛爲奉朝請,預平桂陽王休範,封廣晉縣男。 沈攸之反,運長有異志,齊高帝遣驃騎司馬崔文仲誅之。 楊運長,宣城懷安人。 素善射,爲射師。 以平桂陽王休範功,封南城縣子。 性謹慤,爲明帝委信。 順帝即位,運長爲宣城太守,尋還 及卽 運長質木廉正,修身 動 位,親遇甚厚。 止施為,必與二

眞以微過見罰,旣而委任如舊。 紀僧眞,丹陽建康人也。 方當富貴,我不見也。」以僧眞託劉彥節、周顒 少隨逐征西將軍,蕭思話及子惠開,皆被賞遇。 及罷 益州還都,不得志,而僧眞事之愈謹。 惠開臨終歎曰: 惠開性苛,僧

紀僧眞

齊高 外賊也。」惠開 夢蒿艾生滿江,驚而白之。 帝,隨從在 初,惠開在「盆州,土反,被圍危急,有道人謂之曰:「城圍尋解,檀越貴門後方大興,無憂 密謂僧眞曰:「我子弟見在者並無異才,政是蕭道成耳。」僧眞憶其言,乃請事 淮陰。 以閑書題,令答遠近書疏。 高帝曰:「詩人採蕭,蕭卽艾也。 自寒官歷至高帝冠軍府參軍主簿。 蕭生斷流,卿勿廣言。」其見親 僧眞

如此。後除南臺御史、高帝領軍功曹。

袁、褚,明公豈得默己,坐受夷滅? 上曰:「卿顧家、豈能逐我行邪。」僧眞頓首稱無貳。 天子居深宮,施號令,目明公爲逆,何以避此? 僧眞又曰:「主上雖復狂釁,而累代皇基,猶固盤石。今百口北度,何必得俱,縱得廣陵城 上 一將廢立,謀之袁粲、褚彦回。 存亡之機,仰希熟慮。」高帝納之。 僧真啓上曰:「今朝廷猖狂,人不自保,天下之望,不在 如其不勝,則應北走。 竊謂此非萬全策也。」 高帝欲度廣陵 起兵,

側。 高帝遣衆軍掩討。 必官軍所攻。 上曰:「諸將勸我誅袁、劉、我意未願便爾。」及沈攸之事起,從高帝入朝堂。 昇明元年,除員外郎,帶東武城令,尋除給事中。 火光起者,賊不容自燒其城,此必官軍勝也。」尋而啓石頭平。 宮城中望石頭火光及叫聲甚盛,人懷不測。僧眞謂衆曰:「叫聲不絕,是 高帝坐東府高樓望石頭城,僧眞在 石頭 反夜,

書疏皆付僧眞。 上出頓新亭,使僧眞領千人在帳內。 上觀之笑曰:「我亦不復能別也。」 初,上在領軍府,令僧眞學上手迹下名,至是報答

日,有楊祖之謀於臨軒作難,僧眞請上更選吉辰,尋而祖之事覺。上曰:「無卿言,亦當致小 文字,此自久遠之物。 初,上在淮陰修理城,得古錫趺九枚,下有篆文,莫能識者。 錫而 有九,九錫之徵也。」高帝曰:「卿勿妄言。」及上將拜齊公,已剋 僧眞省事獨曰:「何須辯此

列

狼 狽,此亦何異滹沱之冰。」轉齊國中書舍人。 建元初,帶東燕令,封新陽縣男。 轉羽林監,

遷尙書主客郎,太尉中兵參軍,兼中書舍人。

舍人。僧真容貌言吐,雅有士風,武帝嘗目送之,笑曰:「人生何必計門戶,紀僧真堂堂,貴 人所不及也。」諸權要中最被眄遇。後除前軍將軍。遭母喪,開冢得五色兩頭蛇。 高帝疾甚,令僧眞典遺詔。 永明元年,丁父喪。 起爲建威將軍,尋除南泰山太守,又爲 武帝崩、

僧眞號泣思慕

內少。 作飛白賦。 啓進其弟僧猛 明 帝以僧眞歷朝驅使,建武初,除游擊將軍,兼司農,待之如舊。欲令僧眞臨郡,僧眞 卒于官。 僧眞子交卿,甚有解用。 爲鎭蠻護軍、晉熙太守。 僧猛後卒於晉熙太守。 永泰元年、除司農卿。 兄弟皆有風姿舉止,並善隸書。 明帝崩,掌山陵事,出爲廬陵 僧猛又能飛白書

寧朔將軍,封州陵男。 宋時道 人楊法持與高帝有舊,元徽末,宣傳密謀。 二年,遣法持爲軍主,領支軍救援朐山。 昇明中,以爲僧正。 永明四年,坐役使將客, 建元初,罷道,

奪 其鮭稟,削封,卒。

沈 慶之 劉 係宗 赦係宗,以 丹陽 人也。 爲 東宮侍書。 少便書畫,爲宋竟陵王誕子景粹侍書。 泰始中, 爲 主書, 以 寒官累至勳品。[10]元徽 誕舉兵,廣陵城內皆死 初、爲 奉 朝 う敕

兼中書通事舍人、員外郎,封始興南亭侯,帶秣陵令。

喪 旨。 開 自 ,是卿盡力之日。」使寫 解,起 高帝卽位,除龍 高 帝廢蒼梧,明 復 本 職 腰將軍 旦 一呼正直· 諸 、建康令。 處分敕令及四 舍 人虞整, 永明初、 方書疏。 醉 不能起, 爲右軍將軍、淮陵 使主書十人、書東二十人配之, 係宗歡喜奉敕。 太守,兼中 高帝曰:「今天地 -書通 事 ·舍人。母 事 皆 重 稱

宗錢 悉 無 所問 帛 四 年,白 還復 賊 唐寓 人 伍 之起,宿衞兵東討,遣係宗隨軍慰勞。 係宗還,上曰:「此段有 征 一無戰,以時 平蕩, 遍 至 |遭賊郡縣,||百姓被驅 百 姓安怗, 甚快 也 逼 賜係

武 隸 之。 L 上 履行 再為 欲 修白下 自下 少 府。 城 城, 日 鬱林 難於 劉 即位、除 動役。 係宗 爲 寧朔 國家 係宗啓讁役 將 得 軍 此 宣 在東 城。」永明 城 太守。 人丁隨寓之爲逆者,上從之。 中 , 魏 使書常令係宗題 答, 後 車駕 祕 書 出 局皆

足矣。 係 宗 沈 約 久 王 在 朝 融 省 數 開 百 於 人 於於 職 事 事 武武 ·何用。 」 帝常 | 其重· 云:「學 一
東
事 土 軰 如 此。 不 堪 建武 經 國 二年,卒官 唯 讀 書耳。 經 或 劉係宗

列傳第六十七 恩倖

度,校獵江右,選白衣左右百八十人,皆面首富室,從至南州,得鞭者過半。 啓出家得爲道人。 茹法亮,吳興武康人也。 人,法亮求留爲武帝江州典籤,除南臺御史,帶松滋令。 明帝初,罷道,結事阮佃夫,累至齊高帝冠軍府行參軍。 宋大明中,出身爲小史。曰三歷齋幹扶侍。 孝武末年, 鞭罰過 法亮憂懼,因緣 及武帝鎭盆城,

須舊驅使

並以 文度吉凶。 姦佞諂 武帝即位,仍爲中書通事舍人,除員外郎,帶南濟陰太守。 法 ||亮便僻解事,善於承奉,稍見委信。 文度尤見委信,上嘗云…「公卿中有憂國如文度者,復何憂天下不寧。」 事武帝。 文度爲外監,專制兵權,領軍將軍守虛位而已。 建元初,度東宮主書,除奉朝請,補東宮通事舍 與會稽呂文度、臨海呂文顯 天文寺常以上將星占

吳却籍者奔之,衆至三萬。 亂,鼓行 不能及。 文度旣見委用,大納財賄,廣開宅宇,盛起土山,奇禽怪樹,皆聚其中,後房羅綺,王侯 而東,乃於錢唐縣僭號,以新城戍爲僞宮,以錢唐縣爲僞太子宮,置百官皆備。 又啓上籍被却者悉充遠戍,百姓嗟怨,或逃亡避咎。 竊稱吳國,僞年號興平。 其源始於虞玩之,而成於文度,事見虞 富陽 人唐萬之因此聚黨為

玩之誓。

法 文度並勢傾天下,太尉王儉常謂人曰:「我雖有大位,權寄豈及茹公。」永明二年,

封 望蔡縣男。 七年,除臨淮太守,轉竟陵王司徒中兵參軍

陵,誅 法亮 林 光 麗 花 .藥之美,公家苑囿所不能及。 · 疑 賞 與 東王子響於荆州殺僚佐, 、處分 畏 延 不肯往。 殿相 ,皆稱敕斷決。 埓。 又求見傳詔,法亮又不遣。 延昌殿,武帝中齋也。 軍還,上悔誅子響,法亮被責,少時親 上遣軍西上,使法亮宣旨安撫子響。 鬱林 即位,除步兵校 宅後爲魚 故子響怒,遣兵破尹略 尉。 池釣臺,土山樓館,長廊將一里。 竹 任 如 舊。 法亮至江津,子響呼 軍。 廣開 事平,法亮 (宅字),杉齋 至江

背有「三公」字,常語 潛 帝 數 暨 作,不關 行。 構 陽 求 令, 貨賄 封 欽之自 時 自 有 詔 朝議 欽之罷 非 綦 **交至,旬月之間,累至千金。** 旨。 珍之翼 行 母: 未 珍之,居舍人之任,凡所論 佐作縣,還除廬 縣還, 許。 材官將軍細作丞相語云:「寧拒至尊敕、不可 衞 扶持, 人云:「 又自陳 珍之迎 徴祥 事在 日 母至 陵王 示測。 珍之西州伏事,侍從 如 湖熟,輒將青氅百 此,何患三公不 驃騎正 帝給珍之宅,宅邊又有空宅, 今惜千戶侯 鷹,事無不允。 將 軍, 又詐宣敕使欽之領 至。」 人 入宫, 自隨, 誰爲官使者。」又有牒自論於朝廷曰 一乃就 內外要職及郡丞尉、皆論 契闊 蔣王 違舍人命。」珍之母 鼓角横 心膂,竭 廟乞願 從卽 吹, 清氅。 盡誠 都 得三公, 併 下 取 珍之有 力。 富 輒 隨弟 人追 封 價 王 令材 郡 一融姦謀 從者百 欽 而後施 王。啓 銅 之作 官營

列

傳

第

侯、於 當 世 分 祖 非過。」乃許三百戶。 晏駕之時,內外紛擾, 瞋恚形於言色,進爲五百戶,又不肯受。 珍之手抱至尊, 口行處分,忠誠契闊, 人誰不知。 明帝議誅之, 今希千戶 乃許 封

汝南縣

未之職 殉, 慷慨。 萬 南 曰 行 事 則 早爲計 遣荆 靈會 彭 m 亦 西州 在眼中矣。」珍之不能 死,不 城 事 有 敗。 近聞 ·,吾徒無類矣。」<u>珍之曰:「計將安出。」答曰:「先帝故</u> 杜文謙者、吳郡錢唐人。帝爲南郡王、文謙侍五經文句、歷太學博士。 太守,領中 軻 魏僧動 會明帝 時手 舉事 豫讓 珍之在 王洪範與趙越常、徐僧亮、萬靈會共語,「三」皆攘 板 殺蕭 之徒, 亦死,二死等耳,死社稷 知權,蕭諶 何 書通事舍人。 西州時有一 在? 諶, 因諮事,左手頓其胸,則方寸之刃,足以立事,亦萬世 則宮內之兵皆我用也。 珍之曰:「此是黃門手板, 用。 用事,文謙乃謂珍之曰:「天下事 手板,相者云「當貴」。每以此言動帝,又圖 時徐龍駒亦當 正直宿,宣旨使卽往蔣王廟祈福, 可乎。 得封,珍之恥與龍駒共 若遲疑不斷,復少日,錄君稱敕賜死, 即勒兵入尚書斬蕭令, 官何須問? 人多 可知, 袂搥牀。 帝大笑。 見擯斥,今召而 灰盡 因收送廷尉, 韶,因求別立。 君其密報周奉叔,使 粉 兩都伯· [黃門郞,帝嘗問之 珍之時 滅, 時 匪 出爲 也。 力耳。 使之,誰不 為左 朝 與周奉叔、 溧陽 伊 父母 今舉 事 將 夕 其次 未 ′,
不 大 及

杜

文謙

同死

謙 有學行,善言吐。 其父聞其死,曰:「吾所以憂者 ,恐其不得死地耳。 今以忠義死

復何恨哉。王經母所以欣經之義也。」時人美其言。

徒, 殿 著黃 所 莫之能 誘 韹 勸 駒 〈綸 以 比。 帽,被貂 位羽 奄人 封 林監 本給安陸侯,後度東宮爲 惠懷 袭,南面 、後閣舍人、黃門署令、淮陵太守。 縣男,事 「向案, 未行, 代帝畫敕。 明帝請誅 齋 帥。 之,懇至,乃見許。 內左右侍直, 帝卽位後, 帝爲 與帝不 以便佞見寵。 龍駒置嬪御妓樂。 異。 前代 凡諸鄙黷雜事 趙忠、張 常住 譲之 含章

皆 州 珠 遣 昭 宮內 人韓護 須 彭 人 Ē 曹 刺 廢 城 不 帝。 道 人 殺 寶也 人,性質 善騎 剛 護。 , 使 直 元 日 廢帝之日直閤省, 後 馬, 及 見 直 徐僧亮甚怒, 蜯之所病,云何 道 禮 帝嘗 剛 則。 帝雖 死 呼入華 近聞 張融 與 (之狎 韓護與天子 林園 大言於衆曰:「吾等荷恩, 蕭諶 謂劉繪 不療 而 一令騎, 未嘗 先入,若欲論 之哉 日 敢訓。 ",此道 齊馬 大賞 道剛 並馳, (狎之。 帝悅 似不 剛 事 所 ,兵隨後奄進,以刀刺之,洞胸死, 爲諂 र्ता 以 此導 道剛 死 里雜事,以 今日應死 也 人君於 出謂 亦復 明帝:「主上 不 危地,道剛 爲 報。 発也。 」 歡 樂。 又見殺。 答曰:「 一个是· 道 欲 剛 殺之。」 輒 小 道剛 夫 徑 寸 之 見、左 避之。 字景 因 旣 右 益 進 而

殿 武帝陰 明 帝 刨 室 位 高 藏 諸服 武 舊 御 人 一少帝並居西殿。 鮮有 存 者、法亮 以主署文事、言意故不 及明帝居東齋,開陰室, 見疑,位任 出 武 如 帝白 故。 紗 先 帽 是 、防身 延昌

列

出法亮爲大司農。 刀,法亮歔欷流涕。 中書權利之職,法亮不樂去,固辭不受。旣而代人已到,法亮垂涕而出, 永泰元年,王敬則事平,法亮復受敕宣慰諸郡,無所納受。 東昏卽位,

世 守,與茹法亮等迭出入爲舍人,並見親幸。多四方餉遺,並造大宅,聚山開池。 四人各住一省,世謂之四戶。旣總重權,勢傾天下。晉、宋舊制,宰人之官,以六年爲限,近 令,封劉陽縣男。 緊遷左中郎將,南東莞太守。 「天文乖忤,此禍由四戶。」仍奏文顯等專擅愆和,極言其事。 戶內 疲於道路。 以六年過久,又以三周爲期,謂之小滿。 .年辦百萬。」蓋約言之也。 呂文顯,臨海人也。 四方守宰餉遺,一年咸數百萬。舍人茹法亮於衆中語人曰:「何須覓外祿,此一 |永明元年,爲中書通事舍人。|文顯臨事以刻覈被知。三年,帶南淸河太 昇明初、「日日為齊高帝錄尚書省事,累遷殿中侍御史。「日日後為秣陵 其後玄象失度,史官奏宜修祈禳之禮。 而遷換去來,又不依三周之制,送故迎新,吏人 上雖納之而 王儉聞之,謂上曰: 不能改也。 時中書舍人 文顯

故 《事,府州部內論事,皆籤前直敍所論之事,後云謹籤,日月下又云某官某籤,故府州

近左 置 露 後, 年將六十、為 得 典籤之口 籤還都,而 專其 典籤以典之。 難卽 權寄彌隆 右 任 領 顯戮,而權任之重 (典籤) · ,莫不折節推奉,恒慮不及。 也。 典籤之任輕矣。 國竭 ,典籤遞互還都,一 宗整為豫州 典籤之權稍 本五品吏,宋初改爲七職。 命, 政得 不異。 ,吳喜公爲 一州如斗大,不能復與典籤共臨」喜公稽顙流血 重。 後以文顯守少府,見任使,歷建武、永元之世,至尚書右丞,少 歲數反,時主輒與閒言,訪以方事。 大明、泰始,長王臨蕃,素族出鎭,莫不皆出內敎 明帝輔政,深 **炒典籤。** 於是威行 慇刑 宋氏晚運,多以幼少皇子爲方鎮,時主皆以親 知之,始制 ?州郡,權重 政所施,喜公每多違執。 蕃 諸州急事宜密有所論,不得遣 君。 劉 道濟、柯孟孫等姦慝 刺 史行事之美惡,係於 **愍大怒曰:「宗**慤 乃止。 命, 自 刺 史不 此 發 以 典

光等誅 茹 後 法 及 珍, 會稽 左 右 人,梅蟲兒,吳興 應敕捉 刀之 徒 並 專 人,齊東昏時並爲制局監,俱 國 命 人 間 謂之刀敕, 權奪 見愛幸。 入主。 都 自江祏、始安王遙 下爲之語 四三、欲

府

卿、卒官。

時 叉 有 新 蔡 人徐 世 檦 尤見寵信, 自殿內主帥爲直閤驍騎將軍。 凡諸殺戮,皆世檦所

列

傅

第

六

+

求

貴

職

依

刀

敕

須

得富豪

事

御

刀。

勸。 冠袞服,題云徐氏皇帝。永元二年事發,乃族之。 耳。」法珍等與之爭權,遂以白帝,帝稍惡其凶强。 權實在世標,當時權勢傾法珍、蟲兒。 縣男,蟲兒封竟陵縣男。 書舍人王咺之與相脣齒,專掌文翰。其餘二十餘人,皆有勢力。 事,收得千餘人仗及呪詛文,又畫帝十餘形像,備爲刑斬刻射支解之狀;而自作己像著通天 殺徐 孝嗣 後,封臨汝縣子。 陳顯達事起,加輔國將軍。 叉謂法珍、蟲兒曰:「何世天子無要人,但阿儂貨主惡 自是法珍、蟲兒並爲外監,口 世檦竊欲生心,左右徐僧重密知之,發其 雖用護軍崔慧景爲都督,而兵 崔慧景平後,法珍封餘干 稱詔敕,中

耳。」復赦、羣小誅戮亦復如先。 者,不論赦令,莫不受戮,籍其家產,與慧景深相關爲盡力而家貧者,一無所問。 時亦已如此,至慧景平復然。或說王咺之云:「赦書無信,人情大惡。」 咺之曰:「政當復有赦 崔慧景之平,曲赦都下及南兗州,本以宥賊黨,而羣凶用事,刑辟不依詔書。 始安、顯達 無罪家富

雜語以爲諧謔。又帝輕騎戎服往諸刀敕家游宴,有吉凶輒往慶弔。奄人王寶孫年十三四, 蟲兒及東冶營兵兪靈韻爲阿兄。帝與法珍等俱詣寶慶,帝躬自汲水,助厨人作膳,爲市中 宋文帝有潘妃、在位三十年、於是改姓曰潘、其父寶慶亦從改焉。帝呼寶慶及法珍爲阿丈、 帝自羣公誅後,無復忌憚,無日不游走。所幸潘妃本姓愈名尼子,王敬則伎也。或云

號爲長子,最有寵,參預朝政,雖王咺之、蟲兒之徒亦下之。控制大臣,移易救詔,乃至騎馬 誅。又朱興光爲苗法珍所疾,得罪被繫,豐勇之與王珍國相知,行殺皆免。初,左右刀敕之 敬子、李粲之、周管之、范曇濟、石曇悅、張惡奴、王勝公、王懷藻、梅師濟、鄒伯兒、史元益、 韻、祝靈勇、范亮之、徐僧重、時崇濟、芮安泰、劉文泰、呂文慶、胡輝光、繆買養、章道之、楊 入殿、武訶天子。公卿見之、莫不懾息。其佐成昏亂者:法珍、蟲見及王咺之、兪寶慶、兪靈 徒悉號爲鬼,宮中訛云:「趙鬼食鴨劇,諸鬼盡著調。」當時莫解。梁武平建鄴,東昏死,羣小 昭、許朗之、許伯孫、方佛念、馬僧猛、盛劭、王竺兒、隨要、袁係世等十人。梁武平建鄴,皆 王靈範、席休文、解滂及太史令翳文叔、大巫朱光尚,凡三十一人。又有奄官王寶孫、王法 時誅滅,故稱爲諸鬼也。俗間以細剉肉糅以薑桂曰蒯,意者以凶黨皆當細剉而烹之也。

應 未陷,已射 一對,後遂至制局監,帶開陽令。歷位直閤將軍。太淸三年,封南豐縣侯,猶領制局。臺城 武帝方坐文德殿,怪問之,石珍曰:「皆丞相甲士。」上曰:「何物丞相。」對曰:「侯丞相。」 周石珍,建康之厮隸也,世以販絹爲業。梁天監中,稍遷至宣傳左右。身長七尺,頗閑 書與侯景相結,門初開,石珍猶侍左右。時賊遣其徒入直殿內,或驅 驢馬出

傳

景篡位,制度羽儀皆石珍自出。景平後,及中書舍人嚴亶等送于江陵。 上 |怒叱之曰:「是名侯景,何謂丞相!」石珍求媚於賊,乃養其黨田遷以爲己子,遷亦父事之。

送降 靴 之,不復得語。 監刑人曰:「倩語湘東王,不有廢也,君何以興。」俱腰斬。 上殿,無肅恭之禮。 _! 亶 及至江陵,將刑于市,泣謂石珍曰:「吾等死亦是罪盈。」石珍與其子昇相抱哭。 本爲齋監,居臺省積久,多閑故實。在賊居要,亞於石珍。及簡文見立,亶學北人著 有怪之者, 直曰:「吾豈畏劉禪乎。」從景圍巴陵郡, 叫曰:「荆州那不 自是更殺賊黨,以板柙舌,釘釘 亶

謂

穢 世 德,遂言於武帝拔之,與徐驎兩 吉卿貸以錢米,驗借以商販,遂致千金。因出都下,散貲以事權貴。朱异,其邑子也,故嘗有 國獻生犀,其形 狼藉,若使聖主發悟,欲免得乎了异曰:「外間謗讟,知之久矣,心苟無魄,何卹人言。」 岐 人謂之三蠹。 **|陸驗、徐麟,並吳郡吳人。 驗少而貧苦,落魄無行。邑人郁吉卿者甚富,驗傾身事之。** 甚陋,故閭里咸謂驗爲生犀。 司農 |卿傅岐,梗直士也,嘗謂异曰:「卿任參國鈞, 人遞爲 少府丞、太市令。驗本無藝業,而容貌特醜。先是,外 驗、鱗並以苛刻 爲務,百賈畏之,异尤與之昵, 榮寵如此, 比日 所聞,鄙

謂 其能久乎。」驗竟以侵削爲能,數年遂登列棘,鳴佩珥貂,並肩英彥。 人曰:「朱彦和將死矣,恃諂以求容,肆辯以拒諫,聞難 而不懼, 知惡而不改。 仕至太子右衞率,卒, 天奪其鑒,

贈右衞將軍。遠近聞其死,莫不快之。

| 麟素爲邵陵王倫所憾,太清二年,爲倫所殺。

司 馬申字季和,河內溫人也。 祖慧遠,梁都水使者。父玄通,梁尚書左戶郎

在焉,呼與棊。 申早有風鑒,十四便善弈棊。 申每有妙思,异觀而奇之,因引申游處。太清之難,父母俱沒,因此自誓,擔 嘗隨父候吏部尚書到溉,時梁州刺史陰子春、領軍朱异

土菜食終身。

策,皆見行用。僧辯歎曰:「此生要鞬汗馬,或非所長,若使撫衆守城,必有奇績。」僧辯之討 陸納也,于時賊衆奄至,左右披靡,申躬蔽僧辯,蒙楯而前,會裴之橫救至,賊乃退。僧辯顧 梁元帝承制,累遷鎭西外兵記室參軍。及侯景寇郢州,申隨都督王僧辯據巴陵,每進

而笑曰:「仁者必有勇,豈虛言哉。」

陳太建中,除秣陵令,在職以淸能見紀,有白雀集于縣庭。 復爲東宮通事舍人。 叔陵

列

中秘 功除 之肆 因 威 機進之。 福 逆 也 太子 事,往往泄漏。 性忍害,好飛書以譖毁,朝之端士,遍罹其殃。 左 是以朝廷內外,皆從風靡。 衞率,封文招縣伯,兼中書通事舍人。 既不捷,出據東府,申馳召右衞將軍蕭摩訶帥兵先至,追斬之,後主深嘉焉。以 性叉果敢,善應對,能候人主顏色。 遷右衞將軍。 參預謀謨,乃於外宣說,以爲己力,省 有忤已者,必以微言譖之,附己者, 歷事三帝,內掌機密,頗作

脱兒 尙 之妻兄,高帝時稱陛下有酒德,請逐去宮臣,陛下寧忘之邪!」喜由是廢錮。 '書下省,有鳥 比周 初,尚 ,

潛殺傅縡,奪任

忠部曲以

配蔡徵、

孔範,

是以

文武解體,

至於

覆滅。 .書右僕射沈君理卒,朝廷議以毛喜代之。|申慮|喜預政,乃短|喜於|後主曰:「|喜臣 啄其口,流血 一及地,時論以爲譖賢之效也。 又與施文慶、李 中嘗畫寢於

爵 爲侯、諡曰忠。 後 加散騎常侍,右衞、舍人如故。 及葬,後主自爲製誌銘。 至德四年卒,後主嗟悼久之。 子琇嗣,官至太子舍人。 贈侍中、護軍將軍,進

事 焉。 施文慶,不知何許人也。日為家本吏門,至文慶好學,頗涉書史。 及卽位、擢爲中書舍人。 仍屬叔陵作亂,隋師臨境,軍國事務,多起倉卒,文慶 陳後主之在 東宮,文慶 聰敏

縱,文慶盡其力用,無所縱捨,分官聯事,莫不振懼。 云有吏能,後主信之。 强 記、明閑吏職、心算口占、應時條理、由是大被親幸。又自太建以來、吏道疏簡、 然並不達大體,督責苛碎,聚斂無厭,王公大人,咸共疾之。後主益 又引沈客卿、陽惠朗、徐哲、暨慧景等, 百司弛

以文慶爲能,尤更親重,內外衆事,無不任委。累遷太子左衞率,舍人如故。

發間,二人共掌機密。 仍徵叔文還朝。文慶深喜其事,然懼居外,後執事者持己短長,因進其黨沈客卿以自代。未 度素與羣臣少恩,恐不爲用,無所任者,乃擢文慶爲都督、湘州刺史,配以精兵,欲令西上,

以 卿又利文慶之任己得專權,俱言於朝曰:「必有論議,不假面陳,但作文啓,卽爲通奏。」憲等 <u>保石各置兵五千,幷出金翅二百,緣江上下,以爲防備。</u>文慶恐無兵從己,廢其述職,而客 為然。二人齎啓入白後主曰:「此是常事,邊城將帥,足以當之。若出人船,必恐驚擾。」 時隋軍大舉,分道而進,尚書僕射袁憲、驃騎將軍蕭摩訶及文武羣臣共議,請於京口、

可。」又對曰:「如此,則聲聞鄰境,便謂國弱。」後又以貨動江總,總內爲之游說,後主重違其 多從,今若出兵,事便廢闕。」後主曰:「今且出兵,若北邊無事,因以水軍從郊,何爲不

及隋軍臨江,間諜驟至,憲等慇懃奏請,至于再三。文慶等曰:「元會將逼,南郊之日,

列傳

意,而迫羣官之請,乃令付外詳議,又抑憲等,由是未決,而隋師濟江

黨數人,並於石闕前斬之,以謝百姓。 行。 功, 乃奏曰:「此等怏怏,素不服官,迫此事機,那可專信。」凡有所啓請,經略之計,並皆不 尋敕文慶領兵頓于樂游苑。陳亡,隋晉王廣以文慶受委不忠,曲爲諂佞,以蔽耳目,比 後主性怯懦,不達軍事,晝夜啼泣,臺內處分,一以委之。」文慶旣知諸將疾己,恐其有

理 至 雖有 尙 · 書儀曹郎。 沈客卿,吳興武康人也。美風采,善談論,博涉羣書,與施文慶少相親昵。仕陳,累遷 不經,而衆莫能屈,事多施行。 聰明有口辯,頗知故事。每朝廷體式,吉凶儀注,凡所疑議,客卿斟酌裁斷,

景 卿 削 市之稅。後主盛修宮室,窮極耳目,府庫空虛,有所興造,恒苦不給。客卿每立異端,唯以刻 百姓 爲 居舍人,總以督之,每歲所入,過於常格數十倍,後主大悅。尋加客卿散騎常侍、左衞將 至德初,以爲中書舍人,兼步兵校尉,掌金帛局。以舊制軍人士人,二品淸官,並無關 書金 爲 《事,奏請不問士庶,並責關市之估,而又增重其舊。於是以陽惠朗爲太市令,暨慧 一、倉都令史。二人家本小吏,考校簿領,豪釐不差,糾讁嚴急,百姓嗟怨。 而客

軍、舍人如故。惠朗、慧景奉朝請。

城 失守,隋晉王以客卿重賦厚斂,以悅於上,與文慶、暨慧景、陽惠朗等,俱斬於石闕前 隋師至, 文慶出頓樂游苑, 內外事客卿 總焉。 臺

徐哲,不知何許人,施文慶引爲制局監,掌刑法,亦與客卿同誅。

孔 範字法言, 會稽山陰人也。 曾祖景偉,齊散騎常侍。 祖滔, 梁海鹽令。

清顯。

計從。 將,起自行伍,匹夫敵耳。深見遠慮,豈其所知。」後主以問施文慶,文慶畏範,益以爲然。自 是將帥微有過失,卽奪其兵,分配文吏。 等並爲狎客。|範容止都雅,文章贍麗,又善五言詩,尤見親愛。|後主性愚狠,惡聞過失,每 有惡事,範必曲爲文飾,稱揚贊美。時孔貴人絕愛幸,範與孔氏結爲兄妹,寵遇優渥,言聽 範 朝廷公卿咸畏範,[1+]範因驕矜,以爲文武才能舉朝莫及。從容白後主曰:「外間諸 少好學,博涉書史。陳太建中,位宣惠江夏王長史。後主即位,爲都官尚書,與江總

隋師將濟江,羣官請爲備防,文慶沮壞之,後主未決。 範奏曰:「長江天塹,古來限隔,

言北軍馬死,範曰:「此是我馬,何因死去。」後主笑以爲然,故不深備。 **虜軍豈能飛度?邊將欲作功勞,妄言事急。** 臣自恨位卑,虜若能來,定作太尉公矣。」或妄

蔣山,南斷淮水,質其妻子,重其賞賜。陛下以精兵萬人,守城莫出。不過十日,食盡,二將 負販輕薄多從之,高麗、百濟、崑崙諸夷並受督。時任蠻奴請不戰,而己度江攻其大軍。又 並不可信。」事遂不行。 之頭可致闕下。」範冀欲立功,志在於戰,乃曰:「司馬消難狼子野心,任蠻奴淮南傖土,語 司馬消難言於後主曰:「酮若登高舉烽,與韓擒相應,鼓聲交震,人情必離。請急遣兵北據 中領軍魯廣達頓于白塔寺。日日後主多出金帛,募人立功,範素於武士不接,莫有至者,唯 尋而隋將賀若弼陷南徐州,執城主莊元始,韓擒陷南豫州,敗水軍都督高文泰。 範與

·) 範以其徒居中,以抗隋師,未陣而北,範脫身遁免。 尋與<u>後主</u>俱入<u>長</u>安。 隋軍旣逼,<u>蠻奴又欲爲持久計,</u>範又奏:「請作一決,當爲官勒石<u></u>燕然。」後主從之。 明

免。日己及至長安,事並露,隋文帝以其姦佞諂惑,並暴其過惡,名爲四罪人,流之遠裔,以謝 女,以求親昵。瓘險慘苛酷,發言邪諂,故同罪焉 初,晉王廣所戮陳五佞人,範與散騎常侍王瑳、王儀、御史中丞沈瓘,過 惡 未 彰,故

字,紙爲銅落,筆由利染。故門同玉署,家號金穴,嬙媛侍女,燕、溱、燦、鄭之聲,琁池碧梁, 卒,重屯廣衞。至於元戎啓轍,武候還麾,遮迾淸道,神行按轡,督察往來,馳騖輦轂,驅役 歐漏,宮省咳唾,義必先知。 故窺盈縮於望景,獲驪珠於龍睡,坐歸聲勢,臥**震都鄙**。 寄,屬當事有所歸。[10]通驛內外,切自音旨。 若夫竭忠盡節,仕子恒圖,隨方致用,明君盛 魚龍雀馬之翫,莫不充牣錦室,照徹青雲,害政傷人,於斯爲切。況乎主幼時昏,讒慝亦何 譴辱詆訶,恣於典事之口。 分部、親承几案、領護所攝、示總成規。若徵兵動衆、大興人役、優劇遠近、斷於外監之心、 日積,苞苴歲通,富擬公侯,威行州郡。制局小司,專典兵力,雲陛天居,亘設蘭綺,羽林精 顏,遷蘭變鮑,久而彌信。 典,舊非本舊,因新以成舊者也,狎非先狎,因疎以成狎者也。 近狎,異世同揆。 九卿六府,事存 論 曰:自宋中世以來,宰御朝政,萬機碎密,不關外司。尚書八座五曹,各有恒任,係以 副職。 故環纓斂笏,俯仰晨昏,瞻幄坐而竦躬,陪蘭檻而高眄,探求恩色,習覩威 至於冠冕搢紳,任疎人貴,伏奏之務旣寢,趨走之勞亦息。 因城社之固,執開壅之機。長主君世,振裘持領,賞罰事殷,能不 抑符緩詔,姦偽非一,書死爲生,請謁成市,左臂揮金,右手刊 而任隔疎情,殊塗一致,權 關宣所 賄賂

可勝紀也。三

校勘記

- (1) 山陰有陳戴者 「戴」宋書作「載」。
- 截法與棺兩和 「兩和」南北監本、汲古閣本、殿本、局本俱作「焚之」,大德本作「兩和」。 張元濟
- [川] 昇明初年老拜太中大夫 「年」字各本並脫,據宋書補。
- 「四」即日宣殺焉 「宣」宋書作「宣旨」。
- *3*5. 始興王濬後軍行參軍 「後」下「軍」字各本並脫,據宋書補。
- [六] 佃夫等勸取開門鼓後 「後」字各本並脫、據宋書補。
- 以本官兼游擊將軍及輔國將軍孟次陽與二衞參員直 「孟次陽」各本作「蓋次陽」,據宋書改。
- 時佃夫及王道隆楊運長並執權 「楊運長」各本作「楊運夫」,據宋書改。
- [f] 遂官陟三品 「陟」各本作「涉」,據通志改。
- 以寒官累至勳品 軍主簿」,寒官謂微賤之官。 「寒官」各本作「寒宦」,據南齊書改。 按紀僧眞傳「自寒官歷至高帝冠軍府參

- [11] 出身爲小史 「小史」各本同。南監本南齊書作「小吏」。
- 近聞王洪範 與趙越常徐僧亮萬靈會共語 「王洪範」各本並作「王洪軌」, 據通鑑齊高帝建元元

年紀改。參見本書卷七十循吏傳校勘記第二十一條。

- [1] 法亮以主署文事 「署文」各本作「者久」,據南齊書改。
- 昇明初 「昇明」各本譌「昇平」,據南齊書改。 按昇明爲宋順帝年號。
- (三) 累遷殿中侍御史 「侍」字各本並脫,據南齊書補。
- 施文慶不知何許 人 也 按施文慶事附陳書任忠傳、云「吳興烏程人」。
- [14] 朝廷公卿咸畏範 「範」字各本並脫,據通志補。
- $\frac{1}{2}$ 範與中領軍魯廣達頓于白塔寺 「範」字各本並脫,依讀書記疑說補
- 二九 範與散騎常侍王瑳王儀御史中丞沈瓘過惡未彰故免 「沈瓘」院書文帝紀作「沈觀」,通鑑一七

七作「沈瓘」。

- C10 屬當事有所歸 南齊書無「事」「所」二字。
- [11] 讒慝亦何可勝紀也 「紀」字各本並脫,據南齊書補。

南史卷七十八

列傳第六十八

夷貊上

海南諸國

康泰 皆朝貢。 及宋、齊至梁,其奉正朔、修貢職,航海往往至矣。今采其風俗粗著者列爲海南云。 西域諸國接。 **※通焉。** 海南諸國,大抵在||交|||南及西南大海洲上,相去或四五千里,遠者二三萬里。 後漢桓帝世,大秦、天竺皆由此道遣使貢獻。及吳孫權時,遣宣化從事朱應、中郎 其所經過及傳聞則有百數十國,因立記傳。晉代通中國者蓋鮮,故不載史官 漢元鼎中,遣伏波將軍路博德開百越,置日南郡。 其徼外諸國,自武帝以來 其西與

林邑國,本漢日南郡象林縣,古越裳界也。 伏波將軍馬援開南境, 置此縣。 其地從廣

積 鵝毳,抽其緒紡之以作布,布與紵布不殊。 里,有西圖夷亦稱王,〇二馬援所植二 可六百里。 以歲年,朽爛而心節獨在,置水中則沉,故名曰沉香,次浮者棧香。 金夜則出 城去海百二十里,去日南南界四百餘里,北接九德郡。 飛,狀如螢火。 又出瑇瑁、貝齒、古貝、沉木香。 銅柱,表漢家界處也。 亦染成五色,織爲斑布。 其國有 古貝者,樹名也,其華成 金山,石皆赤色,其 其南界, 水步道二百餘 沉木香者,土人斫斷, 中 生 如

南,文復滅之,進寇九德郡,害吏人。 遣使告藩,願以日南北境橫山爲界。 因人之怨,襲殺覽,以其屍祭天。留日南三年,乃還林邑。交州刺史朱藩後遣督護劉雄戍 和三年,臺遣夏侯覽爲太守,侵刻尤盛。 國人自立。 任之。後乃讒言諸子,各奔餘國。 斫 於 逸嗣 山澗 石如斷芻橐,文心異之。范幼嘗使之商賈至林邑,因敎林邑王作宮室及兵車器械,王寵 葬復屯日南。文死,子佛立,猶屯日南。 漢末大亂,功曹區連殺縣令, 🖽 自立為王。 數世,其後王無嗣,外甥范熊代立,死,子 ,得鱧魚二化而爲鐵,因以鑄刀。 刀成,文向石咒曰:「若斫石破者,文當王此國。」因 晉成帝咸康三年, [三] 逸死,奴文篡立。 文本日南西卷縣夷帥范幼家奴,[四] 嘗牧牛 時交州刺史姜莊使所親韓戢、謝幼前後監日南郡,並貪殘,諸國患之。穆帝永 及王死無嗣,文僞於鄰國迓王子,置毒於漿中殺之,遂脅 林邑素無田土,貧日南地肥沃,常欲略有之。至是 征西將軍桓溫遣督護滕畯、九眞太守灌邃討 藩不許。 文歸林 日

追至林邑,佛乃請降。 安帝隆安三年,佛孫須達復寇日南、九德諸郡,至無歲不至,殺

傷甚多,交州遂致虛弱。

文敵。 紫磨者,因以爲名。宋永初二年,遣使貢獻,以陽邁爲林邑王。 陽邁初在孕,其母夢生兒,有人以金席藉之,其色光麗。夷人謂金之精者爲陽邁,若中國云 日 於其甥。 陽邁。[K] 須達死,子敵眞立,其弟敵鎧攜母出奔。 文敵復爲扶南王子當根純所殺,大臣范諸農平其亂,自立爲王。諸農死,子陽邁立。 國相藏麟固諫不從。其甥立而殺藏麟,藏麟子又攻殺之,而立敵鎧同母異父弟曰 敵眞追恨不能容其母弟,捨國而之天竺,禪位 陽邁死,子咄立,慕其父復

男而 旗。 然也。 焚之中野,謂之火葬。 下,謂之干漫,亦曰都漫。穿耳貫小環。貴者著革屣,賤者跣行。自林邑、扶南以南諸國皆 貴女。同姓還相婚姻。使婆羅門引壻見婦,握手相付,呪曰「吉利吉利」爲成禮。 國不設刑法,有罪者使象蹋殺之。其大姓號婆羅門,嫁娶必用八月。女先求男,由賤 其 其王者著法服,加瓔珞,如佛像之飾。出則乘象,吹螺擊鼓,罩古貝繖,以古貝爲幡 ,國俗,居處爲閣,名曰干闌。 門戶皆北向。 書樹葉爲紙。 其寡婦孤居,散髮至老。 國王事尼乾道,四歸金銀人像大十圍。 男女皆以橫幅古貝繞腰以 死者

元嘉初,陽邁侵暴 日南、九德諸郡,交州刺史杜弘文建牙欲討之、聞有代乃止。八年,

九四

第六十

喪 貊

1:

之慍、欲輸金一萬斤、銀十萬斤、銅三十萬斤、還所略日南戶。其大臣審僧達諫止之。 傲,二十三年,使交州刺史檀和之、振武將軍宗慤伐之。和之遣司馬蕭景憲爲前鋒,陽邁聞 還。十二年、十五年、十六年、十八年,每遣使貢獻,獻亦陋薄,而寇盜不已。文帝忿其違 珍異,皆是未名之寶。又銷其金人,得黃金數十萬斤。 大帥范扶龍戍其北界區栗城。景憲攻城剋之,乘勝卽剋林邑,陽邁父子並挺身逃奔。 又寇九德郡,入四會浦口。交州刺史阮彌之遣隊主相道生帥兵赴討,攻區栗城不剋, 乃遺 獲其

黷貨,迎獄中女子入內,免官禁錮。後病死,見胡神爲祟。追贈左將軍,諡曰裹子。 孝武孝建二年,林邑又遣長史范龍跋奉使貢獻,除龍跋揚武將軍。大明二年,林邑王 和之,高平金鄉人,檀憑之子也。以功封雲杜縣子。孝建三年,爲南兗州刺史,坐酣飲 齊永明

南將軍、林邑王。死,子弼毳跋摩立,奉表貢獻。普通七年,王高戍勝鎧遣使獻方物,公詔 范神成又遣長史范流奉表獻金銀器、香、布諸物。明帝泰豫元年,又遣使獻方物。 以爲持節、督緣海諸軍事、綏南將軍、林邑王。大通元年,又遣使貢獻。大通二年,行林邑 中,范文贊累遣使貢獻。梁天監九年,文贊子天凱奉獻白猴,詔加持節、督緣海諸軍事、威 王高戍律陁羅跋摩遣使貢獻,詔以爲持節、督緣海諸軍事、綏南將軍、林邑王。六年,又遣

使獻方物。

歸 順,拜龍驤將軍。 廣州諸山並狸獠,種類繁熾,前後屢爲侵暴,歷世患之。 檀乞官軍征討未附,乃以檀爲高興太守,遣前朱提太守費沈、龍驤將軍 宋孝武大明中,合浦大帥陳檀

武期南伐,幷通朱崖道,並無功,輒殺檀而反,沈下獄死。

俗大較與林邑同。出金、銀、銅、錫、沈木香、象、犀、孔翠、五色鸚鵡。 海 五百里,有大江廣十里,從西流東入海。其國廣輪三千餘里,土地洿下而平博,氣候風 扶南國,在日南郡之南,海西大灣中,至去日南可七千里。在林邑西南三千餘里。城

順遜之東界通交州諸賈人。其西界接天竺、安息徼外諸國,往還交易。其市東西交會, 有萬餘人。珍物寶貨無不有,又有酒樹似安石榴,采其花汁停甕中,數日成酒 其南界三千餘里有頓遜國,在海崎上,地方千里。城去海十里。有五王,並羈屬扶南。

王常樓居,不血食,不事鬼神。 也。自己國法,刑人並於王前噉其肉。國內不受估客,有往者亦殺而噉之,是以商旅不敢至。 古不死,莫知其年。王神聖,國中人善惡及將來事,王皆知之,是以無敢欺者。南方號曰長 頓遜之外大海洲中,又有毗騫國,去扶南八千里。傳其王身長丈二,頸長三尺,[10]自 國俗,有室屋衣服,噉粳米。其人言語小異扶南。 其子孫生死如常人, 唯王不死。 有山出金, 金露生石上, 無央限 扶南王數使與書相報答。

列傳第

六十八

夷 貊 上

常 遺扶 亦 、能作天竺書,書可三千言,說其宿命所由,與佛經相似,並論 南 王 純 !金五十人食器,形如圓盤,又如瓦塸,名爲多羅,受五升, 善事 又如椀者受一

而 餘 里,至自然大洲,其上有樹生火中,洲左近人剝取其皮,紡績作布,以爲手巾 ,

金 號 蔓。[]]] 國 舶, 功 下 其 一十,乃結國中壯士,襲殺協。 扶南 選子 ·得弓, 南 色微青黑。若小垢洿,則投火中,復更精潔。 生 穿度 納 扶南 有 叉傳 柳葉爲妻,生子分王七邑。其後王混盤況以詐力間 大王。 孫 行。 盤盤 激 一面,矢及 便依 送扶南 國, 國俗 中分居諸邑,號曰小王。 蔓姊 立三年死,國人共舉遵爲王。 夢乘舶 有事鬼神者字混塡。 乃作 ·本裸,文身被髮,不製衣裳,以女人爲王, 東界卽大漲海,海中有大洲,洲上有諸薄國, :大船窮 《侍者。 入海,遂至扶南外邑。 柳葉大懼,舉衆降混塡,塡乃教柳葉穿布 漲海,開國十餘,闢地五六千里。 游大將<u>范</u>尋又攻殺長而代立。 夢神賜之弓,乘賈人舶入海。 盤況 年九十餘乃死,立中子盤盤,以國事 蔓勇健有權略,復以兵威攻伐旁國,咸服 柳葉 或作燈炷,用之不知盡 人衆見舶至,欲劫取之。混塡 號曰柳葉。 諸邑,令相疑阻,因 次當伐 國東有馬五洲。 時有乳下兒名 更繕國內,起觀閣遊戲之,朝 混塡晨起卽詣廟,於神樹 金鄰國,蔓 貫頭,形不 年少壯健,有似男子。 長 復東行漲海千 在 委其 舉兵 復露,遂君其 遇疾,遣太子 卽張弓射其 與蕉麻無異 人間,至年 屬之,自 攻併之。 大 將 范

旦中晡三四見客。百姓以蕉蔗龜鳥爲禮。

長 輒 湯 以 中 七尺, 餧 或 令探 法 猛 戵 兩 取 無 一及鰐魚,魚獸不食爲無罪,三日乃放之。 之,若 邊有 牢 一獄,有 齒 無實者手卽爛 利 訟者,先齋三日,乃燒斧極赤,令訟者捧行 如 刀劍,常食魚,遇得麞鹿及 有 理者則 不。 又於城溝中養鰐魚, 人亦噉之,蒼梧 鰐大者長三丈餘, 七步。 以南 門外圈猛 又以金鐶、雞 狀似體, 及 外國 皆 獸, 有 ī有之。 四足,喙 有 卵投沸 郭 者

國 中 吳 實 時, 佳 一, 但 遣 中 人褻露 郎 康泰 可怪耳。」專始令國內 宣化 從事朱應使於 男子着横幅。 (尋國) 或 人猶 横幅, 裸, 唯 婦 今干漫也。 人 著 貫 頭。 大 家 |泰、應謂 乃截錦爲

貧

者

乃

用

布

年, 之, 其 後 跋摩復遣 舉 年、 王 晉 或 憍 武 十二年、十五 欣 帝 陳 戴 太康 如 使送珊 本 迎而 ·天竺婆羅門也,有 中,尋始遣使貢獻。 瑚佛 立焉。 年,奉 像 · 弁 獻 表 復 獻 改 方物。 制 方物 度,用 神 穆帝升平元年,王竺旃檀奉 語 齊永 詔 目 天 授安南 應 明 王 中 一扶南。 ·, 王 將軍、 憍 憍 陳 扶 憍 陳 如 死 陳 南 如 闍 後 王 如 邪 J) 王 跋摩 悦, 表 持棃陁跋摩, 獻 南 遣使 馴 至 象,詔以勞費停之。 盤 貢 盤 獻 宋文 梁 扶 南 天 監二 元嘉 人聞

面 者 四手 其 國 四 皆 面 醜黑拳髮, 者 八手 手 所 各有 居不 所持。 穿井 少數 或 十家 小兒,或鳥獸,或日月。 共 池引 汲 之。 俗 其王 事 天 神,天 出 入乘 神 象 以 嬪 銅 侍亦然 爲 像,二

列

死 王 者有 坐 則 偏 |四葬:水葬則投之江流,火葬則焚爲灰燼,土葬則瘞埋之,鳥葬則棄之中野。 人性貪 踞 戀魅,垂左膝至地,以白疊敷前,設金盆香鑪於其上。 國俗, 居喪則剃除鬚髮。

無禮義,男女恣其奔隨

有佛髮,長一丈二尺。詔遣沙門釋雲寶隨使往迎之。 |當抱老奉表貢獻。十八年,復遣使送|天竺旃檀瑞像、婆羅樹葉,幷獻火齊珠,鬱金、蘇合 十年、十三年,跋摩累遣使貢獻,其年死。 庶子图陁跋摩殺其嫡弟自立。十六年,遣使 普通元年、中大通二年、大同元年,累遣使獻方物。 五年,復遣使獻生犀。 又言其國

元帝 時 育王卽鐵輪 伸之,隨手長短,放之則旋屈爲蠡形。按僧伽經云:「佛髮靑而 有 而 初 ·我昔在宮沐頭,以尺量髮,長一丈二尺。 尼 先是,三年八月,武帝改造阿育王佛塔,出舊塔下舍利及佛爪髮,髮青紺色, 修立、至孝武 居其 度江,更修飾之。 地為 王,王閻浮提一天下。佛滅度後,一日一夜,役鬼神造八萬四千塔,此卽 小精舍,孫綝尋毀除之,塔亦同滅。 太元九年,上金相輪及承露。 至簡文咸安中,使沙門安法程造小塔,口己未及成而 放已右旋、還成蠡文。」則 吳平後,諸道人復於舊處建立焉。 細,猶 如藕莖絲。」佛三昧經 與帝 所得 弟子僧顯 衆僧以手 同 其一。吳 也。 SIL

其後,有西河離石縣胡人劉薩何遇疾暴亡,而心猶暖,其家未敢便殯,經七日更蘇。 說

寺僧 是, 分入兩 一年改造會稽鄧縣塔, 開舊塔中出舍利, 遣光宅寺釋敬脫等四僧及舍人孫照 暫 迎 還 帝禮 叉 請 拜竟,卽送還縣,入新塔下,此縣塔亦是劉薩何所得也。 帝於寺發般若經題。 刹 剎下,及王侯妃主百姓富室所捨金銀環釧等珍寶充積。 爾夕二塔俱放光明,敕鎮東邵陵王綸製寺大功德碑文。先 十一年十一月二 日,

係世 像,至咸安初,歷三十餘年,光趺始具。 年,交州 至寺,悝因留像付寺僧。 金 像 於海 晉咸和 無有光趺。 合浦人董宗之採珠沒水底,得佛光餘,交州送臺,以施於像,又合焉。 口忽見有銅花趺浮出,取送縣,縣人以送臺,乃施像足,宛然合。 中,丹陽尹高悝行至張侯橋,見浦中五色光長數尺,不知何怪,乃令人於光處得 悝 乃下車載像還至長干巷首,牛不肯進。 每至夜中,常放光明,又聞空中有金石之響。 **悝乃令馭人任牛所之,牛徑牽** 經一歲,臨海漁 會簡 自 咸 文咸安元 和 中得 人張

亂 回 金 五 身西向。 色 僧 埋 至寺,見像 初 一於河 謂邃 高 邊。 悝 曰:「若能 明旦便許摸之。像趺先有外國書,莫有識者,後有三藏那跋摩識之,云是阿育 得像,後有 嘘 今尋覓失所。」五人嘗一夜俱夢見像曰:「已出江東,爲高悝所得。」悝乃 一欷涕泣,像便放光,照燭殿宇。 令像放 西域胡僧五 光,回身 (西向、乃可相許。」
慧邃便懇 人來詣悝曰:「昔於天竺得阿育王造像,來至鄴下,逢胡 又瓦官寺慧邃欲摸寫像形,寺主僧尚 拜請。其夜像卽轉 坐放光, 慮損 送此

王爲第四女所造也。[1]

於輪奐焉。 及大同 中,出舊塔舍利,敕市寺側數百家宅地以廣寺域,造諸堂殿幷瑞像周回閣等,窮 其圖諸經變,並吳人張繇運手。 **繇丹青之工,一時冠絕。**

今故遣使二人,表此微心。」 西南夷訶羅陁國,宋元嘉七年,遣使奉表曰:「伏承聖主信重三寶, 興立塔寺,周滿世

乃遣使策命之。二十九年,又遣長史婆和沙彌獻方物。 六年,文帝詔曰:「阿羅單、婆皇、婆達三國,頻越遐海,欵化納貢,遠誠宜甄,可並加除授。 六通,爲世間導,是名如來,是故至誠五體敬禮。」其後爲子所篡奪。十三年,又上表。二十 古貝等物。 阿羅單國都闍婆洲,元嘉七年,遣使獻金剛指環、赤鸚鵡鳥、

天竺國白疊、古貝、葉波國 十年,阿羅單國王毗沙跋摩奉表曰:「常勝天子陛下,諸佛世尊,常樂安隱,三達

婆皇國,元嘉二十六年,國王舍利婆羅跋摩遣使獻方物四十一種,文帝策命之爲婆皇

列

國王。 長史竺須羅達、CIKD前長史振威將軍竺那婆智並爲龍驤將軍。 爲振威將軍。 二十八年,復遣使貢獻。 大明三年、獻赤白鸚鵡。 孝武孝建三年,又遣長史竺那婆智奉表獻方物, 大明八年、明帝泰始二年, 又遣使貢獻。 明帝以其 以那婆智

二十六年、二十八年,復遣使獻方物。〔1+〕 婆達國,元嘉二十六年,國王舍利不陵伽跋摩遣使獻方物,文帝策命之爲婆達國王。

遠,亦霑靈潤。」 天子足下, 教化一切, 種智安隱, 天人師降伏四魔, 成等正覺, 轉尊法輪, 度脫衆生。 閣婆達國,[15]元嘉十二年,國王師黎婆達呵陁羅跋摩遣使奉表曰:[15]「宋國大主大吉 我 難存

矛 及畫塔,幷獻沉檀等香數十種。 槃槃國,元嘉、孝建、大明中,並遣使貢獻。 六年八月,復遣使送菩提國舍利及畫塔圖,弁菩提樹葉 梁中大通元年、四年,其王使使奉表累送佛

詹糖等香。

大同 元 丹 年 丹 - ,復遣 國, 中大通 使獻 金銀、瑠璃、雜 三年,其王遣使奉表送牙像及畫塔二軀,幷獻火齊珠、古貝、雜 寶、香藥等物。

遺長 禮敬 爲 國, 曇脩 中所見武帝容質, 汝若不信我 諸 比 史 列 跋 國 Ŧ 本 毗 **施羅** 之極 陁 土 畫 利 員 地 則 、跋摩奉 以 國,在南海洲 豊樂, ,當與汝往觀。」乃於夢中至中 符 四月 宋孝 同 飾 焉。 武 ·表獻金芙蓉、雜香藥等。 八 商 以 世、王 日 旅 丹青, 因盛以 夢一 百倍; 上,〔三〕其俗與林邑、扶南略同,出 釋婆羅那 僧謂 仍遣使幷畫工 寶函 若不信 曰:「中國 鄰陁遣長史竺留陁獻 日 我, 加敬 則境土不得自安。」初未之信, 國 今有聖主,十年之後,佛法 禮。 普 奉表獻 | 拜覲| 通 後跋 元 天子。 玉盤 年,復遣 陁 等物。 死,子 旣覺 金銀 斑布、古貝 使獻 毗 心異之,陁羅本 寶器。 使人旣 方物 針 邪跋摩立,三 大興。 八檳榔。 梁天 至,摸寫帝形 旣 監 而 汝若遣使貢 檳榔 I 又夢此僧曰: 元 畫,乃寫 年 十七年, ,其王 特精好, 以還其 夢

貴 氣 臣 物 乃 產 狼 牙 加 與 雲霞 扶 脩 南 逑 在 布 略 覆 同,偏 南 胛, 海 多棧、沉、婆律 中。 以 金 其界東 繩爲絡帶,金環貫耳。 西三十日 香等。 行, 其俗。 南北二十日 女子則被布、三以瓔珞繞身。 男女皆袒 而 行, 被髮,以古貝 北去 廣 州二萬 爲干 兀 漫, 于 其國累塼 其 里 王 土 及

列

傳

後嗣 伽達 乃逐 爲城,重門樓閣。 多立。 出 衰弱 境, ,王族有賢者,國人歸向之。王聞乃加囚 遂奔天竺。 天監十四年,遣使阿撤多奉表。 王出乘象,有幡旄旗鼓,罩白蓋,兵衞甚嚴。 天竺妻以長女。 俄 而 狼牙王死, 執,其鎖無故自斷。王 大臣迎還爲王。 國人說,立國以來四百餘年, 以爲神,因 二十餘年死,子婆 不 ·敢害,

以雜 有一 金高 王乃 有石 能記。 名坩 香爲 坐, 用斑絲者,自己以瓔珞繞身,頭著金冠高尺餘,形 百三十六聚。 婆利國,在廣州東南海中洲上,去廣州 以銀蹬支足。 之,上施羽蓋、珠簾。其導從吹螺擊鼓。 貝羅,初采之柔軟,及刻削爲物暴乾之,遂大硬。 自言白淨王 土氣暑熱, 侍女皆爲金花 夫 人即其國 如中國之盛夏。 女。 雜寶之飾, 二月日行。 穀 王姓憍陳如, 或持白毦拂及 歲 如弁,綴以七寶之飾。 再熟,草木常榮。 國界東西五十日行,南北二十日行。 其國人披古貝如 自古未通 孔 雀扇。 中 王出 海出文螺、 國 帶金 吧,及為 以象駕輿, 問 裝 其先及年 劍 紫貝。 一偏坐 都縵。 輿

蟲、 兜鍪、瑠璃器、古具、螺杯、雜香藥等數十種 天監十六年, 遣使奉表 獻 金席等。 普通三年, 其王頻伽復遣使珠智獻白鸚鵡、日間青

杖、蜀布,國人云市之身毒,卽天竺也。 中 天竺國,在大月支東南數千里,地方三萬里,一名身毒。 從月支、高附西,南至西海,東至盤越,列國數十,每 漢世張騫使大夏, 見邛竹

國置王,其名雖異,皆身毒也。 漢時羈屬月支。 其俗土著與月支同,而卑濕暑熱,人畏戰, 下有真鹽,色

弱於月支。 國臨大江,名新陶,源出崑崙。分爲五江,總名恒水。 其水甘美,

正 白 如 水精。 土出犀、象、貂鼠、瑇瑁、火齊、金銀銅鐵、金縷織成金罽、細靡白疊、好裘、毾

蘣。 火齊狀如雲母,色如紫金,有光曜,別之則薄如蟬翼,三三積之則如紗縠之重沓也。西 與

多大秦珍物、珊瑚、琥珀、金碧、珠璣、琅玕、鬱金、蘇合。

蘇

合是合諸

者相

大秦、安息交市海中。

香汁煎之,至了非自然一物也。 又云大秦人采蘇合,先笮其汁以爲香膏,乃賣其滓 與諸 或

似。 是以展轉來達中國不大香也。 或 人先取以 上佛寺,積日槀乃糞去之,賈人以轉賣與 鬱金獨出罽賓國,華色正黃而細, (他國 也 與芙蓉華裏被蓮

漢 桓 帝 延熹 九年,大秦王 安敦遣使自日南徼外來獻,漢世 唯一 通焉。 其國 人行賈往往

至 扶 南 日南 交阯。 其南 徼 諸 國 人少 有 到 大秦者。 孫權黃武五年,有大秦賈 人字秦 論 來

到 交阯, 論 見之曰:「大秦希見此人。」權以男女各十人,差吏會稽劉咸送論,咸於道物故, 太守吳邈遣送詣權。 権問論 方上風 俗,論具以事對。 時諸葛恪 討丹陽,獲黝、歙短 乃徑

還本 國 也

列 傳 第 六 + 八 夷 貊 上

來獻,魏、晉世絕不復通。唯吳時扶南王范旃遣親人蘇勿使其國,從扶南發投拘利口,循海 漢 和 帝 時,天竺數遣使貢獻,後西域反叛遂絕。 至桓帝延熹三年、四年,頻從日南徼外

街曲市里,屋舍樓觀,鍾鼓音樂,服飾香華,水陸通流,百賈交會,器玩珍瑋,恣心所欲。 「海濱極遠,猶有此人乎」即令觀視國內,仍差陳、宋等二人以月支馬四疋報旃,勿積四年 右嘉維、舍衞、葉波等十六大國,去天竺或二三千里,共尊奉之,以爲在天地之中。」 **龐,土饒沃,其王號茂論。所都城郭,水泉分流,繞于渠塹,下注大江。其宮殿皆雕文鐫刻。** 方至。其時吳遣中郎康泰使扶南,及見陳、宋等,具問天竺土俗,云:「佛道所興國也。人敦 大灣中正西北入,歷灣邊數國,可一年餘到天竺江口,逆水行七千里乃至焉。 天竺王鰲曰: 左

天監初,其王屈多遣長史竺羅達奉表獻瑠璃唾壺、雜香、古貝等物。

鵡各一頭。明帝泰始二年,又遣使貢獻,以其使主竺扶大、竺阿珍並爲建威將軍。[1]了元嘉 十八年,蘇摩黎國王那羅跋摩遣使獻方物。孝武孝建二年,斤陁利國王釋婆羅那隣陁遣長 史竺留陁及多獻金銀寶器。後廢帝元徽元年,婆黎國遣使貢獻。曰己凡此諸國皆事佛道。 天竺迦毗黎國,元嘉五年,國王月愛遣使奉表,獻金剛指環、摩勒金環諸寶物,赤白鸚

佛道自後漢明帝法始東流,自此以來,其敎稍廣,別爲一家之學。元嘉十二年,丹陽尹

一九六二

有違犯,嚴其誅坐。 銅像者, 蕭摹之奏曰:「佛化被于中國, 后,此制竟不能行。 道者數百人。 悉詣臺自聞,興造塔寺精舍,皆先列言,須許報然後就 孝武大明二年,有曇標道人與憲人高閣謀反,上因是下詔,所在精加沙汰,後 於是設諸條禁,自非戒行精苦,並使還俗,而諸寺尼出 先是,晉世庾冰始創議欲使沙門敬王者,後桓玄復述其義,並不果行 已歷四代,而自頃以來,更以 奢競爲重。 功。」詔 可。 請自今以後 入宮掖 叉沙 汰 ,交關妃 沙 有 門罷 欲

鸞,乃毀廢新安寺,驅斥僧徒,尋又毀中興、天寶諸寺。 孝武寵姬殷貴妃薨,爲之立寺,貴妃子子鸞封新安王,故以新安爲寺號。 明帝定亂,下令修復。 前廢帝殺子

大明六年,孝武使有司奏沙門接見皆盡敬,

詔可。

前廢帝初復舊。

五. 便能講 **慧琳者,秦郡秦縣人,姓劉氏。少出家,住冶城寺。** 宋世名僧有道生道人,彭城人,父爲廣戚令。 經,及長有異解,立頓悟義,時人推服。一元嘉十一年,卒於廬山,沙門慧琳爲之誄。 道生爲沙門法大弟子,幼而 有才章,兼內外之學,爲廬陵王義 聰悟。 年十

陋 眞 答,其歸以爲 智周萬 所 之,謂不 知。 變,天人之理盡矣。 嘗著均善論,頗貶裁佛法,云:「有白學先生,以爲中國 照幽冥之塗,弗及來生之化,雖尙虛 「六度與五敎並行,信順與慈悲齊立」。 道無隱旨,敎罔遺筌,聰叡迪哲,何負於殊論 心,未能虛 論行於世。 事 ,,不逮西域之深也。」爲客主 聖 舊僧謂其敗黜釋氏,欲加 人經綸百世,其德弘矣, 哉。 有黑學道士

列

傅

輔 擯 四 . 方 斥。 會稽 贈賂相 文帝! 孔覬嘗詣之,至迅遇賓客塡咽,暄凉而已。 見論賞之,元嘉中,遂參權要,朝廷大事皆與議焉。 係,勢傾一 時。 方筵七八,座上恒滿。 琳著高展, 覵慨然曰:「遂有黑衣宰相 披貂裘, 賓客輻湊,門車常有數十兩。 置 通呈書佐,權 可謂 冠 屨 侔 失 宰

之語日 又有慧嚴、慧議道人,並住東安寺。 鬭場 禪師窟,東安談義林。」 學行精整,爲道俗所推。 時闡場寺多禪僧,都

所矣。」注孝經

及莊子逍遙篇文論傳於

世

忽然 都 下 出 不見。 孝武 新經勝鬘經,尤見重釋學。 大明 天下 四 年,於中興寺設齋,有一 無此寺名, 乃改 中興 日天安寺。 異僧,衆莫之識, 大明中, 問名,答言名明慧,從天安寺 外國 沙門摩訶衍苦節 有 精理,於

價 止 有 取 之。 鬼 師 神 子 國、天竺旁國也。 諸 及龍居之。 國 人聞其土樂,因此競至,或有住者,遂成大 諸國 商估來共市易,鬼神不見其 其地 和適,無冬夏之異。 五穀隨人種,不 形, 國 但 田 「珍寶, 須 顯其所 八時節。 堪價。 其國 舊無人, 商 人依

工。 此像歷晉、宋在瓦官寺,先有徵士戴安道手製佛像五軀,及顧長康維摩畫圖,世人號之 晉義 煕 初 始遣 使獻 玉 像,經十載 乃至。 像高 四尺二寸,玉 色潔潤, 形 制 殊特, 殆 非

三絕。 至齊東昏遂毁玉像,前截臂,次取身,為嬖妾潘貴妃作釵釧

宋元嘉五年,其王刹利摩訶遣使奉表貢獻。〔章〕十二年,又遣使奉獻。 梁大通元年,後

王迦葉伽羅訶黎邪使使奉表貢獻。

校勘記

- 有西圖夷亦稱王 「西圖夷」梁書作「西國夷」。 太平御覽三九〇引異物志作「西屠夷」。
- 功曹區 連殺縣 令 「區連」梁書作「區達」。 按晉書、隨書、册府元龜九五六並作「區

連。

- 晉成帝咸康三年 「三年」梁書同。 晉書林邑傳作「二年」。
- 文本日南 西卷 縣夷帥范幼家奴 「幼」本字「稚」、此避唐諱改。
- 五 佛孫須達復寇 日南九德諸郡 「須達」梁書同。 晉書安帝紀作「范達」。 按須達為范文之孫,故

亦稱「范達」。

- ハベ 子咄立慕其父復曰陽邁 「慕」各本作「篡」,據南齊書、太平御覽七八六引改。
- フセン 國王事尼乾道 「尼乾道」太平御覽七八六引、通志並作「竺乾道」。
- ハベン 王高 戍 勝鎧遣使獻方物 「戍」梁書作「式」,下「高戍律陁羅跋摩」同
- ト と し 扶南國 在 日南郡之南海西大灣中 「在」字各本並脫, 據南齊書、 梁書及册府元龜九五 一七補。

列傳第六十八 校勘記

「海西大灣」南齊書、太平御覽七八六引作「大海西灣」。

- [10] 頸長三尺 「頸」各本作「頭」,據册府元龜九九七改。
- [11] 無央限也 「央」梁書作「所」。
- [三] 以國事委其大將范蔓 「范蔓」南齊書作「范師蔓」。
- [11] 使沙門安法程造小塔 「安法程」梁書作「安法師程」。
- [12] 又使沙門僧尙加爲三層 「加」梁書作「伽」。
- 二吾 後 有三藏那跋摩職之云 是阿育王為第四女所造也 「那」下梁書有「求」字。
- (1六) 明帝以其長史竺須羅達 「達」各本作「遠」、據宋書改。
- 二七 二十六年二十八年復遣使獻方物 按上已出「二十六年」,則此「二十六年」非衍文即 有譌誤。

據文帝紀二十七年亦無婆達國事。

- 闍婆達國 「闍婆」下宋書更有「婆」字。 按文帝紀作「閣婆娑達」,通志同。
- 二九 國王師黎婆達呵陁羅跋摩遣使奉表 日 呵 [施]宋書作「陁呵」。
- 干陁利 各 本作「海南」,據梁書、太平御覽七八七引乙。 國在南海洲 上 「干陁利」宋書作「斤陁利」。 按天竺迦毗黎國傳出「斤陁利國」。 「南海」
- (三) 子毗針邪跋摩立 梁書無「針」字。

〔三三〕 王乃用斑絲者 「者」梁書作「布」。

其王頻伽復遣使珠智獻白鸚鵡 「珠智」梁書作「珠貝智」。

[三]別之則薄如蟬翼 「薄如」二字各本並脫、據梁書補。

[三六] 蘇合是合諸香汁煎之 下「合」字據梁書補。

子三 又遣使貢獻以其使主竺扶大竺阿珍並爲建威將軍 上「使」字各本並脫, 據宋書補。 「阿珍」

宋書作「阿彌」。

後廢帝元徽元年婆黎國遣使貢獻 按婆黎國即婆利國。 上婆利國據梁書爲傳, 此又據宋書爲

說,重出。

二九 會稽孔凱嘗詣之 「孔覬」各本譌爲「孔顗」,下同,今改正。按宋書有孔號傳。

宋元嘉五年其王刹利摩訶遣使奉表貢獻 「五年」梁書作「六年」、「訶」下宋書有「南」字。

南史卷七十九

列傳第六十九

夷貊下

東夷 西戎 蠻 西域諸國 蠕蠕

屬,世通中國。自晉過江,泛海來使,有高句麗、百濟,而宋、齊間常通職貢,梁興又有加焉 扶桑國,在昔未聞也,梁普通中有道人稱自彼而至,其言元本尤悉,故幷錄焉。 東夷之國,朝鮮爲大,得箕子之化,其器物猶有禮樂云。 魏時,朝鮮以東馬韓、辰韓之

漢、魏世、南與朝鮮穢貊、東與沃沮、北與夫餘接。其王都於丸都山下,自己地多大山深谷, 無原澤,百姓依之以居,食澗水。雖土著,無良田,故其俗節食,好修宮室。於所居之左立 高句麗,在遼東之東千里,其先所出,事詳北史。地方可二千里,中有遼山,遼水所出。

歹:

傅

皆 屬 兄 作 有 歌 之。 本 簿、優台、使者、阜衣、先人, 🗐 尊卑各有等級。 罪 錦 戲。 有 送 終 妻嫂。 者 繡 其置官,有對盧則不置沛者,有沛者則不置對盧。 五族,有消奴部、絕奴部、愼奴部、灌奴部、桂婁部。 \subseteq 之衣。 金銀 則 其 會諸 祭 人潔淨自喜,善藏釀,跪拜申一脚,行步皆走。至以十月祭天大會。 鬼神 其馬皆小,便登山。 以自飾,大加、主簿頭所著似幘而 其死 [加評議,重者便殺之,沒入其妻子。 `又祠零星、社稷。人性凶急,喜寇鈔。其官有相加、對盧、沛者、古鄒加、主 葬, 有椁 無棺。四好厚葬, 國人尙氣力,便弓矢刀矛,有鎧甲,習戰鬭, [無後,其小加著折風,形如弁。 金銀財幣盡於送死。 言語諸事, 其俗好淫, 男女多相 俗喜歌舞,國中邑落,男女每夜羣聚 [四]本消奴部爲王,微弱, 多與夫餘同,其性氣衣服 積石為封, 奔誘。 沃沮 其國無牢獄 其公會衣服 列植 已嫁娶便稍 桂婁部代 東濊皆 松柏 有異

加 璉散 軍 事 晉 安帝 征 騎常侍,增督 東將 義熙九年,高麗王高璉遣長史高翼奉表,獻赭白馬,晉以璉爲使持節 軍 高 |早州諸| 麗王、樂浪 軍事。 公。 少帝景平二年,璉遣長史馬婁等來獻方物,遣 宋武 帝踐 作,加 速征 東大 將軍 ,(E) 餘官並 如 、都督營州 謁 故。三年, 者朱邵

元嘉十五年,馮弘爲魏所攻,敗奔高麗北豐城,表求迎接。 文帝遣使王白駒、趙次興迎 伯

王邵

子等慰勞之。

刘傅弟六十九 夷貊下

爵位。

禽漱, 之,幷令高麗資遣。 殺仇等二人。 **蹥以白駒等專殺,遣使執** 璉不欲弘南, 乃遣將孫漱、高仇等襲殺之。 送之。 上以遠國不欲違其意, 白駒等率所領七千餘人生 白駒等下獄

璉 毎歲遣使。 十六年,文帝欲侵魏,詔璉送馬,獻八百匹。

營平二州、征 中,貢獻不絕,歷齊並授爵位,百餘歲死。 七年,韶進璉爲車騎 (孝建二年) 璉遣長史董騰奉表, 慰國哀再周, 並獻方物。 東大將軍、高麗王、樂浪公。云 大將軍、開府儀同三司、餘官並 子雲立,齊隆昌中,以爲使持節、散騎常侍、都督 如 故。 大明二年,又獻肅慎氏楛 明帝泰始、後廢帝 元 徽

襲餌。 侍、都督、王 安纂襲封爵 武 中 大 帝卽位,進雲車騎大將軍。 通四年、六年,大同元年、七年,累奉表獻方物。 `持節、督營平二州諸軍 並如故。 十一年、十五 年,累遣使貢獻。 事 天監七年,詔爲撫東大將軍、開府儀同三司,持節、常 、寧東將軍。 七年,安卒,子延立,遣使貢獻。 十七年,雲死,子安立。 太清二年,延卒,詔其子成襲延 普通 元年,韶 韶 以 延

百濟者,其先東夷 有三韓國二 日馬韓、二日辰韓、三日弁韓。 弁韓、辰韓各十二國,馬

韓有 國。 其國本與句麗俱在遼東之東千餘里,晉世句麗旣略有遼東,百濟亦據有遼西、晉平二 五 十四 國。 大國萬餘家,小國數千家,總十餘萬戶,百濟卽其一也。 後漸强大,兼諸小

郡地矣,自置百濟郡。

武帝 持節、督百濟諸軍事、綏東將軍、百濟王 東大將軍、百濟王。梁天監元年,進大號征東將軍。 年,又遣使貢獻。慶死,立子牟都。都死,立子牟大。齊永明中,除大都督百濟諸軍事、鎮 遣上表、言行冠軍將軍、右賢王餘紀十一人忠勤、並求顯進。於是詔並加優進。明帝泰始七 式占、腰弩,文帝並與之。毗死,子慶代立。 復修貢職,以映爵號授之。二十七年,毗上書獻方物,私假臺使馮野夫西河太守,表求易林 者閭丘恩子、兼副謁者丁敬子等往宣旨慰勞,其後每歲遣使奉獻方物。七年, 地。普通二年,王餘隆始復遣使奉表,稱累破高麗,今始與通好,百濟更爲强國。 踐阼, 進號鎭東大將軍。 少帝景平二年, 映遣長史張威詣闕貢獻。 元嘉二年,文帝詔 詔隆爲使持節、都督百濟諸軍事、寧東大將軍、百濟王。五年,隆死,詔復以其子明爲 晉義熙十二年,以百濟王餘映爲使持節、都督百濟諸軍事、鎭東將軍、百濟王。 孝武大明元年,遣使求除授,詔許之。二年,慶 尋爲高句麗所破,衰弱累年,遷居南韓 百濟王餘毗 其年,梁 宋武帝 練謁

號所都城曰固麻,謂邑曰檐魯,如中國之言郡縣也。其國土有二十二檐魯,皆以子弟

宗族分據之。 日冠,襦曰複衫,袴曰褌。 其人形長,衣服潔淨。其國近倭,頗有文身者。 其言參諸夏,亦秦、韓之遺俗云。 言語服章略與高麗同,呼帽

給之。 中大通六年、大同七年,累遣使獻方物,並請涅槃等經義、毛詩博士幷工匠畫師等,並 太清三年,遣使貢獻。及至,見城闕荒毁,並號慟涕泣。 侯景怒,囚執之,景平乃得

還國。

使使隨百濟奉獻方物。日 時 日新盧; 宋時日新羅,或日斯羅。其國小,不能自通使聘。 新羅、其先事詳北史,在百濟東南五千餘里。 其地東濱大海,南北與句麗、百濟接。 梁普通二年,王姓募名泰,始 魏

半,靴曰洗。其拜及行與高麗相類。無文字,刻木爲信。語言待百濟而後通焉。 旱支、壹旱支、齊旱支、謁旱支、壹吉支、[10]奇貝旱支。 其冠曰遺子禮, 襦曰尉解, 袴曰柯 五十二邑勒。土地肥美,宜植五穀,多桑麻,作縑布,服牛乘馬,男女有別。 其俗呼城曰健牟羅,其邑在內曰啄評,在外曰邑勒,亦中國之言郡縣也。 其官名有子賁 國有六啄評、

倭國,其先所出及所在,事詳北史。 其官有伊支馬,次曰彌馬獲支,次曰奴往鞮。 人種

禾、稻、紵、麻、蠶桑織績,有薑、桂、橘、椒、蘇。 出黑雉、眞珠、青玉。 竊,少諍訟。若犯法,輕者沒其妻子,重則滅其宗族。 至八九十,或至百歲。其俗女多男少,貴者至四五妻,賤者猶至兩三妻。婦人不媱妬,無盜 胡公頭。食飲用籩豆。 與儋耳、朱崖同。 有大蛇吞此獸。 蛇皮堅不可斫,其上有孔,乍開乍閉,時或有光,射中而蛇則死矣。 地氣溫暖,風俗不淫。男女皆露养,自己富貴者以錦繡雜采爲帽,似中國 其死有棺無槨,封土作冢。人性皆嗜酒。俗不知正歲,多壽考,或 有獸如牛名 山鼠,又 物產略

昔祖 獻。 羅任那加羅秦韓墓韓七國諸軍事、安東大將軍、倭國王。順帝昇明二年,遣使上表,言「自 那加羅秦韓慕韓六國諸軍事,安東將軍如故,并除所上二十三人職。 濟死,世子興遣使貢 十年,倭國王濟遣使奉獻,復以爲安東將軍、倭國王。二十八年,加使持節、都督倭新羅任 軍、倭國王。。珍又求除正倭洧等十三人平西、征虜、冠軍、輔國將軍等號,三三詔並聽之。二 都督倭百濟新羅任那秦韓慕韓六國諸軍事、安東大將軍、倭國王,表求除正。 授。」文帝元嘉二年,讚又遣司馬曹達奉表獻方物。讚死,弟珍立,遣使貢獻,自稱使持節 一禰,躬擐甲胄,跋涉山川,不遑寧處。 東征毛人五十五國,西服衆夷六十六國,陵平海 孝武大明六年,詔授興安東將軍、倭國王。興死,弟武立,自稱使持節、都督倭百濟新 晉安帝時,有倭王讚遣使朝貢。及宋武帝永初二年,詔曰:「倭讚遠誠宜甄,可賜除 詔除安東將

秦韓慕韓六國諸軍事、自己安東大將軍、倭王。齊建元中,除武持節、都督倭新羅 志,竊自假開府儀同三司,其餘咸各假授,以勸忠節」。詔除武使持節、都督倭新羅任 九十五國。 一欲見吞。 王道融泰,廓土遐畿,累葉朝宗,不愆于歲。 臣亡考濟方欲大舉,奄喪父兄,使垂成之功,不獲一簣。 道逕百濟,裝飾船舫,而句麗無 今欲練兵申父兄之 任那 加羅 那 加 秦 羅

道,圖

北

南萬里有海人,身黑眼白,裸而醜,其肉美,行者或射而食之。 其 、南有侏儒國,人長四尺。 又南有黑齒國、裸國,去倭四千餘里,船行可一年至。 叉西

梁武帝卽位,進武號征東大將軍。

韓慕韓六國諸軍事、鎭東大將軍。

有枉 俗歡樂,物豐而賤,行客不齎糧。 丈,實以水銀,雨則流于水銀之上。 則獸避而不食,經宿則赦之。 文身國在倭東北七千餘里,人體有文如獸,其額上有三文,文直者貴,文小者賤。曰曰土 有屋宇,無城郭。 市用 珍寶。 犯輕罪者則鞭杖,犯死罪則置猛 國王所居,飾以金銀珍麗,繞屋爲塹,廣 獸食之,

大漢 或 在文身國東五 一千餘里,無兵戈,不攻戰,風俗並與文身國 同 而言語異。

爲 獄。 赤、績其皮爲布、以爲衣、亦以爲錦。曰三作板屋、無城郭。 此 朝 與 **芸昏姻法,則壻往女家門外作屋,晨夕灑掃,經年而女不悅卽驅之,相悅乃成昏。 昏禮大抵** 子孫,三重者則及七世。名國王爲乙祁。貴人第一者爲對盧, [12]第二者爲小對盧,第三者 國人大會,坐罪人於坑,對之宴飲分訣若死別焉。以灰繞之,其一重則一身屛退,二重則及 不攻戰。 地 國畜牛,以乳爲酪。有赤梨,經年不壞。[l+]多蒲桃。其地無鐵有銅,不貴金銀。 白,壬癸年黑。有牛角甚長,以角載物,至勝二十斛。有馬車、牛車、鹿車。國人養鹿如中 八中國 納 夕拜 在中國之東。其土多扶桑木、故以爲名。扶桑葉似桐、初生如笋、國人食之。實如梨而 咄沙。 五 在北獄者男女相配,生男八歲爲奴,生女九歲爲婢。犯罪之身,至死不出。貴人有罪, 扶桑國者,齊永元元年,其國有沙門慧深來至荆州,說云:「扶桑在大漢國東二萬餘里, 同。 人游行 奠,不制 其國法有南北獄,若有犯,輕罪者入南獄,重罪者入北獄。有赦則放南獄,不赦北 親喪七日不食,祖父母喪五日不食,兄弟伯叔姑姊妹三日不食。設座爲神像, 國王行有鼓角導從。其衣色隨年改易,甲乙年青,丙丁年赤,戊己年黃,庚辛年 其國,流通佛法經像,教令出家,風俗遂改。」 衰経。 嗣王立,三年不親 國事。其俗 舊無佛法。 有文字,以扶桑皮爲紙。無兵甲, 宋大明二年,罽賓國嘗有 市無租估。

慧深又云:「扶桑東千餘里有女國,容貌端正,色甚潔白,身體有毛,髮長委地。

列傳第六十九 夷貊下

九七七

月競 昹 H 不 鹹。 能 山 隐。 行,三四年則成 入水則任娠,六七月產子。 梁天監六年,有晉安人度海,爲 男則 人身而狗頭,其聲如吠。 人矣。 見人驚避,偏畏丈夫。 女人胸前無乳,項後生毛,自己根白,毛中有汁以乳子。 風所飄至一 其食有小豆,其衣如 島,登岸,有人居 食鹹草 如 布。 禽獸。 築 土爲牆,其形 止,女則 鹹 草葉似邪蒿, 如 中 圓,其戶 國 而 而 言語 氣 如如 香 百

竇云。」

垂,提. 河南 挈于魏,時通江左。 、岩昌、 鄧至、武 興,其本並爲氐、羌之地。 **今採其舊** 土,編于西戎云 自晉南遷,九州分裂,此等諸國,地分西

之 故 流 以 爲 卒, 廆 河南王 沙 號。 地 其 地 嗣 者, 事詳北 有 位,吐谷渾避之,西徙上隴,度枹罕, 麥無 乏草木,少水潦,四時恒有冰雪,唯六七月雨雹甚盛。 其先出自鮮卑慕容氏。 , 建。 穀。 其界東至疊川,西隣于闐,北接高昌,東北 有青海方數百里,放牝馬其側,輒生駒,土人謂之龍種,故其國多善 初, 慕容弈洛干有二子,庶長日吐谷渾, 出涼州 西南,至赤水 通秦嶺 若晴 而 則 居之。 方千餘里, 風 飄 沙 地 嫡)礫,常 在 日廆洛 河南 蓋古 蔽

有屋宇,雜以百子帳,即穹廬也。 著小袖袍,小口袴,大頭長裙帽。 女子被髮爲辮。

國中。 以王父字爲氏,因姓吐谷渾,亦爲國號。至其末孫阿豺,始通江左,受官爵。弟子熹延,宋 都督西秦河沙三州、鎭西將軍、護羌校尉、西秦河二州刺史。 元嘉末,又自號河南王。慕延死,從弟拾寅立,乃用書契,起城池,築宮殿。 有佛法。拾寅死,子度易侯立。易侯死,子休留代立。如回齊永明中,以代爲使持節 一世谷渾孫葉延,頗識書記,Clob自謂會祖弈洛干始封昌黎公,吾蓋公孫之子也。 其小王並立宅

立。大通三年,詔以爲寧西將軍、護羌校尉、西秦河二州刺史。眞死,子佛輔襲爵位,其世 子又遣使獻白龍駒於皇太子。 二口,又表於益州立九層佛寺,詔許焉。十五年,又遣使獻赤舞龍駒及方物。 三至,或再歲一至。 |梁興,進||代爲征西將軍。||代死,子||伏連||籌襲爵位。[三]||天監十三年,遣使獻金裝馬腦鍾 其地與益州隣,常通商賈。普通元年,又奉表獻方物。籌死,子阿羅眞 其使或歲再

安西將軍、東羌校尉、河凉二州刺史、隴西公、宕昌王。佩以金章。 獻方物。三三梁天監四年,王梁彌博來獻甘草、當歸。詔以爲使持節、都督河涼二州諸軍事、 宕昌國,在河南國之東、益州之西北隴西之地、宣西羌種也。宋孝武世,其王梁瑾忽始 爾博死,子彌泰立。大

同七年,復策授以父爵位。其衣服風俗與河南略同

屈 耽 舒 遣使 鄧 彭遣 至 獻 國,居 使獻 馬。 黃耆四 西涼州界,羌別 梁 天監元年, 百 斤,馬 詔 四 種 以鄧 匹。 也。 至 其俗 世 王象 號 呼帽 持節、平北 舒彭 日 [突何。 爲督西凉 將 軍 其 州 衣 西涼 諸 服 軍 與宕昌 州 事 刺 , 進 史。 同 號 宋 安 文帝時,王象 北 將 軍 五.

德 叉聚 以 孟 箾 北 死 難 靈 當 弟 孫 梁 都 子 族 武 珍 爲 州 文 衆 孟 督 度 葭蘆 爲 假 刺 興 秦雍 孫 立, 持 史、仇 節 或 廣 立。 節 督 香 本仇 宋 以 叉 督 沙 州 齊 因 池 弟 攻 諸 永 隴 州 公。 授 池 文 殺 明 右 以 諸 軍 弘 文度 楊難 諸 文洪 中 軍 事 爵 爲 位 白水 軍 事 ?,自立 魏 輔 當 死 事 平 南 或 自 、左 以以 太守 魏 羌 梁 將 爲陰 立 叉 將 校 州 族 軍 爲 攻之,文 尉 軍 人 刺 秦王, 平王 平羌 集 史 沙州 北涼州 始 仇 屯 一、葭蘆 德 校 武 爲 池 宋文 刺 奔漢 尉 北 興。 公楊 史、陰 刺 鎭 秦 帝遣裴方 史、 北 中。 主 宋 州 靈 平王 秦 珍據 世 刺 仇池 州 史、武 從弟 死 以 刺 泥 ,子 艮 立。 爲 明 史、 集始 功 武 僧 討之, 都 Щ 都 嗣 武 王 歸 王。 死 叉 年, 都 難當 自立 齊、三三齊武 |
見死。 子 玉。 梁 武 孟 紹 天 奔魏。 一,復戍 興 孫 監 先 靈 (之國 子 死, 襲 初 珍 崇 葭 蘆 爵 爲 自 帝 詔 以 其兄子文德 祖 位 冠 贈 集 以 立 於 卒。 軍 安沙將 始 靈 此 將 崇祖 珍為 爲 年 軍 持

列

傳

軍、北雍州刺史。 子定襲封爵。 紹先死,子智慧立。 大同元年,剋復漢中, 智慧遺使上表,

求率四千戶歸梁,詔許焉,卽以爲東益州。 其國東連秦嶺,西接宕昌。 其大姓有苻氏、 姜氏、梁氏。 言語與中 國 同。 著烏阜突騎

帽,長身小袖袍,小口袴,皮鞾。 地植九穀。婚姻備六禮。 知書疏。 種桑麻 出紬絹布漆

蠟椒等,山出銅鐵。

(書云「蠻夷猾夏」,其作梗也已舊。及于宋之方盛,蓋亦屢興戍役,豈詩所謂「 蠢爾蠻

荆,大邦爲讎」者乎。 今亦編錄以備諸蠻云爾。

雄溪、構溪、辰溪、酉溪、武溪,丘民〕謂之五溪蠻。而宜都、天門、巴東、建平、江北諸郡蠻所居 有數百千人、州郡力弱、則起爲盜賊、種類稍多、戶口不可知也。所在多深險。 而宋人賦役嚴苦,貧者不復堪命,多逃亡入蠻。 以領之。孝武初,罷南蠻併大府,而寧蠻如故。 荆、雍州蠻、盤瓠之後也、種落布在諸郡縣。 蠻無徭役,强者又不供官稅。 蠻之順附者,一戶輸穀數斛,其餘無雜調。 宋時因晉於荆州置南蠻、雍州置寧蠻校尉 結黨連郡,動 居武陵者有

皆深山重阻,人跡罕至焉。前世以來,屢爲人患。

百姓。 絕。 沮 之等五十人,七年,宜都蠻田生等一百一十三人,並詣闕獻見。 、當陽蠻反,縛臨沮令傅僧驥。 天門樓中令宋矯之徭賦過重、日刊蠻不堪命。 少 帝景平二年,宜都蠻帥石寧等一百二十三人詣闕上獻。 荆 州刺 史衡陽王義季遣行參軍曾孫念討破之,至五角矯之官。二十年,至五南郡臨 荆州刺史南譙王義宣遣中兵參軍王諶討破之。 十八年,蠻田 [向求等爲寇,破漊中, 虜掠 其後, 文帝元嘉六年,建平蠻張維 沔中蠻大動,行旅 殆

蠻叉反叛。 先是,雍州刺史劉道產善撫諸蠻,前後不附者,皆引出平土,多緣沔爲居。 至孝武出爲雍州、羣蠻斷道。 臺遺軍主沈慶之連年討蠻,所向皆平,事在慶 及道產亡,

之傳。

諸蠻。 千人係之,蠻乃散走。是歲,溫水諸蠻因險爲寇,雍州刺史隨王誕遣使說之,又遣 二十八年正月,龍山雉水蠻寇鈔湼陽縣,南陽太守朱韶遣軍討之,〔三〕失利。 襲濁山、如口、蜀松三柴,剋之,又圍斗錢、柏義 諸柴。 蠻悉力距戰, 軍大破 之。 軍討沔北 韶又遣二

存 侯 走清江 孝武 明 清江 帝、順 大明 神,建 去巴東千餘里。 帝世尤甚,荆州爲之虛弊云。 平蠻向光侯寇暴峽川, 時巴東、建平、宜都、天門四郡蠻爲寇、諸郡人戶流散,百不 巴東太守王濟、荆州刺史朱脩之遣軍討之。 光

水 謂之五水蠻。 像 州蠻,稟君後也。 所在並深岨,種落熾盛,歷世爲盜賊。 盤瓠、稟君事,並具前史。 西陽有巴水、蘄水、希水、赤亭水、 北接潍、汝,南極江、漢, 地方數 西歸

等相率斬世財父子六人。豫州刺史王玄謨遣殿中將軍郭元封慰勞諸蠻,使縛送亡命。 乃執智、安陽二人,送詣玄謨。孝武使於壽陽斬之。 遺慶之討西陽蠻,大剋獲而反。司馬黑石徒黨三人,其一名智,黑石號曰太公,以爲謀主。 有亡命司馬黑石逃在蠻中,共爲寇。文帝遣太子步兵校尉沈慶之討之。孝武大明四年,又 一人名安陽,號譙王,一人名續之,號梁王。蠻文山羅等討禽續之,至己爲蠻世財所篡,山羅 宋元嘉二十八年,西陽蠻殺南川令劉臺。 二十九年,新蔡蠻破大雷戍,略公私船入湖。

之爲宋安太守,光興爲光城太守。封益之邊城縣王,成邪財陽城縣王。 義,攻郢州剋之。以益之爲輔國將軍,都統四山軍事。 明帝初卽位,四方反叛,及南賊敗於鵲尾,西陽蠻田益之、田義之、成邪財、田光興等起 又以蠻戶立宋安、光城二郡。 成邪財死,子婆思

襲飦云。

列傳第六十九 夷貊下

有 時而至,論其風土,甚未能詳。今略備西域諸國,編之于次云。 玉門以西達于西海,考之漢史,通爲西域,高昌迄于波斯,則其所也。 自晉、宋以還,雖

袴。女子頭髮,辮而不垂,著錦纈纓絡環釧。 與華略同。 長史、司馬、門下校郎、中兵校郎、通事舍人、通事令史、諮議、諫議、校尉、主簿。 地高寧臨川橫截柳婆洿林新興由寧始昌篤進白力等鎭。〔言〕官有四鎭將軍,及置雜號將軍、 秦州諸軍事、秦州刺史、金城郡公。在位二十四年卒,國諡曰昭武王。子子堅,子堅嗣位,〔三〕 **諱據之稱王,一世而滅於魏。** 多草木,有草實如繭,繭中絲如細艫,名曰白疊子,國人取織以爲布。 屋,土覆其上。寒暑與益州相似,備植九穀,人多噉麵及牛羊肉。 魏授使持節、驃騎大將軍、散騎常侍、都督瓜州刺史、西平郡公[言]、開府儀同三司、高昌王。 其國蓋車師之故地,南接河南,東近敦煌,西次龜茲,北隣敕勒。置四十六鎮,交河田 高昌國,初闞氏爲主,其後爲河西王沮渠茂虔弟無諱襲破之。 有五經、歷代史、諸子集。面貌類高麗,辮髮垂之於背。著長身小袖袍、縵襠 其國人又推麴氏爲王,名嘉,魏授爲車騎將軍、司空公、都督 昏姻有六禮。其地高燥,築土爲城,架木爲 出良馬、蒲桃酒、石鹽。 其王闞爽奔于蠕蠕 布甚軟白,交市用焉。 國人言語 無

有朝鳥者, 旦旦集王殿前,爲行列,不畏人,日出然後散去。

梁大同中,子堅遣使獻鳴鹽枕、蒲桃、良馬、氍氀等物。

侯。 自魏 滑國者,車師之別種也。 、晉以來, 不通中國。 漢永建元年,八滑從班勇擊北虜有功, 至梁天監十五年,其王厭帶夷栗陁始遣使獻方物。 勇上八滑為後部 普通 親 漢

年,遣使獻黃師子、白貂裘、波斯錦等物。

七年,又奉表貢獻

通,則使旁國胡 屋爲居,東向開戶。 人以麵及羊 龜茲、疏勒、姑墨 玉爲帶。 魏之居代都,滑猶爲小國,屬蠕蠕。 止。 女人被裘,頭上刻木爲角,長六尺,以金銀飾之。 葬以木爲槨。 肉爲糧。 爲胡書,羊皮爲紙。 、于闐、句般等國,開地千餘里。 其王坐金床, 其獸有師子、兩脚駱駝,野驢有角。 父母死,其子截一耳,葬訖卽吉。 隨太歲轉, 與妻並坐接客。 無職官。 後稍强大,征其旁國波斯、渴盤陀、〔三〕罽賓 事天神、火神、每日則出 土地溫暖, 人皆善騎射,著小袖長身袍,用金 少女子,兄弟共妻。 其言語待 多山川, 無文字,以木爲 河南 戶 少樹木, 加 神 人 譯 而 然 後食。 契。 有五 無城郭,氈 後 へ、焉耆、 與旁 通 其跪 或 國

元年

मिम

跋檀

周

古柯、胡密丹等國,並滑旁小國也。

凡滑旁之國,衣服容貌皆與滑同。

普通

一使使隨滑使來貢獻方物。

方物。

也。 在滑國東,去滑六日行,西極波斯。 白題國王姓支名史稽毅,其先蓋匈奴之別種胡也。 土地出粟、麥、瓜果、食物略與滑同。 漢灌嬰與匈奴戰,斬白題騎一人是 普通三年,遣

龜茲者,西域之舊國也。 自晉度江不通,至梁普通二年,王尼瑞摩珠那勝遣使奉表

貢獻。

使獻方物。

鄣。 十八年,又獻瑠璃甖。一大同七年,又獻外國刻玉佛。 于闐者,西域之舊國也。 梁天監九年,始通江左,遣使獻方物。 十三年,又獻波羅婆步

十餘 資 以爲糧。 里。 渴 盤陁國,于闐西小國也。西隣滑國,南接罽賓國,北連沙勒。 國有十二城,風俗與于闐相類。 多牛馬駱駝羊等。 出好氈。 王姓葛沙氏,梁中大同元年,江南始通江左,遣獻 衣古貝布,著長身小袖袍、小口袴。 國都在山谷中,城周回 地 宜 小

氈帽 末國, 、小袖衣,爲衫則開頸而縫前。 漢世且末國也。 勝兵萬餘戶。 多牛羊騾驢。 北與丁零、東與白題、西與波斯接。 其王安末深盤,梁普通五年, 土人剪髮,著 始通江左,

遣使來貢獻

國、北與泛慄國接。「是」梁中大通二年,始通江左,遣使獻佛牙。 龍駒馬。 婦亦如之。 市買用金銀。 非過高,其勢連接甚遠。 城高四丈,皆有樓觀。 波斯國, 鹹池生珊瑚樹,長一二尺。[雲]亦有武魄、馬腦、眞珠、玫瑰等、[長]國內不以爲珍。 婦兄弟便來捉手付度,夫婦之禮,於茲永畢。 昏姻法,下娉財訖,女壻將數十人迎婦。壻著金線錦袍、師子錦袴,戴天冠。 其先有波斯匿王者,子孫以王父字爲氏, 城內屋宇數百千間,城外佛寺二三百所。西去城十五里有土山,山 中有鷲鳥噉羊,土人極以爲患。國中有優鉢曇花,鮮華可愛。出 因爲國號。 國東與滑國、西及南俱與娑羅門 國有城周回三十二里,

北狄種類實繁、蠕蠕爲族、蓋匈奴之別種也。 魏自南遷,因擅其故地。[80] 無城郭,隨

水草畜牧,以穹廬居。 辮髮,衣錦小袖袍、小口袴、深雍韡。 其地苦寒,七月流澌亘河

攻魏。 獻 四年,遣使獻馬、貂裘。四三普通元年,又遣使獻方物。 匹,金一斤。 師子皮袴褶。 宋昇明· 其相國 中,遣王洪範使焉,引之共謀魏。四三齊建元三年,洪範始至。 刑基祇羅回表,言「京房讖云:『卯金卒,草肅應王。』歷觀圖緯,代宋者齊。」又 其國後稍侵弱,永明中,爲丁零所破,更爲小國 是後數歲一至焉。 而南移其居。四回梁天監十 大同七年,又獻馬 是歲通使,求幷力

爲之,則不能雨,問其故,蓋以暝云。 其國能以術祭天而致風雪,前對皎日,後則泥潦橫流,故其戰敗莫能追及。 或於中夏

有序。 嘉 無聞竹素,豈所謂有德則來,無道則去者也。 撫運、爰命干戈、象浦之捷、日間威震冥海。 論 及侯景之亂,邊鄙日蹙。 曰:自晉氏南度,介居江左,北荒西裔,隔礙莫通。 陳氏基命,衰微已甚,救首救尾,身其幾何。 於是鞮譯相係,無絕歲時。 至於南徼東邊,界壤所接,洎宋元 以泪 齊、梁, 故西費南琛

校勘記

- 其王都於丸都山下 「丸都」各本作「九都」,據梁書改。 按三國志魏志、梁書無「山」字。
- 於所居之左立大屋 「立大屋」各本倒作「大立屋」,據三國志魏志、梁書乙。
- = 阜衣先人 「阜衣」各本作「帛衣」,據三國志魏志、梁書改。
- 29 本有五族有消奴部絕奴部愼奴部灌奴部桂婁部 「愼奴部」三國志魏志、後漢書並作「順奴部」,

梁書避蕭衍父順之諱作「愼奴部」,此循之未回改。

- (五) 行步皆走 「步」字各本並脫,據魏志、梁書補。
- へない 其死葬有椁無棺 「死」下各本並脫「葬」字、據梁書補。
- しもし 宋武帝踐阼加璉 征東大將軍 「征東」各本作「鎭東」,據宋書改。 按「鎭東大將軍」時以之封百

濟王,見百濟傳。

- 以爲使持節散騎常侍都督營平二州征東大將軍高麗王樂浪公 「高麗王」 三字各本並脫,據南齊書補。 按下云「持節、常侍、都督、王並如故」,明 「二州」下南齊書有 「諸軍 此脫 事
- 一九山 書疊一「使」字。 王姓募名泰始使使隨百濟奉獻方物 泰」汲古閣本、金陵書局本及梁書作「秦」。 「使」下從梁

「高麗王」三字。

- 〔10〕壹吉支 梁書作「壹告支」。
- [1] 男女皆露霁 「昦」梁書作「紒」,魏志云「男子皆露紒」。
- 珍又求除正倭洧等十三人平西征虜冠軍輔國將軍等號 「倭洧」宋書作「倭隋」。
- 詔除武使持節都督倭新羅任那加羅秦韓慕韓六國諸軍事 「加羅」據南齊書補。
- 文小者賤 「文小者」太平御覽七八四引、通志作「文小曲者」。
- 〔三〕亦以爲錦 「錦」梁書作「綿」。
- 〔六〕貴人第一者爲對盧 「對盧」梁書作「大對盧」。
- 14〕有赤梨經年不壞 「赤梨」梁書作「桑梨」。
- 一八」項後生毛 「項後」各本作「頂後」,據梁書改。
- 其後吐谷渾孫葉延頗識書記 「葉延」各本作「葉廷」、據梁書、晉書改。
- 子度易侯立易侯死子休留代立 「度易侯」南齊書作「易度侯」,此同梁書、通鑑。「休留代」南齊

書作「休留茂」。

- 子伏連籌襲爵位 運」當作「伏連」。 「伏連籌」各本作「休運籌」,據册府元龜九六七改。錢大昕廿二史考異謂「休
- 宕昌國在河南國之東益州之西北隴西之地 列 傳 第 六 + 九 校 勘 記 梁書「東」下有「南」字,「隴西之」下無「地」字。 九八九

[]] 其王梁瑾忽始獻方物 「梁瑾忽」梁書作「梁瓘忽」。

文德弟文度立以弟文弘爲白水太守 「文度」照齊書作「文慶」,此同宋書。 「文弘」各本作「文

洪」,據宋書、南齊書改。 通鑑考異:「楊文弘、魏書本紀作楊黽、氏傳作鼠。 皆避顯祖諱也。」按

魏顯祖名弘、故爲諱改、則字本作「弘」、作「洪」者非。

C語 魏南梁州刺史仇池公楊靈珍據泥功山歸齊 「泥功山」各本作「泥切山」,據梁書改。按南齊書

魏麡傳又作「泥公山」。

〇六 武溪 宋書作「舞溪」,是。

Cirl 天門漊中令朱矯之徭賦過重 「朱」朱書作「宗」。

[三八] 曾孫念討破之 「曾」宋書作「曹」。

〇元〕二十年 宋書作「二十四年」。

南陽太守朱韶遣軍討之 「朱韶」朱書作「朱曇韶」。 下同。

蠻文山羅等討禽續之 「文山羅」朱書作「文小羅」。 下同

[三] 子子堅子堅嗣位 各本作「子堅堅嗣位」,據梁書補正。

西平郡公 魏書、北史並作「平四郡公」、梁書作「河西郡開國 公。

置四十六鎭交河田地高寧臨川橫截柳婆洿林新興由寧始昌篤進白力等鎭 「由寧」各本作「寧

由」,據梁書改。「白力」各本作「白刃」,梁書作「白刀」,蓋卽北史之「白棘」、 魏書唐和傳之「白

力」、「白刃」、「白刀」並譌、今據改。

〇五 征其旁國波斯渴盤陀 「渴盤陀」各本作「盤盤」,據通志改。 按盤盤為海南諸國, 與西域諸國

不相 連。 下有渴盤陁國云:「西鄰滑國,南接罽賓。」正與此「旁國」合。

呈 梁中大同元年 「中大同元年」各本作「中大同七年」,據梁書改。 按中大同只一年。

鹹池生珊瑚樹長一二尺 「鹹池」各本作「鹹地」,據梁書改。

亦有武魄馬腦眞珠玫瑰等 「武魄」本字「虎魄」,此避唐諱改。

日む 國東與滑國西及南俱與娑羅門國北與泛慄國接 「東與滑國」各本脫,據梁書補。

CEO) 因擅其故地 「故地」各本互倒作「地故」,據梁書乙正。

宋昇明中遣王洪範使焉引之共謀魏 「王洪範」各本作「王洪軌」,據通鑑齊高帝建元元年紀改。

說見卷七十至與模勘記第二十一條。

〔四〕 更爲小國而南移其居 「南」字各本並脫,據梁書補。

[四] 遣使獻馬貂裘 「馬貂裘」梁書作「鳥貂裘」。

[B] 象浦之捷 「捷」各本作「絕」,今改正。

南史卷八十

列傳第七十

賊臣

侯景 王偉 熊曇朗 周迪 留異 陳寶應

史。始魏相高歡微時,與景甚相友好,及歡誅今朱氏,景以衆降,仍爲歡用。稍至吏部尚書, 朱榮,甚見器重。初學兵法於榮部將慕容紹宗,〔1〕未幾紹宗每詢問焉。後以軍功爲定州刺 非其好也。 侯景字萬景,魏之懷朔鎭人也。少而不羈,爲鎭功曹史。 每獨曰:「何當離此反故紙邪。」尋封濮陽郡公。 魏末北方大亂, 乃事邊將介

歡以告其妃婁氏,曰:「彼若得泰,亦將不歸。得泰失景,於事奚益。」歡乃止。後爲河南道大 行臺,位司徒。又言於歡曰:「恨不得緣。請兵三萬,橫行天下,要須濟江縛取蕭衍老公,以

作 太平寺主 |。」||歡壯其言,使擁兵十萬,專制|河南,仗任若己之半體。

若賜以書,請異於 景 似豕 右 足 突爾,勢何所 短 弓馬 **が他者。**」 ,非其長,所在唯以智謀。 許之。 至。 及將鎭河南,請于歡 每與景書,別加微點, 時歡 部 日 雖 將 今握 高昂、 子 弟 兵在遠, 弗之知 彭樂皆雄勇冠時, 姦 人易生 詐 唯景常輕 爲,

是歲 臺 南 至, 郎 北 校景 Ê 諸軍 中 及 歡 1 月乙卯於 實 和 疾篤 事 以正 ·(三 上 表 ,其世子 月乙卯日定計, 、求降。 善言殿 大行臺,承制 澄矯書召之。 帝召 讀 佛經,因 ·羣臣議之,尚書僕射謝舉等皆議納景非便,武帝 如 鄧禹 帝由 「謂左· 景知 是納之。 故 事 右黃慧弼 偽,懼 於是封景河南王、大將軍、使持節 調,因 日 ::「我昨夢天下太平,爾其 用王 偉計,乃以太淸元年二 不 識 從。初,帝 、董督 之。 月遣 其行 及 河 和

以

兗 仁 請 遣 長 救 高 史鄧 于 澄 西 嗣 魏 鴻 事 爲 率 魏遣五 兵至 勃海王,遣 一汝水,元慶 城 王 元慶等率 其將慕容紹宗 軍 夜 遁 兵救之, 鴉仁 重 景於長社。 乃據懸瓠 紹宗 乃退。 景急, 景復 詩 乃求割魯陽、長社、東荆、北 兵於 司 州 刺 史羊 鴉仁,

終 其 身 時 景 ,所部文武更不 將蔡道 遵北 歸,言景有悔 追攝,闔門無恙,幷還寵妻愛子。 過 志。 高澄 以 爲信然,乃以 景報書不從。 書喻景,若還,許以 澄知景無歸志, 豫州 乃遣 刺 史

軍

相繼

討景。

列傅第七十 賊臣

子弟立爲魏主。詔遣太子舍人元貞爲咸陽王,須度江許卽位,以乘輿之副資給之。 紹宗攻潼州,刺史郭鳳棄城走。 帝聞鴉仁已據懸瓠,遂命羣帥指授方略,大舉攻東魏,以貞陽侯蕭明爲都督。明軍敗見 景乃遣其行臺左丞王偉、左戶郎中王則詣闕獻策,請

紹宗遙謂曰:「爾等家並完。」乃被髮向北斗以誓之。景士卒並北人,不樂南度,其將暴顯等 徐以啓聞,朝廷喜王南歸,必不責也。」景執其手曰:「天教也。」及至,而歸授甲登陴。景謂 此不遠,城池險固,韋黯是監州耳。王若次近郊,必郊迎,因而執之,可以集事。得城之後, 殺言者而去。 |石濟||淮,稍收散卒,得馬步八百人。南過小城,人登陴詬之曰:「跛脚奴何爲邪!」景怒,破城 各率所部降紹宗。 又爲景敗。紹宗謂曰:「定何如也。」相持連月、景食盡,誑其衆以爲家口並見殺。 衆皆信之。 曰:「吾戰多矣,未見此賊之難也。 如其言。景命戰士皆被短甲短刀,但低視斫人脛馬足,遂敗紹宗軍。裨將斛律光尤之,紹宗 曰:「將決戰。」遂順風以陣。景閉壘,頃之乃出。紹宗曰:「景多詭,好乘人背。」使備之,果 高澄又遣慕容紹宗追景,景退保渦陽,使謂紹宗曰:「欲送客邪?將定雄雌邪。」紹宗 旣而莫適所歸,馬頭戍主劉神茂者,爲韋黯所不容,因是踣馬乃馳謂景曰:曰「壽陽去 晝夜兼行,追軍不敢逼。使謂紹宗曰:「景若就禽,公復何用。」紹宗乃縱之。 景軍潰散,喪甲士四萬人,馬四千匹,輜重萬餘兩。乃與腹心數騎自硤 爾其當之。」光被甲將出,紹宗戒之曰:「勿度渦水。」旣而

神茂 開門納景。景執黯,數將斬之,久而見釋。乃遣于子悅馳以敗聞,自求貶削。優詔不許。復 日:「事不諧矣。」對曰:「黯懦而寡智,可說下也。」乃遣豫州司馬徐思玉夜入說之,黯乃

帝以景兵新破,未忍移易,故以鄱陽王範爲合州刺史,卽鎮合肥。魏人攻懸瓠,懸瓠糧

少,羊鴉仁去懸瓠歸義陽。

求資給,即授南豫州刺史,本官如故。

敗後,多所徵求,朝廷含弘,未嘗拒絕。 請送青布以給之。又以臺所給仗多不能精,啓請東冶鍛工欲更營造,敕並給之。景自渦陽 配將士。又啓求錦萬疋爲軍人袍,中領軍朱异議以御府錦署止充頒賞,四不容以供邊用, 王其圖之。」於是遂懷反計。屬城居人,悉占募爲軍士。輒停責市估及田租,百姓子女悉以 可於,保、張以下訪之。」景恚曰:「會將與兒女以配奴。」王偉曰:「今坐聽亦死,舉大事亦死, |侯景夕反。||景謂左右曰:「我知吳兒老公薄心腸。」又請娶於|王、謝,帝曰:「王、謝門高非偶, 寧肯束手受繫。」謝舉、朱异曰:「景奔敗之將,一使之力耳。」 帝從之,復書曰:「貞陽旦至, 人書,求以貞陽侯換景。帝將許之。舍人傅岐曰:「侯景以窮歸義,棄之不祥。且百戰之餘, 魏人入懸瓠,更求和親,帝召公卿謀之。 張綰、朱异咸請許之。 景聞未之信,乃僞作鄴

是時貞陽侯明遣使還梁,述魏人請追前好,許放之還。武帝覽之流涕,乃報明啓當別

遣行 帝亦欲息兵,乃與魏和通。 景聞之懼,馳啓固諫,帝不從。 爾後表疏跋扈,言辭不

遜。又聞遣伏挺、徐陵使魏,不知所爲。

其不許,卽領甲臨江,上向閩、越。非唯朝廷自恥,亦是三公旰食。」帝使朱异宣語答景使曰: |江左有佞邪之臣,一旦入朝,乃致囂讟,寧堪粉骨,投命讎門。 請乞||江西一境,受臣控督;如 聞。 正德怨望朝廷,密令要結。正德許爲內啓。 「譬如貧家畜十客五客,尙能得意,朕唯有一客,致有忿言,亦是朕之失也。」景又知臨賀王 「高澄狡猾,寧可全信。 景又招司州刺史羊鴉仁同逆,鴉仁錄送其使。 元貞 朱异曰:「侯景數百叛虜,何能爲役。」並抑不奏聞,景所以姦謀益果。 乃上言曰: 知景異志,累啓還朝。 陛下納其詭語,求與連和,臣亦竊所笑也。臣行年四十有六,未聞 景謂曰:「將定江南,何不少忍。」貞益懼,奔還建鄴,具以事 時鄱陽王範鎭合肥,及鴉仁俱累啓稱景

敕:斬景者不問南北人同賞封二千戶兼一州刺史,其人主帥欲還北不須州者,賞以絹布二 攻馬頭、木棚、執太守劉神茂、戍主曹璆等。武帝聞之,笑曰:「是何能爲,吾以折箠笞之。」乃 領軍朱异、少府卿徐麟、太子左率陸驗、制局監周石珍爲辭,以爲姦臣亂政,請帶甲入朝。先 以禮發遣。於是詔合州刺史鄱陽王範爲南道都督, 二年八月、景遂發兵反,於豫州城內集其將帥, 登壇歃血。 北徐州刺史封山侯正表爲北道都 是日地大震。 於是以誅中

列

傳

第七十

賊

臣

司 州 刺 史柳 仲禮爲 西道都督,通 直散騎常侍裴之高為東道都督,同討景, 濟自歷陽。 叉

今侍中、開府儀同三司邵陵王編持節,董督衆軍。

遣弟 禍 刺史 也。 兵 聞 景 2豐城 拙 均 留 景 乃 聞 夜 偽 速 使 中 **斫景營,戰沒。** 侯 示不 之,謀於王偉。 鐵 泰。 軍 聞 大都督王貴顯守壽春城,至 爲 I. 導。 武帝聞 遲, 令今便 之,遺太子家令王質率兵三千巡江 鐵 **障曰:「莫若直掩揚都,臨賀反其內,** 母愛其子,勸鐵降。 須 進路,不然邵陵 出 軍 景拜其母,鐵乃勸景曰:「 偽 及 向 人。」九月, 合肥、塗襲譙州。 一遇防。 景發壽春,聲 大王攻其外, 景進攻歷陽 助 防董紹先降之, 急則應 云游獵, 天下不足定也 太守莊 機,緩必致 人不 鐵 執 覺 鐵

信, 获, 矣。 $\frac{2}{2}$ 乃自 乃密遣覘之, 是 實 時 采石 鎭 擬 濟景。 戍 濟,馬數百 相 次 謂使者:「質若退,折江 景 啓 至江 聞, 匹,兵八千 將度, 朱异尚日 慮王質 人,都下 「景必無度江志。」 爲 東 梗, 樹枝爲驗。」覘 弗之覺。 俄 而 質被追為丹陽 蕭正 人如言 一德先遣大船 而 尹 返。 一無故 景大喜 自 數 退。 + 日 艘 景 偽 聞 吾 稱 事 未 載 辨 之

停中書省指授,內外擾亂相劫不 見 事 急,入 景出 ,分襲姑孰 面 啓武 帝 ,執淮南 曰:「請以 太守文成侯寧,遂至慈湖。 事 復通 垂 一付, 願 於是韶以揚州刺史宣城王大器爲都督內外諸軍事 不 勞聖心。」帝 日一此 南津校尉 自 汝 江 事 子 何 奔還建鄴 更問 爲。」 。皇太子 太子仍

都 官尚書羊侃爲軍師將軍以副焉。 遣南浦侯推守東府城,西豐公大春守石頭,輕車長史謝

| 稿守白下。

耳。」景旣 曰:「今者之舉,何以爲名。」景曰:「欲爲帝也。」王偉進曰:「朱异、徐驎諂黷亂政, 實 欲 觀 旣 城 面 中虚 景 出惡言,留季不遣,寶亮還宮。 至朱雀航,遺徐思玉入啓,乞帶甲入朝,除君側之惡,請遣了事舍人出相領解, 實。 帝遣· 中書舍人賀季、主書郭寶亮隨思玉往勞之于板橋。 景北 面 欲除姦臣 受敕,季

游 白 未 建 爲 康 (袍) 采色尚青。 景乘白馬,青絲爲轡,欲以應謠。 蕭正德先屯丹陽郡,至是率所部與景合。 下 庫 軍 城 復 令庾信率兵千餘人屯航北,及景至徹航 便 先是,大同 走。 閉 奔 航 景 度景。 乘勝 中童謠曰:「靑絲白馬壽陽來。」景渦陽之敗,求錦,朝廷所給靑布,及是皆用 至闕下。 皇太子以所 西豐公大春藥石頭城走, 乘馬授 王質,配精兵三千,使援庾信。 分始除 一舶,見賊軍皆著鐵 景遣其儀同于子悅據之。 質 面,遂棄軍走。 至領軍府與 謝 禧 (賊遇) 亦棄 南塘

夜,簡文募 之方 景 滅。 遣 百 人出 賊 道 攻城,縱 叉 焼東 斫 東掖門將 宫 .臺殿遂盡,所聚圖籍數百厨, 火燒大司馬、東西華諸門。 入,羊侃鑿門 扇刺 殺 數 城中倉卒未 人,包財乃退。 皆灰燼。 有備, 先是簡文夢有 又登 乃鑿門樓,下水沃 東宮牆 人畫 射 城 作秦始 、內。至

列

以膏蠟,叢下焚之。

百 攻城 ,云「此人復焚書」,至是而驗。 ,城上擲以石,並皆碎破。

[5] 賊又作尖頂木驢,狀似槥,石不能破。 景又燒城西馬廐、土林館、太府寺。 明日,景又作木驢數 乃作雉尾炬,灌

鐡 珍等。城內亦射賞格出 乃奔歷陽,給言景已梟首。 賊 旣不剋, 士卒死者甚多,乃止攻,築長圍以絕內外。 外,有能斬景首,授以景位,幷錢一 景城守郭駱懼,棄城走壽陽。 億萬,布絹各萬疋,女樂二部。 又啓求誅朱异、陸驗、徐驎、周石 鐵得入城,遂奔尋陽。

攻東 驅 及 故 暉 城 立 略 一號以 府 內文武倮身 十 守東府 城 一月,景立蕭正德爲帝,卽僞位,居於儀賢堂,改年曰 應之。 ,設百尺樓車,鉤城堞盡落。 城 識者以爲正德卒當平殄也。 而 出,使交兵殺之,死者三千餘人。 城陷、景使其儀同盧暉略率數千人持長刀夾城門、悉 景自為 南浦侯推是日遇害。 相國、天柱將軍,正德以女妻之。 正平。 初童謠有「正平」之言, 景使正德子見理 景又

巡城 初 上 景至都,便唱云 將登城,陸驗 諫 「武帝已晏駕」。 曰:「陛下萬乘之重, 雖城內亦以爲然。 世可 輕脫。」因 泣下。 簡文慮人情有變,乃請 帝深感其言, 乃幸大司 上興駕

馬門。 城 F 聞 | 蹕聲皆鼓譟,軍人莫不屑涕,百 姓乃安。

景 又於城東西各起土山以臨城,城內亦作兩山以應之,簡文以下皆親畚锸。初,景至便 列傳第七十 賊臣

拔,賞以不次。朱异家黥奴乃與其儕踰城投賊, 錦袍詬曰:「朱异五十年仕宦,方得中領軍。我始事侯王, 殺掠,交尸塞路。 望剋定建鄴,號令甚明,不犯百姓。 富室豪家,恣意裒剝,子女妻妾,悉入軍營。 旣攻不下,人心離沮,又恐援軍總集,衆必潰散, 景以爲儀同,使至闕下以誘 已爲儀同。」於是奴僮競出,盡皆 又募北 人先為 城 奴者, 內, 乃縦 乘馬 並. 令 自 披 兵

山,不限貴賤,晝夜不息,亂加敺棰,疲羸者因殺以塡山,號哭之聲動天地。 並出從之,旬日間衆至數萬 景食石頭常平倉旣盡,便掠居人,爾後米一升七八萬錢,人相食,有食其子者。 百姓不 敢藏隱 又築土 得志。

主陳昕 賜容。 與之。 而桃棒軍人魯伯和告景,並烹之。 知,一旦傾危,悔無及矣。」桃棒又曰:「今止將所領五百餘人,若至城門,自皆脫甲。 曰:「吾卽堅城自守,所望外援,外援若至,賊豈足平。 景儀同范桃棒密貧重賞,求以甲士二千人來降,以景首應購,遣文德主帥前白馬游 夜踰 事濟之時,保禽侯景。」簡文見其言愈疑之。 簡文恐其詐,猶豫不決。上怒曰:「受降常理,何忽致疑。」朱异、傅岐同請納之。 城入,密啓言狀。 簡文以啓上,上大悅,使報桃棒,事定許封河 朱异以手搥胸曰:「今年社稷去矣。」 俄 今若開門以納桃棒,桃棒 南王,鐫銀券以 之意尚 乞朝廷 且難 簡文 軍

超 、武州刺史蕭弄璋、步兵校尉尹思合等馬步三萬,發自京口,「亞直據鍾山。 至是,邵陵王編率西豐公大春、新淦公大成、永安侯確、南安鄉侯駿、前譙州刺史趙伯 景黨大駭,咸

景分軍屯南岸。 傷其口,景義而釋焉。 邵陵王。」霍儁獨云:「王小失利,已全軍還京口,城中但堅守,援軍尋至。」語未卒,賊以刀 執四豐公大春、綸司馬莊丘慧達、直閣將軍胡子約、廣陵令霍儁等來送城下,逼令云:「已禽 退。 銳卒拒綸,陣於覆舟山北,與綸相持。會暮,景退還,南安侯駿率數十騎挑之。景回軍,駿 鄉萬里,走欲何之。戰若不捷,君臣同死。草間乞活,約所不爲。」景乃留宋子仙守壁,自將 欲逃散,分遣萬餘人拒戰。綸大敗之於愛敬寺下。 時趙伯超陣於玄武湖北,見駿退,仍率軍前走。 景初聞綸至,懼形於色,及敗軍還,尤言其盛,愈恐,命具舟石頭將北濟。 正德乃收而害之。是日,鄱陽世子嗣、裴之高至後渚,結營于蘇洲。 衆軍因亂,[10]遂敗績。 綸奔京口。 任約日:「去

攻具,賊乃退。是時,景土山成,城內土山亦成。以太府卿韋黯守西土山,左衞將軍柳津守東 輪,陳於闕前,百道攻城。以火車焚城東南隅大樓,自己因火勢以攻城。城上縱火,悉焚其 十二月,景造諸攻具及飛樓、橦車、登城車、鉤堞車、階道車、火車,並高數丈,車至二十 山起芙蓉層樓,高四丈,飾以錦罽,捍以烏笙,山峯相近。募敢死士,厚衣袍鎧,名曰

列傳第七十 贼臣

升之樓車 地 如 僧騰 道, 却月以 、毁外 客」, 四四 **捍之,賊乃退。** 山,擲雉尾 配二山, 面 並 至。 交矟 炬燒其櫓堞。 城 以戰。 內飛石碎 鼓 其車, 賊死積於城下。 叫沸騰,昏旦不息。 外山 崩,壓賊且 盡。 土山攻戰旣苦,人不 賊又作蝦蟆車, 賊叉掘 城東南角, 運 土石 堪命,柳津 城內作迂 塡 塹, 城 戰 命 形 作 士

陳文徹 貫甲 寺門樓以望之。見韋粲營壘未合,度兵擊之,粲敗,景斬粲首徇 自是賊不敢濟岸。 等皆來 居人營寺,莫不咸盡。 ·,與數十人赴之。 材官將軍宋嶷降賊, 李孝欽 赴援,鄱 陽 屯丹陽郡 過世子嗣、 遇賊,斬首數百,仍投水死者千餘人。 司 州刺 、二部陽世子嗣 、裴之高又濟江。柳仲禮營朱雀航南,裴之高營南苑,韋粲營青塘 因爲立計,引玄武湖水灌臺城,闕前御街並爲洪波矣。 史柳仲禮 演州 營小航南,並緣淮造栅。 刺史章粲、南陵太守陳文徹、宣猛將軍 仲禮深入,馬陷泥,亦被重創 城下。 及旦,景方覺,乃登禪 柳仲禮 聞 粲 又燒南岸 敗,不遑 李孝 靈 欽

兵繼 吳曄 棚,遂營于靑溪水東。 至。 、天門太守樊文皎赴援,營于湘子岸 邵 陵王 旣 | 綸又與臨城公大連等自東道集于南岸 而 鄱陽世 子嗣、永安侯確、羊鴉仁、李遷仕、樊文皎率衆度淮,攻破賊東 景遣其儀同宋子仙緣水西立栅以相拒。景食稍盡,人相食者十五六。 前 高温。 州刺史李遷仕、 荆州 刺史湘東王繹遣世子方等、 前 司州 刺史羊鴉 兼 府 城前 叉 司 率

列營而 初 立,互相疑貳。 援兵至 北 岸, 邵陵 衆號百萬。 王綸、柳仲禮甚於讎敵,臨城公大連、永安侯確逾於水火,無有 百姓扶老攜幼以 候王師, 纔過淮, 便競剝掠,徵責 金銀銀

鬭心。 賊黨有欲自拔者,聞之咸止。

者太半。 禍 屠馬於殿省間鬻之,雜以人肉,食者必病。賊又置毒於水竇,於是稍行腫滿之疾,城中疫死 乃壞尙書省爲薪,撤薦剉以餇馬,盡又食飰焉。御甘露厨有乾苔,味酸鹹,分給戰士。 賤並出 之術,叉射下之,其危急如此。是時城中圍逼旣久,膎味頓絕,簡文上厨,僅有一肉之膳。軍 鴉 士煮弩燻鼠捕雀食之。殿堂舊多鴿羣聚,至是殲焉。初,宮門之閉,公卿以食爲念,男女貴 敗之狀,皆如所陳,南人咸以爲讖 緊以長繩,藏敕於中。 賊之始至,城中纔得固守,平蕩之事,期望援軍。 . 負米,得四十萬斛,收諸府藏錢帛五十億萬,並聚德陽堂,魚鹽樵採所取蓋寡。 初、景之未度江、魏人遣檄、極言景反覆猜忍,又言帝飾智驚愚,將爲景欺。 簡文出太極殿前,因西北風而放,冀得書達。 旣而中外斷絕, 羣賊駭之,謂是厭勝 有羊車兒獻計,作紙 軍人

路 邈 絕,野無所掠,嬰兒掌上,信在於今。未若乞和,全師而反。」景乃與王偉計,遣任約至城北 ?說景曰:「大軍頓兵已久,攻城不拔,今衆軍雲集,未易可破。如聞軍糧不支一月, 運漕 時景 軍亦飢,不能復戰。東城有積粟,其路爲援軍所斷,且聞湘東王下荆州兵。 彭城劉

旣 拜表偽降,以河南自効。 曰:「和不如死。」簡文曰:「城下之盟,乃是深恥,白刃交前,流矢不顧。」上遲回久之,曰:「爾 而 城中日蹙,簡文乃請武帝曰:「侯景圍逼,旣無勤王之師,今欲許和,更思後計。」帝大怒 帝曰:「吾有死而已,寧有是議。 且賊凶逆多詐,此言云何可信。」

自圖之,無令取笑千載。」乃聽焉。

送與于子悅、王偉等登壇共盟。 右衞將軍柳津出西華門下,景出其栅門,與津遙相對,刑性 款出送, 詔許焉。 遂於<u>西華門外設壇,遺尚書僕射王克、兼侍中上</u>甲鄉侯韶、兼散騎常侍蕭 丞王偉入城爲質。 景請割江右四州地,幷求宣城王大器出送,然後解圍濟江。 中領軍傅岐議以宣城王嫡嗣之重,有輕言者請劍斬之。乃請石城公大 仍許遣其儀同于子悅、左

歃血

足,權借廣陵、譙州,須征得壽春、鍾離,即以奉還朝廷。」 之。景遂運東城米于石頭,食乃足。又啓云:「西岸信至,高澄已得壽春、鍾離,便無處安 「永安侯、趙威方頻隔栅詬臣,云『天子自與爾盟,我終當逐汝』。乞召入城,卽進發。」敕並召 · 景慮北軍自白下而上, 斷其江路, 請悉勒聚南岸。 敕乃遣北軍並進江潭苑。 景又啓稱: 南兗州刺史南康嗣王會理、前青冀二州刺史湘潭侯退、西昌侯世子彧率衆三萬至于馬

時荆州刺史湘東王繹師于武成,河東王譽次巴陵,前信州刺史桂陽王慥頓江津,並未

骨鯁士· 未及度江,童子能斬之,必不 也,每恨湘東不入援。 旣 而 有 敕 班師, 湘東王欲旋。 一爲也。 嘗與王雙六,食子未下,賁曰:「殿下都無下意。」王深爲憾,遂 大王以十萬之師,未見賊而退,若何」湘東王不悅。貴, 中記室參軍蕭賁曰:「景以人臣舉兵向闕, 今若放兵,

因事害之。

府城 入殿陳謝曰:「臣旣與高氏有隙,所以歸投,每啓不蒙爲奏,所以入朝。 初,城圍之日,男女十餘萬,貫甲者三萬,至是疾疫且盡,守埤者止二三千人,並悉羸懦。 朔,城內於太極殿前設壇,使兼太宰、尚書僕射王克等告天地神祇,以景違盟,舉烽鼓譟 中丞沈浚至景所。景無去意,自己浚因責之,景大怒,即決石闕前水,百道攻城,晝夜不 屍滿路,無人埋瘞,臭氣熏數里,爛汁滿溝洫。 主,陵穢宗廟,今日持此,何處容身。願且觀變。」景然之,乃表陳武帝十失。三年三月丙辰 等兵,又得東城之米,江巴王偉且說景曰:「王以人臣舉兵背叛,圍守宮闕,已盈十旬。逼辱妃 北。 永安侯確與其兄堅力戰不能却,乃還見文德殿言狀。 景旣知援軍號令不一,終無勤王之效,又聞城中死疾轉多,當有應之者。 丁卯,邵陵王世子堅帳內白曇朗、董勛華於城西北樓納賊。こ己五鼓,賊四 棚壘未立,爲景將宋子仙所敗,送首級於闕下。景又遣于子悅乞和,城內遣御史 於是羊鴉仁、柳仲禮、鄱陽世子嗣進軍於東 須臾,景乃先使王偉、儀同 面飛梯,衆悉 旣却湘 息。 陳 東 横

而姦佞懼誅,深見推

天威難犯。吾不可以再見之。」出見簡文于永福省,簡文坐與相見,亦無懼色。 謂其廂公王僧貴曰:「吾常據鞍對敵,矢刃交下,而意了無怖。今見蕭公,使人自慴,豈非 拒,連兵多日,罪合萬誅。」武帝曰:「景今何在。可召來。」景入朝,以甲士五百人自衞,帶劍 「圍臺城有幾人。」曰:「十萬。」「今有幾人。」曰:「率土之內,莫非已有。」帝俛首不言。景出 「卿何州人?而來至此。」又不對。其從者任約代對。又問:「初度江有幾人。」景曰:「千人。」 拜訖,帝神色不變,使引向三公榻坐,謂曰:「卿在戎日久,無乃爲勞。」景默然。又問

有赴援名也。 臺。」後人以爲詩讖,謂無蔕者,是無帝。不安臺者,臺城不安。輪無轍者,以邵陵名綸,空 初,簡文寒夕詩云:「雪花無有帶,冰鏡不安臺。」又詠月云:「飛輪了無轍,明鏡不安

都督中外諸軍、錄尚書事,其侍中、使持節、大丞相、王如故。 士送永福省,撤二宮侍衞。使王偉守武德殿,于子悅屯太極東堂,矯詔大赦,自爲大都督 旣 而景屯兵西州,使偽儀同陳慶以甲防太極殿,悉鹵掠乘輿服玩、後宮嬪妾,收王侯朝

位,於是諸軍並散。 里。 尚書外兵郎鮑正疾篤, 賊曳出焚之, 宛轉火中, 久而方絕。 先是,城中積屍不暇埋瘞,又有已死未斂,或將死未絕,景悉令聚而焚之,臭氣 降蕭正德爲侍中、大司馬,百官皆復其職。 景又矯詔征鎭牧守各復本 聞 十餘

冀收其力用焉。時東揚州刺史臨城公大連據州, 請 迎簡文卽位。 亦不敢逼。後每徵求,多不稱旨,至於御膳亦被裁抑。遂懷憂憤。五月,處疾餒,崩于文德 以文德主帥鄧仲爲城門校尉,帝曰:「不置此官。」簡文重入奏,帝怒曰:「誰令汝來」」景聞 景制命所行,唯吳郡以西、南陵以北而已。 景秘不發喪,權殯于昭陽殿,自外文武咸莫之知。二十餘日,然後升梓宮於太極前殿, 雖外迹不屈,而意猶忿憤,景欲以宋子仙爲司空,帝曰:「調和陰陽,豈在此物。」景又 及葬脩陵,使衞士以大釘於要地釘之,欲令後世絕滅。矯詔赦北人爲奴婢者, 吳興太守張嵊據郡,自南陵以上並各據

者十餘人。以柳仲禮爲使持節、大都督、隸大丞相、參戎事。[15] 六月,景乃殺蕭正德於永福省,封元羅爲西秦王,元景襲爲陳留王,曰對諸元子弟封王

十一月,百濟使至,見城邑丘墟,於端門外號泣,行路見者莫不灑泣。景聞大怒,收小

莊嚴寺,禁不聽出入。

即與溧陽主共據御牀南面並坐,羣臣文武列坐侍宴。 四人。三月甲申,日己景請簡文禊宴於樂游苑,帳飲三日。 下,並令馬射,箭中者賞以金錢。翌日向晨,簡文還宮。 大寶元年正月、景矯詔自加班劍四十人,給前後部羽葆、鼓吹,置左右長史、從事中郎 景拜伏苦請,簡文不從。及發,景 其逆黨咸以妻子自隨,皇太子以

列 傅 第 七 十 善 敗 臣

爲公講。」命景離席, 闌 慶、索超世 命景起舞,景卽下席 下何不樂。」上爲笑曰:「丞相言索超世聞此以爲何聲 至 西州 坐散,上抱景于牀 四 月辛卯,景又召簡文幸 景等逆拜。 等西向 坐。 曰:「我念丞 應弦而歌。 上冠下屋白紗帽,服白布 使其唱經。 溧陽主 西州 與其母范淑妃東向 相。」景 上顧命淑妃, 景問超世 簡文御素輦,侍 曰:「陛下如不 何經 裙 淑 最 襦 妃固辭乃止。 坐。 小, 衛四 で、場別 景服紫紬褶,上加 超世 上聞絲竹,悽然下泣。 念臣,臣 百餘 日.一臣 日:「唯觀世音小。」景卽唱「爾時 人。 何至 景 叉 且 景衆數千浴鐵 上禮, 不 此。」上索筌蹄, 知, 金帶,與 逐逼 豈獨超世。 」 景起 其 上起舞。 翼衞 謝 偽儀 曰:「我 簡 上 同 陳 乃 陛 酒 文

無盡意菩薩」。

上大笑,夜乃罷

待命 湖, 不許大酺, 頭立 其 手足, 死 冱 或弟兄相 澤。 聽終。 大春碓,有犯法者擣殺之。 時江南 刻析 其絕粒 有犯 大饑,江、揚 於是千里絕烟, 要俱緣山 心 腹, 則 **八者**,鳥面 刑 破 及 岳。 《外族。 出肝腸。 彌 甚、旱蝗相係、年穀不登、百姓流亡、死者塗地。父子攜 協形 芰實荇花,所在皆罄,草根木葉, 人跡罕見,白骨成聚如 其官人任兼閩外者位必行臺,入附凶徒者並稱開府, 瞻正 東陽 ,俯伏牀帷,不出 色整容,言笑自若,見其膽者乃如 人李瞻起兵,爲賊所執,送詣 戶牖者,莫不衣羅 丘 一隴焉。 而景 爲之凋 虐於用 建鄴。 綺, 殘。 升焉。 懷金玉 刑 雖假 景先 酷 命 叉禁 忍 出 交相 須 一之市 無道,於石 手共 臾, 人 其親寄 中,斷 偶 枕藉 亦終 入

隆重則號曰左右廂公,勇力兼人名為庫眞部督。

文大驚 謀之。 自 殿,依漢蕭 今兩無疑 七月, 王偉 曰:「將軍乃有宇宙之號乎。」 何故事。 景又矯詔自進位相 因搆扇,遂懷逆謀矣。 貳,臣固不負陛下,陛下 十月,景又矯詔自加宇宙 國, 封 亦不 初, 泰山等二十郡爲漢王。 得負臣。」及南康王會理之事,景稍猜懼,謂簡文欲 武帝旣崩,景立簡文,升重雲殿禮佛爲盟 大將軍、都督六合諸軍事,以 入朝 不趨, **贊拜** 詔 文呈 不 ·名, 一簡文。 曰:「臣乞 劍履 簡 上

索超世 徒,任約爲司空,于慶爲太師,紇奚斤爲太子太傅,時靈護爲太子太保,王偉爲尙書左僕射, 二年正月,景以王克爲太宰,宋子仙爲太保,元羅爲太傅, 爲右僕射。 於大航跨水築城,名曰捍 國 郭元建爲太尉, 張化仁為司

陵, 危,此上策 水軍之盛未有 ,連攻巴陵,銳氣盡於堅城,士卒 禽其將任約,景乃夜遁還都。 王僧辯沉 匹 月 景遺朱 也 船臥 也。 身頓長沙 子仙 鼓, 元帝聞之,謂御 襲陷郢州刺史方諸。 若將已遁。 行,徇 地零、桂、運糧以至洞庭、湘、郢非吾有、三三此中策 左右有泣者,景命斬之。 .史中丞宗懔曰:[:10]「賊若分守巴陵, 飢於半菽, 景遂 圍城。 景乘勝西上,號二十萬, 此下 元帝遣平 策 也。 北將軍胡僧 吾安枕 王僧辯乃東下,自是衆軍所至皆 而臥, 聯旗千里,江左 祐 鼓行 與居 無所 西上, 多 士 漫。」 陸 也。 法 荆、郢殆 及 擁 和 以來, 次巴 衆 大

列 傳 第 七 十 善 賊 臣

捷。 先 是 景毎 出師, 戒諸將曰:「若破城邑, 淨殺却, 使天下知吾威名。」故諸將以殺 人爲

戲笑,百姓雖死不從之。

明, 不 固 24 王 范 偉 與 執 方 华。 何得廢 相 不 云 須 是月,景 見。 可, 定,故未自立。 有 自古移鼎必 口 之。」景曰:「王偉勸吾。」元建固 乃禪位于棟。 景司 乃廢簡 自 空劉神茂、儀 永福省吹 文, 須廢立。」故景從之。 旣而 幽於永福省,迎豫章王棟卽皇帝位,升太極前殿,大赦,改元爲天 景以哀 其 巴陵 文物皆倒 同 尹思 太子 失律,江、郢喪師,猛 妃賜 合 折 劉歸義 ,見者莫 郭元 陳 其太尉 不 建 可 、王曄 元建 景意 不驚駭。 郭元 將外殲,雄 八桑乾 建 逐 日「豈有皇太子 聞 回,欲復帝位, 初 王元 之, 景旣平建鄴 心內沮,便 和等據 自秦郡 妃 以 東 馳 陽 棟 還 欲 便 而 速管 降 諫 歸 爲 有篡奪志, 順 太 爲 人妾。」 孫。 三主上 大 號。 王偉 E

王克 于 加 偃 Ŧi. 景 時 爲 文 册 奉 大 副 十 物 將 書 璽 車 並 月 紱 軍 上 失 于己。 ·, 父 一,赤足 , |景 旄 舊 矯蕭 爲 頭 儀 雲罕,樂儛 丹觜,都 大 先夕 棟 丞 旣 認り 相, 唱警蹕, 、景宿大莊 自 下 自 八佾 左 加 加 九 右 冕 識者以爲名景而言警蹕,非久祥 錫 所 十 嚴 鍾 有 無。 漢 寺, 虡 、宮懸之樂, 國 旒,建 卽 賊 置丞相 南 徒悉駭 郊, 天子 以下 柴燎于 旌旗 競 如 ·百官, 射 舊 主, 之, 儀 出警入蹕, 。尋又矯 陳備 不能 升壇 也。 物 受 中。 於 禪, 蕭 乘 景 庭。 景 棟 金 聞惡之,改爲備蹕 大 叉 詔 蒰 忽有 風 禪 矯棟詔 車, 拔 位 鳥 木, 使使 駕 似 六馬。 偽 追 旂 Щ 一崇其 鵲 太 蓋 宰 備 翔

直寢。 牀, 在。 脚坐焉。 人 又曰 牀脚 自: 幽之。 又白虹貫 ,備於此便畢矣。 景所帶劍 陷。 改梁律爲漢律, 日三重, 大赦, 水精 改元爲太始元年。 摽無故墮落, 日靑無色。 有司乃奏改云永蹕。 改左戶尚書爲殿中尚書, 還將登太極殿, 手自拾取,甚惡之。 方饗羣臣, 乃以廣柳車載鼓吹, 醜徒數萬 中會而 五兵尚書為七兵尚書, 將登壇, 起, 同共 觸
展
墜
: 吹唇唱吼而 有冤 橐駝負犧牲, 地。 自前 封蕭棟 而 上。 直殿主帥 走, 辇 俄 爲 及 上置 淮 升 失 陰 御 所 垂

望) 人。 略、盧暉略、于和、史安和爲爪牙:曰:斯皆尤毒於百姓者。 此四人盡 仁、任約爲佐命元功,並加三公之位,王偉、索超世爲謀主,于子悅、彭儁主 非腹心任也。 梁人而爲景用者,則故將軍趙伯超、前制局監幄石珍、內監嚴亶、邵陵王記室 景三公之官,動置十數,儀同尤多。 一心竭力者。 景祖名乙羽周,及篡以周爲廟諱,故改周弘正 若太宰王克、太傅元羅、侍中殷不害、太常姬弘正等雖官尊, 或匹馬孤行,自執羈紲。 其餘王伯醜、任延和等復有數十 、石珍姓姬焉 以宋子仙、郭元建、張化 擊斷,陳慶、呂 伏知命, 止從 季

咸笑之。 敕太常具 王偉 、祭祀 景黨有知景祖名乙羽周者,自外悉是王偉制其名位。 請立七廟,景曰:「何謂七廟。」偉曰:「天子祭七世祖考,故置七廟。」 之禮。 景曰:「前世吾不復憶,唯阿爺 名標,且在 朔州, 以漢司徒侯霸爲始祖,晉徵 伊那得來噉是。」 幷請七 世諱, 衆聞

士侯瑾爲七世祖。 於是推尊其祖周爲大丞相,父摽爲元皇帝。

呼東西南北皆謂爲廂、景曰:「此東廂香爐那忽下地。」議者以爲湘東軍下之徵。 僵柳起於上林,乃表漢宣之興,今廟樹重青,必彰陝西之瑞。又景牀東邊香爐無故墮地,景 株,再宿悉枿生,便長數尺。時旣冬月,翠茂若春。賊乃大驚惡之,使悉斫殺。識者以爲昔 樹獨鬱茂。及景篡,修南郊路,偽都官尚書呂季略說景令伐此樹以立三橋。始斫南面十餘 袍,著芒屩,荆州天子挺應著。」時都下王侯庶姓五等廟樹,成見殘毀,唯文宣太后廟四周相 于時景修飾臺城及朱雀、宣陽等門,童謠曰:「的脰烏,拂朱雀,還與吳。」又曰:「脫青

十二月、謝答仁、李慶等軍至建德,攻元顒、李占栅,大破之。執顒、占送京口,截其手

足徇之,經日乃死。

景二年,謝答仁攻東陽,劉神茂降,以送建康,景爲大剉碓,先進其脚,寸寸斬之,至頭

方止。使衆觀之以示威。

大破之。景聞之大懼涕下,覆面引衾臥,良久方起,歎曰:「咄叱!咄叱!誤殺乃公。」 王僧辯軍至蕪湖,城主宵遁。侯子鑒率步騎萬餘人度州,幷引水軍俱進。僧辯逆擊,

食、言笑談論、善惡必同。及篡、恒坐內不出、舊將稀見面、咸有怨心。至是登烽火樓望西 初,景之爲丞相,居于西州,將率謀臣,朝必集行列門外,謂之牙門。以次引進,賚以酒

師 遣 看 掘 人 王僧辯 以爲 父墓, 十人,大懼。 剖棺 焚其屍。 僧辯及諸將遂於石頭城西步上,連營立棚,至于落星墩。 王僧辯等進營於 石頭城北,景列陣挑戰,僧辯 大 破 之。 景大

中 儀 見。 王 天子 二子 王 一克開 輦 書、尚書省得免 輅莫 今日 挂 種 景 今宮 臺 馬 旣 之 城 鞍, 有孑遺。 退敗,不敢入宮, 斂其散兵屯于闕下, [中衞士尙足一戰] 寧可 門引裴之橫 事 來 與 南直度大江, ,恐是天亡。 工其儀 王僧辯 同 田遷、范希榮等百餘騎東奔。 入宮,縱兵蹂掠。 命武州刺史杜崱救火,僅 乃好守城,當復 取臺 城 便走。」景曰:「我在北 如 反掌, 是夜遺燼燒太極殿 一決。」仰觀石闕,逡巡歎息久之。 打邵陵王於 逐將 而 王偉遂委臺城竄逸。侯子 逃。 得滅。 北 打賀拔勝,敗葛榮,揚 王偉按劍攬轡諫曰:「自古豈有 山, 故武德、五明、重雲殿 及東西堂、延閣、秘署皆 破 柳仲禮 於 、南岸, 鑒等奔 名河朔,與 乃以皮囊盛 皆乃 及門下、 盡 质 所 羽 陵 親 高 叛

岸 謂 於宣 爲 極 陽 目 僧辯 有 初 門,作 變,登 無 景之圍臺城,援軍三十萬,兵士望青袍則氣消膽奪。 煙。 迎簡文梓宮升於朝堂,三軍縞素,踊於哀次。 一城問 神主於太廟,收圖 老小 故, 相 扶競 亦不 禁也。 出,纔度淮,王琳 書 僉以王 八萬卷歸 師 江陵。 杜龕 之酷,甚於 軍人掠之,甚于 杜崱守臺 、侯景、 命侯瑱、裴之横追賊於東,焚偽 君子 城, 及赤亭之役,胡僧祐以羸 都 寇賊, 以是知僧辯 下戶 號 口 叫聞 百 遺 之不 于石頭 一二,大航 終 僧 卒 神 南 主

列傳第七十 賊臣

制 千破任約精甲二萬,轉戰而東,前無橫陣。旣而侯瑱追及,景衆未陣,皆舉幡乞降,景不能 乃與腹心人數十單舸走, 推墮二子於水,自滬瀆入海至胡豆洲。前太子舍人羊鯤殺

之,送于王僧辯

子於鑊,其子之在北者殲焉。 「此謂豺狼之聲,故能食人,亦當爲人所食。」旣南奔,魏相高澄悉命先剝景妻子面皮,以大 鐵鑊盛油煎殺之。女以入宮爲婢,男三歲者並下蠶室。後齊文宣夢獼猴坐御牀,乃並煮景 景長不滿七尺,長上短下,眉目疎秀,廣顙高顴,色赤少鬢,低眡屢顧,聲散,識者曰:

鳥嗚呼、景惡之,每使人窮山野捕鳥。景所乘白馬,每戰將勝,輒躑躅嘶鳴,意氣駿逸,其有 若有物扣其心。自是凡武帝所常居處,並不敢處。多在昭陽殿廊下。所居殿屋,常有鵂鶹 奔衂,必低頭不前。 遶,然後見客。每登<u>武帝</u>所常幸殿,若有芒刺在身,恒聞叱咄者。又處宴居殿,一夜驚起, 是鬱怏,更成失志,曰:「吾無事爲帝,與受擯不殊。」及聞義師轉近,猜忌彌深,牀前蘭錡自 牀及筌蹄,著靴垂脚坐。或跂戶限,或走馬遨游,彈射鵐鳥。自爲天子,王偉不許輕出,於 足、割舌劓鼻、經日乃殺之。自篡立後、時著白紗帽、而尚披青袍、頭插象牙梳、牀上常設問 景性猜忍,好殺戮,恒以手刃爲戲。方食,斬人於前,言笑自若,口不輟飡。或先斷手 及石頭之役、精神沮喪、臥不肯動。景使左右拜請,或加箠策,終不肯

肉中。三三

進。 始景左足上有肉瘤,狀似龜,戰應剋捷,瘤則隱起分明,如不勝, 瘤則低。至景敗日,瘤

足滿十旬,其言竟驗。又大同中,太醫令朱耽嘗直禁省,無何夢犬羊各一在御坐,覺而告人 得爲帝,但不久耳。破『侯景』字成『小人百日天子』,爲帝當得百日。」案景以辛未年十一月 景常謂人曰:「侯字人邊作主,下作人,此明是人主也。」臺城旣陷,武帝嘗語人曰:「侯景必 曰:「大羊非佳物也,今據御座,將有變乎。」旣而天子蒙塵,景登正殿焉。 十九日篡位, 壬申年三月十九日敗, 得一百二十日。 而景以三月一日便往姑孰,計在宮殿 **遂覆陷都邑,毒害皇家。起自懸瓠,卽昔之汝南。巴陵有地名三湘,景奔敗處。其言皆驗。** 陰死三湘。」又曰:「山家小兒果攘臂,太極殿前作虎視。」狗子,景小字,山家小兒,猴狀。景 天監中,沙門釋寶誌曰:「掘尾狗子自發狂,當死未死嚙人傷,須臾之間自滅亡,起自汝

取 共射,時僧通在坐,奪景弓射景陽山,大呼云「得奴已」。景後又宴集其黨,又召僧通。 鄉里,人莫能知。初言隱伏,久乃方驗。人並呼爲闍梨。景甚信敬之。景嘗於後堂與其徒 二手送齊文宣,傳首江陵,果以鹽五斗置腹中,送于建康,暴之于市。百姓爭取屠膾羹食皆 肉 . 搵鹽以進景,問曰:「好不。」景答:「所恨大鹹。」僧通曰:「不鹹則爛。」及景死,僧辯截其 及景將敗,有僧通道人者,意性若狂,飲酒噉肉,不異凡等。世間游行已數十載, 僧通 姓名

列傳第七十 賊臣

降,侯子鑒曰:「此小惠也,不足自全。」乃奔齊。 焉。白雪景儀同謝答仁、行臺趙伯超降于侯瑱,生禽賊行臺田遷、儀同房世貴、蔡壽樂、領軍 景。」及景首至,元帝付諮議參軍李長宅,宅東即苦竹町也。 王伯醜。 於市三日,然後煮而漆之,以付武庫。先是江陵謠言:「苦竹町,市南有好井。 ,幷溧陽主亦預食例。景焚骨揚灰,曾罹其禍者,乃以灰和酒飮之。首至江陵,元帝命梟 凶黨悉平,斬房世貴於建康市,餘黨送江陵。 初,郭元建以有禮於皇太子妃,將 旣加鼎鑊, 卽用市南井水 荆州軍,殺侯

皆偉創謀也 行臺郎。 稱偉之文。 王偉,其先略陽人。父略,仕魏爲許昌令,因居潁川。偉學通周易,雅高辭采,仕魏爲 景叛後,高澄以書招之,偉爲景報澄書,其文甚美。澄覽書曰:「誰所作也。」左右 澄曰:「才如此,何由不早使知邪。」偉旣協景謀謨,其文檄並偉所製,及行篡逆,

勢。」僧辯大笑,意甚 而 執者促之,偉曰:「各爲人臣,何事相敬。」僧辯謂曰:「卿爲賊相,不能死節,而求活草間,顚 不扶,安用彼相。」 景敗,與侯子鑒俱走相失,潛匿草中,直瀆戍主黃公喜禽送之。見王僧辯,長揖不拜。 異之,命出以徇。偉曰:「昨及朝行八十里,願借一驢代步。」僧辯曰:「汝 偉曰:「廢興時也,工拙在人。向使侯氏早從偉言,明公豈有今日之

「前日 爲赤 略 之,至骨方刑之。 獻書,何惜 遇 頭 之而 周 《方行萬里,何八十里哉。」偉笑曰:「今日之事,乃吾心也。」前尙書左丞虞騭嘗見辱於偉, ,縣所歸。」[lē]帝大怒,使以釘釘其舌於柱,剜其腸。[lē]顏色自若。 石珍、嚴亶俱送江陵,偉尙望見全,於獄爲詩贈元帝下要人曰:「趙壹能爲賦,鄒陽 唾其 西江水,不救轍中魚。」又上五百字詩於帝,帝愛其才將拾之,朝士多忌,乃請曰 、面,曰:「死虜,庸復能爲惡乎!」偉曰:「君不讀書,不足與語。」 鷹慚 石珍及亶並夷三族。 仇家臠其肉,俛而視 而 退。及呂季 一目,寧 解

rf1 世, 福, 恩在明公。」僧辯又顧謝答仁曰:「聞卿是侯景梟將,恨不與卿交兵。」答仁曰:「公英武蓋 答仁安能 彭儁亦生獲,破腹抽出其肝藏,儁猶不死,然後斬之。 趙伯超,趙革子也。 仰敵。」僧辯大笑。 初至建鄴,王僧辯謂曰:「卿荷國重恩,遂復同逆。」對曰:「當今禍 答仁以不失禮於簡文見宥, 伯超及伏知命俱餓死江陵 獄

稍 聚少年,據豐城縣爲棚,桀黠劫盜多附之。 熊曇朗 豫章南昌人也,世爲郡著姓。 曇朗跅弛不羈,有膂力,容貌甚偉。 梁元帝以爲巴山太守。 魏剋荆州,曇朗兵力 侯景之亂,

稍强,劫掠隣縣,縛賣居人,山谷之中,最爲巨患。

及侯瑱鎭豫章,曇朗外示服從,陰欲圖瑱。 侯方兒之反璌也、曇朗爲之謀主。 **璵敗**,曇

朗獲與馬仗子女甚多。

其馬仗而歸。 **頠送甲二百領助之。** 曰:「事捷與我馬仗。」乃出軍與隨掎角而進。 及蕭勃踰嶺, 歐陽頗為前軍。 及至城下,將戰,曇朗僞北,法甦乘之,頗失援,狼狽退衂。[17] 曇朗取 曇朗紿頠共往巴山襲黃法軞。 又給頗曰:「余孝頃欲相掩襲,須分留奇兵。」 又報法與期共破頗, 且

時巴山陳定亦擁兵立砦,曇朗僞以女妻定子,又謂定曰:「周迪、余孝頃並不願此昏,必

須 以强兵來迎。」定信之。及至,曇朗執之,收其馬仗,並論價責贖。 陳初以南川豪帥、歷宜新、豫章二郡太守。抗拒王琳有功,封永化縣侯,位平西將軍、

王琳。 開府儀同三司。及周文育攻余孝勱於豫章,曇朗出軍會之,文育失利,曇朗乃害文育以應 琳東下,文帝徵南川兵,江州刺史周迪、高州刺史黃法輕欲沿流應赴,曇朗乃據城列

艦遏迪等。及王琳敗走,迪攻陷其城。 曇朗走入村中。 村人斬之,傳首建鄴,懸于朱雀航,

宗族無少長皆棄市。

縣俟。 皆 周 那 續 中 起兵於臨川、梁始 周 紹泰 豪 迪,臨川南城人也。 族, 二年,為衡州刺 稍驕横, 續頗禁之, 興王蕭毅以郡 史,領臨川內史。周文育之討蕭勃 少居山谷, 渠帥 讓續,迪占募鄉人從之,每戰勇冠諸軍。 等乃殺續推迪爲主。 有膂力,能挽强弩,以弋獵爲事。 梁元帝授迪高州 也, 迪按甲保境, 侯景之亂, 刺 以觀 續 史, 所部渠帥, 成敗 封臨 迪宗人 汝

乃造 建 其 鄴。 爲 其將李孝欽、樊猛等南徵糧 變, 陳 武 以 因 功 帝 加加 厚撫之。 受禪,王琳東下,迪欲自據南川 平南將軍、開府儀同三司 琳至盆 城, 餉。 新吳洞主余孝頃舉 孝欽 等與余孝頃逼迪,迪大敗之,禽孝欽、猛、孝頃送 ,乃總召所部 兵應琳。 八郡守宰結盟, 琳以為南川諸郡 聲言 入赴, 可傳 檄而定, 朝廷恐

其弟 帝 口 錄其 ,又徵其子入朝 方 文帝 、破熊曇朗功、並加官賞。 興 嗣 襲周 位,熊曇朗反,迪與周敷、黃法輕等圍曇朗,屠之。 敷敷 迪越趄 與戰,破之。 顧望 並 迪聞之不平,乃陰 不至。 又別使兵襲華皎於盆城, 豫章太守周敷本屬迪, 與留異 相結。 事覺、盡爲 王琳敗後,文帝徵迪出鎭盆 至是與法 及王 () () () 師討異 **ᄣ率其部詣闕,文** 迪疑懼,乃使

迪, 不能剋。 天 嘉 三年, 文帝乃遣宣帝總督討之, 文帝 乃使江州 刺史吳明徹都督衆軍, 迪衆潰,脫身踰嶺之晉安,依陳寶應。 與高 州刺史黃法 | | | | 豫章 太守周敷討 寶應以兵資

列傳第七十 賊臣

山 迪 留 異又遺第二子忠臣隨之。 明年秋, 復越東興嶺。 文帝遺都督章昭達征迪, 迪 又散于

徴 有女伎,挼繩破篾,傍若無 斂必至。 初, 侯景之亂,百姓皆棄本爲盜,唯迪所部獨不侵擾,耕作肆業, 性質朴,不事威儀。 人。 然輕財 冬則短身布袍,夏則紫紗袜腹。 好施, 凡所周 、贍,毫釐 必均。 居常徒跣 訥於語言,而 ,各有贏儲, 政令嚴明, 雖外 衿懷 列 兵 信實, 、衞,內

獵,伏兵斬之。 人竄 山穴中。 昭 達 仍 度嶺 後遣 傳首建鄴,梟于朱雀航 與陳寶 人潛出 應 相抗。 臨川郡市 迪復收· 魚 三日 鮭 合出 臨]][東 太守 興, 駱文牙執之,三二 文帝遣都督程靈洗破之。 令取迪自 効 迪又與十餘 誘 迪出

|臨||川

人皆德之。

至是並

藏匿

一,雖

加誅戮,無肯言者。

留 異 東陽 長山 人也,世爲郡著姓。 異善自居 處, 言語醞籍,爲鄉 里 雄 聚 惡

陵侮貧賤,守宰皆患之。仕梁,晉安、安固二縣令。

隨巡 出 侯景 都。 之亂, 及 城 還鄉里, 陷,異 隨梁臨城公大連,大連委以軍 占募 士卒。 太守沈巡援臺,讓郡於異,異使兄子 事。 異性殘暴, 無遠 超監 略, 私樹 知 郡 威 事 福 了,率兵 衆

並 思之。 會景 將宋子仙 濟浙江,異奔還鄉里,尋以衆降子仙。 子仙 以爲鄉導,令執 大連。邵

其妻子 陵 王 綸 爲質。 聞 之日 ::「姓作去留之留, 行臺劉 神茂建義拒景, 名作同異之異,理當同於逆虜。」侯景署異爲 異外同神茂,而密契於景。 及神茂敗, 被景誅, 東陽 太守,收 異 獨

獲死。

州 太守。 刺史,領東陽太守,封永嘉縣侯。「云又以文帝長女豐安公主配異第三子貞臣 景平後,王僧辯使異慰勞東陽,仍保據巖阻,州郡憚焉。 陳文帝平定會稽,異雖有糧 饋, 而擁擅 郡,威福在己。 魏克荆州,王僧辯以異爲 紹泰二年,以應接功,除縉 東陽

敗,文帝遣左衞將軍沈恪代異爲郡,實以兵襲之。 異頻遣其長史王凘爲使入朝。 湘、郢,且羇縻之。 陳永定三年,徵異爲南徐州刺史,遷延不就。 異知終見討,乃使兵戍下淮及建德,以備江路 脚每言朝廷虚弱,異信之,恒懷兩端,與

王琳潛通信使。及琳 異與恪 文帝即位,改授縉州刺史,領東陽太守。 戰,敗,乃表啓遜謝。 時朝廷方事

應 平 · ,幷禽異送都,斬建康市,子姪並伏誅,唯第三子貞臣以尙主獲免 州 平,文帝乃下詔揚其罪惡,使司空侯安都討之。 異與第二子忠臣奔陳寶應。 及實

0

自己出。 |梁時||晉安數反,累殺郡將,|羽初並 陳寶 應,晉安候官人也,世爲閩中四姓。父栩,有材幹,爲郡雄豪。 侯景之亂,晉安太守賓化侯蕭雲以郡讓羽,羽年老,但主郡事,令寶應典兵。 扇惑成其事,後復爲官軍鄕導破之,由是一郡兵權 寶應性反覆,多變 時東 皆

夫,仍命宗正錄其本系,編爲宗室。 紹泰二年,封候官縣侯。[10]武帝受禪,授閩州刺史,領會稽太守。 侯景平,元帝因以羽爲晉安太守。 陳武帝輔政、羽請歸老、求傳郡於寶應、武帝許之。 文帝卽位,加其父光祿大

境饑饉,

會稽尤甚,死者十七八,而晉安獨豐沃,士衆强盛。

章 昭 達破迪,文帝因命討寶應,詔宗正絕其屬籍。 與戰。 寶應娶留異女爲妻,侯安都之討異,寶應遣師助之,又資周迪兵糧,出寇臨川。及都督 但命爲簰,俄而水盛,乘流放之,突其水栅,寶應衆潰。 寶應據建安湖際逆拒昭達,昭達深溝高 執送都,斬建康市

側 以 耄期之年,溺 ,貨賄潛通 論 日 ···侯景起于邊服,備嘗艱險,自北而南,多行狡算。于時<

江表之地,不見干戈。 ,景乃因 情釋教,外弛藩籬之固,內絕防閑之心,不備不虞,難 機騁詐,肆行矯慝。 王偉爲其謀主,飾以文辭,武 以 帝溺於 爲 國。 知音,惑茲邪 加 以姦 梁武 回 在

熊曇 村屯場 說。 朗 遂 使 活周 壁之豪,郡邑巖穴之長,恣陵 乘 迪、 柎 留異、陳寶應等, 直 濟 ,長江喪其天險, 雖逢興運,未改迷塗,志在 揚旌指闕, 修梅而 爲暴, 金墉亡其地利。 資剽掠以 亂 爲 常) 雄。 自致夷戮,亦其 生靈塗炭,宗社 陳武 應期 撫 運 宜矣。 丘墟。 戡定安輯 於是

校勘記

初 學兵法於榮部將慕容紹宗 「紹宗」各本作「超宗」, 據 通志 改。 按史不聞有慕容超宗, 而|慕

容紹宗 則 先 爲 介朱榮部將 當 卽 其 人。

董 督 河 南 南 北 諸 軍 事 董」字、「河 南一下 「南」字各本並脫,據梁書補。

= 因 是踣馬 功 馳謂 景 日 王懋竑 讀書記疑云 踣字 ·可疑。 」 按 踣 或是蹋 之譌。 {劉 穆之傳孫瑀附

傳 瑀蹋馬及之」,弱即 踏之本字,謂 蹴 蹋

/" 四 中 領軍 朱异議以 御 府錦署 止 充 頒 賞 「頒」各本作「領」,據梁書 『、通志 改。

1 35. 留 僞 中 軍 大 都 督 王 貴 顯守 壽春 城 王 貴 顯」梁書作「王 顯貴」, 通鑑 同; 此 同 陳書任忠傳。

ヾ 蕭 正 德 先 遭 大 船 數 + 艘 僞 稱 載 荻 「稱」字各本 並 脱 據 梁書 『通志補。

اسر -L-羊 侃 数 門 扇 刺 殺 數 人 數 字 各 本 並 脫,據梁書補

л Ш 城 上 擲 以 石 並 一皆碎 破 城」字 各 本 並脫,據梁書補。

- , ≯i ∪ 「新塗」,有「新淦」,涉形近而訛。梁書侯景傳、邵陵王編傳作「三萬」,今並改正。 邵陵王綸率西豐公大春新淦公大成永安侯確南安鄉侯駿前譙州刺史趙伯超武州 刺 史 蕭 弄 璋 步兵校尉尹思合等馬步三萬發自京口 「新淦公」、「三萬」各本作「新塗公」、「二萬」。按地志無
- 衆軍因亂「因」各本作「前」,據梁書改。
- 「車」字各本並脫,據梁書補

以火車焚城東南隅大樓

- 陳文徹李孝欽屯丹陽郡 「孝」字各本並脫、據梁書補。
- 營于湘子岸前 「湘子」各本作「洲子」或「州子」、據梁書、册府元龜二八五改。
- (18) 又得東城之米 當爲「東城」之倒,今乙正。 「東城」各本作「城東」或「城中」。按上云「景邃運東城米于石頭」,則此「城東」
- 景又遣于子悅乞和城內遣御史中丞沈浚至景所景無去意 「和」字、「無」上「景」字各本並脫 據通志補。 按梁書云「景又遣于子悦至,更請和」云云,又沈波傳「侯景表請求和」,明此誤奪
- 「白雲朗」,據梁書邵陵王編傳删改。 邵陵王世子堅帳內白曇朗董勛華於城西北樓納賊 「世子堅」、「白曇朗」各本作「世子子堅」、
- 元景襲為陳留王 列 傳 七 -校 「元景襲」梁書作「元景龍」。 勘 配

- 以柳仲禮爲使持節大都督隸大丞相參戎事 「柳仲禮」梁書作「柳敬禮」。 按柳敬禮傳「留敬禮
- 爲質,以爲護軍將軍。」梁書侯景傳:「景以柳敬禮爲護軍將軍。」則作敬禮是。
- [12] 三月甲申 按大寶元年三月庚戌朔,是月無甲申。
- 元帝聞之謂御史中丞宗懔曰 「宗懔」各本作「宗懷」。 按時有「宗懔」,不聞有「宗懷」其人,今
- 身頓長沙徇地零桂運糧以至洞庭湘郢非吾有 「湘郢」二字各本並脫,據通志補

改正。

陳慶呂季略盧暉略于和史安和爲爪牙 張森楷南史校勘記:「時無于和而有于慶, 疑『和』當是

『慶』誤。」

如不勝瘤則低至景敗日瘤隱陷肉中 「至景敗日」各本作「至日」、據册府元龜九五

補。

- [18] 卽用市南井水焉 「井」字各本並脫,據通志補。
- 項羽重瞳尚 .有烏江之敗湘東一目寧爲赤縣所歸 「赤縣」各本作「四海」,據太平御覽五九七引

梁書改。

- 使以釘釘其舌於柱剜其腸 「剜其腸」太平御覽五九七引梁書作「抽其腸」。
- 曇朗: 偽 北法與乘之頠失援狼狽退衂 「之」字各本並脫,據陳書補
- 臨川太守駱文牙執之 「駱文牙」陳書作「駱牙」,有傳、本書有駱文牙傳。

〔元〕封永嘉縣侯 「永嘉」陳書作「永興」。

CMOD 紹泰二年封候官縣侯 「二年」各本作「三年」,據陳書改。按紹泰無三年。

